

امير عليشير نوایی حياتی و آثارى

بويوك عالم و متفكر شاعر امير عليشير نوایی ميلادي ۱۴۴۱ - يىلى، فبرورى آيى نىنگ ۹ - سىده امير تېمورنىنگ كېنجه اۋغلى شاهرخ ميرزا سلطنتى دورىده هرات شھرىده دىياگه كېلدى. آتەسى غياث الدين كيچكىنه و اونىنگ ايرىم قرىنداشلىرى تېمورىلر دربارىگه جوده يقين شىخصلردن بۇلگن. عليشير نىنگ بى-بى لرى تېمورى شھزاده لرنىنگ اپنەگەلرى بۇلگن. آتەسى تاماندن عليشير بېك نىنگ باباسى سلطان حسين نىنگ باباسى بايقرا نىنگ اميرلريدن اېدى. بو حالت عليشير بېك نىنگ تېمورى شھزاده لر، جملەدن شھزاده حسين بىلن بىرگە تربىلەنىشىگە سبب بۇلگن. عليشير تۇرت - بېش ياشلىرىده شھزاده حسين بىلن بىرگە اۋقىي باشلەيدى. لېكن بو مکتبداشلىك اوزاققە بارمىدى. چونگە بو دورگە كېلىپ تېمورى شھزاده لر اۋرتەسىده تاج و تخت تلەشيش رقابتى اۋز اوجىگە چىقەدى. اينىقسە، ۱۴۴۷ - يىلده شاهرخ ميرزا نىنگ اۋلىمىدن كېين باشلنگن اوروش و كورەشلىر خراسان و اونىنگ مركزى بۇلگن هراتنى هرج و مرج و قىرغىنلر اۋچاغىگە ايلنتىرەدى. مردم روزگارنىنگ بو فتنەسىگە برداش بېرە آلماي، جان سقلش مقصدىده، اوى - جايلىرىنى تشلب، باشلىرى آققن تامانگە كېتىشىگە مجبور بۇلەدىلر. شونده بو آوارهلر ايچىده عليشير نىنگ آتەسى غياث الدين كيچكىنه نىنگ عايلەسى هم بار بۇلىپ، اولر نىنگ كاروانى عراق تامان يۇل آلەدى.

۱۴۵۲ - يىلگە كېلىپ، خراسانده بۇلەياتگن تېمورى شھزاده لر اۋرتەسىده گى تخت تلەشيشلىر بىر مونچە وقتگچە تۇختەيدى و اۋز ارا كورشلىر نتيجه سىده خراسان نختىگە ابوالقاسم بابر اېگە بۇلەدى. هرات هم بو وقتده اگرچە مركز بۇلمەسە - دە، اۋزى نىنگ اولگى موقعىنى تىكلەپ، هر تامانگە قاقچىپ كېتگن خلق ينە هراتگە قىتیب كېلە باشلەيدى. غياث الدين كيچكىنه نىنگ عايلەسى هم بېش يىللىك آوارهلىكدن سۇنگ اۋز وطنىگە قىتیب كېلەدى.

غياث الدين كيچكىنه هراتگە قىتگچ، ابوالقاسم بابر دربارىگە خدمتگە كىرەدى. بىر مونچە وقتدن كېين او سبزوار حاكىمى قىلىپ تعيينلەندى. اما عليشير هراتده قالىپ اۋقىشنى دوام اېتتىردى. عليشير قلىبىده ياشلىكدن ادبىياتگە نسبتاً هوس اويغانىشده اونىنگ عايلەسىده گى ادبىي محيط نىنگ تاثيرى كتە بۇلگن. تاغلەلرى مير سعيد كابلې و محمد على غرىبى يېتوك شاعرلر اېدىلر، عليشير نىنگ اويىده تېز - تېز يىغىلىپ مشاعرە و ادبىي بحثلر اويوشتىر اېدىلر.

عليشېر ۱۰-۱۲ ياشلاريدە- ياق ايلک شعرلری بيلن معلوم بۇلىپ، كتە شاعر و عالملىرىنىڭ دقتىنى
اۋزىگە جلب قىلگن اېدى. اۋزى نىڭ «مجالس النفايس» يە ايتىشىچە، ۱۰-۱۲ ياشلاريدە مشهور كېكسە
شاعر مير شايى بيلن مكاتبە قىلىپ تورگن. خواندمير نىڭ خبر بېرىشىچە، ياش عليشېر نىڭ
استعداديدىن ممنون بۇلگن لطفى، اونىڭ:

عارضين ياپقاچ كۈزومدىن ساچيلور هر لحظه ياش،

بۇيله كيم، پيدا بۇلور يولدور، نهان بۇلغاچ قوياش

مطلعلى غزلىنى تىنگلب، «اگر مىسر بۇلسە اېدى، اۋزىم نىڭ اۋن-اۋن اېڭى مىڭ فارسى و توركى
بىتىمنى شو غزلىگە المشتيرديم...» دېگن.

عليشېر تخمينا ۱۲ ياشلاريدە اېكن، آتەسى غياثالدين كىچكىنە دنيادىن كۈز يۈمەدى. آتەدىن بېتىم
قالگن عليشېر، ابوالقاسم بابر ۱۴۵۴-يىلدە اۋز پايختىنى هراتدىن مشهدهگە كۈچىرەياتگندە او بيلن
مشهدهگە بارەدى. آرەدىن بير يىل اۋتر-اۋتمس، ابوالقاسم بابر وفات اېتەدى. بابر وفاتيدىن سۇڭ خراسان
ينە تاج و تخت تەشيش نتيجهسىدە قىرغىن و اوروشلر ميدانىگە ايلنەدى. عليشېر اېسە بوندى شرايطدە
وطنىگە قيتيشنى مناسب كۈرمى، اۋزى نىڭ مشهدهگى مشقتلى حياتىگە ادامه بېرەدى.

نوايى اوچون مشهده بېگانە شەر اېدى. اونىڭ بو يېردە نە دۈستى بار اېدى، نە-دە دستگىرى، نە
تورر جايى، نە-دە بير لقمة ناننى. بيراق او برچە بو قىينچىلىكلرگە چيدەب، علم و كمال تحصيلىگە بېل
باغلىيىدى. هر حالده عليشېر نوايى اوچون مشهده حياتى بويوك بير مکتب اېدى. چونكى اونىڭ دني
قرەشى و شعري استعدادى منە شو دورده شكللنەدى و يېتوكلىككە اېرىشەدى. عليشېر نوايى مشهده
مشهور شاعر و فاضللردىن بۇلگن سيد حسن اردشېر و كمال تربىي بيلن دۈستلشەدى.

عليشېر نوايى سگىز يىل غربتدىن كېين، آتەدىن قالگن مىراثلىرىنى قۇلگە كىرىتىش مقصىدە آنە
شهرى هراتگە قىتىپ كېلەدى. لېكن خراسان پادشاهى ابوسعيد ميرزا نوايى نىڭ قىتىشىنى ياقىتىرمى،
اونىڭ التفات كۈرستمىدى. نوايى ايگى يىلگە يقين مدتتى تنگدستلىك و بېچارەلىك بيلن هراتدە اۋتكزە
دى. اما ظهيرالدين محمد بابر نىڭ تعبىرى بيلن ايتگندە سلطان ابو سعيد ميرزا عليشېر نوايىنى هرات
دىن «اخراج قىلەدى». نوايى اۋز وطنىنى ترك اېتىپ، سمرقند نىڭ اوزاق يۇلىگە آتلەنىدى. او بو وضعيتنى
استادى ھمدە معنوي آتەسى بۇلگن سيد حسن اردشېرگە يازگن شعري مکتوبىدە بوندى تصويرلەيدى :
چو سېن سېن بوگون عالم اھلىدە فرد،

که حالین دې آله‌ی سنگه اهل درد.
 منگه کیم و دادینگه خرسندمېن،
 جنابینگه شاگرد و فرزندمېن.
 غمی یېتتی چرخ جفا پیشه‌دین،
 هم اول انجم خارج اندیشه‌دین.
 که بؤلماق وطن ایچره دشوار اېدی،
 کونگولگه جلا دفع آزار اېدی.

(غریب‌الصغر)

نوایی سمرقندگه کھلیب، علم و دانش، هنر و ادبیات اهلی بیلن یقیندن تانیشه‌دی. اؤز استعدادی و قابلیتیی طفیلی بو بیرده آز وقت ایچیده کتّه آبرو و شهرتگه اېریشه‌دی. سمرقند حاکمی احمد حاجی بېک نینگ حمایتینی قازانه‌دی. احمد حاجی بېک علمپور و شاعر پیشه‌کیشی بؤلپ، وفایی تخلصی بیلن شعرلر یازگن. نوایی سمرقندده زمانه‌سی نینگ مشهور عالمی بؤلگن فضل الله ابواللیثی نینگ مدرسه سیده تحصیل آله‌دی. سمرقندده‌گی ادبی و علمی محیط نوایی نینگ حیاتی و ایجادیکه کتّه تأثیر قیلگن بؤلسه‌ده، نوایی نینگ فعالیتلری هم سمرقند فرهنگي محیطی نینگ رونقی اوچون بی تأثیر بؤلمیدی. شو ترتیبده، نوایی نینگ فقر و آواره‌لیگی میلادی ۱۴۶۹-ییلگچه، یعنی باله‌لیک دؤستی و مکتبداشی سلطان حسین بایقرا خراسان تختینی اېگلله‌گنیکه قدر دوام اېته‌دی. سلطان حسین بایقرا، پادشاه‌لیگی نینگ بیرینچی کونلریده. یاق سمرقندگه چاپر یؤللب، نوایی نینگ وطنگه قیتیشینی التماس قیله‌دی. غربتده قینلگن نوایی دراو اؤز وطنی هرات‌گه قهر ب یؤلگه توشه‌دی. هراتده سلطان حسین بایقرا اېسکی و قدردان دؤستی علیشېر نوایی صمیمیت بیلن قرشیله‌یدی. مملکتدارلیک ایشلریده نوایی نینگ یاردمینی سؤره‌ب، اونگه مهردارلیک وظیفه‌سینی تاپشیره‌دی. آره‌دن اونچه وقت اؤتمی، نوایی‌گه امیرلیک مقامینی مجبوراً قبول قیلدیره‌دی.

مملکتدارلیک وظیفه‌لری نوایی جوده بند اېته‌دی، شو طفیلی او کتّه‌راق ایجادي ایشلر اوچون قلم تېره‌تیشگه فرصت تاپمیدی. چنانچه نوایی نینگ اؤزی کھنراق بو وضعیتینی خمسه‌سی نینگ بیرینچی داستاننی بؤلیمیش «حیرت‌الابرار»ده قوییده‌گیچه اعتراف اېته‌دی:

كىم بار اېدى باشىمە كۆپ محنتىم،
يۇق اېدى باش قاشىغەلى فرصتىم.

اگرچه او ۱۴۷۶-يىلده اۆز درخواستىگە كۆره دولت ايشلريدن رسماً بۆشهگن بۆلسە-دە، كۆپ وقتلرگچه سياسي-اجتماعي همده عمراني ايشلردن فارغ بۆلە آلمىدى. نهايت او ۱۴۸۲-يىلده قوريليش ايشلريگە ختم نقطەسىنى قۇيەدى و بو ايشلر نتيجهسىنى «وقفىه» ناملى اثرىده سرحساب قىلەدى. بوندن كۆرينەدى كە، نوايى شونچه بويوك ايجادى ايشلرنى فقط كېچەگى اويقو حسابىگە عملگە آشىرگن. او وزارت مقاميدن استعفا قىلگندن كېين، حياتى نىنگ قالگن يىللرلىنى اۆزىپك تىلى و ادبياتىنى يوكسك چۆقىلرگە كۆتۈرۈش نيتىدە بو تىلده بويوك ادبي و بديعى اثرلر يره تيشگە وقف قىلەدى. نوايى، حياتى نىنگ بيرىنچى باسقىچىدە اۆزى نىنگ غنايى شعرلىرى بىلن خلق آرەسىدە كتە شهرت قازانگن اېدى. ۱۴۶۵-۱۴۶۶-يىللردە نوايى غزللىرى نىنگ علاقمندلىرى اونىنگ شعرلىرىنى تۈپلەب دېوان تۈزىشگە همت قىلەدىلر. نوايى نىنگ اۆزى اېسە ۱۴۷۰-يىل نىنگ باشلىرىدە بيرىنچى دېوانى «بدايع البدايه» نى تدوين قىلەدى. كېين ۱۴۷۶-۱۴۸۳-يىللر آرەسىدە ايگىنچى دېوانى «نوادرالنهايه» نى تۈزەدى. غنايى شعرلردە تجربه آرتتيرىب شهرت قازانگن نوايى، اېندى اۆزىپك تىلىدە داستانى اثرلر يره تيشنى اۆز آلدىگە مقصد قىلىپ قۇيەدى و «خمسە» يره تيشگە بىل باغلىەيدى. او ۱۴۸۳-يىلده «خمسە» نىنگ بيرىنچى داستانى «حيرت الابرار»، ۱۴۸۴-يىلده «فرهاد و شيرين»، «لىلى و مجنون»، «سبعه سياره» و ۱۴۸۵-يىلده «سد سكندري» داستانلىرىنى يازەدى. دېمك «خمسە» دېك بويوك اثر اوچ يىلدن كمراق وقت اىچىدە بيتىب توگتيلهەدى. حال بو كە نوايى نىنگ سلفلىرى بوندەى بير ايش اوچون بوتون عمرلىرىنى صرف قىلگنلر.

«خمسە» علىشير نوايى ايجادى نىنگ يوكسك چۆقىسىنى تشكىل بېرەدى. نوايى خمسەسى نىنگ وجودگە كېلىشى توركى خلقلر، اينىقسە اۆزىپك ادبياتى تاريخىدە بويوك حادثە حسابلنەدى. خمسە طفىلى اۆزىپك ادبياتى دنياهەگى اېنگ ايلغار ادبياتلر قطارىدن اۆرين آلدى.

عمرنى ضايع اېتمە، محنت قىل،
محنتنى سعادت نىنگ كلىدى بىل

شعارىنى مىدانگە تشلەگن عليشير نوايى اۆز ۋاقتى و امكانىتلىرىدىن نھايت ثمرەلى فايدهلەندى. «خەمسە» دىن كېيىن يەنە كۆپىگىنە بىدىيىي و علمىي اثرلار يەرەتتە، سەنئەت، ادبىيات و علم و فرھنگ ترقىياتىگە كۆتە حصە قۇشەندى.

۱۴۸۸-۱۵۰۱ يىللار آرسىدە عليشير نوايى بىر قەچە بىدىيىي و علمىي اثرلار يەرەتتى: ۱۴۹۰- يىلدە تارىخىي مەنبەلەر و «شەننامە» كىيى بىدىيىي اثرلار اساسىدە «تارىخ مىلك عەجم» ھەمدە شاعر و عالم سىد حسن اردشير حەقىدە «حالات سىد حسن اردشير» ناملى اثرلىرىنى يەرەتەندى، «رسالە مەمما» نى ۱۴۹۱- يىلدە يازەندى. شۇ يىلدە ۴۰۰ دىن آرتىق ۱۵- ئەسىر شاعرلىرى حەقىدە مەلۇمات بېرۋوچى «مجالس النفايس» تەزكىرە سىنى يازىشكە باشلەيدى. استادى و دۇستى عبدالرحمەن جامى حەقىدە «خەمسە المەتھىرىن» اثرىنى (۱۴۹۲-۱۴۹۴) يەرەتەندى، شۇ يىللاردا سۇلتان حسين بايقرا و باشقەلەرگە يازگەن مەكتۇبلىرىنى جەمەتتە «مەنشەات» نى تۈزەندى، «عروض نەزىرىيەسى» حەقىدە «مىزان الاوزان» ھەمدە «حالات پەلوان مەمما» اثرلىرىنى يازەندى. ۱۴۹۶- يىلدە تەسۋوف و صوفىلەر حەقىدە «نەسائىم المەحبە» رسالە سىنى يەتەندى. ۱۴۹۱-۱۴۹۸ يىللار آرسىدە «بەدايىع بەدائىيە» و «نوادىر النەھاىيە» يىلگە كېيىنكى يازگەن شەرھلىرىنى قۇشەتتە تۇرت دەۋاندىن «خەزائىن المەعانى» كىلىتىنى، شۇ يىللاردا فارس تىلىدە يازگەن شەرھلىرىنى تۇپلەپ دەۋان «فانى» نى تۈزەندى. ۱۴۹۹- يىلدە «لسان الطير» داستانىنى، اۋشە يىلى مەشھۇر تىلشەناسلىك اثرى «مەھاكەمە الغەتىن» نى يەرەتەندى، ۱۵۰۰- يىلدە سۇنئەتلىك علمىي-فەلسەفىي كىتابى «مەھبۇب القلوب» نى يازەندى. بۇلاردىن تەشقىرى عليشير نوايى ۱۴۸۲- يىلدە اۆز دورى نىنگە ئىقتىسادىي-جەمئەي تۈزۈمى و اۆز مىلكلىرى حەقىدە «ۋەفەيە»، ۱۴۸۵- يىلدە دىنىي و اخلاقىي مەسئەلەرگە دائىر «نەزم الجۋاھر»، ۱۴۸۵- يىلدە «تارىخ انبىا و حەكمما»، «سراج المەسلىمىن»، ۱۴۸۸- يىلدە «رسالە تىر انداختەن» و باشقە اثرلىرىنى يەرەتەندى. بۇ اثرلارنىڭ دىۋانلىرى ھەممەسى بىزگە قەدەر سەقلىنىپ قالگەن.

نوايى قىزغىنە ئىجادىيەتچى بولۇپ، تەمورىي شەھزادەلەر تەخت و تاج تەلەشەپ اۆز ارا اورۇش و قىرغىنلار بىلەن آۋارە اېدىلەر. سۇلتان حسين بايقرا ۱۵۰۰- يىلى نىنگە يازىدە عصيان كۆتۈرگەن اۋغلى مەمەد حسينگە قارشى قۇشەن تارتەندى. جەنگدە غەلبە قازانگەن حسين بايقرا اۋغلى بىلەن يەرەشەپ، ۲۸- دىسامبردا ھەراتگە قەيتتە كەلەندى. عليشير نوايى خەستەلىگىگە قەرەمى، شاھ نىنگە ئىستەقبالىگە چىقەندى. شۇندە اۋنىنگ سەھىيە ھالىتى يەمەنلەشەندى. بېھۇش عليشير نوايىنى ھەراتگە آلىپ قەيتەدىلەر. ۱۵۰۱- يىلى نىنگە ۳- جەنۋرىسىدە عليشير نوايى ۋەفات تاپتەندى.

ظهیرالدین محمد بابر، «علیشیر بېک نظیری یوق کیشی اېردی. تورکي تیل بيله تا شعر ایتتورلر، هیچ کیم آنچه کؤپ و خوب ایتقان اېمس» دېب، علیشیر نوایی گه حقّانی بها بېرگن. شونینگدېک علیشیر نوایی نینگ اؤزی هم «امیدیم اول دور و خیالیمگه انداق کېلور کیم، سؤزوم مرتبه سی اوجدین قویی اینمه گهی و بو ترتیبیم کوکبه سی اعلی درجه دین اؤزگه یېرنی بېگنمه گی» دېب خطا قیلمه گن.

علیشیر نوایی ذواللسانین شاعر اېدی. اونینگ قلمی ایگه له تیلده، هم تورک، هم فارس تیللریده تېنگ کوچگه اېگه بؤلگن. اما کؤپراق تورک تیلده یازگن. بونینگ سببى نوایی نینگ اؤزی شونده ی ایضاحله یدی: «بو سؤزلریمدین خصم مونداق بیلمه سون و مدعی بو نوع گمان قیلمه سون که، مېنینگ طبعیم تورک الفاظیغه ملایم توشگن اوچون تعریفده مبالغه اظهار قیلورمېن و فارسی عبارتقه مناسبتیم آزاراق اوچون انکار و نفیغه اصرار کؤرگوزورمېن کیم، فارسی الفاظ استیفاسین و اول عبارت استیقاسین کیشی مېندین کؤپره ک قیلیمدور اېرکین و صلاح و فسادین مېندین یخشیراق بیلیمدور اېرکین...» او فارسی شعرلریده «فانی» و تورکي شعرلریده «نوایی» تخلص قیلگن.

علیشیر نوایی دېوانلری، اونینگ باشقه اثرلری کبی، ادبیات، صنعت و علم و دانش اهلی نینگ دقتینی اؤزیگه جلب اېته دی و تېزده شهرتی خراسان و ماورالنهر چېگره لریدن اؤته دی. اونینگ دېوانلری ۱۵- عصرده یاق نه فقط خراسان و ماورالنهرده، بلکه اېران، آذربایجان، شرقی تورکستان، مصر، تورکیه و باشقه مملکتلرده کېنگ ترقه له دی. علیشیر نوایی دېوانلری ۱۵- عصرده سلطان علی مشهدی، عبدالجمیل کاتب، درویش محمد طاقی، محمد ابن نور، سلطان محمد خندان کبی مشهور خطاطلر تامانیدن قیته-قیته کؤچیریلده دی، لواح و مصورلر تامانیدن بېزه تیلده دی. کپینگ عصرلرده هم ماهر خطاطلر تامانیدن قیته-قیته کؤچیریلیب، یوزلب ینگى نسخه لر وجودگه کېلدى. دېمک، علیشیر نوایی حقلی روشده اؤزینی سؤزملکی نینگ سلطانی بیلپ، بوتون تورک اولوسینی اؤز فرمانی آستیکه آگنینی دعوا قیلده دی:

اگر بیر قوم، گر یوز، یوقسه مینگ دور،
معین تورک اولوسی خود مېنینگ دور.
آلبمېن تحت فرمانیمده آسان،
چېریک چېکمه ی ختادین تا خراسان.

خراسان دېمه کیم، شېراز و تبرېز،
 که قيلميشدور نې کلکیم شکررېز.
 کۈنگول بېر مېش سۈزومگه تورک جان هم،
 نې يالغوز تورک، بلکه تورکمان هم.
 نې ملک ايچره که بېر فرمان ييبارديم،
 انینگ ضبطیغه بېر دېوان ييبارديم.

يېگيرمنچى عصرينېگ اۋتيزينچى يىللىرىدن باشلې نوایى اثرلىرى لاتین و کريل الفبالريده تکرار و تکرار چاپ اېتيلدى، همده دنياينېگ بېر قنچه تيللريگه ترجمه قىلىندى. اونینگ اثرلىرى اساسيده يوزلب تحقيقي مقالهلر و کتابلر وجودگه كېلدى. اما مينگ درد و افسوس بيلن ايتيش كېره ك که، بو بويوک انسان نینگ قيمتلى اثرلىرى اۋزى قۇلله گن و يورتداشلىرى حاضر هم قۇللب كېله ياتگن الفبا بيلن شو كۈنگه قدر چاپ اېتيلمه گن، اۋزى تيرىگليگيده ياق شهرتى ربع مسكونگه يايىلگن بونده ي اولوغ انساننى اۋز يورتیده هيچ کيم تنيمسليگى و اونی تنيشتيريشده رسمي مرجعلرينېگ عمدأ سكوت سقلشى بويوک فاجعه دير. بيز منه شو معنوي بۇشليقنى تۇلديريش مقصديده اونینگ اثرلرينى عرب الفباسى اساسيده گى ينگى اۋزبېك تىلى املاسيده چاپ اېتيشنى نيت قىلديك. بېراق نوایى نینگ بيزگه قالدیرگن بويوک ميراثى آلدیده قىلینه ياتگن بو ايشيميز دېنگيزدن بېر تامچى مثالی. حضرت عليشېر نوایى نینگ بوتون اثرلرينى چاپ اېتيش مسؤوليتى اېسه اونینگ فرزندلرى بۇلميش بيزگه نوشه دي. شونده ي اېکن، بو شرفلى ايشگه برچه يورتداشلىرىمىز نینگ حصه قۇشيشلرينى صميميت بيلن كۈته مېز.

دباجه

شکر و سپاس اول قادرغه کیم، چون عدم آسایشگاهیدین وجود آرایشی آگاهلریغه جلوه بپردی،
انسانی سایر مخلوقاتدین نطق شرفی بیله ممتاز قیلدی.

رباعیه:

اول کیم، چو جهان خلقتین آغاز ایتی،
صنع کلکینی نقش پرداز ایتی.
انسان خیلین نطق ایله ممتاز ایتی،
نطق اهلینی نظم ایله سرافراز ایتی.

و حمد ببحد و قیاس اول صانعغه کیم، چون عبارت جواهرین نظم سلکیگه تارتدی، اول گلشن
ارم آیینی نظم اهلی خامه گوهر افشانی بیرله رشک نگارخانه چین و غیرت خلد برین یسه دی.

رباعیه:

چون خیل بشرغه نطق کامین بپردی،
اول نطق ایله نظم احترامین بپردی.
نظم ایچره بلاغت انتظامین بپردی،
ترکیبده اعجاز مقامین بپردی.

جَلَّتْ أَلَاؤُهُ وَ عَمَّتْ نِعْمَاؤُهُ وَلَا إِلَهَ غَيْرُهُ.

و درود نا معدود اول انبیا حلقه سی نینگ خاتمیغه کیم، إِنَّ الشَّعْرَ لَحِكْمَةٌ وَ إِنَّ الْبَيَانَ لَسِحْرٌ
نکته سی بیله شعرا پایه سین حکما مرتبه سیغه چپکتی و بیان رتبه سین سحر منزله سیغه تارتتی.

رباعیه:

اول کیم چو بلاغت اہتی دعوا، اعراب
کۆرگوزدیلر اول دعوی ارا کۆپ اطناب.
چون نکته سیده قیلدی عیان گوهر ناب،
دعواگر گوهرلری بۆلدی سیماب.

و صَلَّى اللَّهُ عَلَيْهِ وَ عَلَى آلِهِ وَ أَصْحَابِهِ وَسَلَّمَ.

اما بعد:

سۆز بیت الحرمی نینگ بادیه پیمایی و نظم شاه بیٹی نینگ زہور آراییی الفقیر الحقیر علیشہر
المتخلص بالتوایی سترعیوبہ و غفر ذنوبہ، انداق عرض قیلور کیم، بو خاکسار پریشان روزگار کیچیک
یاشدین اؤزومنی شعر نینگ پریشان سوداسیغہ گرفتار بولغانیمنی و طفولیت زمانیدین کؤنگلومنی نظم
نینگ پراکنده وسواسیغہ مشعوف و شہفته وار بولغانین و ماتقدم شعراسی ملک الکلاملری دستوری بیله
جمع و ترتیبیدہ سعی قیلغانیمنی و نہچہ مرتبہ انینگ تدوینیدہ مرتبہ ارتکاب قیلیب ہر صنف شعرغہ
زہب و تزیین و آرایش و آیین ہرگنیم نینگ کیفیتین بورونگی دہوانیم فہرستیدہ کیم، «بدایع البدایہ» غہ
موسوم دور، شرح بیله عرض قیلیب اہردیم. اندین سؤنگرہ دغی اول جمع و ترتیبیدین باشقہ ینہ ہر
تقریب بیله ہر نوع ابیات کیم، ایتیلیب اہردی و ہر نوع غزلیات کیم ییغیلیب اہردی، اول خیال شہستانی
نینگ درخشان اخترلیدین و اول کؤنگول مخزنی نینگ درخشان گوہرلرین دغی ایکینچی دہوانیمدہ
کیم، «نوادرالنہایہ» غہ مشہور دور، ربط و ترتیب ہررب، دیباچہ سیندہ شرح بیله اعزہ اصحاب و اجلہ
احباب خدمتلیدہ عرض قیلیب اہردیم. اندین سؤنگرہ خیالیمغہ کپلور اہردی و کؤنگلومگہ اپورولور
اہردی کیم،

رباعیه:

شاعرلیغ ایلہ شہرہ قیلیب آتیمنی،

ضايغ قىلدىم شعر ايله اوقاتىمنى.
اېمدى توزه يىن تېنگرىگە طاعاتىمنى،
كۆپ اېلگە مشوش اېتمەي ابياتىمنى.

رباعىه:

چونكىم قىردىم، عمرنى برباد اېتمى،
كۆنگلومنى يىگىتلر غمىدىن شاد اېتمى،
هر لحظه بىراو عشقىدە فرىاد اېتمى،
حاليم شرحىن نظم ايله بىياد اېتمى.

رباعىه:

اېلىك بىلە آلتىمشقە يېتتى قىدىم،
نې معنا كىم، بۆلمەدى اېركىن رىقىم،
نې طرفە كە، ثبت اېتمەدى اېركىن قىلمىم
كىم، يۇق بىرىدىن خاطر ارا جز المىم.

اگرچە بو نىگار ش تاپقان ايكى دېوان ترتىبىدە و غزار شقە كىرگن ايكى دفتر تدوينىدە هم بو فقير
نامراد و حقير ناشادغە هيچ اختيار يۇق اېردى، نېچونكە برچەسى سلطاني حكملر و احسان و تحسینلر
و خاقاني امرلر و تعلیم و تلقینلر بىلە اېردى، اندین سۇنگرە خود خاطرغە كېلمس اېردى كىم، بىر غزل
حسن بهارى غزاللرى تعريفىدە يا عشق آتشكدهسى شراره لرى توصيفىدە توگتگە يىمېن، بلەكە بىر بيت بىر
شۇخ نىنگ جمال دلفروزی بايىدە يا اؤز كۆنگلوم نىنگ درد و سۆزى شرحىدە نظم سلكىگە كىيوره آغە
يىمېن يا خىالىمغە كېچوره آغە يىمېن.

رباعىه:

كامين قىلور اېرمىش آدميزاد خيال،
نقش ايلر اېرمىش كۆنگلىگە يوز فكر محال،

موندين غافل قالب كه، حى متعال
كېلتورگوسى تانگله انىنگ آليغه نې حال.

رباعيه:

هم دېمگيده يۇق اعتبارې كيشيگه،
هم قيلماغيده يۇق اختياري كيشيگه.
تقدير ارا چون يۇق اقتدارې كيشيگه،
نې قىلغانىغه نې اېرك، بارې كيشيگه.

ينه روزگار حواديدين اول فكرلر برچه كۈنگلومدين باردى عشق عاجزكش ظلم و بېدادى اول
خياللرنى خاطرېمدين چيقردى، آليمغه آنچه دشوارليغلر يوزلندى و تېگرمگه آنچه صعب گرفتارليغلر
ايلندى و سېهر باشيمغه آنچه بلا تاشى اتتى و عشق سپاهى نىنگ لگدكوبى ضعيف پيكرېم بيله
سۈنگكلىمنى آنچه اياق آستيده اوشتتى كيم، نې سۈزومدين خبرېم و نې اۈزلوگومدين اثرېم قالدى.
عشقىم آشوبى طغيانده هر صعوبت كيم يوزلشور اېردى، چون بير همدرد رفيقىم يۇق اېردى، كه
درېمدين شمه يى اظهار قىلغيمېن، بيرار بيت بيرله اول حال مضمونين نظم قىليب كۈنگلومنى خالى
قىلور اېردىم و جنونوم شدتى غليانده هر آشوب كيم، آليمغه كېلور اېردى، چون همزبان مشفقېم يۇق
اېردى، كه مخفي اۋتومنى آشكارا اېتگه يېمېن، بيرار مطلع بيله اول معنائى ادا قىليب، قتيغ حالېمنى شرح
اېتر اېردىم. بو واسطه بيله كۈنگلوم اۋتيغه آرامې و عشقىم بېدادى ناھموارليغيغه اندامې حاصل بۈلور
اېردى.

بو نوع بيله آز وقتده كۈپ شعر ايتيلدى و هر نوع نظم تېگرمگه ييغيلدى. عشقىم شور و غوغاسى
وقتده و جنونوم تاراج و يغماسى فرصتده خود قيده آنچه تسكين و سامانېم بار اېدى كيم، ايتيلغان
پريشان ابياقده جمع و ترتيب بېره آلغيمېن و ييغيلغان پراكنده شرح حالاتقه ربط و قاعده قۋيه آلغيمېن.
چون اول تاريخدين مدتي اۋتتى و اول وقتدين فرصتي اراغه كيردى، فلک حوادثى نىنگ اول قتيق اېسه
دورغان صرصرى تسكين توتتى و اول رنج و تشويشدين يىللر رنجورلوق تارتقان تن دېك، بلكه
جانېمدين مھجور قالغان بدن دېك چيقتيم، نبضيمغه حركت معدوم و نفسېم نىنگ كيرر-چيقرى نامعلوم،
تنېم اۋن قتله اندىن ضعيفراق كيم نال و كۈنگلوم بير زمان اۋز حالده بۈلسه، ينه اۋن ساعت بېحال.

و ايکي مرتب بولغان دېوانلردين ينگي آيتيلغان ابیات عددی اکثر و هر بيتی لفظ و معنا بيله درجلیغ گوهر دېمه ی کیم شعله لیغ آذر؛ خاطرغه کېلور اېردی کیم، اگر بو اوراققه ربط و ترتیب بېریلمه سه، بېر حوادث تند بادی اېسگېچ، هر صفحه سین بېر یان ساوورغی و اگر بو گلبرگلرنی زېب و آیین بيله بېر گلدسته باغلنمه سه، بېر نوائب نسیمی یېتگېچ، هر ورقین بېر یان اوچورغی، و اگر ربط و ترتیبینی هوس قیلسم، هوسیمغه قیده اول قوت که، ايکي بيتنی بېر-بیریگه مربوط باغلشوره آغی و خیالیمده قیده اول جمعیت و حالت که ايکي لفظین بېر-بیریگه یرشوره آغی. بو عجزدین خامم تیلی لال و بو زبونلوقدین اؤز تیلیم شکسته مقال اېردی کیم، ناگه عنایت نسیمی هدایت گلشنی رایحه سین یېتکوره کیریشتی و سعادت مْنهسی دولت روضه سی مژده سین کېلتوره باشلده دی، یعنی حکم قضا جریان و فرمان واجباً لاذعان بو بنده آتیغه اول سلطان صاحبقراندین یېتیشتی کیم، قوللری حکمیدین عظیم الشان سلاطین باش تارته آلمسلر و بنده لری فرمانیدین نافذ فرمان خواقین بویون تولغای آلمسلر.

رباعیه:

شاهی که، فلک که یېتسه فرمانی انینگ،
تا پماققه سکون سرعت دورانی انینگ.
گر حشرغه تېگرو بولسه پایانی انینگ،
قیلماق حرکت بولمه غای امکانی انینگ.

رباعیه:

مینگ بنده سی خاقان بيله قیصر ینگلیغ،
یوز چاکری دارا و سکندر ینگلیغ.
هم تختیغه پایه چرخ اخضر ینگلیغ،
هم تاجیغه قبه مهر انور ینگلیغ.

رباعیه:

موروئی قول جنس بنی آدم انگه،

میراث ایلہ ملک جملہ عالم انگہ.
حیران کرم و جود ایشیدہ حاتم انگہ،
نوشیروان عدل ایچینده تابع هم انگہ.

رباعیہ:

فعّالِ قضا حکمیغہ انباز کہلیب،
غدارِ قدر امریغہ دمساز کہلیب،
بزمی ارا زھرہ نغمہ پرداز کہلیب،
انجامِ زمان دوریغہ آغاز کہلیب.

رباعیہ:

اقبال انگہ دولت می پیوست توتوب،
بو بادہ بیلہ جانین انینگ مست توتوب،
حق آنی سپہردین زبردست توتوب،
توفراغدین اول ولّی اوزین پست توتوب.

رباعیہ:

حق کؤنگلین انینگ بیلک کہ مخزن ایلب،
ھر فندہ اریغ ذاتینی یکفن ایلب.
جاهی تختین چرخ مثن ایلب،
توفراق دپک اول اوزین فروتن ایلب.

رباعیہ:

هم قبله اقبال حریم جاهی،
هم کعبه آمال بییک درگاهی،

شهرلر نینگ دردمندی و آگاهی،
بو طرفه که، دردمندلر نینگ شاهی.

السُّلْطَانُ ابْنُ السُّلْطَانِ وَالْخَاقَانُ ابْنُ الْخَاقَانِ مُعِزُّ السُّلْطَنَةِ وَالْدُّنْيَا وَالدِّينِ أَبُو الْغَازِي سُلْطَانُ حُسَيْنِ
بِهَادِرْخَانِ خَلَّدَ اللَّهُ تَعَالَى مُلْكَهُ وَسُلْطَانَهُ وَأَفَاضَ عَلَى الْعَالَمِينَ بِرَّهُ وَاحْسَانَهُ.

رباعیه:

بؤلغانچه سپهر دوری کامی بؤلسون،
افلاک اوزه بزم احتشامی بؤلسون.
هم درگهی شاهلر مقامی بؤلسون،
ییلده بیر الرغه بار عامی بؤلسون.

رباعیه:

هر لحظه قیل انکه یوز عنایت، یارب،
آلیغه یاروت شمع هدایت، یارب،
هم عمرینی ایله بپنهایت، یارب،
هم دولتیغه یپتورمه غایت، یارب!

بو ینگلیغ فلک تزیین درگاهدین و بو نوع عرش آیین بارگاهدین، خطابِ **صدمت** آمیز و حکم
حیرت انگیز بیتیشتی. مضمونی بو کیم، ای قدیمی بنده خاص و ای **بایری** خادم دَویِ الاختصاص
بورونگی ایکی دېوان کیم، بیزنینگ حکم و خطاییمیز بيله مرتب قیلدینگ و کلیات و جزئیاتین بیزنینگ
مشورت و تعلیم و استصوابیمیز بيله توزتینگ کیم، بیری نینگ عشق آمیز ایباتیدین بو اېسکی دیرنینگ
رفیع طاقیده عشاق نینگ شور و غوغاسی دور وینه بیری نینگ شوق انگیز غزلیاتیدین بو قدیمی مَنیع
گنبد رواقیده محبت اهلی نینگ هوی و علااسی. اندین سؤنجره ییغیلغان اشعارنینگ و نظم رشته سیغه
تارتیلغان دُر شهوارنینگ عددی بورونگی دېوانلردین آرتقان چاغلیغ دورور و بو لطافت صفات خوبلر و

ملاحت سیمات محبوبلر بیلە ینە ایکی دېوان ترتیب بېرسە بۇلوردېک معلوم بۇلە دور. نېتگونگدور کیم بو ایشدین دلبندراق بۇلغەی و نې قیلغونگ دور کیم، بو شغلدین سودمندراق بۇلغەی. اېمدی اولی بو دور کیم، بو غریب ایشگە کۈنگول کېلتورگە یسېن، بلکه حکم بو اېرور کیم، بو عجب امرغە خامە سورگە یسېن و تفکر خلوتگاھیدە خیال شوخ و رعنالی بیلە بزم توزگە یسېن و تا فلک گردش قیلور بشر جنسی نینگ خیالیغە کېلمە گن اعجوبەنی اېلگە کۈرگوزگە یسېن. اۋزونگ بیلورسېن کیم، نظم حریمی نینگ حاصلری و شعر بحری نینگ غواصلری کیم، روح پرور نوالیغ انفاصلریدین زمانە بزمی تۇلوبتور و خیال دریاسیدین چیققرغان قیمتی گوهرلریدین دوران لباسی جواهر بیلە مرصع بۇلوبتور، هیچ قیسی عالم نینگ ربع مسکونین آلە آمیدور و تۇرت گوهردین مرکب بۇلغان بشر خیلی هیچ قیسیدین تۇرت دېوان یادگار قالمیدور. بیر اۋز عصریدە گنج معنوی امیر خسرو دهلوینی دېرلر کیم، سلطان ملکشاھ آلپ ارسلان آتیغە تۇرت دېوان مرتب قیلیمیش بۇلغەی و خاتمە سینی انینگ آتی بیلە مذیل اېتمیش بۇلغەی و بو ایشی اول زمان نینگ یخشی-یمانی قولاغیگە یېتمیش بۇلغەی، اگرچه بو سۋز مذکور دور، اما اول دېوانلر معدوم دور و اول معدوملرنینگ اگرچه اسامیسی موجود دور، اما وجودی نامعلوم دور. خیالیغە اۋتکریب، ورققە نگارش قیلمە غان مو اېرکین، یا تیلیگە کېچوروب، ترتیب یوزیدین نسققە گزارش بېرمە گن مو اېرکین کیم، «خمسه» سی و سایر منظوم کتب و رسایی اۋز حالی بیلە موجود دور. بو تۇرت دېوانی زمان اهلیدین مهر و وفا و انصاف و مروتدېک نابود. چون سېنگە توفیق مدد قیلپتور و بو مقصودنینگ هیچ کیمگە ییغیلمە غان ماده سی ییغیلپتور، تیلربیز کیم، فرصتی غنیمت بیلگە یسېن و بو مدعا حصولیغە رغبت قیلغە یسېن.

بو حکم چون قولاغیمغە یېتیشتی، عجز و زبونلوق اۋتی نینگ دودی کۈنگلومدین دماغیمغە یېتیشتی کیم، حکم قوی اېردی و محکوم ضعیف و امر بغایت کلی اېردی و مأمور اسرو نحیف و رعشە پیکریمغە تزلزل سالدی و حواس و خیالیم خیلی بیر-بیریدین قۇزغالدی. نې عذر ایتورغە زهره و جرأتیم و نې قبول قیلورغە حوصلە و قوتیم، اگرچه عذر دلپذیر اېمس اېردی، اما اۋز عجز حالیمنی عرضغە یېتکورمکدین هم گزیر اېمس اېردی.

رباعیه:

دېدیم که، بو ایشدە کیم، بۇلورمېن مأمور،

هر نېچه كيم توتمه سم اوزومنى معذور،
لېك ايشته كه، اژدهاغه كېلتورگه زور،
زور اېتگه اؤزيگه، ايسته سه قيلماق مور.

اول همايون ضميرنينگ آيينه گيتي نماييده روشن و پيدا دور و اول پاكيزه كۈنگول نينگ جام
جهان آراييده مبرهن و هويدا كيم، بو بنده فقيرغه نې ناتوانليغلر شكست بېردى و بو ذره حقيرغه نې
سرگردانليغلر دست بېردى. اگرچه مرضيمغه صحت اميدى پيدا بۈلوپتور، اما هنوز غذا بيله شربت كيم،
ايچيلور بېيلور، مثقال ترازوسى بيله تارتيلور و تانگدين آقشامغچه ساعت شيشه سيغه كۈز تيكيلور و
اگرچه ضعفيمنغه قوت امكانى ظاهر بۈلوپتور، اما هنوز بوزوغ كاشانه مدين چيقرغه قۇپماق تيله سم،
آسيلغان ادبار عنكبوتى تارلرى دستگيريم بۈلوب مدد يېتكورمه گونچه، تېرنمك كه تاب و توان و حركتقه
مقدور، بلكه امكان يۇقتور؛ پشه يوز پيل دمان تارته آلمه غان يوكنى نېچوك تارتقى، به تخصيص كيم،
مجروح و رنجور دغى بۇلغەى، مورچه مينگ شيرژيان قيله آلمه غان ايشنى نېچوك قيله آلمه غى، خصوصاً
كيم، بېمار و صحت طريقيدين مهجور دغى بۇلغەى.

رباعيه:

اول ايكي دېوانغه چو قىلديم رغبت،
هم اېردى يېگيتلىك مدديم، هم صحت،
بۇلدوم چو قىرى و خسته، يۇق اول قوت،
كۈرگوزگه لى انداق نيمه لرگه جرأت.

كۇيراق بو كيم، اول دواوين ترتيبده سلطان صاحبقران نينگ عالي طبعى نينگ اصلاح و اهمتامى
بېحد و هر جزوي نكته ده تغيير و تعليم مالاكلامى بېعدد اېركن جهتدين اول ايش سرانجام صورتين پيدا
قىلدى و افتتاحيدىن اختتامىغه دېگونچه ترتيب رقمى چېكىلدى. بو ضعف و ناتوانليغيم زمانيده بو عجز
و زبونلوق و بې سامانليغيم طغياننده سلطان صاحبقران نينگ رأى عالم آرايى و ضمير خورشيد تاثيرى
گۇيا كه بعض اوقاتده عالم كشورى فتحىغه عزمساز و بعضى حالتده كشور اهلى آبادانليغىغه سحر پرداز

و بعضی زمانده عیش و نشاط بيله ایلگی زر پاش و بعضی آوانده طاعت و عبادت بيله کۆزی گوهر پاشلیققه متأمل و مشغول اوچون بو خاشاک دریادېک کۆنگلیگه کیرمس و بو ذره قویاش دېک ضمیریه پیدا اېرمس. و سلطان صاحبقران نینگ همت یوزیدین اهتمامی و سعی غایتیدین تعلیم بردوامی بؤلّمه سه، مونداق دشوار ایش ایلگری بارماغی متعسر، بلکه خیالیمغه کپچورماغی متعذر دور.

مونداق حکم بؤلغاندین سؤنگره گه-گاهی حالیمدین آگاه بؤلّمه سه نېتکه یمېن و لحظه-لحظه احوالیمدین خبر توتمه سه نېته آغە یمېن. قومورسقه سلیمان نینگ خاطریغه کپلمه سه نې محل تعجب و تحیر، سُهّا چرخ گردان سطحیده کؤرونمه سه، نې محل حیرت و تعذر. بو خاکسار چون بو درد دللریمنی اظهار و نامرادلیریمنی آشکار قیلدیم و مذلت توفراغیغه تظلم بيله ییقیلدیم، عنایت بارگاهیدین صدا کپلدى و هدایت کارگاهیدین ندا پېتیشتی کیم، کۆنگلونگنی سالمه و بو نوع سودا بو وسواس خیالیغه قالمه کیم، بیز هیچ حالده سېنینگ حالینگدین غافل اېرمس اېرکندوربیز، اما بو حالدین سېن غافل و کۆنگلومیزدین هرگز یادینگ زایل اېرمس اېکن دور و بو معنا سېنینگ کۆنگلونگدین زایل. انداق که بورونگی ایکی دېوانینگ تکمیلیده رعایتیدین هیچ نوع تغافل واقع بؤلّمه دی و رهنمالیغ و عنایتیدین هیچ تورلوک تکاسل صورت باغلمه دی، اېمدی دغی هم اول دستور بيله، بلکه اندین هم آرتوقراق، مونده هم اول قانون بيله، بلکه اندین هم افزونراق احوالینگدین خبر توتولغوسی دور و هر آز وقتده سر وقتینگه پېتیلغوسی دور. چون ضعف حالینگ بیزگه ظاهر و پیدا دور و چون شکست احوالینگ بیزگه روشن و هویدا دور، مرحمت و نواسازلیغلر بيله هر مشکلینگ بؤلّمه حل فیلینغوسی دورور.

رباعیه:

شه دین چو بو نوع لطف و احسان تاپتیم،

امید دغی ببحد و پایان تاپتیم.

ظلمت ارا اېردیم، آب حیوان تاپتیم،

یؤق-یؤق که، اولوب اېدیم، ینگى جان تاپتیم.

کۆنگلومگه اؤزگه قوت کیردی و طبعیمگه اؤزگه جودت و جلادت حاصل بۆلدى، کلکیم جردّه تېز کامیغه اؤزگه روانلیغ و خیالیم سحاب برق خرامیغه اؤزگه گوهر افشانلیغ یوزلندی. قبول برماغین

كۆزومگە و منت ايلگين كۆكسومگە و جان پرور سۆزومگە قۇيدوم و ضمير خلوتگاهيني خواطر
غوغاسيدين معرا و كۆنگلوم زىستگاهيني وساوس هجوميدين مبرا قىلديم. خامه اوچين تېز اېتتيم و طبع
آب حياتين آتش انگېز. و اۆتكىن ايامده ايتيلغان مطلعلىرى صبح بدايتين مقطعلر شام نهايتيغە پيوسته و
كېچكن هنگامده بيتلگن پريشان ابيات گوهرلرين تكميل رشته سيغە تارتماق بيله پيوسته قيله باشلەدويم.

رباعيه:

كون بار ابردى كيم بير غزل و ايگى غزل،
بل اوچ غزل و تۆرت غزل بعضى محل.
مهوشلردېك بارى لطافتده مثل،
باغلب كييان يوزگه حله تۇنغە حلل.

بو نزاھت شېبستانى نىنگ پرده نشينلىرى يوز مىنگ زېب و زىنت بيله طبع خلوت خانه سىيدىن
جلوۋە ناز قىلىپ چىقىپ، ساير ابنای جنس سىلگىگە كىررلر ابردى و بو ملاحىت نىگارستانى نىنگ نازىنلىرى
مىنگ تومن آرايش و نمايش بيله خيال خلوت خانه سىيدىن خرام دلنواز بيله حرىكت كۆرگوزوب، ينه ابكار
فتنه آثارغە قۇشولورلر ابردى. چون بو موزون حرىكتلىك دلکشلر و بو مطبوع صفتلىك شوخوشلر اېلىك،
آلتىمىش يا يوزگه يقين بۇلسلرلر ابردى، بو فقير سودايىي بير تاجردېك كيم، ملك التجار دېسە بۇلغەي،

رباعيه:

يوز حور صفت برچه سى نىنگ ناز و فنى،
كشميرى و رومى و ختا و ختنى،
كيم بير شه اوچون كېتورگەي اول طائفه نى،
تاجر اۆزىن ايلرگه بها بيرلە غنى.

كشميرى سحر سازليغده دلربا و دلکش و رومى تورك تازليقده كافر آيين و فرنگى وش و
ختايى سى خونرېزليقده ناوكن و شېر شكار و ختنىسى فتنه انگېزليغده شېرافگن و غزاله كردار، بو شمائل

و آيين بيله و بو زباليغ و تزئين بيله سلطان صاحبقران نينگ حرم سراييغه كيورور ابرديم و بيرين-بيرين اول حضرت نينگ كيما اثر نظريغه ييتكورور ابرديم.

و اول حضرت عنایت کۆزی بيله اول رعنا لرنی کۆروب و التفات نظرين هر بير يگه ييتكوروب، قيسى بيرى نينگ حرير و حله سیده قصورې کۆرونسه يا اول حله و حريرنى مرصع قيلغان جواهرده عدم مناسبت سبيدين فتورې ظاهر بولسه، اول لباسلرنی چي قريپ، خزانه خاصدين مناسب رنگليغ خز و دپا لباسلر برچه قيمتي گوهرلر بيله ترصيع قيلغان کپلتوروب اول شوخلرغه كييدورور ابردى و هر قيسىنى اؤز مناسبت يغه کۆره ترتيب بيله اؤز عالي مجلسیده اؤلتورتور ابردى. يعنى ايتيلغان ابیات برچه لطايف آثار و ثبت بولغان اشعار برچه ظرايف شعار کيم، اېليک، آلتيمش يا يوز غزلغه يقين ييغيلسه ابردى، حضرت سلطان صاحبقران نينگ فردوس آما صحبتیده و سپهر فرسا حضرتیده حاضر قيليب عرضغه ييتكورور ابرديم و اول حضرت الرغه شفقت يوزيدين باقيب، قيسى معنا شوخی نينگ کيم ترکيب خلعتیده و الفاظ کسوتیده بي تکلفلوق کۆرسه، اؤز گنجينه ضميرى خزانه سيدين مناسب الفاظ بيله اول لباسلرغه تغيير بيريپ و اول الفاظ کسوتیده صنایع جواهريدين نامناسبليغ معلوم قيلسه، اؤز خزانه خاطرى گنجخانه سيدين ياقوت و لعل رنگين و گوهر و در ثمين بيله اول زېب و زينته تبديل ييتكوروب، هر غزلى ترتيب يوزيدين اؤز اؤرن يغه رقم قيلور ابردى.

و بو فقير بي بضاعت و بو حقير بي استطاعت اول تعليملرنی اؤزومگه دستور قيليب هم اول دستور بيله اول ضبط و ترتيب يغه شروع قيلور ابرديم. موندین باشقه دغى اول حضرت نينگ کؤپ خاصه معنالى خيالاتين و غريب مضمونلرى مقالاتين و دلپذير تشبيهلرى تراکتين و بهنظير تنبيهلرى جزالتين بورونغي ايکى دېوانيم دېباچه سیده شرح بيله مذکور قيليب ابرديم و تفصيل بيله مسطور ايتيب ابرديم. بو دېوانلرده دغى هم اول دستور بيله معانى جواهر شاهواريدين و الفاظ نقش و نگاريدين و ترکيب سلاست و لطافتيدين و چاشنى حالت و حرارتيدين هيچ جزوي جزئياتدين يوقتور کيم، اول حضرت نينگ مبارک طبعى نينگ انده کلي دخلى بولمه ميش بولغهى. بلکه اصل خيال اول حضرت نينگ بولوب، بو بنده هم اول حضرت نينگ بويروغى تعليمى بيله انده جزوي دخلى قيلميش بولغهمين. بو جهتدين بوله آلاي که، بو دېوانلر اول حضرت نينگ عدليسيز طبعى دېک بهنظير و هر شاه بيتى اؤز همايون ذاتى دېک عالمگير بولغهى. چون بو معنى گوهرلرى برچه اول حضرت نينگ طبعى بحريدین و ذهنى کانيدین

حاصل بۆلدى و الفاظ و عبارت خزاينى هم اول معنالر گوهرىدين تۆلدى، بو معنادين انىنگ آتین «خزاين المعانى» قۇيولدى.

رباعیه:

يارب، بو خزاين كه مېن اېتتيم معمور
كىم خازنِ جنت انگه خوشتر گنجور،
چون كېلدى فتورلوق كۈنگوللرگه سرور،
بېر مه اندين كۈنگول سروريغه فتور.

رباعیه:

بو بحر كه، گنجلر مكاني دېديلر،
هر قطره سين آبِ زندگاني دېديلر.
شه مخزنِ طبعدين نشاني دېديلر،
كىم آنى «خزاين المعانى» دېديلر.

اگرچه خورشيدِ عالمتاب نىنگ فلكنى بير دوره قيلغان زمانىغه ييل آت قۇيوپتورلر و ييل كيم عبارت تۆرت فصلدين دور، هر فصلغه دغى بير آت تعيين قىلىپتورلر. بو نىر اعظم فلكنى بير دوره قيلغانى نىنگ مانندى كيم، بحري و كانى و نباتى و حيوانى نىنگ نتايجى انده ظاهر بۇلور، مونده دغى جميع اول نتايجدين دليل و اثر تاپسه بۇلور. تۆرت فصلى نىنگ مقابله سیده كيم، تۆرت دېوان واقع بۇلوتور، هر قيسىغه بير مناسب آت در بايست اېدى، اول سبيدين اولغى دېواننى كيم طفوليت بهارى غنچهسى نىنگ عجيب گللى و صغر گلزارى باغچهسى نىنگ غريب چېچكلى بيله آراسته بۇلوب اېردى، «غرايب الصغر» دېيىلدى. و ايگينچى دېواننى كيم، ييگيتلىك و آشفته ليغ و شباب و آلفته ليغ يازى و دشتيده يوزلنگن نادر وقايع بيله پيراسته بۇلوب اېردى «نوادراالشباب» اتلدى. و اوچونچى دېواننى كيم، وسط الحيات ميخانه سیده عشق بيله شوق پيمانه سیدين يوزلنگن بدیع نشاطلر كيفيتين يازيلىب اېردى، «بدايع الوسط» آت قۇيولدى. و تۆرتونچى دېواننى كيم، عمر نىنگ آخرليده يوزلنگن عشق درد و رنجى

فايدهلرى كيم، جانسوز آه اورماق و جان تاپشورماقدور كيم، انده ثبت بولوپتور، «فوایدالكبر» لقب بېرىلدى.

اميد اول كيم، بو تورت دېوان كيم، سلطان صاحبقران آتى بيله مذيّل دورور و القابى بيله مطرز، هم انىنگ آتى دېك ربع مسكونده تۇلغەى و هم انىنگ القابى دېك تۇرتونچى كۆككە دېگىنچە منتشر بۇلغەى. شكر كيم، بو بنده نظم وسيلهسى و شعر واسطهسى بيله تمام عمرومنى اول حضرت نىنگ مدحى بيله كېچوردوم و برچه حياتىمنى انىنگ دعاسى بيله اۆتكردىم.

طفوليت آوانى كيم، يېتى-سېگىز ياشدىن يىگىرمە ياشقچە چىنەسە بۇلغەى كيم، عمر فصولى نىنگ نو بهارى و حيات گلشنى نىنگ شگوفە و گلزارى دور، انىنگ مدحيدە «غرايبالصغر» بيله صرف قىلدىم.

شباب زمانى كيم، يىگىرمەدىن اۆتۆز بېشكچە دېسە بۇلغەى كيم، هم بو فصول نىنگ يازى دور كيم، يىگىتلىك چشمه سارى نىنگ حياتبخشلىگى نىنگ آغازى دور، انىنگ وصفيدە «نوادالشباب» بيله كېچوردىم.

و كهولت ايامى كيم، اۆتۆز بېشدىن قىرق بېشكچە دېگىنچە قياس قىلسە بۇلغەى كيم، بو فصول نىنگ خزانى دور كيم، تىرىكلىك باغى نىنگ برگېزى نىنگ نشانى دور، انىنگ تعريفيدە «بدايعالوسط» بيله اۆتكردىم.

و قىرق بېشدىن آلتىمىش يقىنىغچە كيم تعيين قىلسە بۇلغەى كيم، بو فصول نىنگ قىشى دور كيم، كىشى نىنگ خم قد بيله عدم يۇلغە كىرىب، زمان اهلى بيله خير باد قىلىشى دور، انىنگ دعاسيدە «فواید الكبر» بيله نهايتقە يېتكوردوم.

رباعيه:

صرف اېتتىم انكه عمر بهارين داغى،
بوستان حيات و لاله زارين داغى،
آليده خزان زر نثارين داغى،
كافور فشان قيش بيله قارين داغى.

و بو اوقات مابینده هر مقدار کیم، فرصت تاپتیم، خواه «خمس» نظمیدین و خواه «نظم الجواهر» و «مجالس النفایس» و «زبدة التواریخ» و سایر تصنیفلر اشتغالیدین هم اول حضرت دعای دولتیغه اوقاتیمنی صرف قیلدیم. و بحمدالله انداق مرادلر کسب ایتتیم کیم، مہینگ ابنای جنسیم نینگ یوزیدین بیریکه میسر بؤلیمدور و انداق مقصودلرغه یتتیم کیم، الر کیم، مہن دېک یوز، بلکه مینگ قوللری بار ابردی، بیرى نینگ ساغر آرزوسى مہنگه نشاط یتکورگن مى بيله تؤلیمدور. بحمدالله تعالی که، بو اوقاتده کیم عمر وادیسى نینگ کؤپراغین انینگ دولتیدین مرادلر بيله قطع ایتیمهن و حیات نینگ نهایتیغه کاملر، بلکه کامرانلیغر بيله یتیمهن، هیچ تورلوک ارمان خاطریمده قالمیدور و هیچ نوع آرزو کؤنگلومده سینغانین خیالیم تاپه آلمیدور. هر نې دنیا مرادی و ظاهر کامرانلیغی دور، سوروبمهن و سؤزوم نینگ صیت و صداسین انینگ مدحیده یتتی فلک که یتکوروبمهن. اولچه آرزو حیثیتیدین و ارمان جنسیدین قالپتور، آخرت یولی نینگ سهولت و آسانلیغی و باطن ملکى نینگ ایالت و کامرانلیغی دور. و اول وابسته دور حق سُبْحَانَهُ و تَعَالَى نینگ توفیقی بيله امری اطاعتیغه و رسول صَلَّی اللہُ عَلَیْهِ وَاٰلِہٖ وَسَلَّم شفاعتی و شریعتی نینگ متابعتیغه. امیدیم اول دور کیم، اول حضرت دولتیدین بو اقبالغه دغی سر بلند و بو سعادتقه دغی بهره مند بؤلغیمهن.

بو بابده بیر نېچه سؤز اؤز عرضِ حالیمنی تیلیم کیم، ظاهر قیلغیمهن و اول نشاطیم گلی آچیلغاندین مهن هم نشاطدین غنچه دېک آچیلغیمهن و اول عرضه داشتیم سوادین بو دېپاچه ذیلده ثبت اېتکیمهن و بیتکوچیلرگه هم بو فهرستدین بو عرضه داشتی اییرمسقه وصیت اېتکیمهن، تا کون سؤنگه ی بو دېپاچه نی اؤقوغان اېلگه بو عرضه داشتیم بيله بو مدعاومعه یتکنیم نشانه یی بؤلغهی واضح و دلیلی بؤلغهی لایح. بو جهتدین تا عالم انقراضی بؤلغوسیدور، سلطان صاحبقران دولتیغه دعا قیلغهی یلر و شفقت و بنده پرورلیغیغه ثنا دېگهی.

قوللوق عرضه داشت اول کیم، بو بنده غه یاش اولغایغان چاغده ضعفی یوزلندی و اول ضعف رشته سی رشته دېک ضعفلیغ پیکریمغه انداق چیرمندی کیم، اول قویاش دېک ضمیرغه روشن دور. حالا مزاجیم استقامتدین منحرف و بدنیمده نېچه مرضِ مختلف دور و اَطْبَا علاجیمدین عاجز و معزول و اَحْبَا مزاجیمدین متعجب و ملول. دماغیم پریشانلیغیدین سؤزوم نامربوط و خیالیم آشفته لیغیدین حالیم نامضبوط. بغیرم قیزیغانیدین جسمیمده حمای لازم و کؤنگلوم آزعانیدن باشیم ایلنماغی و کؤزوم قاررماغی دایم. نې تانگدین آقشامغچه اؤزومگه بیر دم غذادین کام، نې آقشامدین تانگغچه طرفه العینې

كۆزومگە اويقودىن آرام. خاطرىم سودا آمىز خياللردىن مشوش، بې سر و دلىقدين هر نېچە دلکش سۆز بۆلسە كۆنگلومگە ناخوش. معدەم نىنگ هضم قىلور غذاسى زمانە اهلى نىنگ ايداسى، كۆنگلوم نىنگ نشاط بزمىدە مى نابى فلک تيغى آقیزغان بغير خونابى. ناتوانى كيم، يوقارى مذکور بۆلغان دېك غذا قىلور، آشى مثقال تاشى بىلە بۆلغەى، اگر گاهى ضعيف خاطرى شربت مىلى قىلغەى، اول دغى بو تاش ترازوسى بىلە تارتىلغەى، كيشى قۇلدە مەيىن يېردىن قۇپرىدە كۆپ آزار بۆلغەى و عصا مددى بۆلمغونچە يېردىن قدم كۆترمگى دشوار، سىر هواسىن قىلسە ايگى انسانغە آتلندورور. توشورىدە حمالوشلىق و آتلانغاندىن سۆنگرە پىكرى يوكىدىن بىر حيوانغە مردەكشلىق، توشكىندىن سۆنگرە بو سىر كوفتىدىن اعضاسى ناكار، بو آزرده ليغدىن يەنە بىر كېچە. كوندوز تېرنە آلمى، انداق كە بىر يىللىق بېمار، ايسىغ نفسلىرىدىن حياتى نىنگ گلى پۆمرە و نفسى نىنگ آغىر كىرر. چىقىرىدىن ضعيف تى آزرده.

رباعيه:

هر شام و سحرغە تېگرو اينگرىماق ايشى،
بو يانيدىن اول يانيغە ايلنماق ايشى.
گە. گاه ايسىتمە اۋتيدىن يانماق ايشى،
گە تۇنگدورورىدىن يەنە چىرمنماق ايشى.

رباعيه:

نې جسمىدە تاب و نې تنيدە قوت،
نې كۆنگلودە خوشلوق، نې اۋزىدە صحت.
مونداق كيشى نىنگ مناسى دور غزلت،
ويرانەسىدىن چىقماق انگە نې نسبت.

سلطان صاحبقران نىنگ انعام بغايتىدىن و احسان بېنھايتىدىن عمرىن بو دولتليغ درگاهدە و حياتىن بو صولتليغ بارگاهدە يوقارى اۋتكەن شرح بىلە صرف اېتكەن بىندە نىنگ التماسى بو دور كيم،

مذكور بۇلغان تردد و مشقتلردىن آزاد بۇلغەي، و غمگين كۈنگلى بو نوع ضعف اياميده نسبتسيز قىغولردىن شاد، مونداق عمرده كيم، بوكون تانگله ليغ معلوم اهرمس.

مصراع:

ايش تېنگريگه توبه و انابت بۇلغەي،

و اۋتكن عمر معصيت بيله عذر تقصيريده طاعت و ندامت. بو حالتده دغى اوقات نينگ پاكيزه سيده اول حضرت نينگ دعاسيغه مشعوف بۇلغوسيدور و دعا و نيازى نقدى نينگ خلاصه سى اينىگ فرخنده روزگار يغه مصروف.

اميد اول كيم، اول حضرت دولتيدين انداق كيم دنيا اقبال و كاميدىن مستفيد بۇلدوم، آخرت كام و اقباليدىن هم نااميد بۇلمه غه يمېن. اول آستان نينگ قوللىرى نينگ بو قول بيله يارليغ نشانى اول دور كيم، سلطان صاحبقران عنايتيدىن بير يارليغ نشانى بيتليگه ي و بو بنده نى سلطاني عمارت نينگ بيت المغفره سيده ساير جاروب كشلريدىن بيرى نينگ اۋرنيغه منصوب و سرافراز ايتليگه ي كيم، بو افتاده ليغ اياميده بارى اول آستانده ييقيليغ يمېن. قوتيم بۇلغانده سوپورگو آليب، ايلگيم بيله و قوتيم بۇلمه غانده سوپورگو اۋرنيغه كيريگيم بيله اول آستانه نى سوپورور بهانه سى بيله كۈزومنى اول منور روضه توفراغيدىن ياروتغ يمېن و اول آستانه نى بو سوپورگو بيرله اريغ و بو اوينى اول سورمه بيله ياروغ توتقه يمېن و بو خدمتنى دنيا و آخرتيم شرفى بيلگه يمېن.

سۈزوم اوزلدى و ادا قيله دورغان مقصودوم ييراق قالدى. اگرچه خامه نينگ گوهر افشانليغيغه نهايت ييراق دور و لېكن دعا گوهر فشانليغى بيله اختصار قيلماق يخشراق.

رباعيه:

تا دهر اوزه بو گنبد دۋار اۋلغەي،
اول گنبد اوزه ثابت و سيّار اۋلغەي،
تا ثابت و سيّارغه آثار اۋلغەي،
تېنگرى بارى حالينگده نگهدار اۋلغەي.

رباعيه:

تختينگ بولسون سپهرِ اخضر چاغليغ،
چترينگ رفعتده مهرِ انور چاغليغ.
ملكونگ بر و بحر ارا سكندر چاغليغ،
لېكن عمرونگ نوح پيمبر چاغليغ.

رباعيه:

هم درگهينگ اقبال مڪاني، يارب،
هم باشينگ اوزه تاج كياني، يارب!
جامينگده زلالِ زندگاني، يارب،
اندين سنگه عمرِ جاوداني، يارب!

«الف» حرفى نىنگ آفتلىرى نىنگ ابتداسى «غرايب» دىن

۱

أَشْرَقَتْ مِنْ عَكْسِ شَمْسِ الْكَأْسِ أَنْوَارِ الْهَدْيِ،
«يار عكسين میده كۆر» دېب، جامدىن چىقتى صدا.

غير نقشىدىن كۈنگۈل جامىدە بۇلسە زنگ غم،
يۇقتور، اى ساقى، مى وحدت مَثَلِيك غمزدا.

اى، خوش اول مى كىم، انگە ظرف اۋلسە بىر سىنغان سفال،
جام اۋلور گېتى نما، جمشىد انى ايچگن گدا.

جام و مى گر بۇيلە دور، اول جام اوچون قىلماق بۇلور،
يوز جهان هر دم نثار، اول مى اوچون مىنگ جان فدا.

دير ارا هوش اهلى رسوا بۇلغالى، اى مغبېچە،
جام مى توتسنگ مېن دېوانەدىن قىل ابتدا.

تاكه اول مىدىن كۈنگۈل جامىدە بۇلغاچ جلوه گر،
چهره مقصود محو اۋلغەى هم اول دم ماعدا.

وحدتي بۇلغەى مىسر مى بيله جام ايچره كىم،
جام و مى لفظين دېگن بىر اسم ايله قىلغەى ادا.

سېن گمان قىلغاندىن اۋزگە جام و مى موجود اپرور،
بىلمەيىن نفى اېتمە بو ميخانه اهلىن، زاهدا.

تشنه لب اۆلمه نوایی، چون ازل ساقیسیدین،
«اَشْرَبُوا، یا اَیَّهَا الْعَطْشَان» کپلور هر دم ندا.

۲

زهی حسنونگ ظهوریدین توشوب هر کیمگه بیر سودا،
بو سودالر بيله کونین بازاریده یوز غوغا.

سپنی تاپماق بسی مشکل دورور، تاپمسیلیغ آسان کیم،
اپرور پیدالیغینگ پنهان، ولی پنهانلیغینگ پیدا.

چمن آتشگهیگه آتشین گلدین چواؤت سالدینگ،
سمندر دپک اول اؤتدین کولگه باتتی بلبل شیدا.

نې ایشکه بؤلدى بی آرام کؤزگو عکسی دپک مجنون،
یوزی کؤزگوسیده عکسینی گر کؤرگوزمه دی لیلا.

قویاشقه گه قیزرماق، گاهی سرغرماق اپرور اندین،
که صنعونگ باغیده بار اول صفت یوز مینگ گل رعنا.

نېدین یوز گل آچر عشق اؤتیدین بلبل کببی وامق،
یوزینگدین گر عذار باغیده گل آچمه دی عذرا.

کمالینگنی اگر شیرین لبیده قیلمه دینگ مضمهر،
نېدین پس لعل اؤلور فرهادینگ قان یاشیدین خارا.

جمالینگ پرتویدین شمع اؤتی گر گلستان اپرمس،
نېدین پروانه اؤت ایچره اوزین سالور خلیل آسا.

ملاحت بیرله توزدونگ سرو قدلر قامتین، یعنی،
که مونداق زبب بیرله اول الفنی ایله دینگ زبیا.

قناعت نینگ دلیلین انزوا قیلدینگ ینه بیر هم،
دلیل اوشبو که قانع حرفیدین خلق ایله دینگ عنقا.

نواپی قیسی تیل بیرله سېنینگ حمدینگ بیان قیلسون،
تیکن جنت گلی وصفین قیلورده گنگ ابرور گویا.

۳

ای صفحه رخسارینگ ازل خطیدین انشا،
دبیاچه حسنونگده ابد نقطه سی طغرا.

ذرات ارا هر ذره که بار، ذکرینگه ذاکر،
امطار ارا هر قطره که بار، حمدینگه گویا.

مشاطه صنعونگ دورور اول کیم، نفس ایچره،
کون کوزگوسین آقشام گلیدین قیلدی مجلا.

کون شکلی یوزینگ سجده سیدین بولدی مشکل،
تون طره سی قهرینگ ییلیدین بولدی مۇطرا.

صنعونگ قیلیبان صبحنی اول نوع مشعبد
کیم، مهر اوتین آغزیدین اېتر هر نفس افشا.

گویا که کویر آغزی اول اوت حرقتیدین کیم،

انجمدين اۋلور آبلەر گرديدە پيدا.

محتاج سېنىڭ درگھىنگە خسرو و درويش،
پرورده سېنىڭ نعمتىنگە جاھل و دانا.

گل يوزيده بلبل سېنىڭ اسرارىنگە ناطق،
شمع اۋتيدە پروانە سېنىڭ حسنونگە شيدا.

عشاق ارا، يارب كە، نوايىغە مقامى
بېرگىل كە، سېنىڭ حمدىنگە بۇلسون تىلى گۇيا.

۴

اى حمد اۋلوب محال فصاحت بىلن سىڭا،
انداق كە قۇب تقوا و طاعت بىلن سىڭا.

تاپماق عجيب فكر و تخيل بىلە سېنى،
يېتمك محال عقل و فراست بىلن سىڭا.

چون كاينات زبدهسى عاجز كۋروب اۋزىن،
حمد آيتە آلمس آنچه بلاغت بىلن سىڭا.

اظھارِ عجز بيزدين ادب تركى دور بسې
يوز مىنگ قصور و نقص و كثافت بىلن سىڭا.

ھر تيرە روزگار كە، وصلينگە يۇل تاپيب
سېندىن يېتىپ چراغ ھدايت بىلن سىڭا.

لطفونگ رفيقيم اولمه سه ني حد كه يپتکه مپن
باشدين اياغ گناه و ضلالت بيلن سنگا.

لطف ايله گيل كه ممكن ايمس قيلمه سنگ قبول،
يپتمک تمام عمر عبادت بيلن سنگا.

چون سپندين اوزگه يوق پنهيم قاجمه يين نپتي
جرم و گنه دين آه و ندامت بيلن سنگا.

عصيانى كؤپ نوايى ننگ و يوق اوياتي كيم،
ايستر يپتيشسه مونچه خجالت بيلن سنگا.

۵

الاها، پادشاها، كردگارا،
سنگه آچوغ نهان و آشكارا.

صبور اسمى بيله قيلسنگ تجلى،
قيليب نمرودغه يوز مينگ مدارا.

قچان كيم ظاهر ايتسنگ «تنزع الملك»،
سكندريننگ بؤلوب مغلوبى دارا.

يؤلونگ مهلك تاشى ياقوت احمر،
ايشيگينگ تيره گردى مشك سارا.

سها بؤلسه شبستانينگده طالع،
بؤلوب نوري قوياش دېك عالم آرا.

نوايي نفس ظلماتيغه قالميش،
سېن اؤلمه‌ي خضر ره چيقماق نې، يارا؟!

قيامته گناهين عفو اېترگه،
رسولينگني شفيع اېت، کردگار.

٦

اي نبوت خيليغه خاتم بني آدم ارا،
گرالر خاتم، سېن اول آت کيم، اېرور خاتم ارا.

يوز اېشيگينگ توفراغيغه سورته آغه‌يمېن مو دېب،
چرخ قصردين قوياش هر کون توشر عالم ارا.

انجم ايچره عارضينگ معراج شامي اؤيله کيم،
توشسه در شبچراغي هر طرف شېنم ارا.

نې اوچون کييميش قرا هر يان ساليب جيبيغه چاک،
فرقتينگدين کعبه گر قالميدورور ماتم ارا.

صاف کؤنگليده يوزونگ مھريني گؤيا اسره‌ميش،
توش چاغي هر کون قوياش عکسي اېمس زمزم ارا.

مشعلي بؤلميش ملک ايلگيده روضنگ باشيغه،
آي چراغي کپچه‌لر بو نيلگون طارم ارا.

قوم اېمس بطحاده کيم، مھر جمالينگ هجريدن،

ذره-ذره جسمی بیر-بیردین تۆکولدی غم ارا.

یؤل اېمس، یثربده بیرتیدور یوزین تیرناق ایله،
مقدمینگ تا بیتمه‌دی اول وادی خرم ارا.

ایتلرینگ مخصوص و محزون دور، نوایی کاشکی
کیرسه بو محروم هم اول زمره محرم ارا.

۷

زه‌ی جولانگه‌ینگ افلاک اوزه میدان «اؤ آذنی»،
براقینگه تۆقوز گنبد بو تۆقوز گنبد خضرا.

قیلیب چون خوی گلابی میل نعلینگ، بؤلوب آندین
ملک رعنا‌لری نینگ جبهه‌سیغه چرخ سندل سا.

اېسیب رحمت نسیمی چون دمام سنبلونگ ساری،
بؤلوب روحانیلر جیبی لبالب عنبر سارا.

فلک قالیب براقینگدین، اېمس وصفی فلک سرعت،
قمر یاروب جمالینگدین، اېمس نعتینگ قمر سیما.

یوزونگدین انجم، انجمدین قویاش نور اکتساب ایلب
انینگ‌دېک کیم، قویاشدین آی و آیدین قیرگون غبرا.

فلک وادیلری قطعیه عزمینگ چون سوروب مرکب،
خرد پیکینگه هم اول قدمده رنج اؤلوب پیدا.

رفیقینگ طایر انداق کیم سلیمان آلیده هدهد،
براقینگ سائر انجم شاهي اوستينده سپهر آسا.

قيليب بو سير ارا معشوق وصلی کوييده منزل،
تيلب سرگشته عشاقیغه هم رحمت اويين مأوا.

نوايي خوش کؤرر عالمی آتینگ ذکریدین، یؤقسه،
انگه دوزخ ارا اؤت دېک دورور دنيا و ما فيها.

۸

هر گدا کیم، بوریای فقر اپرور کسوت انگا،
سلطنت زربفتیدین حاجت اپمس خلعت انگا.

کیم فنا توفراغیغه یاتیب قؤیر تاش اوزره باش،
تخت اوزره اپرمس مذهب متکا حاجت انگا.

شه یوروب عالم آچر، درویش عالمیدین قاجر،
هم اؤزونگ انصاف بېرگیل کیم، بو نی نسبت انگا.

هر نی شه مقصودی دور، درویش نینگ مردودی دور،
کؤر، نی حکمت دور مونگه، نی نوع اپرور حالت انگا.

فقر کویی توفراغین شه ملکیگه بېرمس فقیر،
ملک کؤر کیم، تېنگ اپمس توفراغ ایله قیمت انگا.

شه سپه چېکسه، فقیر احوالیغه بیتمس فتور،
بو ولی چېکسه نفس، برباد اؤلور حشمت انگا.

شە اېمستور بىر نەفس آسودە دوزخ وھمىدىن،
اى خوشا دروېش كىم، مردود اېرور جنت انگا.

شەغە صدق اھلى دمىدىن مشعل دولت يارور،
مھردېك كىم، صبح انفاسى آچر طلعت انگا.

شاھغە شەھلىغ مىسلم دور، اگر بۇلغەى مدام،
شاھلىغ تركين قىلىپ، دروېش اولور نيت انگا.

ممکن اېرمس شەھلر ايچرە بۇيلە نيتلىغ، مگر
شاھ غازى كىم، مىسر بۇلدى بو دولت انگا.

شاھلر دروېشى و دروېشلر شاھى كە، بار
شاھلىغ ثروت انگە، دروېشلىغ سىرت انگا.

تا شە و دروېش بۇلغەى ايلە گيل، يارب، عيان،
شاھدىن خدمت مونگە، دروېشدىن ھمت انگا.

گر نوایی سۆز اوزتتى فقردين اېرمس دېمنگ،
بۇلمە غونچە حکم شەھدىن قیدە بو جرأت انگا؟!

۹

اول پريوش كىم، بۇلوبمېن زار و سرگردان انگا،
عشقيدىن عالم مېنگە حيران و مېن حيران انگا.

اؤقلىرىنگدىن دمبدم تسكين تاير كۇنگلوم اؤتى،

بار دورور بير قطره سو گۇيا كه هر پيكان انگا.

بير دلاور دور كۇنگول كيم، غم سپاهى قلبيده،
آهى ناوك، تازه داغى دور قيزيل قلقان انگا.

ناوكينگ نينگ پر و پيكانيده رنگين توس ابرور
يا كه كۇنگلومدين چو پران اوتتى يوقميش قان انگا.

نامه شوقوم نې نوع اول آيغه بېتكى، چونكه مېن
ابل آتين اوقور حسددين يازمه ديم عنوان انگا.

خضر خطينگ نينگ عجب يوق سيز و خرم بولماغى،
لب به لب چونكيم بېرور سو چشمه حيوان انگا.

اي خوشا، مغ كويى كيم، رفعت بيله زينته بلور،
مهر انگه بير شمسه و كوك طاقى دور ايوان انگا.

اېسته ميش بلبل وفا گلدين مگر كيم ژاله دين،
بغرى قاتميش غنچه نينگ، بس كيم ابرور خندان انگا.

قيلمه ميش جانين فدا جانانغه يېتمس دېر اېميش،
اي نوايى، اوشبو سؤز بيرله فدا يوز جان انگا.

۱۰

سينسه كۇنگلومده اوقونگ سورتوب ايسىغ قاندين انگا،
پى مثلليک چيرمه غايمېن رشته جاندين انگا.

بادۀ لعلینگ مزاجی روح پرور دور بسی،
گؤيا ممزوج اېتېب سېن آب حيواندين انگا.

اؤقى كؤنگلوم شعله سين گه ساكن اېتى، گاه تېز،
گه اؤتون بؤلدى، گهى سو اوردى پيكاندين انگا.

درد و غم بوستانى نينگ طاووسى دور كؤنگلوم قوشى،
گل بؤلوب جسميمده كېسكن نعل هر ياندين انگا.

نې كېوتر يېته آلور اول قوياشفه، نې نسيم،
اى كؤنگول، حالينگى اعلام ايله افغاندين انگا.

كؤزگه تاكيرميش خيالينگ ساووغ آھيم وھميدىن،
باغله ميشمېن قؤرې هر سارى مژگاندين انگا.

اى نوایى ييغله ماق آھيمگه تسكين بېرمەدى،
وہ، بو نې اؤت دوركە، يۇق تائير طوفاندين انگا.

۱۱

وہ كە عشقينگ ظاهر اېتسم وھم اېرور اؤلمك منگا،
گر نھان توتسم داغى جان خوفى دور بېشك منگا.

كېلگن اېرميش اول مسيح اؤلگنلرين تيرگوزگه لى،
مېن تيريك، وہ، يخشيراك بو عمردين اؤلمك منگا.

جزو- جزوومنى فغان كيم منفك اېتتى تيغ ھجر،

بیر- بیریدین لېک اؤزی دور جزو لاینفک منگا.

کۈنگلوم اۋتیدین ییغاچ کول دور، بشاک بیر قطره سو
ناگه اول شوخ جفاکېش آتسه بیر ناوک منگا.

آلتون اېزینیب- اېریب کویگن سایو خالص بولور،
نې عجب سرغرسه یوز، بیتگن سایو اېمگک منگا.

چاک ایلر مېن یقا اول قاشی یانی کۈرگچ- اۋق،
کیم خدنگین آتسه حائل بۈلمه غای کۈنگلک منگا.

باده هجریدین آقرمیش کۈزلریم، ای پیر دیر،
ایله گیل می شیشه سیدین سیندوروب عینک منگا.

صرصر هجران، وجودوم خرمنین انداق ساوور
کیم، فنا یۈلیده صرصر بۈلمه سین همتک منگا.

ای نوایی، گر منگه کۈپرەک اېمس امید وصل،
پس نغو عشاقیدین جوری اېرور کۈپرەک منگه.

۱۲

گرچه هجرینگدین اېرور یوز غم و آزار منگا،
غم اېمس، وصلینگه امید اگر بار منگا.

بیر بوزوغ اوزره جنون قوشلری قۈنغان کببی دور،
تاش کیم، یاغدورور اول شوخ ستمگار منگا.

زاھد اوچماغنى اپتر وصف و مېن اول آى كۋيين،
گلشن خلد انگه، اول گل رخسار منگا.

تېلبه انداغ كه پرى جلوه سیدین آلدره غه ی،
اؤت سالور هر طرف اول طرفه نمودار منگا.

بسكه قانیمنى یلرلر، عددی كۋپ یره دین،
ایتلری قیلدی ملایم تن افگار منگا.

كۋنگلوم ایسترینه مقصود جمالی عکسین،
ساقیا، توت قدح آینه کردار منگا.

سبحه تارینی ییغ، ای شیخ كه، بیر لحظه بورون،
تاقتیلر مغبچه لر رشته زنار منگا.

سالغیل، ای عشق، وجودیمغه فنا اؤتینی کیم،
یاپتی مقصود یوزین پرده پندار منگا.

چون وفا اهل زمان ذاتیده یؤقتور، نی عجب،
هر زمان قیلسه جفا اول بت عیار منگا.

غرضیم بیر نهچه کون شاهد و می دور، یؤق اېسه،
ای نوایی، بو فنا دیریده نی بار منگا؟

۱۳

اول ملاحت گنجی هجریده بوزوغ مسکن منگا،
اؤیله دور کیم، جاندین ایرو یوز یرالیغ تن منگا.

مەر ایلە ھەم پەرتویدین کۆزنی روشن قیلەدە،
بۆلگەلی مەر رُخونگ ماھیتی روشن منگا.

بۆلدى روزن-روزن اول قاتل خەنگیدین کۆنگول،
جان قوشى چىقماققە بىر يۇل انگە ھەر روزن منگا.

مەن اۆلرمەن غەمدین و يىغلب کویوب باشیمدە شەمە
دودیدین چىرمەب قرا ھەر تون توتر شيون منگا.

رحم اېتىب حالیمغە دۋست بۇلماق وە نې سود،
دۋست چون رحم ایلەمەي بۇلمىشتورور دۋست منگا.

غەم تونى ظلمیدە خەندان بۇلمەدەي حالیمغە صېح،
صېح دېک نې تانگ کە بۆلگەي چاک پىراھەن منگا.

اي نوایی، عشق مشکل دېب نېچوک ترکین توتەي،
اېلگە گر بو ايش ھەر بۆلسە، بۆلۈبتور فەن منگا.

۱۴

شەر بىر آي فرقتیدین بیت الاحزان دور منگا،
بىر گل رعنا غەمدین باغ زندان دور منگا.

بزم عشرت ايچرە سىز مې نوش اېتىنگ، اي دۋستلر،
کیم نصیب اول لەل لب ھجرانیدین قان دور منگا.

چىقتى عقل و فەھم ایلە صبر و کۆنگول تەن ملکیدین،

چيقمه يين هر لحظه زحمت بپرگوشي جان دور منگا.

اؤقى بس کيم تنده دور، تېگمس تنيمغه اؤزگه زخم،
اول که اؤق دېب ناله قيلدیم، اېمدی قلقان دور منگا.

اؤيله رسوامېن که، کؤی و کؤچه ده حالیم کؤروب،
بعضی اېل گریان و بعضی خلق خندان دور منگا.

هجریدین بغریم سو دور، اول سو ارا بالیغ کېی،
درد و محنت اؤقیدین بیر نیچه پیکان دور منگا.

حور مژگانین اگر سورتای دېسه قيلمان قبول،
کیم ایاغده آرزو خار مغیلان دور منگا.

می ایچیپ طاعتنی فوت اېتمنگ که اول اؤت تابیدین،
نیچه باقسم بهره حالا داغ حرمان دور منگا.

ای نوایی، خلق دېر: جان بېر و یا کېچ عشقیدین،
گرچه بو دشوار اېرور، لېکن اول آسان دور منگا.

۱۵

مېن دورور مېن کیم سېنینگ وصلینگ میسر دور منگا،
بخت گمره دین قچان بو قصه باور دور منگا.

حق تنوق دور کیم، تیریکلیکیدین منگه سېنسېن مراد،
یؤقسه عالم نینگ یؤقی-باری برابر دور منگا.

ای کۈنگۈل، غواص بحر وصل اۋلوبمېن، نې عجب،
گر نصیب اېمدی اۋشول پاکیزه گوهر دور منگا.

نې اوچون بزم وصال ایچینده ایچمه ی باده کیم،
کۈزی و آغزی بوگون بادام و شکر دور منگا.

آی و خورشیدینگی ییغ، ای چرخ گردون کیم، بو دم
همدم اول آی چهره لیغ خورشید پیکر دور منگا.

سرونی اۋرتب، سمنی ییگه بیر، ای باغبان،
کیم بوگون همصحبّت اول سرو سمنی دور منگا.

قۇرقره حرمٰن سحابین یاپمه غای فهم اتسه چرخ،
کیم شبستان مهر شمعی دین منور دور منگا.

ای نوایی، هیچ بیلماں کیم تاپیمین وصلینی،
یا مگر کیم جمله عالم مسخر دور منگا.

۱۶

کۈرگه لی حسنونگی زار و مبتلا بۇلدوم سنگا،
نې بلالیغ کون اېدی کیم، آشنا بۇلدوم سنگا.

هر نیچه دېدیم که کون- کون دین اوزه ی سېندین کۈنگۈل،
وه که، کون- کون دین بترراق مبتلا بۇلدوم سنگا.

مېن قچان دېدیم وفا قیلغیل منگه، ظلم آیله دینگ،
سېن قچان دېدینگ فدا بۇلغھیل منگا، بۇلدوم سنگا.

قى پرى پىكرغە دېرسىن تېلبە بۇلدىنگ بو صفت،
اى پرى پىكر، نې قىلسنگ قىل منگا، بۇلدوم سىنگا.

اى كۇنگول، ترك نصيحت ايله دىنگ آواره بۇل،
يوز بلا يېتمس كه، مېن هم بير بلا بۇلدوم سىنگا.

جام جم بيرله خضر سويى نصييم دور مدام،
ساقيا، تا ترك جاه ايلب گدا بۇلدوم سىنگا.

غصه چنگيدىن نوايى ناپمه ديم عشاق ارا،
تا نوايى دېك اسير و بېنوا بۇلدوم سىنگا.

۱۷

قهرىنگ اؤلسه، برچه ايشيمدين ملالت دور سىنگا،
لطفونگ اؤلسه، يوز مېنىنگ دېكدين فراغت دور سىنگا.

اى مېن سرگشته دىن گه فارغ و گاهى ملول،
قهرىنگ اول، لطفونگ بو، يارب كيم، نې عادت دور سىنگا.

لطفونگ آزي جان آلور، قهرىنگ كۇپى هم اؤلتورور،
بوالعجب حالې دورور، آيا نې حالت دور سىنگا.

پند اېشيمه ي سپودىنگ آنى، اى كۇنگول، چېك درد و رنج،
آز دورور هر لحظه گر يوز مونچه آفت دور سىنگا.

وهم اېت آھيم اؤتيدىن، اى گل، كه دوران باغيده

كۆز ياشىمىدىن بو قدر لطف و طراوت دور سىنگا.

اى قوياش، مهر اهلينى كويدورمه بو واديدە كيم،
گرمرولر آهيدين مونچه حرارت دور سىنگا.

اى نوايى، ايسته مه وصل اول قوياشدين ذره دېك،
چون نېچه اول قىلسه استغنا، حقارت دور سىنگا.

۱۸

اى الف دېك قامتىنگ مىلى بوزولغان جان ارا،
گنج حسونىگ جوهرى بو خاطر ويران ارا.

كولمكىنگ ايچره ملاححت اؤيله دور كيم، شوخلر
اؤينه ماقدىن يوز ياشورورلر گل خندان ارا.

خسته كۈنگلوم آهى كۈنگلونىگ گە دېدىم قىلغەى اثر،
قىدە اۋلتورسون ولى بېمار اۋقى سندان ارا.

باشته گوهر گۈيى نىنگ فكريدين آرتر درد سر،
كىم كه كېچتى باشيدىن گۈي اوردى بو ميدان ارا.

اوى كه ادنى تېره نور ساكنىگه خاطر جمع اېمس،
نې عجب، گر امن يۇقتور گنبد گردان ارا.

لعلينىگ آلمان كۈنگلوم احوالين منجم چون كۈرر،
ايتور اول آواره بۇلغان غايىنىگ دور قان ارا.

ای نوایی، عشق دردی کۆرگن اېل کۆنگلین بوزر،
هر خراشې کیم، اونونگ ظاهر قیلور افغان ارا.

۱۹

کیم که کۆرسه مشکِ ناب اول سنبلِ سپراب ارا،
بیر قرا توفراغ دېگه ی کیم توشتی مشکِ ناب ارا.

قاشینگ ایچره رشته جانیمغه چیرمنغان کۆنگول،
عنکوتې دور که ایلبدور وطن محراب ارا.

اول قویاشدین ایرو اشکیم یامغوری لینگ برقی دور،
اؤت توتشقان رشته ینگلیغ جسم پیچ و تاب ارا.

اول لبِ عنابگون کۆنگلومگه اېککن تخمِ مهر،
کۆنگلوم ایچره یاشورون دور دانه دېک عناب ارا.

اویقو صیدی قصدیغه آتقان تاشینگدین دور نشان،
کۆز قراسی دېمه گیل بو دیده بی خواب ارا.

چرخِ دائر بحریدین اېل توتمه سون ساحل امید،
کیم قوتولمس هر کیشی کیم، توشتی بو گرداب ارا.

گر نوایی یادینی قیلماق حبیب امکان اېمس،
بس دورور مذکور هم بؤلسه گهی احباب ارا.

۲۰

زورق ايچره اول قوياش سير ايله مس جيحون ارا،
اخترِ سعدې هلال ايچره كېزر گردون ارا.

انگله مان جيحون ده اول آي كېمه بيرله سير اېتر
يا هلال و مهر عكسين اېل كؤرر جيحون ارا.

كېمه دين هر دم چيقيب رنگين سو كؤزوم قاني دېك،
انده يار انداق كه مردم ديده پر خون ارا.

بارغيل، اي مجنون كه، اول آي زورقي دېك تېز اېمس،
جونگ كيم ليلا عماريسين چېكر هامون ارا.

آلمه خُم گرداييدن بير لحظه ساغر زورقين،
بحرِ غمدن ايسته سنگ مخلص بو دهرِ دون ارا.

بحر موجيدن مشوش بؤلمه سون دېب خاطرينگ،
موج اورر يوز بحرِ غم بو خاطرِ محزون ارا.

دُر بؤلور بحر ايچره پنهان، نظميدن شه مدحيده
بحر ياشورميش نوايي هر درِ مكنون ارا.

۲۱

مينگ زخم اوردي خنجرِ عشقينگ بو تن ارا،
بو تنني هجر تشله دي يوز مينگ تيكن ارا.

لېك اول تيكنلر ايچره خيالينگ بيله كؤنگول
اؤينر مگر گل اوزره و اغنر سمن ارا.

جسم اوييدين كۈنگول تيلر اول كۈيىنى، ولېك
غربت صعوبتتىن كىشى بىلمس وطن ارا.

اېرمس اوچوغ لىيىنگده كه اول يوز سۈيلىدىن
رنگ آلمەدى بو قطره عقيق يىمن ارا.

جانىم لىيىنگ شەيدى اېكىنگە تانوغ دورور،
هر آل رشته قانغه بۇيلغان كفن ارا.

بلبل نې كويمەسون كه، بىر اۋت ياقنى قصديغه
هر آتشىن گل اوشبو وفاسيز چمن ارا.

كۈردونگ نوایی اول سر زلف اوزره يوز شكن،
كۈر اېمدى يوز شكسته كۈنگول هر شكن ارا.

۲۲

ايگى برماغ بيرله توتتوم لعلين اول رخسار ارا،
اۋيله كيم بلبل توتر گل يفراغين منقار ارا.

خطده رخسارينگ سو اېركين مو ياشونغان سبزه ده،
يۇقسە كۈزگو دور كه قالميش هر طرف زنگار ارا.

كوہ غم تارترغه خس دېك جسم ايله بېل باغله ديم،
آستيغه قالميش مېن انداغ كيم سمان دېوار ارا.

مى دېمە قوشلر قناتى نىنگ يېلىدىن بۇلغوسى،

نخلِ قدینگ مایل اۇلماق ھر طرف رفتار ارا.

شکرِ لعلِ خیالیدین سراسر مور دورور،
ساچیده اهرمس توگون اوزره توگون ھر تار ارا.

کافرِ عشق اۇلغان آولا دېمەسه ایمان سۆزین،
خوب اېمس تسبیح تارى رشتە زنار ارا.

وسمه اوزره زر ورقلیق ایکی قاشینگ یوز اوزه،
جلوه گر بۇلغان ایکی طاووس ابرور گلزار ارا.

قامتیم گلر آچیلغان بیر تیکن شاخی دورور،
تۇلغەلى پیکانلرینگ قانلیغ تن افگار ارا.

گلشن ایچره چون بوتر گل، شۆره یېردین شۆره زار،
غیرِ غدر اهلی نې بۇلغەلى عالمِ غدار ارا.

دور اېلى بېدادیدین گر مخلص ایسترسېن، مدام
کُپ ایاغیدین باش آلمه کلبه خمار ارا.

حق تیلر بۇلسنگ نوایی سیلک دنیادین اېتک،
عشقینگ اۇلسه پاک، اوزنی قۇیمه بو مردار ارا.

۲۳

کۇنگلوم اؤرتنسون اگر غیرینگه پروا ایلهسه،
ھر کۇنگول هم کیم سېنیگ شوقینگنی پیدا ایلهسه.

هر كيشى وصلين تمنا ايله سم نوميد اوله‌ي،
هر كيشى هم كيم سېنينگ وصلينگ تمنا ايله سه.

اوزگه لر حسنين تماشا ايله سم چيقسون كوزوم،
اوزگه بير كوز هم كه حسنونگنى تماشا ايله سه.

غير ذكرين آشكارا قيلسه لال اولسون تيليم،
قيسى بير تيل هم كه ذكرينگ آشكارا ايله سه.

رشكدين جانيمغه هر نرگس كوزى بير شعله دور،
باغ ارا ناگه خرام اول سرو رعنا ايله سه.

يوق آغيزدين نكته ايتور مهوشيم دېك بولمه غاي،
گر قوياش هر ذره سيدين بير مسيحا ايله سه.

عافيت جانيمغه يېتتى، اى خوش اول مغ كيم، مېنى
بير قدح بيرله خرابات ايچره رسوا ايله سه.

كېلتورونگ دفع جنونيمغه پريخوان، يوق طبيب
كيم اول انسب دور پرى هر كيمنى شيدا ايله سه.

صبح دېك بير دمده گردون قويمه غاي آثارينى،
ناگه اهل صدق كۈنگلى مھرين افشا ايله سه.

دھر شوخيغه، نوايى، صيد بولمه نېچه كيم،
كون عذارى اوزره تون زلفين مطرا ايله سه.

اېرور عشق اهلی گورستانی و یوز مینگ مزار انده،
فنا شهری و لوح و میلدین طاق و منار انده.

عجب شهری که اوی گور اؤلغهی و سگانی جانسیز تن،
معاشر ماتمیلر، نوحه اهلی نغمه گار انده.

کؤنگوللر تازه-تازه داغ ایله قان ایچره آیلنغان،
کؤررسپن لاله دین گه-گه گذر قیلینگ بهار انده.

گیاه اېرمس که عشق اهلی شهیدی بغریغه قانغان،
بؤلوبتور برچه زهر آلود نیشترا آشکار انده.

مگر توسن مینیب، سنچیب اېتک، تارتیب قیلیمچ هر دم،
اولوس قتلیغه جولان قیلیمیش اول چابکسوار انده.

بو اؤلگنلرگه عمر خضر بېرگهی، گرینه ناگه،
مسیحیم آب حیوان ینگلیغ اېتسه بیر گزار انده.

کؤرونکلر عشق دشتین کیم، نسیم و لاله دین هر یان،
گهپ جانبخش سلقین دور، گهپ مهلک شرار انده.

اېرور عشق آیتی کیم، نقطه سی نینگ دانه سین کؤرگچ،
توشر ارواح قدسی قوشلری بی اختیار انده.

نواپی، دیر ارا کیر، گر فنا جامی تیلر کؤنگولونگ،
ریا دور خانقه اهلیده، بارمه زینهار انده!

داغلر کیم، قۇیدوم اول آی فرقتی آزاریده،
دودی هر بیرنینگ ابرور داغی فلک رخساریده.

ضعفیم ایچره قصری تامیغه ته یَنغاندېک دورور،
هر سمان کؤرسنگ یاپوشقان کویی نینگ دېواریده.

بیر مسلمانغه ابرور دین قصدی ایتکندین حساب
هر توگون کیم، کؤرسنگ اول کافر ساچی زُناریده.

گلشن ایچره کؤپ بنفشنگدین دېمه، ای باغبان،
نیل ایله کؤر خالدر هر یان یوزی گلزاریده.

قۇیدی گلگون مهرلر جان پرده سیده قان ایله،
وه که، سالور مهری، یا گل مو اېکن دستاریده.

تغه جان کیرگن کبی جاناننی یتکور، ای طبیب،
اېمدی کیم، جاندین رمق ظاهر اېمس بېماریده.

وه که بیر قاتلغه عاشقمېن که جان نینگ بیمی بار،
عشقی نینگ جان ایچره هم اخفاسی، هم اظهاریده.

تاپمه سنگ دور اهلیدین مهر و وفا، عیب اېتمه کیم،
بوتمه میش بو مېوه دوران باغی نینگ اشجاریده.

ای نوایی، عقل و دین یغما قیلور دوران میی،

چىق روان بو بزمدين فى الجملة هوشينگ باريدە.

۲۶

اى كۈنگۈل، گر كيمسە احواليم دېمىس يار آليدە،
خاطرېم كيمدين ملول اۋلسون، كيمىم بار آليدە؟!

اول كۈز آليدە ھلا كيم دېسەلر، يۇق باك ھېچ،
گرچە اۋلمكدىن دېمك يۇق شرط بېمار آليدە.

نې جفاكشمېن كۈرونك كيم، بار انگە قىلماق جفا،
سۈز وفادين ظاهر اېتسم اول جفاكار آليدە.

آليغە گللىر كە سنچييدور، مشابە دور انگە،
كيم توشر گاھې مُلۈن مھر دستار آليدە.

كۈزلرينگ قانيم غذا قىلسون اگر يالغان دېسم،
بىر قاشوق قانيم بېل اول ايگى خونخوار آليدە.

مى بېرور بۇلسنگ منگە دير ايچرە بېر، اى مغېچە،
كيم قۇيەى باشيمنى قۇيسم پېر خمار آليدە.

اى نوايى، اېر اېسنگ دنيا عروسين قيل طلاق،
بىر يۇلى بۇلمە زبون بو زال مكار آليدە.

۲۷

دھر اېليدين نفع اگر يۇقتور، ضرر ھم بۇلمەسە،

مرهم ار يۇقتور، كۈنگۈلگە نىشتىر ھىم بۆلمەسە.

عالم اھلىدىن اگر يۇقتور جگرگون ساغرى،
كاشكى يوز مىنگ قدح خون جگر ھىم بۆلمەسە.

مھوشى كىم بۆلمەغاي وىلىدىن اُمىد حیات،
خوش دورور كىم جانغە ھىجرىدىن خطر ھىم بۆلمەسە.

بېدلى كىم، بېخىر توشكەى بىراو ھىجرانىغە،
نې بلا دور گە- گھې اندىن خىر ھىم بۆلمەسە.

ساقيا، نېتكەى مېنى اول نوع قىلىسنگ مست كىم،
عقل و ھوشىمدىن نشان، بلكىم اثر ھىم بۆلمەسە.

كىم توزەى مستانە شاھ غازى اوصافىدە صوت،
بو كۈنگۈل گر بۆلسە اۋز حالىدە، گر ھىم بۆلمەسە.

اى نوايى، سېن چېكرسېن آھ، لېكن يىخشى دور،
اول پرى نىنگ زلفى بو يېل بىرلە در ھىم بۆلمەسە.

۲۸

نې خوش بۇلغاي ايكاولان مست بۆلسق وصل باغىندە،
قۇلوم بۆلسە انىنگ بۇينىدە و آغزىم قولاغىندە.

دمې وصل ايچرە والەليغ بىلە رخسارىم اېگىندە،
ينە بىر دم نياز و عجز ايلە باشىم اياغىندە.

توتوب گاهى زىندانىن مكرر ايله سم بات. بات،
كۆروب گللىر آچىلغان بادەدىن رخسارى باغىندە.

شىمىي يوتىسم گەھى حيوان سويى دېك ذوقدىن كۆرگىچ،
تەرشۇ بادەدىن گل يىفراغى يىنگىلىغ دوداغىندە.

گەھى كۆز سورتىمدە، يوقسە ھەريان شادلىغ اشكىم،
گل اوزرە قىطرە شېنىملەر كېيى سىمىن سقاغىندە.

گەھى بېخودلوغومدىن سېسكىنىپ توتىسم ادب رىسمى،
بېلىگە چىرىمىشۇردە شوق نىنگ افراطى چاغىندە.

نې كېلسە تانگە كېلسون، بىر تون اوسروك ياتسە ھەم خوشتور
كىشى گل چاغى بىر گل خرمىن تارتىپ قوچاغىندە.

قېچان دوران مىنگە بىر بۇيلە عشرتى روا كۆرگەي،
كە اۋرگىتىش مېنى اۋرتىگە ھىجران درد و داغىندە.

نوايى، سېن كىم و عشرت مىي، بىلىمس موسېن كىم، ايت
اگر قان ايچسە ھەم باشى كېرەك تور اۋز يلاغىندە.

۲۹

يار توتر كۆنگلومدە گردوندىن جدا بۇلغان بلا،
جانە دور دېوانە كۆنگلومدىن خطا بۇلغان بلا.

اىستەمان كىم، عشق مېندىن اۋزگەنى قىلغاي اسير،
ھىچ كىشىگە بۇلمەسون، يارب، مىنگا بۇلغان بلا.

شاد يوزلنمىڭ، بلالار، بىزگە كىم بۇلمىس خلاص،
بو كۈنگۈل زندانى ايچرە مېتلا بۇلغان بلا.

وصلیدە رشك اۋلتورور، هجریدە غم، وه كىم، منگە
وصل ارا بۇلغان بلا دور هجر ارا بۇلغان بلا.

اۋلتورورلر همدىمىڭ بۇلىسم، اۋلىمېن، بۇلمەسم،
بۇلمەغان، جانا، سېنىڭ بىرلە بلا، بۇلغان بلا.

ناصحا، عاشقلىغىمنى منع قىلدىڭ، بىلمەدىڭ،
كىم نصيحت بىرلە دفع اۋلىسم قضا بۇلغان بلا.

چون بلاسىز كام يۇق تاپمس بقا كامىن مگر،
كىم كە آنى اۋرتەمس آتى فنا بۇلغان بلا.

اى نوايى، تاكه باردى يار، بىلدىم هجر اېمىش
شدت ايچرە هر بلىتدىن سوا بۇلغان بلا.

۳۰

خلعتين ايلب مو دور اول شوخ سىمىنبر قرا،
تون سوادى بىرلە كىيگن دېك مه انور قرا.

اول پرى هندوسىمېن مېن تېلبه كىم، عريان تنيم
طفللر تاشيدىن اينك بۇلدى سر تا سر قرا.

اشك دېك آتتى قرا سو كۈزلرىمدىن هجریدە،

تانگ يۇق ادبارىم چو بۇلمىشدور منگە اختر قرا.

كاش اويوب ياقسنگ قرا بۇلغان كۇزوم نىنگ مردمين،
خال ميگونونگنى قىلغانچه قۇيوب عنبر قرا.

عشق دفع اۇلغاچ كۇنگولگه يۇقتورور جز تيره ليك،
اول صفت كيم شعله سى اۇچكچ، بۇلور اخگر قرا.

غيردين قىلغىل ضميرىنگ صفحه سين پاك، اى فقيه،
تا به كى قىلماق فريب و مكر ايله دفتر قرا.

دود آهيدين قرا ابرمس نوايى كلبه سى
كيم، قىليبتور خان و مانين بير پرى پىكر قرا.

۳۱

هم رمد تېككن كۇزىنگه جسم بېمارىم فدا،
هم اوچوق چىققان لىبىنگه جان افكارىم فدا.

اشك كيم، اندين تامر، گريان كۇز آنىنگ صدقه سى،
قانع كيم موندن چىقر بو چشم خونبارىم فدا.

اول كۇز و بولبغه عمروم باغ و گلزارينده غى
نرگس و گل برگى، يۇق كيم، باغ و گلزارىم فدا.

كۇز و آغزىنگدين كېترگه بار و يۇق آشوب و رنج
صبر و عشقيم صدقه، يعنى كيم، يۇق و بارىم فدا.

گر کۈنگۈل آھو کۈزونگ آئیدە لایق بۇلمەسە،
ایتلرینگگە بۇلسون، ای شوخ ستمگاریم فدا.

جان اگر شیرین لبینگە اۋلگەلی درخور اېمس،
ایله‌ی الفاظینگ اوچون، ای تلخ گفتاریم، فدا.

اۋزلوگوم نینگ قیدیدین بیر می بیلە قیلدینگ خلاص،
وہ نہی دبی، ای مغ، سنگە بت بیرلە زُناریم فدا.

بادە مرآتیدە شاهد عکسی ظاهر بۇلمەدی،
بادە و شاهدقە بۇلمە‌ی نقد پنداریم فدا.

ای نوایی، دېمە کیم جان و کۈنگۈلنی نیلەدینگ،
ایله‌دیم جولان قیلیب چیققندە دلداریم فدا.

۳۲

دیر اېل ساغرینی قیلدی می ناب تۈلە،
جز مېنینگ اېسکی سفالیمنی که، خوناب تۈلە.

جام می دېک تۈلە قان بۇلدی ایچیم بېرمە‌ی دست،
یار بزمی ارا بېر جام می ناب تۈلە.

وہ کہ، هر کیرپیگی بیر نیشتراپور زهر آلود،
گر چه بار اول ایکی نرگسده شکرخواب تۈلە.

ژالەلر تۈشتی مو گل برگی ارا، یا خود اېرور
حقە لعلینگ ایچینده در سېراب تۈلە.

عارضينگ عكسى دورور كؤزده گى ياش اپوروله دور،
باغ جنت گليدين بؤلدى بو گرداب تۆله.

مېن و مغ ديرى ارا مغېچه باشيده غلو،
سېن و زهد اهلى بيله مسجد و محراب تۆله.

اي نوايى، نېچه آز-آزغينه مى مدرسه ده،
دير ارا كير كه، ايچر شيخ تۆله، شاب تۆله.

۳۳

آنچه دوران بيرله كؤردوم اهل دوراندين جفا
كيم، كؤزومگه توتيا دېك بؤلدى جاناندين جفا.

بو جفا دفعين نې ينگليغ ايله گه يمېن كيم، يېتر
ايله سم كيمدين جفا منعين طمع، آندين جفا.

مينگ جفا هر لحظه كؤرسم، بير طرف، اول بير طرف
كيم، يېتر جانان اوچون جانيمغه هجراندين جفا.

صيد دېك كيم، چرگه ده يوزلنسه هر يان كېلگى-اؤق،
اهل دوراندين كېلور كؤنگلومگه هر ياندين جفا.

گر كؤنگول اول زلفدين كؤرسه جفا، وه نې عجب،
چون كؤرر اوشبو سيه روز پريشاندين جفا.

انگله، جانا كيم، جفا قيلماققه تاپقونگ يۇق كيشى،

مېن جفاکشگه نېدين کيم اوتتي امکاندين جفا.

کېچهلر اول آي جفاسيندين که افغان تارترهم،
اول خود آرتوقراق چېکر هر تون بو افغاندين جفا.

نې مسلمانليغ بولور اوشبو که، دوران باشيمه
يپتکورور هر دم ينه بير نامسلماندين جفا.

اي نوایی، بارغھلی جانان سري جانيم، يپتر
جانگه جاناندين جفا، مېن خسته غه جاندين جفا.

۳۴

گل اوزره خط مشکين بيرله تا قيلدينگ رقم پيدا،
منگه جان صفحه سيده بولدي يوز خط الم پيدا.

توگانلر کونگولوم ايچره لذت دردينگي بيلدوردی،
تنعم دست بېرمس کيمسه گه، بولمه ی درم پيدا.

شفق گون يوز، هلالی قاش ايله تا جلوه گر بولدونگ،
کوزومده بولدي قان ظاهر، قديمده بولدي خم پيدا.

صمد قيلغاچ ظهور اول نوع کيم اصنام اولور معدوم،
بولور بتلر بری مبهوت، بولغاچ اول صنم پيدا.

چو ايلر جلوه حسن اول پری عشاق ارا، نېتگی
يوزون ياشورمه سه بولغان زمان مېن تېلبه هم پيدا.

نې مېلك وادى اېرمېش عشق دشتى كېم، كېشى اندە
قدم اورغان دم-اۋق كۈزگە بۇلور ملكِ عدم پيدا.

قۇيونگ يىغلهى كه كۈنگلوم نېنگ غبارى پستراق بۇلسون
كه، منع گرد اپتر ناگه هواده بۇلسه نم پيدا.

آقېزغېل باده سېلابېنى، اى ساقى كه، هجراندين
كۈنگول دشتيده بۇلمېش كاروانِ درد و غم پيدا.

نوايېنى چو سۇردونگ، اى پرى، بېر دم توقف قىل،
كه اول مجنون بۇلور صحرا يوزيدين دمېدم پيدا.

۳۵

بۇلسه ايكېمېزېنېنگ يوزى عكسى سوده پيدا،
اول سو نې طرف بارسه، آچېلغھى گلِ رعنا.

زلفونگ غمى كۈنگلومنى بېلېنگ فكريگه سالدى،
كۈر كېم، نې تخیلغھه سالىپتور انى سودا.

غوغا قىلور اېل مېوشلر كوييده، لېكن
مېوشلر ايشى قىلماق انېنگ كوييده غوغا.

احوالېمه فرهاد ايله مجنونغه تعجب،
عشق اېتتى خرد اهلى قاشيده مېنى رسوا.

هر سارى تماشاغه كېم، اول شوخ قىلور عزم،
يۇق انگه تماشاكه، اېرور اېلگه تماشا.

دوران سنگه ظلم اپتسه، قدحلهر تۆله می ایچ،
قان یوتسنگ ایاغلهر تۆله دورانغه نې پروا.

اول شوخ که میدان ارا کؤرگنگه سالور تیغ،
کؤرمسگه سالور، یپتسه نوایی سری عمدا.

۳۶

می بیرله یوزونگ تیم-تیم احمر مو اپکین آیا،
یا شعله ارا بیر-بیر اخگر مو اپکین آیا؟

هر ساری قولاغینگده گوهر مو اپکین یاخود
هر جانبیده آی نینگ اختر مو اپکین آیا؟

رخسارینگ اوزه خویدین یوز قطره که کؤرگوزدونگ،
گل برگیده شبنمدین گوهر مو اپکین آیا؟

غنچه ایچیده دوران محکم تیکن اورغان دېک،
کؤنگلوم ارا غمزه نگدین خنجر مو اپکین آیا؟

کؤنگلوم قوشی کیم قالمیش زلفونگ ارا سرگردان،
سودا تونیده سایر شب پر مو اپکین آیا؟

زلف ایچره یوزی ینگلیغ آفاقنی کویدورگن،
آهیم توتونی ایچره آذر مو اپکین آیا؟

هجرانده مو اول مهوش اغیارغه مایل دور

يا زهرِ فراق ايچره نيشتر مو اېكين آيا؟

جان پرده سیده هر يان کيم، ينگي توگانلردور،
قتليمغه فلک توزگن محضر مو اېكين آيا.

اېل دېسه نوایینی کيم جور ايله ترک اېتتی
عشقینگی، سنگه بو سؤز باور مو اېكين آيا؟

۳۷

زار جسمیمغه خدنگینگ زخمیدین آرتر نوا،
سازدېک کيم، تېشسه لر آنی فزون ایلر صدا.

قدی هجرینده غمیم شمعینی هر دېوارغه
کيم ته ییمین سر و اندامی بیله بولمیش قرا.

غنچه نگ انفاسی نسیمی زورقِ جان قصدیغه
یېتکورور هر دم عدم دریاسیدین موج فنا.

آرزوی وصلیدین رنجور اېرور مونگلوغ کؤنگول،
قوت اوچون تزویر ايله بېمار اؤلغان دېک گدا.

نېگه ییغلب عنبرین زلفین کپسر هجران تونی،
اؤلمگیمنی انگله بان گر شمع توتمیدور عزا.

هجر دردین کؤنگلومه کم قیلدی خالینگ عاقبت،
داغ اېمیش دردِ شلایین خسته غه آخر دوا.

روح پرور دور نوایی آهی اول یوز شوقیدین
اول صفت کیم، لاله و گل یوزیدین کپلگهی صبا.

۳۸

نې نوا ساز ایله گهی بلبل گلستاندین جدا،
ایله مس طوطی تکلم شکرستاندین جدا.

اول قویاش هجرینده قورقمین فلکنی اؤرتگی
هر شراری کیم، بولور بو اؤتلوغ افغاندین جدا.

دېمه، هجرانیمده چپکمه یسین فغان و ناله کؤپ،
جسم ایلمو فغان بولغان نفس جانندین جدا؟

هجر اولومدین تلخ اېمیش، موندین سونگ، ای گردون، مېنی
ایله گیل جانندین جدا قیلغونچه جانانندین جدا.

بؤلسه یوز مینگ جانیم آل، ای هجر لېکن قیلمه غیل،
یارنی مېندین جدا یاخود مېنی آندین جدا.

وصل ارا پروانه اؤرتندی همانا بیلدی کیم،
قیلغودېک دور صبح آنی شمع شبستاندین جدا.

بیر ایه سیز ایت بؤلوب اېردی نوایی یارسیز،
بؤلمه سون، یارب که، هرگز بنده سلطانندین جدا.

۳۹

مهوشا، سرو قدا، لاله رخا، سیم تنّا،
چاره کیم، قالمه دی صبریم غم هجرینگده ینا.

اخترِ سعد سپینگ دپک که توغوپتور گویی
کیم، قویاش اپردی اتا و تؤلین آی اپردی انا.

گر فلک سیری دور ایستر سپنی ایلک تک و دو،
ور ملک ذکرین ایشیتسنگ سنگه دهر مدح و ثنا.

اؤیله عشقینگ میی لب تشنه سیمین کیم، ایچمان
آز دپان، بادهم اوچون بؤلسه فلک جامی انا.

عشق محنتلری ترکینی بویورمنگ منگه کیم،
موجبِ صحت و قوت دورور اول رنج و عنا.

خانقاه ایچره ابرور شیخ و اوزین کؤرستمک،
ای خوشا، مغیچه لر جلوه سی و دیر فنا.

جز نوایی باریغه جام کرامت توتونگ،
«أَيُّهَا السَّاقِيُ مِنْ كَأْسٍ فَنَّا أَيْنَ لَنَا».

«ب» حرفی نینگ بلالری نینگ بدایتی «غرایب» دین

۴۰

زهی وصالینگه طالب توتوب اوزین مطلوب،

محبیتیدین آتینگنی حبیب اتب محبوب.

عروجینگ آقشامی بۆلمەى تۆقوز سپەر حجاب،
یوزونگ خجالتیدین مهر اۆلوب ولې محبوب.

اۆت ایچره توشسه بۆلور نسبتی سمندر دېک
کیشی کیم، عشقینگ اۆتیغه اۆزین قیلیب منسوب.

ایتینگ حسابیغه کیرگن حساب وقتیده،
اگرچه جرمی ابرور بېحساب، اېمس محسوب.

کتابت اېتمه گنینگدین قلمده نال اېرمس
که، توشتی کۆنگلی ارا تاب اۆیله کیم مکتوب.

لباس ماتم ارا قالدی تا ابد سایه
که، مهریدین نېگه یانینگده بۆلمەدى مصحوب.

مطیع امرینگ اگر پادشاه، اگر سائل،
گدای خانینگ اگر هوشمند، اگر مجذوب.

عجب یۆق آلسه کۆنگول هوشین اول ایکی گیسو،
بو بۆلسه سلسله، کۆپ تېلبه نی قیلور مغلوب.

تېله سه روضه نی زاهد، نوایی و کویونگ
که، هر کیشی انی ایستر که، بار انگه مرغوب.

۴۱

ايگي اوتلۇغ نرگسینگ كيم، قىلدیلر بغريم كباب،
بيري دور عين خمار ايچينده، بيري مست خواب.

تيغ تارتيب دم آله آلمه ي پيتشتينگ باشيمه،
گوييا خورشيد ينگليغ يۇلدە كۇرگوزدونگ شتاب.

آفرينيش بس كه احواليمغه ييغلر هر كېچە،
اشك درياسى ابرور گردون و كوكبلر حباب.

تالپينورمېن اشك ارا هر دم كه تيشلر لعليني،
كيم تېنگيزگە توشسە، جان وھميدىن ايلر اضطراب.

رنج و ضعيفم بۇلميش انداق كيم سۇرر كېلگن اولوس،
حاليم ايلرلر سوال، اما اېشيتمسلىر جواب.

نېچە تسبيحينگ حسابى، زاهدا، ايچ باده كيم،
سېن و مېن دېكلرگە خود بو كارگەدە نې حساب.

گر كرم درياسى نينگ موجى بو دور كيم، چاغله ديم،
قانى اؤز بۇيىنغە، كيم عشرتدين اېتسە اجتناب.

ايچ، نوايى، مى كه فهم اېتتوك طيب عشقدين،
غصه و غم زھريغە ترياك اېميش ياقوت ناب.

خاصه بزمى كيم قوياش جامين شفق راحى بيله
اېلگە توتقى خسرو انجم سپاه و جم جناب.

قاش و يوزونگنى منجم چونكه كۆردى بې نقاب،
دېدى: كۆر كىم قوس برجىدىن توغولوپتور آفتاب.

بىر لىنىگ جان آلدى انداق كىم، بىرىسى بىلمەدى،
اېمدى كىم بىلدى ارالرىدە بار دور شىكراب.

گر فلک قاشىنىگ بىلە بىلە بىلە ھاللىدىن قىلور،
بىر دېسە پىوستە، جانا، اېشىتور اېكى جواب.

گل كېبى يوزونگدە تېر فرد اېتتى ھوشىمىدىن مېنى،
گرچە بېھوش اېلگە ھوش اوچون مقوى دور گلاب.

كىم سرشكىم كۆردى معلوم اېتتى عشقىم حاصلين،
دانه بىرلە اۋىلە كىم اېل نقدىنى ايلر حساب.

نې چمن دور بو كه حسرت سويى و درد اۋتيدىن
پرورش تاپمىش قيو بىر گلە كىم، بار آب و تاب.

گر نوایى نىنگ كويوك بغرىدە قان دور، نې عجب،
خام سوز اۋلور يالين اوزرە توشوب كويگن كباب.

چابكى كىم، هر طرف ميدان ارا ايلر شتاب،
برق لامع دور سمندى، گردى انداق كىم سحاب.

اۋقى رشكىدىن اېرور كۆكسوم ارا كۆنگلوم قوشى،

اول كېوتەر كېم، قېق اېچىندە قىلغەي اضطراب.

آتسە اۋق اول قاشى يا يوز پېچ اورر جان رشتەسى
كېم، منگە حرمان و آنىنگ اۋقىغە يېتكى طناب.

ناگھان اتقى مو دېب بىر اۋق قېق شىكلى بىلە
باشى اوستىگە كېلور ميدانده هر كون آفتاب.

اول قوياشتىن باشقە كېم اتقى قېق، وه كۋرمەدوك
اختر سەدى كە، هر دم ظاھر اېتكەي بىر شهاب.

جان بېرورمېن قېرولور چاغده كۋروب بېلىدە پېچ،
اۋلسە تانگ يۇق اول كە جاني رشتەسىغە توشسە قاب.

كېم كە سرکشراق، حوادث اۋقىغە كۋپراق ھەد،
اوشبو حالتنى قېق احوالىدىن قىلغىل حساب.

اي نوايى، چون اۋقى هر دم فلک مىلى قىلور،
سېن آتى گرديگە قانع بۇل كە، باردورسېن تراب.

۴۴

ھوا خوش اېردى و آلىمدە بىر قدح مى ناب،
ايچر اېدىم ولې غمدين قدح-قدح خوناب.

كە حاضر اېردى اۋشول سرو و نرگس مخمور،
ولېك رغميمە قىلمس اېدى قدحغە شتاب.

مېنگە نې زهرەيى اول كيم، دېسم كە بىر قەدح ايچ،
نې آنسىز ايچكەلى مى، نې قرار و طاقت و تاب.

بو غصە بىرلە ايچىم قان بۇلوب نېچوك كە قەدح،
كۆزومگە ھەر نفس اشك اپورولور مثال حباب.

چو انگلەدى كە بارور اختيار ايلگىمدىن،
كولوب قەدح كېيى لطف ايلەدى و قۇيدى عتاب.

قەدحنى ايچتى و يوز لايە بىرلە توتتى منگە
كە، آنىنگ ايچكىنى-اۋق قىلدى مېنى مست خراب.

چو ساقى اېتتى قەدح كۆزگوسىدە جلوۋە حسن،
نې عىب عاشق مېخوارە كۆنگلى بۇلسە يباب.

نوايى وصل بەشتىدە شكر قىل بو نفس،
كە ينە چېكمە گەسپن ھجر دوزخىدە عذاب.

۴۵

يوز سۆزومدىن بىرىگە بېرمىس جواب اول نوش لب،
آغزىنى يۇقتور دېسم واقع كە ھىچ اېرمىس عجب.

نقطە خالىنگ نېدىن شىرىن لىبىنگ اوستىدە دور،
نقطە چون آستىن بۇلور ھەر قىدە كيم يازىلسە لب.

وصل نې يىنگلىغ مىسر بۇلغوسىدور، چون اپور
دلبرىم نازك مزاج و مېن بغايت بې ادب.

گر قویاش دېرلر یوزونگنی گرم بۇلوب چېكمه تیغ،
اېلگه جرمې یۇق، اېنر چون آسماندىن هر لقب.

لعلینگ آلسه چاکلیک بېمار كۋنگلومنى نې تانگ،
ای ملاححت نخلی، چون کیم خسته سیز بۇلمس رطب.

زنده دل معنون نینگ اۇلمیش كۋنگلی چون لیلاغه حی،
بس نې آسیغ آنی حیدین قاوله ماغلیغ، ای عرب.

طالب اول کیم تاپمه سنگ داغی یو بس کیم، ایله مس
بیر نفس غافل سېنی مطلوب یادیدین طلب.

قهر برقی بیرله رحمت یامغوری گر بۇیله دور،
ایمن اېرمس بوالعلا، نومید اېمستور بولهب.

گر نوا تاپسه نوایی لېلرینگ نینگ ذکریدین،
تانگ اېمستور، چون مدام افزون بۇلور میدین طرب.

۴۶

صبح دولت یوزونگ، ای توسن گردون سنگه اشهب،
باشینگ اوستیده گی دُر اویله که، تانگ باشیده کوکب.

پایمال اېتکن اوچون مرکبی جولانده باشیمنی
عذر اوچون قیلدیم انینگ نعلینی یوز بیرله مُدَهَب.

مهر ترکین قیلیبان پست، فلک رخشیدین اؤتتی،

اللّٰه اللّٰه، بو نې راكب دورور و وه، بو نې مركب.

نې قتيغ حال كه، هجرينگ كېچه سى تينغه لى قويمس،
يېر اېلين اشك ايله اندوه، كوك اېلين نعره يارب.

ايتى مهمانليگ اوچون اېمدى قدم قويسه بولور كيم،
كۈنگول اؤت قىلدى مهيا و بغير طعمه مرتب.

هر كيشى بولدى قولونگ، اول كيشى دور عالم ارا شه،
قوللرينگ قريبنى كيم تاپسه اېرور شهغه مقرب.

يوزى وصفيده كېره ك صفحه ولى لوحه خورشيد،
ساچى وصفينى يازر وقتده تون دودى مركب.

يار چون برچه زمان ناظر اېرور حالينگه، بولغيل
بارى حالتده مشاهد، بارى اېل بيرله مؤدب.

تېلېره ب كۈنگلى نوايى نينگ اگر عربده ايلر،
دفعيغه سلسله زلف ايله بس دور چه غېغب.

۴۷

نېچه بولغهى منگه هجر ايچره تظلم، يارب؟
ايله بو ظلم ارا حاليمغه ترحم، يارب.

وعده قتل قىليب وعده غه قىلغونچه وفا،
نېگه مېن خسته نى اولتوردى توهم، يارب؟

لېلرى نىنگ كىلماتى كە بېرور جىسمغە روھ،
آب حيوان اونی دور، يۇقسە تىكلم، يارب.

خوان وىلىدە اۋكوش نىمت ارا دور اغيار،
روزی اېت بىزگە ھىم اول نوع تنعم، يارب.

وہ كە، كۈنلۈمنى شىكاف اېتتى كولومسوب اغزى،
غنىچەلرنى نېتىب آچتى بو تېسىم، يارب.

عمر چون فاني اېمىش، گر كىشى عالم شەھى دور،
چون اۋلر، نېوچون اېتر مونچە تعظم، يارب.

يار قتل اېتكەلى عشاقىنى يىغدورگن اېمىش،
بېر بو بىزم ايچرە نوايىغە تقدۇم، يارب.

۴۸

اى سىنگە يوز خوب و لب خوب و لىنىگدىن كولگو خوب،
ھىر نې كىم واقع بۇلور سېندىن، كۈزۈمگە اسرو خوب.

دېدىنگ اول آى وصفىن، اى راوى، يىنە سۇز دېمە گىل
خوبلردىن كىم، سۇزونگ اېردى بو يېرگە تېگرو خوب.

خوبلر قول بۇلدیلر، لېكن پرىلر قاچتىلر،
عالم ايچرە آدمى بىر سېنچە بار اېركىن مو خوب.

خوبلرنى عرض قىلدىم قىلمەدى كۈنگلۈم پسند،
آنى كۈرگىچ اختىيارى قالمەيىن دېدى بو خوب.

وصلیدە جانیمغە ھجریدین نې كېلگننى دېمان
كىم، فرح بزمیدە ذكر اېتمك اېمستور قىغو خوب.

جور و لطف و كبر و ناز اندین كۈنگولگە خوب اېرور،
حق ازلدە ذاتینى آنینگ یراتیبدور چو خوب.

صاف قیل خاطر كە سالغەى عكس اول یوز یخشی كیم،
كۈرگوزور یوزنى، قچان كیم روشن اۋلدى كۈزگو خوب.

ای كۈنگول، بارسنگ اول آى نظارەسیغە زینھار
اشك بیرلە كۈزلرینگدین غیری نینگ نقشین یو خوب.

خوبلرنى كۈرمەسە سېنسيز نوایی قیلمە عیب،
كىم كۈرونمیدور كۈزیگە كیمسە سېندین اېرو خوب.

۴۹

سېن لېینگ سۋرغان سایى مېن قان یوترمېن، ای حبیب،
سېن مى ایچکیل كیم، منگە خونِ جگر بۈلمیش نصیب.

دېدیلر، احباب دردیغە حبیب ایلر دوا،
وہ کہ، مېن کویدوم محبتتین، اېمس واقف حبیب.

کویونگگە کیرگچ، كۈنگول قاشینگغە میل ایلر بلې،
گوشه محراب اېتر پیوستە منزلگە غریب.

چەرە سرغرغان سایى آرتر كۈنگول نینگ نالەسى،

بار عجب واقع خزان فصلیده نالان عندلیب.

خاص، لله، شربتیمنی زهر قاتل بیرله اپز،
چون ایش اندین اؤتی کیم، کپلگهی مسیحیم، ای طیب.

نپچه اول آی مهریدین شیدا کؤنگولنی آووتهی،
تپله گه یالغان حکایت بیرله بپرگن دپک فریب.

میغه رهن اؤلمهی فنا دیریده تسبیح و ردا،
پیر دیر ایتمس حواله ایلگه زئار و صلیب.

نفسینگ ایتسه شوخلوغ، چرخ اېمگیدین قیل ادب،
طفلنی انداق که زجر ایلر فلتق بیرله ادیب.

ای نوایی، ظلمیدین دېرمېن که عشقین ترک اېتهی،
تا نظر دین غایب اؤلدی، یوق ینه صبر و شکیب.

۵۰

عشق دین یانسه تنیم سؤرمه سبب،
کویسه خاشاک یالیندین نی عجب.

سپکریدی، چونکه سمندینگ دېدی عقل،
برق بؤلْمیش بو قویاشقه مرکب.

خوبلر مکتب ارا خیل نجوم،
او قویاش اؤرتده ماه مکتب.

ذقنىنگ چاه و انىنگ آستىده خال،
چاه نىنگ نقطهسى، اى نوشين لب.

حسن ارا عشوه و ناز ابل كۈنگلىن
آنچه آلمس كه حيا بيرله ادب.

نېگه مطلوب تىلرسېن، چونكىم،
نې طلب دور سنگه، نې درد طلب.

هجر ارا خسته نوایی و فغان،
اى وصال اهلى، سيز و لحنِ طرب.

۵۱

آغزى نىنگ سِرِّى منگه معلوم اگر اېرمس نې عيب،
هيچ كىمگه ذره يى چون بېرمه مېش حق علم غيب.

عاشق و شيداليغىمنى منع اېتر زاهد، كۈرونك
كىم، هنر هم بار اېمېش نادان كېشى آليده عيب.

ياشورون قالغەى مو كۈكسوم جىبى دېك چاك اۋلغانى
خاصه كىم، هجر ايلگىدين كۈكسوم كېبى چاك اېردى جيب.

كۈزلرىنگ بيرله لىبىنگ انداغ كه اوردى دين يۋلىن،
نې بلالردىن بلال اۋتكى، نې صهبادين صھيب.

ذره غه صد يك اېسه آغزىنگ منگه يۋق هيچ شك،
چهرەنگ اۋلغان دېك قوياش نىنگ ده صدى يۋق هيچ ريب.

پیرسيز كېزمه بو وادی ایچره کیم، تاپمس کلیم
تیره شامین روشن امر اېتمه‌ی انگه خدمت شعیب.

ای نوایی، سپن دېک اېتکن ضایع ایام شباب،
سود یوق انجم کبھی اشک ندامت شام شیب.

۵۲

با وجودی کیم عدم بؤلدوم غمیدین قیغوروب،
هیچ آغزی نینگ سؤراغین لعلیدین تاپمان سؤروب.

جان که، قت-قت قان بؤلپتور، داغ عشقینگ کېتمه‌گهی،
لاله برگیدېک انی بیر-بیر ساوورسنگ کویدوروب.

ناوکینگ کؤنگلومده قیلمیش خانه باور قیلمه‌سنگ،
کؤکسومه ایلگینگنی کېلتور کیم، توروپتور بیلگوروب.

عشقی دور جان پرده‌سیده روشن اېتتیم، دؤستلر،
نېچه کویگه‌یمېن حریر ایچینده اؤتنی یاشوروب.

برق دېک پویه‌منی عیب اېتمنگ سلامت اهلی کیم،
مونداغ اؤتې کیم، توتاشیبدور منگه بؤلمس توروب.

ایسته‌مه تحسین که، شاکرمېن نې کېلسه آلیمه،
شکر قیلمه‌ی نیله‌ی آلورسېن قضانی یازغوروب.

چون نوایی جانیغه مرهم اېرور پیکانلرینگ،

كاش، ياقسە مرھمى اۋقونگ يانيمغە اۋلتوروب.

۵۳

خاك پايى بۇلدى جان خاكساريم قان يوتوب
كيم، چىقىب لىلىنى اۋپكى رشتە زلفين توتوب.

زلفين آچقاندە زىخ چاھىغە توشكى مىنگ كۈنگول،
قۇيمەسە اول چاھ اوزە رخسارى شمعين ياروتوب.

عشق محرق دشتىنى قطع ايلهك دشوار ابرور،
كىرمەسم، آھيم يېلى بىرلە ھواسين ساووتوب.

كويگەلى راضيمېن و ھجرىغە يۇق، وە كيم، مېنى
ايلهدى راضى ايسىتماققە اۋلومدين قۇرقوتوب.

دېب اېمىش بىر كون كېلىب كۈنگلى يراسين بوتكرەى،
كېلسە بوتكىل، اى كۈنگول، بو سۈزگە خود بۇلمس بوتوب.

دھر بوستانيدە قىلماق سىر ايلب ھاي و ھوى
ھرزە كېزمك دور حياتىنگ قوشلىرىنى اوركوتوب.

جام وصلينگدين كە، اېلنى تيرگوزورسېن، بىل يقين
كيم، نوايى اۋلگوسى خونابە ھجران يوتوب.

۵۴

وہ، نې قاتل دور كېلور آيين قتل و كين ساليب،

عاشق اۆلتورمك اوچون هر قاشيغه يوز چين ساليب.

چون اۆتوب عشق اهلديدن آشوب صبر و فهم اۆلوب،
چون يېتيب زهد اھليغه تاراج عقل و دين ساليب.

اېل ساري كيم يوزلنيب قيندين چيقاريب تيغ كين،
چون منگه مركب سوروب باشيمغه تيغ كين ساليب.

بو سريغ رخساره بيرله قان ياشيمدين ياد قيل،
ايچسنگ آلتون جام ايچينده باده رنگين ساليب.

سېنسيزين، اي عمر، چون ممكن اېمس آرام و صبر،
بارمه هر دم بيزني مونداغ بېدل و غمگين ساليب.

هر طرف كيم، گام اوروب يوز پارسا يۇلين اوروب،
هر قه يان كيم، كۆز ساليب يغما و قتل آيين ساليب.

باغ حسنونگ كيم گل آچتي رنگ-رنگ، اي مغېچه،
گويي ايچتينگ ميغه برگ لاله و نسرين ساليب.

شرعسيز خاشاك ارا خشخاش دېك دور، اي حكيم،
كۆك كه چيقسنگ جييينگ ايچره سُبْحَه پروين ساليب.

درد و غم قاليب، نوايي جاني چيقتي عاقبت،
هجر اېلندين خان و مانين باردی اول مسكين ساليب.

خنجرىنگ جانىمىغە يېتى كۆكرە گىمگە سىنچىلىپ،
ناوكىنگ يانىمگە اۆلتوردى عىادتقە كېلىپ.

قىرىپ اۆتكىن اۆقلىرىنگ جان پردەسىن رېش اېتكلى،
صفحه دېكتور كىم قىرىلغەى سەو خطلىر يازىلىپ.

يۇگورور ھىر كىرپىگىمگە آرتىلىپ بىر قىطرە ياش،
شوخ ياشلردېك كە اۆينىرلر چوبوق مەركب قىلىپ.

اوشبو ھىجران كېچەسى توش كۆرسىم اېردى ناگھان،
اۆلگەى اېردىم ھەمدىن، البتە، زەرەم يارىلىپ.

نەلىم اىچرە داغ اوچون قۇيغان فەتىلە دود ايلە،
درد اۆچاغىندە توتەيدور اندە اۆتى ياقىلىپ.

اول قوياش بىرلە بارور اېل سايەدېك، مېن خاكسار،
وہ كە، قالورمېن ايزى نىنگ توفراغى دېك ايرىلىپ.

سەر وحدت چون فنا دىرىدە سىغمەس لفظ ارا،
نېوچون آيا خانقە اىچرە توگنەس آيتىلىپ.

نەكتە توحىدنى بىلگن قىلە آلمەس بيان،
كىم بيان قىلدىم دېسە بىلگىل كە قىلمىدور بىلىپ.

اى نوايى، مەيدە ساقى لىلىدىن اېرمىش فروغ،
كىفەيتى چونكە فەھم اېتتىنگ نېترسېن آيىلىپ.

سوز هجرينگ ايچره هر دم ضعفليغ جسميم يانيب،
اوتقه توشگن قيل مثلليق اورتورمېن تۇلغانيب.

آچقيل اوتلوغ عارضينگ، اي شمع كيم، پروانه دېك
اؤرتنه ي باشينگ اوزه بير نېچه قتله ايلانيب.

سالغەسېن عالمغه اؤت، گر گل ساووغى تابيدىن
غنچه دېك گلشنغه چيقتىنگ حله لرغه چيرمانيب.

بىم اېرور كيم، آفرينشدين چيقرغه يېسېن دمار،
بزمدين اوسروك چقيب ميدانغه چاپسنگ اتلانيب.

يار ايله خوى ايله گن كۈنگلوم اېرور اول نوع قوش
كيم، كيشيدىن ايريله آلمس كيچيكدين اؤرگانيب.

مالدين عمرونكغه آسايش اگر يېتمس نې سود،
نوح عمرين حاصل اېتسنگ، گنج قارون قازغانيب.

قبريم اوزره قۇيغەسيز تاشې كه، ضعف اياميده
اول پرى كوييده ياتميشمېن باشيمغه يستانيب.

اي نوايى، توشته گر كۈرمك انى ممكن اېسه،
برچه گر خود سۈنگى اويقودور، نېترسېن اويغانيب.

خسته جانيم ضعفين انگله، كۈنگلوم افغانين كۈروب،

سۆرمە كۈنگلۈم يارەسىن، فەھم اپت كۆزۈم قانين كۆرۈپ.

وصلیدە لعلی اوزە خالین كۆرۈپ كویگن كېی،
اۋرتنورمېن جانده اېمدی داغ هجرانین كۆرۈپ.

وادی صبریم دغی خار و خسک قیلدیم گمان،
كۈنگلۈم اطرافیده هر یان نوک پیکانین كۆرۈپ.

انگله دیم قیلیمیش کۆزی آغان كۈنگۈل صیدیه قصد،
هر طرفدین چرگه توزگن خیل مژگانین كۆرۈپ.

یېر و كۆكتە ایستهبان پیدا اېمس خضر و مسیح،
قاچتیلر گویا دوداغینگ آب حیوانین كۆرۈپ.

جسم باغیده روان شکلی تصور قیلدی عقل،
بوستان حسن ارا سرو خرامانین كۆرۈپ.

شبنم اېرمس نرگس اشکی دور نېدین قان ییغله مس،
کۆز یوموب آچقونچه گلشن عمر پانین كۆرۈپ.

چرخدین صدق اهلی ماتم ایچره دور، فەھم ایله گیل،
هر سحرگه صبح نینگ چاک گریانین كۆرۈپ.

نامه سین وه کیم آچیب سالماق نظر ممکن اېمس،
چون نوایی هوشی زایل بۆلدى عنوانین كۆرۈپ.

كۆز ياشىم بۇلدى روان بىر نرگس جادو كۋروب،
طفل يىنگلىغ كىم يوگورگەى ھەر طرف آھو كۋروب.

قالدى حيران زاھد اشكىمدە كۋروب ھەر يان حباب،
روستايى دېك كە، حىرت ايلەگەى اوردو كۋروب.

جان ارا تيغىنگ كۋروب كۋنگلوم قوشى توزدى نوا،
طوطىي دېك كىم، تكلە ايلەگەى كۋزگو كۋروب.

وادى عشقىنگ مكان قىلدى كۋنگول كۋرگچ يوزونگ،
ابل بيابان ايچرە منزل ايلەگن دېك سو كۋروب.

جانە اۋز داغىن كۋروب عاشقلىغىمنى انگلەدى،
اول كىشى دېك كىم، تنىغەى اۋز قولىن بېلگو كۋروب.

بادە توتقچ، دېمە بېخود بۇلدى كىم اول كۋزگودىن،
باردى ھوشوم يار حسنى جلوھسىن اۋترو كۋروب.

اى نوايى، دفع اۋلور خالىن كۋروب كوھ غمىم،
فيل يىنگلىغ كىم، ھزىمت ايلەگەى ھندو كۋروب.

۵۹

اۋلوكنى تىرگوزور لعلىنگ مسيح آسا كلام ايلب،
تكلە چاشنىسىن شربت يُحْيِي الْعِظَام ايلب.

ازلە لعلىنگە صيد اېتكەلى كۋنگلوم قوشىن گۋيا،
قضا صيادى جانلر رشتەسىدىن يايىدى دام ايلب.

چمىندە تازەلىغىدىن ھەر قوروق شاخى اپرور خىزى،
مىگر كىم اندىن اۋتمىش آب حىوانىم خرام اىلب.

اگر حرف اۋلسە مدغم، ۋە كە خالىنگ نقتە ادغامىن،
عيان قىلدى كۈزۈم نىنگ مىردمى ايچرە مقام اىلب.

نې بۇلغەي تىرە بۇلمەي روزگاريم كىم، آچىب گېسو
قرا شامىمنى مەلك ايلەدىنگ صېخىمنى شام اىلب.

غرض اول يۈزنى مستور اسرەماق دور كىم، حكيم صنع
اولوسقە آه اپتر قسمت انى آيينە قام اىلب.

چو حق درگاهيدىن مىردود اپتر نەيلرسېن، اى زاهد،
قبول خلق اوچون آرتوقسى طاعت التزام اىلب.

ياشىنگى دانه، بىرىنگى سۈقىل كىم، توتتى فقر اهلى
ھدايت قوشلىرىن بو دانه و سۈ بىرلە رام اىلب.

نوايى كۈندە چۈن بىر قرص مقسوم آرتمس، نې سود
فلك دېك بۇلماغىنگ سرگىشتە تۈن. كۈن اھتمام اىلب.

۶۰

قان ياشىم كۈنگۈلۈنگدە تاممىدور كۈزۈم گريان بۇلوب،
كىم اياغىنگە توشۇپتور كۈز قراسى قان بۇلوب.

غىچەدېك كۈنگۈلۈم چېكر اون، غرق اۋلوب خوناۋارا

سۆز دېگندە آغزىنگ ايگى لعل ارا پنهان بۇلوب.

سۆرسە مجنون عشق دشتيده مېنى، آيت، اى رفيق
كيم، قويون دېك ايتتى بو وادیده سرگردان بۇلوب.

هجری کۆنگلومنى بوزوب، غم سیلی هموار اېتتى، وای
كيم، اثر هم یۇقتور اول معموره دین ویران بۇلوب.

تیغی خود اؤتتى صعوبت کۆر که مهلك یارهسی،
بو زمان باشیمغه قالوپتور یلاى جان بۇلوب.

هر زمان آغزىنگ خیالی سنچیلور کۆنگلوم ارا،
گؤییا بو غنچه آنی زخم اېتر پیکان بۇلوب.

چرخ عشاق آهی اؤقیدین مگر وهم اېتتى کیم،
قبة قیلدی مهرینی اؤز هیئتى قلقلان بۇلوب.

حشر خورشیدیغه مانع فکر قیلمس سېن، نې سود،
اطلس گردون سرا پرده ننگه شادروان بۇلوب.

ای نوایی، فانی اول یار ایسته سنگ کیم، خوب اېمس،
جاننى سېومکلیک بهانه اؤرتده جانان بۇلوب.

۶۱

کیمسه یاری بیرله خوشتور غم دېشیب مونگره شیب،
یاتسه گاهی چیرمه شیب، اؤلتورسه گاهی یانده شیب.

زلفى اېل كۈنگلېن پريشان ايله مك كه جمع اولوب،
طرفه راق بو كيم، كۈنگوللرنى يىغرغە ترقە شىب.

ممكەن اېرمس تارتماق پىكانلرېن كيم، جسم ارا
هر بىرى مسكن توتوپتورلر سۈنگك كه اۋرنە شىب.

چىقتى زلفىن سالغچ اول چاه زىنداندىن كۈنگول،
عنكبوت اول نوع كيم، تاريغە چىقتى يارمە شىب.

هجر خىلى كۈنگلوم ايچرە موزدېك ايلب هجوم،
گرچه وصل اميدى يېتكەندە چىيىن دېك بوتەرە شىب.

كويدوم و اول زلف تابى رشتە جانيمده دور،
شمع تارى دېك كه كول بۇلغانده تورميش چىرمە شىب.

ساقيا قىلسنگ حمايت غالب اولغوم بۇيله كيم،
غم بيله كۈنگلوم تلاشورلر ايكاولان قارمە شىب.

قىل حواله دۇر كىشلىر جانى، اى ميفروش،
مى چو هر ساعت تۈكۈلگەى جوش اوروب كپتين تاشيب.

آشوروب حددين نوايى هم نياز و عجزىنى،
يار استغنا و نازى هر نېچە حددين آشىب.

٦٢

كېزىمېن كويىدە يىللر نظر حاليمغە سالغەى دېب،
اگر اولتورسە قانىم رنگى توفراغيدە قالغەى دېب.

كۈنگۈلگە يۈز تۈمەن نېش اورسە ھىجران، ايله مان نالە،
وصالینگ نوشیدین اول زخملىر بیر کون اۋنگالغەى دېب.

كۈنگۈلگە ناوکینگ تا کیردی بیحد حفظین ایلرمېن
کە، بو شیشە ایچیندە اول دغى ناگە اوشلغەى دېب.

كۈنگۈلنى کوییدە یۈز رنج ایلە محنتقە تاپشوردوم
کە، گر کۈرسە بو سرعت بیرلە شاید کۈنگلوم آلغەى دېب.

سرشکیم قانى قیلدی کویى نینگ ئوپراغین آغشته،
ایتیگە شاید اول بلچینگ بیله بیر اوی یسلغەى دېب.

حرم وصلین تیلرسېن پویه اور مردانه، ای سالک،
قدم آهسته چېکمه بغرینگ اول یېلمکده تالغەى دېب.

نوايى بېنوالیغ بیرلە دایم می ایچر، بیر کون
نوا نقشینی دوران مطربی بزمیده چالغەى دېب.

۶۳

دمبدم جام طرب غیر ایلە اول ماه چېکیب،
مېن ییراقتین باقیبان، قان یوتوب و آه چېکیب.

نې غمیم ایت کبېی اۋلمکدین، اگر ابلتور اېسە
بۋینومه ایپ سالیبان کویيگە اول ماه چېکیب.

غرضیم بو کە، اونوتتورمغەمېن اۋزنى انگە،

كويىگە كىرمىگىم افغان گە و بېگە چىكىپ.

كۈنگۈمە ھجر اگر درد اۋقى ياغدورسە، نې تانگ،
گر چىقرور اېسە پىكانىنى دلخواه چىكىپ.

مېن عدم يۇلىغە بارمان، مېنى لېكن اېلىتور
آغزى شوقىدە كۈنگۈل اۋزىگە ھمراھ چىكىپ.

مى اصفر كە تۈكۈلمىش قۇيۇبان يوز ايچسم،
كهربانى كۈرونگۈز جلۈه قىلور كە چىكىپ.

جرەسەن بېرسە نوايىغە اېرور اۋلگۈچە بس،
بزم عىش ايچرە طرب ساغرىن اول شاھ چىكىپ.

٦٤

نې مخلصىم بار انىنگ عشقىدىن كنارە قىلىپ،
نې تۇيماغىم بار انىنگ حسنىگە نظارە قىلىپ.

اۋچرگە عشق اۋتى چارە قىل دېدىنگ، اى شىخ،
بۇلورمو قىسمتىم اۋلغان بلاغە چارە قىلىپ.

باشىمدە تىغى يراسىن نېچە دېبان سۇرمىنگ،
كىشى بۇلورمو باشى نىنگ توكىن شماره قىلىپ.

كۈنگۈل كە ايتتى قىلىپ تىرە خان و مانىمنى،
قاۋەى اگر ينە كېلسە، يوزىنى قارە قىلىپ.

كۈنگۈلنى ياره قىلىپ اول كه تىكتى كۈكسومنى،
ياقمى تىكمك ابرور كۈكره گىمنى پاره قىلىپ.

دېدىم كه، مىكدەدىن خانقه يۈلۈن تۈنەيىن،
نېتى كه، اول سىرى يۈل بېرمىس استخاره قىلىپ.

نوايى اېتتى نھان عشقىن، اى فغان بيله اشك،
انىنگ بو عىيىنى نەيلرسىز آشكاره قىلىپ.

٦٥

اول آى قىلدىمە تىغ بۇران چېكىپ،
مېن آلىدە شكرانه غە جان چېكىپ.

مىسحيم چو فرىادىمە يېتمەدى،
نېچە اۋلتورەى اۋزنى افغان چېكىپ.

ھمانا يىمان كۈزگە ميل ايله دىنگ،
الف نيل ايله يۈزگە ھرىان چېكىپ.

لىبىنگ نوش داروسىدىن نې آسىغ،
مېن اۋلدوم چو خوناب ھجران چېكىپ.

كېتور، ساقيا، دۈر اياغىن تۈلە
كه، جان قالمەدى رنج دوران چېكىپ.

اگر وصل باقى كېرەك، اىستە گىل،
فنا يۈلىگە رخت حىرمان چېكىپ.

نوايى بېرىب جان اۋقى شوقىدىن،
انىنگ زخمىدىن يار پىكان چېكىب.

٦٦

چابكوم رخس اوزه هجران يۇلىدە پويه قىلىب،
مەن انىنگ كېيىنچە گاھى يۈگۈرۈپ، گە يىقىلىب.

يىقىلىب يانە قۇپۇپ، چۈنكىكە ئۈرۈپ يۇلغە قىلىپ،
وہ كە، يۈز نىشتەر هجران اياغىمغە تىكىلىپ.

تابانىم درد و بلا خارەلرېدىن ئۈيۈلۈپ،
يۈرەگىم رنج و عنا خارلرېدىن تېشىلىپ.

طرفە، كۈرگىل كە عنان تارتمەي اول شوخ دىمى،
سۇنكىچە بۇيلە قىيىقلىق بىلە حالىمنى بىلىپ.

عشق دردىغە جز ئۆلمەك يۇق اېمىش ھېچ علاج،
باش قۇيۇپ ئايغە ئانىنگ كە بو معنانى بىلىپ.

اىستىرەم ئۆزنى خرابات اىچىدە لايىقل،
ھوش چۈن باعث رنج ئۆلدى، نېتىمىن آيىلىپ.

گر نوايىغە ياغىن اشك اېدى و رعد فغان،
ھجر چۈن كاج اوروبان كۈزلرېگە ئۆت چاقىلىپ.

«پ» حرفى نىنگ پرىوشلرى نىنگ پروازى «غرايب» دىن

مېندىن اول چابك نىنگ، اى پىك صبا، ميدانىن اۋپ،
كويىگە باشىم نىازىن يېتكۈرۈپ چوگانىن اۋپ.

باد پايى سىرىغە ھىمىكلىك ايلەي آلەمەنىگ،
يېرگە مېندىن يوز قۇيۇپ كۈرگىن ساي و جولانىن اۋپ.

كولسە لىلى، وەكە، قالمىس مېندە بىر اۋپكونچە ھوش،
حشو ابرور، كۈنگلۈم كە، ايتورسېن لب خندانىن اۋپ.

پاك اېتك اىستىر اېسنىگ، بىر پاك اېتكلىك اىستەبان،
خاك نعلينىغە يوز قۇي گۈشە دامانىن اۋپ.

گر اياغىن رخشى نىنگ اۋپىمك مىسر بۆلمەسە،
كۈز سالىب ھەر يېردە كىم، كۈرسىگ اياق باسقانىن اۋپ.

قاشى ياسى غىمزە اۋقىن آتسە وە، مېن خستەدىن،
كۈزلىرىنگە سورتوبان سوفارىنى پىكانىن اۋپ.

اى نوايى، كعبە مقصود وىلىن اىستەنىگ،
شاھ غازى قصرى نىنگ درگاھ عالى شانين اۋپ.

زلف و يوزدىن سىنبولونگى گل اوزە ترقتەمە كۋپ،
دەر باغيدە گل و سىنبول ايسىن بوترتەمە كۋپ.

كۆزلرينگ كيم، مست و خواب آلود اپرور كۆپ آولمه،
هر سارى اويقوغه بارغان فتنهنى اويغتمه كۆپ.

زلفيغه، اى مشك، ايسترسېن قاريمچى بندهليغ،
يۇق حدينگ كېچكىل بو سودادين اوزونگنى ساتمه كۆپ.

اوينه-اوينه اؤلتورور بير-بير اولوسنى كۆزلرينگ،
شوخ قاتللرنى جانلر قصديغه اوينتمه كۆپ.

تيره دور مجنون كه، مين دېك دېسېن آنى، اى خرد،
عقل و هوش اهلىنى بو دېوانهغه اؤخشمه كۆپ.

اى كه، مژگاندين يسال توزدودنگ كۆنگولر صديغه،
كۆز يوموب آچقونچه اوشبو خيلنى قوزغتمه كۆپ.

اېل بيله هر دم قدح ينگليغ كولوب، اى مغېچه،
قان ياشيم ساچيب صراحي دېك مېنى ييغلمه كۆپ.

صفحه خاطرده، اى عارف، كېرهك دور يار و بس،
صافي وحدتقه خاشاكِ خواطر قاتمه كۆپ.

چون نوايى قسمتى جام مى اؤلميش، اى فقيه،
سرزنش ايلب انكه سنگِ ملامت آتمه كۆپ.

«ت» حرفى نينگ تاراجگرلى نينگ تماشاسى «غرايب» دين

قصر جاھىنگە سېھىر اوجىدە ايوان بۇلدى توت،
ھەم سېھىر آسىيىدىن يېر بىرلە يىكسان بۇلدى توت.

لعل رۇمانى تىلرسېن دىمىد زىنت اوچون،
قطرە قطرە بىرلەنگە اندىن ناردېك قان بۇلدى توت.

نەف اوچون كويمىكىدىن اۋزگە كۆرمەدوك پروانەدېك،
بىر قوياش ھەر تون سىنگە شىبستان بۇلدى توت.

دىر قىلدى قىلمە غىل ھەر لىھىتە عاشق بۇلغەلى،
قىلدى دىنىگە قىلغۇچى، بىر نامىسلىمان بۇلدى توت.

ايسىتە سىنگە دىنيا عروسىن توشىدەگى مەجبۇب دېك،
تاپمىس اېرگىچ كام لىلىدىن پىشيمان بۇلدى توت.

شوخلر قاشىن تىلرسېن، لېك انداق كىم ھالال،
جانغە يېتكەندە كۆرونكىچ كۆز پىنھان بۇلدى توت.

كوس شوكت يېتى دوزخقە اېشىك قاقماقەدە دور،
بىس يېتى اقلیم ملكى اوزرە سلطان بۇلدى توت.

اى نوایی، اۋزنى جمع اېت، يۇقسە عالم مخزىن
قان يوتوب جمع ایلەبان اۋلگىچ پرىشان بۇلدى توت.

۷۰

اى كۈنگۈل، اول اھل يالغان مەر شىرطين قىلدى توت،
عەھدىنى پاينىغە يېتكۈرمەين ايرىلدى توت.

خنجەر هجران بيله آخر كېسر چون رشته سين،
مهر تارين رشته جانينگه محكم قىلدى توت.

چون مي وصل اوزگه لر ايچمكه باعث بولغوسي،
هر نفس خوناب هجران يوتماغينگنى بىلدى توت.

يا اېشيتمس، يا اېشيتكچ ظلمين ايلر بيرگه يوز،
حالينگ اول ظالمغه مينگ قىلله بس ايتىلدى توت.

دېمه سنجيب نيش هجران يېتكوره ي نوش وصال،
چون بو نوشونگ اولتورور، اول نيش هم سنجىلدى توت.

ماتم اشكى درى چون توفراغينگه ساجىلغوسي،
گوهر انجم فلكدن باشينگه ساجىلدى توت.

اي نوايى، كسوت فقر ايسته، يۇقسه چرخ نينگ
اطلسين كيدينگ گمان اپت عاقبت اېسكىلدى توت.

۷۱

كېل - كېل، اي قربان كۇنگول، اول قاشى يا مھرين اونوت،
چون وفادين تارتيلورسېن هم باريب بير گوشه توت.

چونكه اول بيزنى اونوتماغنى ساغيندى يىخشى ايش،
سېن دغى كېل بير نفس آنى ساغينماغنى اونوت.

اول قوياش هر دم بولور بير ذره بيرله گرم مهر،

مهر شمعین سېن داغی بیر اؤزگه آی بیرله یاروت.

حیف ابرور هر شوخ رعنا یوزیگه چون پاک عشق،
شوق اؤتین کهل سېن داغی بو عشوه گرلردین ساووت.

ای پری، بیر تېلبه گر آواره بۇلدی غم یېمه،
آدمی وشلر بیله نازک مزاجینگی آووت.

گر کؤزوم یاشیغه اول گل ملتفت بۇلمس نې غم،
گل بولوتدین تازه دور، سیراب اېمس گلدین بولوت.

دهر باغیده گیاه مهر هرگز بوتمه دی،
گر دېسنگ کیم کؤرمه یین بېمهرلیک بو سؤزگه بوت.

شهد عیشینگ زهر اېتر گردون، سېن اوشبو جامدین،
خواه کامینگی اچیت، خواهی مذاقینگی چوچوت.

ترک قیل، سېن هم نوایی دېک هواسین، ای کؤنگول،
یا که هر دم بیر طرف میلین کؤروب، خونا به یوت.

۷۲

آه کیم اول آشنا بېگانه بۇلدی عاقبت،
هجریدین بېخودلوغوم افسانه بۇلدی عاقبت.

عقل و دانش لافینی اورغان کؤنگول ییغله ی یوروی،
اول پریوش شهریده دېوانه بۇلدی عاقبت.

قطره. قطره شادليغ اشكين كه ساچتيم وصلیده،
برچه هجران قوشلريغه دانه بۇلدى عاقبت.

بارغەلى اول حسن گنجى غم بوزوغ كۈنگلومده دور،
اژدها اويى بيزينگ ويرانه بۇلدى عاقبت.

ساقيا، مى توت كه، هجر اندوهيدىن مېن تېلبەنى
فارغ اپتكەن ساغر و پيمانە بۇلدى عاقبت.

چېكمە اون، آھيم كۆر، اى مجنون كه، بلبل كۆپ فغان
چېكتى، اؤرتنگن ولې پروانە بۇلدى عاقبت.

بۇتقە گر باش قۇيمەديم كۆرگيل كه دينيم تحفەسى،
دير پيرى آليده جرمانە بۇلدى عاقبت.

دېدينگ اول كيم نوايى، سېنى گە. گە تيرگوزەى،
ھيچ بيلمان كيم سنگە، جانا، نە بۇلدى عاقبت.

۷۳

جھديم انداق دور يېتىشگەيمېن مو دېب وصلينگە بات،
كيم قبول اپتمان آغير دېب چيقسە اپگنيمدين قنات.

صبر تاغى بيرلە قيلماق پويه بۇلمس، اى كۈنگول،
تشلە اول يوكنى يېتىشمك ايستەسنگ وصلينگە بات.

شھسواريم نينگ براقى پويه سىيدىن قالدى برق،
كيم انينگ فعلى شتاب اپرميش مونونگ رسمى ثبات.

كۆپ مسيحادين دم اورمه، قىل حياتىنگى طفيل
انگه كيم تاپمىش مسيح آنىنگ طفيليدىن حيات.

مهر يوز كۆرمه ي اۋچشدى پرده دىن چىققاچ يوزونگ،
آلغەلى قۇيمس سريغ يوزىن قرا يېردىن اويات.

چون يودى كۆزلر سوادىن اشك ياروت يوز آچىب
كيم درمىسز اېلگه باي اېل فرض دور بېرمك زكات.

اي نوايى، خاك پايى وصفيده شيرين سۆزونگ
بار بعينه توتيا ايچىنده سالغان دېك نبات.

۷۴

تيره كلبمگه كىرىب، جانا، اۋلومدىن بېر نجات،
ظلمت ايچره خضرغه اول نوع كيم آب حيات.

ساده كۈنگلوم ايچره لعلىنگ نىنگ خيالى توشگەلى،
شيشەيى دور كيم، انىنگ ايچىگه سالمىشلىر نبات.

عارضىنگ مەريده آغزىنگ دور گدالىغ قىلغانىم،
حق سېنى خورشيد قىلمىش، ذره يى بېرگىل زكات.

تا كۈنگۈلدىن باش چىقرمىش هر طرف پىكانلرىنگ،
قوش بالەسى دېك بۇلوپتور كيم، بۇلور تېمور قنات.

وصل اميدىغه تىلرمېن عمر، لېكن وای كيم،

سېنسيزىن كۆرسىم، تىرىكمىپەن، ئۆلتۈرۈر مېنى اويات.

ايسىتەسنىگ كىم، اول قوياش چىققاچ سنىگە قىلغەى طلوع،
اى كۈنىگۈل، غم سىلى يېتىكچ، تاغ دېك توتقىل ثبات.

عشقنىگ اۋتىن گر نوايى دېسە كىم ايلهى رقم،
سۆزىدىن كوير قلم، قورور قرا، اېرير دوات.

۷۵

كۆزۈم اوچر كە، ھمايون يوزۈنگى كۆرگەى بات،
بەئىنە انگە كىرپىكلر اۋلمىش ايكى قنات.

بېزىسە درد و بلا شاھدى ھلاكىم اوچون،
مژەم تراغ دورور، اېسكى توگانلریم مرآت.

لېنىگ خيالیدە اشكىم اېرور حیات سویی،
فراقىنىگ ايچرە قاررغان كۆزۈم انگە ظلمات.

زكات اۋلور اېدى يوزۈنگ جمالى نقديغە مەر،
تجمل اھليغە يوزدىن بير اۋلسە اېردى زكات.

دېسنىگ كە، جانیمە اۋت سالمغەيسېن، اى ساقى،
تکلم اېتمە مى آلود لب بيله ھيھات.

قالورلر آغزىن آچىب عشق اھلى پويەمدىن،
ساغ اېلگە كولگو اېرور تېلبە ايله گن حرکات.

لېښنگ که، جان بېره دور اهل درد قانی اوچون،
نوايي قانیغه گر میل اېتر مُمدِ حیات.

۷۶

ای کونگول، یار اوزگه لر دامیغه بولدی پای بست،
سېنگه مشکل حالت و بیزگه قتیق ایش بېردی دست.

وصل تارین چېکتی اول، مېن داغی چېکتیم آه کیم،
رشته نی اوزدی و بولدوم هجر توفراغیغه پست.

نېچه باش قویدوم یولیده، وه که، قیلدی پایمال،
ضعفلیغ جسمیمغه زلفی تاری دېک سالیب شکست.

زهره یوق، موجب سؤررغه بولمه سون یارب، کیشی
مفلس و عاشق سېور دلداری مستغنی و مست.

ساقیا، بو ایشگه بېخودلوغدین اوزگه یوق علاج،
مژده مغ کویيگه یېتکورگیل که، بولدوم می پرست.

غرق اوله ی می بحری ایچره راست اول غایتقچه
کیم، سالیب بؤغزوم ارا چېککی اجل قلابی شصت.

ای نوايي، جرم عذری دشتیده قیل پویه کیم،
یخشی اېرمس زهد زنجیریغه بولماق پای بست.

۷۷

صبح اپرور ساقى و مېن مخمورمېن، سېن مى پرست،
توت قوياش دېك جامنى، مانع نې دور بۇلماقە مست.

تيرە شام ھجر ارا، وہ، اسرو كۆپ چېكتوك خمار،
مست اۋلالى بو نفس كيم، وصل صبحى بېردى دست.

كون بېيك چىققنچە ھوى و نالەنى پست اپتمەلى،
كۆپ بېيك چىققى بوگون كيم بۇلغەبىز بىز يېرگە پست.

انجمن اهلى يوزين گلگون قىلالى مى بىلە،
مهردين تاپقونچە انجم گللىرى بېر-بېر شىكست.

چرخ ماتم يېتكورور، بىز داغى آنچه يىغلالى،
كيم، كھن غمخانەسى اول سىلدىن قىلسون نشىست.

گر شفاعتقە ملايك كېلسە، نا محرم دېبان،
مهر شىكلىدىن فلک يۇلین قىلالى خار بست.

تانگ اپمس بۇلسە نوایی مست تا شام ابد،
كيم، ازل صبحيده بۇلميش قسمتى جام الست.

۷۸

جنون تاشى اوروب هر يان ينگى داغيمنى افگار اپت،
ايچىمدىن لالەدېك، عشق ايچرە تاشيمنى نمودار اپت.

چو مجنون قىلدىنگ اپمدى، اى مغنى، گوشه تابىنگنى،
كۇنگول سوداسى تسكىنى اوچون بۇينوغمە طومار اپت.

دېسنگ، كۈنگلوم قوشى ايلب هوا چېكى نوای عشق،
خدنگینگ نینگ پرين ايلب قنات، پيكانى منقار ايت.

ساچینگ كفریده اؤلسم قېرىم اوزره قۇيمه خرقةمنى،
چېكىب هر تارىنى بير برهمن بېلىگه زنار ايت.

كۈنگول ايوانیده آھيم يېلىدىن پرده عشقینگ
دېسنگ كيم، اوچمه سون مژگاندىن اطرافىغه مسمار ايت.

دېسنگ آغزىن كۆرەي، اى عقل، مركز نقطه سىن ايسته،
ولې شرط اوشبو كيم، اول قوياش دورىنى بىگار ايت.

عمارت طرحى دور نعل و الفدىن هر طرف كۆكسوم،
وفا قصرىن قۇپرسنگ، بو بنالر اوزره دېوار ايت.

اېرور مقصد يىراق، وادى اوزون، تون تيره، يۇل بورتاق،
بو يۇلده سلب ايتىب اۋزلوك يوكىن، اۋزنى سېكبار ايت.

نوايى اۋلسه تيرگوزگيل، يوزىگه يوز قۇيوب، يعنى
يوزىگه سو اوريب اول اويقوسىدىن آنى بېدار ايت.

۷۹

وجودوم اۋرتەدينگ، اى عشق، اېمدى تركيم توت،
خدای اوچون كه، مېنى قیده كۆردونگ انده اونوت.

كۈنگولنى وصل چراغى بيله، دېدينگ، ياروتهي،

توتشتى چون بىزىنگ اوى، اېمدى اۋزگە اوينى ياروت.

چو وصل كويمك ايله حاصل اۋلمەدى، اى كۈز،
تحسراشكى بيله شعلەليغ كۈنگولنى ساووت.

جنونى دفعيغە كۈنگولمنى داغ اېتەى دېسېن،
بو داغ سەل دورور، ھجر داغيدىن قۇرقوت.

بخار آھيم اېرور لايىق، انگلە گىل، اى اشك،
بھار حسنيغە ناگە كېرە كلىك اۋلسە بولوت.

نې واقع اۋلسە چو تقدیردىن اېمس خارج،
بس اۋكتە دور قىلورىدىن كيشيگە بېرمك اۋگوت.

نواييا، بو اۋتر عالم ايچرە بېش كون قىل
اۋزونگنى مى بيله مشغول و عشق بيرلە آووت.

۸۰

كۈنگولم آلدی بير پىرى پىكر ملك سيما يىگيت
كىم، بنى آدمە انداق بۈلمەميش پيدا يىگيت.

آتى سرکش، تۈنى زركش، حسنى دلکش، نطقى خوش،
كۈرمەدوك بو نوع مەوش چابك و رعنا يىگيت.

عشقىدە كۈز و كۈنگول نىنگ بير-بيريدىن رشكى بار،
الله-الله، بۈلور اېرميش مونچە ھم زېبا يىگيت.

زارليغلر بيرله اولمەى تاپمە غومدور خود وصال،
نې اوچون كيم مېن قرى قول دورمېن، اول ميرزا ييگيت.

يوليدە يوز مينگ كهن پير اولسە قيلمس التفات،
كيمسە كورگن مو اپكين بو نوع بې پروا ييگيت.

يولونگ اوزره هم گدامېن، هم قرى، هم خستە حال،
بیر باقيب اؤت حاليمە حسنونگ زكاتى، آييگيت.

دير پيرى مذهبين توتمى، مسلمانلر، نېتەى،
آلغان اولسە نقد ايمانيمنى بير ترسا ييگيت.

باش آقردى، سبزه خطلر تركى توتسم يخشيراق
كيم، خوش اهرمستور ييگيتلر بزميده، الا ييگيت.

اي نوايى، قريب اؤزنى سالمە كيم، ايلر سېنى
بیر قدح مى بيرله اول شوخ قدح پيما ييگيت.

۸۱

مست چيقتى ينه اول قاتل بېباک ييگيت،
چاک ايلرگە كؤنگوللر ياقەسى چاک ييگيت.

عقل پيرىنى فنا ديريدە رسوا قيلدى،
كيم كؤروپتور بو صفت ظالم و بېباک ييگيت.

ييتى اقليمدە آفت ييگيتيمچە اهرمس،
قوياشيدىن يسهسه بو ييتى افلاک ييگيت.

گە قىلور ظلم و گەھى قتل ھوس كيم كۆرمىش
قاتل و ظالم ارا بۆيلە ھوسناك يىگيت.

پاكلىك پرده سىدە توتسون انى ايزد پاك
كيم، اپرور اسرو يوزى پاك و اۋزى پاك يىگيت.

قرىدينگ، اۋزنى قريلر سارى سال كيم، يره شور
كىرسە چالاك يىگيت بزمىگە چالاك يىگيت.

اي نوايى، يىگيتىنگ نظمىنگە ميل اپتى، سپون
كيم، نصيب اۋلدى سنگە صاحب ادراك يىگيت.

www.ezgu.org

ينە سالدی ھجر ھم تن، ھم كۈنگول، ھم جانغە اۋت،
سالدی اۋت ھجران منگە، يارب كە، سال ھجرانغە اۋت.

آيتقى كىيمىش جنون ملكى شەيى زركش لباس
كۈرگن اېل، بو نوع كىم توشمىش مېن عريانغە اۋت.

گۇيا بۇلدى قويون غم دشتيدە اېسكن سموم،
يۇقسە توشتى مېن كېيى مېنچون سرگردانغە اۋت.

منزىلنگ اېردى كۈز و كۈنگولم، ولې سېن بارغەلى
مونى سو قىلدى خراب و توشتى اول ويرانغە اۋت.

مېن دغى كويمەي قوتولماق، اى كۈنگول، مېن اېمس،
بۇيلە كىم سالدى دمىم غم دشتيدە ھر يانغە اۋت.

دود آھىم داش دودى دېك مو روزندىن چىقر،
يا سالىپتور فرقتىنگ بو كلبە احزانغە اۋت.

گر منگە اۋت سالدى دوران ھجريدىن، بس عيب اېمس،
مېن دغى سالىسم دمامد آھ ايلە دورانغە اۋت.

نې اوچون اشجاردىن يىغمىش اۋتون، اى باغبان،
آتشىن گلدىن اگر اورمس فلک بوستانغە اۋت.

اى نوايى، تن قالىب جانىمنى آلىب باردى يار،
سالدى اول بارغانغە اۋت، ھجران ولې قالغانغە اۋت.

وہ کہ، ہجریندہ جہان بۋلدی کۋزومگہ ظلمات
کیم، بارور یایقہلیب و قیتمس اول آب حیات.

زلفی آئیندہ بنفشہ کہ باشین سالدی قویی،
آنی کۋرمک کہ همانا مونگہ مانع دور اویات.

حرکت قیلسہ لبینگ توز تۋکولوب شہد آقر،
توزلوق اہل کۋپ، بیر یۋق سہن کببی شیرین حرکات.

تہرلہ گن لعلی گلاب ایچرہ دورور گل برگی،
یۋقسہ اوسروک کۋز مو سالدی عرق ایچرہ نبات.

کۋنگلوم اول گلگہ قیلیب میل، فغان کیم، بلبل
عاریت ایستہدیم و بېرمہدی بیر لحظہ قنات.

بو چمن ایچرہ خزان صرصریدین سرو کببی،
غمی یۋق توزلوق ایلہ کیم کہ شعار اہتتی ثبات.

کۋر نوایینی کہ کۋنگلی اویی دور بتلر ایلہ
اۋیلہ بتخانہ کہ، اندہ تۋلہ دور لات و منات.

ای نسیم صبح، احوالیم دلارامیمغہ آیت،
زلفی سنبل، یوزی گل، سرو گل اندامیمغہ آیت.

بو كه لعلی حسرتیدین قان یوترمېن دمېدم،
بزم عیش ایچره لبالب باده آشامیمغه آیت.

کام تلخ و باده زهر و اشک رنگین بؤلغانین،
لعلی شیرین، لفظی رنگین، شوخ خود کامیمغه آیت.

شام هجران روزگارینگ تیره نهوچون قیلدی دېب،
سؤرمه غیل مېندین بو سؤزنی، صبحی یوق شامیمغه آیت.

اول پری هجریده ننگ و نام کیم، شرک ایله دیم،
کؤنگول آتلیغ هجر وادیسیده بدنایمیمغه آیت.

ای کرامتگوی، ایشیم آغازی خود عصیان ابدی،
شمع رحمت پرتوی ییتگهی مو انجامیمغه، آیت.

یوق نوایی بی دل آرامی غم ایچره، ای رفیق،
حالینی زنهار کیم، کؤرسنگ دلارامیمغه آیت.

۸۵

خرمن رخساریغه سالمیش می گلناری اؤت،
اؤیله کیم، گل خرمنیغه آتشین رخساری اؤت.

هجر شامی غم سپاهین، کؤرکه، کؤنگلوم دشتیده
نې یاقیدورلر چهریک توشگن کبې هر ساری اؤت.

اؤت اگر ایتسه جهانندین، آهیم اؤلسه، غم اېمس،
یېتکورهی بیر دمده یوز اولغی اؤت مقداری اؤت.

گر حرارت موجبى اېرمس چوچوكلوك، پس نې دور،
هر زمان جانيمغه سالماق لعل شيرينكارى اۋت.

فوطه زربفت اېمس اول شوخ رعنا باشيده
كيم، عيان قىلدى عذارى تابيدىن دستارى اۋت.

مى بى نىنگ كۋر نشاط افزايلغىن حزن اھليغه
كيم، ساچر صحبتىنى گرم ايلر اوچون منقارى اۋت.

گر نوایی اۋخشتور كۋكنى توتونگه، عيب اېمس،
چون بولوتقه اورمىش آنىنگ آھ آتشارى اۋت.

۸۶

لاله زار اېرمس كه، آھىمدىن جهانغه توشتى اۋت،
يۇق شفق كيم، بىر قىراقدين آسمانغه توشتى اۋت.

دېدىلر: اېل خان و مانىن اۋرتىر اول رخسار اۋتى،
بو سۋز اېشيتكىچ، مېن بې خان و مانغه توشتى اۋت.

عارضىنىگ نىنگ لمعهسى كويدوردى صبرىم خيلىنى،
برق آفت چاقىلىب اول كاروانغه توشتى اۋت.

اۋقلىرىنگ كۋنگلومگه توشكىچ كويدى هم كۋز، هم بدن
كيم، كوير اۋل و قوروغ چون نيستانغه توشتى اۋت.

ساووروب گل خان و مانىن مو قويون رنگىن اېكىن،

يا فلک بېداديدىن سىرو روانغە توشى اۋت.

كويدوم اول دم كيم، يوز آچتىنگ خلقنى كويدورگەلى.
اېلگە اۋت سالدینگ ولې، مېن ناتوانغە توشى اۋت.

اي نوایی، بيل كه آهي چېكميشيم بې اختيار،
دېسەلر كيم، بېشە مازندرانغە توشى اۋت.

۸۷

واي كيم، دشمن دېك اۋلدى عھدیدیڭ بېگانه دۋست،
دشمنیم اۋلتورسە، عھد اېتتیم كە، تۈتمەي يانە دۋست.

ساغرىمدە زھر و صحرا اوزرە پويەم شدتین
بيلمس اول كيم، بار انگە همكاسە و همخانە دۋست.

جان قوشى اۋرتندى سېوگچ يارنىنگ اۋتلوغ يوزين،
نيله گەي كويمەي، چو بۇلغەي شمع ايله پروانە دۋست.

وادی هجرانده اغيارىغە يار اۋلدوم نې تانگ،
گر بۇلور غول بياپاني بيله دېوانە دۋست.

دۋستلوق جاناندين ايسترمېن، منگە عالم اپلى
دشمن جان بۇلسە بۇلسون، بار اپسە جانانە دۋست.

اھل دين پيمان شكن دور، قىلسە بۇلمس دۋستلوق،
بس منگە مغ ديريدە اول كيم، توتر پيمانە دۋست.

زلفىغە توشسە نوایى خالى شوقیدىن نې تانگ،
دامدىن يۇق چارەسى ھەر قوش كە، بۇلسە دانەدۇست.

۸۸

باش قۇيرمېن كۇپ اياغىندە مى ايچسەم پيوست،
قنى مغ دىرىدە مېن دېك يەنە بىر بادە پرست.

ھجرىدىن تا كە كۈنگۈل سىندى آقر تورمەى قان،
شىشەدېك كىم، تۈكۈلۈر بادەسى چۈن تاپتى شىكست.

دىن ھوس ايلەسم، اۋلتورمىگىز، اى مغبچەلر،
كىم بورون توبە اوشتقان كۈنى بۇلمىشمېن مست.

مېن و مىخانە كە ساقى و مغنى قىلمىش
چىنگ زلفى و طرب ساغرى بىرلە پابست.

شاھ بزمى ارا سرکشلىك ايلە تاپمە غرور،
كىم بۇلور بۇيلە بىيكلر يەنە بىر جام ايلە پست.

يۇق حريفى كە فنا دشتيدە قۇللر توتوشىپ،
بۇلسە يۇل قطعيدە ھمپاى مىنگە و ھمدست.

مېنى اوسروك كۇروبان جامىم اوشتەمە، اى شىخ،
كىم بو يىنگلىغ مېنى مست اېتگن اپرور جام الست.

سەيلدىن تامغە نشست اۋلغانى دېك، دىر ايچرە
بادە سىلابىدىن اۋلدى مېن ويرانغە نشست.

غرق می بۆلدى نوایی و اپرور اؤيله ضعيف،
کیم صراحی قیلیدین سالسه بۆلور بۇغزیغه شصت.

«ث» حرفی نینگ ثمین گوهرلری نینگ ثمرهسی «غرایب» دین

۸۹

قچان که اول بت شیرین کلام قیلدی حدیث،
خواص شربت یحییٰ العظام قیلدی حدیث.

مسیح دم اوره آلمس انگه عروج تونی،
مگر بیزنینگ مه علوی خرام قیلدی حدیث.

قه یان که یازدی حدیث، اؤلدى صید اهل گویا
نقطنی دانه، خطوطینی دام قیلدی حدیث.

لبیدین ایرو توشوب سوگ اوچون کتابتدین،
نې تانگ، لباسین اگر مشکفام قیلدی حدیث.

چییینی شهد نېچوک کیم بیغر، تکلمدین،
رمیدهلرنی نفس ایچره رام قیلدی حدیث.

زهی تکلم معجز نظام کیم، کبلگچ،
عرب فصیحلریغه حرام قیلدی حدیث.

اولوسنی توتتی نوایی سؤزی انینگ بیرله،
مگر رسول علیه السلام قیلدی حدیث.

نطقی جان بېرمک قیلور اول لعل خندان بیرله بحث،
راست عیسادېک که قیلغه ی آب حیوان بیرله بحث.

یار دېر کیم، بحث قیل اېرنیم بیله کیم، نې اوچون
کونگلونگ آلیب قصد جان اېتتی قیله ی جان بیرله بحث.

ای کونگل، گر عقل اېتر منع جنون قیلمه جدل،
عیب اېرور کیم، اهل دانش قیلسه نادان بیرله بحث.

جاننی جانان گر تیلر، بالله که، منت جانغه دور،
هر نېچوک حکم اېتسه، تېگمس جانغه جانان بیرله بحث.

ناصحا، قیلمه جدل، ایریل کییکلردین دېبان،
عالم شهر اېتمه گه ی غول بیابان بیرله بحث.

فقر کویده مسلم توت نې قیلسنگ استماع،
عارف اېرمس هر کیشی کیم قیلسه عرفان بیرله بحث.

ای نوایی، هر نېچوک ظلم اېتسه، چېک، دم اورمه غیل
کیم، گدا حدی اېمس هیچ ایشده سلطان بیرله بحث.

مېنینگ جنونیمه گر اول پری اېرور باعث،
هلاکیمه قد ایله پیکری اېرور باعث.

دېمە نېدىن كويەسېن كېم، انىنگ يوز و لېدىن
بو ايشگە شعلە بىلە اخگرى ابرور باعث.

كۈنگۈل قوشى تون و كون ملك باختر سارى
هوا قىلورغە مە خاوري ابرور باعث.

منگە كە، غمزەسىدىن اۋلەمىشم حيات ابد
خيالىغە لب جان پرورى ابرور باعث.

چەمەندە بلبل اېتر شوق نكەسىن تكرر
كېم، گل ورقلىرى نىنگ دفتري ابرور باعث.

اول آى فراقىدە اشكىم آقرغە شام و سحر،
طلوع زهرە بىلە مشتري ابرور باعث.

كۈنگۈلنى چاك و بغيرنى شكاف اىستىمە
انىنگ قىلىچى بىلە خنجري ابرور باعث.

ھەمىشە دىر ايچىدە بۇلماغىمغە مەچچەلر
كرشمەسى و فنا ساغرى ابرور باعث.

نوايى اۋلەمەسىغە عازم عراق و حجاز
مگر نزاھت ملك ھري ابرور باعث.

«جېم» حرفى نىنگ جەمىللرى نىنگ جلوهسى «غرايب» دىن

بوزوغ كۈنگۈلگە فنا بۇلسە كام، چېكسون رنج،
كە رنج چېكمەسە ھەرگىز ميسر اۋلەمس گنج.

اگر كيشيگە چېكيب رنج، گنج بۇلدى نصيب،
دېسە بو گنجنى اسرەى، يۇق اندين آرتوق رنج.

كيشى كە نقدىنى وزن ايله بان قىلور مدفون،
بو غصه سنج دور، آلمان كيشى فراغت سنج.

ييلان كېيى، نې عجب، گنج اسرە غان كيشى نينگ
ھميشە كاميدە گر زھر اپرور، تنيده شكنج.

زمانه جاھى اوچون ھەر غلولە تشويش
كە كېلسە كۈنگۈلۈنگ اويىنى انگە قىلورسېن خنج.
دېسنگ كە، فرد اۋلەى اېلدين كۈنگۈلۈنى خالى توت
كە، طاق دېرلر اگر خنج سارى آتسنگ لنج.

باشى قويى دورور آزاده سوسن آلىندە،
چو نرگس اۋلدى چمن مخزنيدە نقدالفنج.

تريق كېيى سويولور تلخكامليق بيرلە،
تريغ تريغ كە، ييغىشتوردى آلتونين نارنج.

ايتور كۈنگۈل حرميدىن خواطر اصنامين.
نوايى، اۋلسە مقامينگ مدينە، گر افرنج.

ای گدایینگ نینگ گدایی برچه اهل تخت و تاج،
کیم، گدایینگ دور، انکه یوق تخت ایله تاج احتیاج.

کۆزلرینگ آز جرم اوچون قیلسه عتاب ابرمس عجب،
بار معین کیم، بؤلور بیمارلر نازک مزاج.

گر صنوبر توزمه میش سروینگ خلافین کؤنگلیده،
یبل چنار ایلگی بیله نهوچون اورر یوزیگه کاج.

ای که، کؤنگلومنی بوزوب، دهرسین، خیالیمنی چیقیر،
هیچ کیم ویرانه دین گنج ایسته مس هرگز خراج.

سهن جفا قیلغچ، کؤنگول جان بیرله ترکیم توتتیلر،
بؤلسه شه ظالم، ابل ایچره ظلمغه ابرمیش رواج.

هجر دین داد ایسته دیم، دېدینگ، صبور اؤل وای کیم
تازه داغیمغه یانر اؤت بیرله ایلر سهن علاج.

چون فنا گردی یاپر، نې سود، تخت جاهینگه،
کؤک نینگ انجم دین مکمل اطلسین قیلسنگ دواج.

تا گدایینگ دور نوایی تخت ایله تاج ایسته مس،
ای گدایینگ نینگ گدایی برچه اهل تخت و تاج.

چرخ ایزینگ گردیگه قیلدی کوکب سیار خرج،

جوهر آماقغه غنى قىلغان كېيى دىنار خرچ.

ساير و ثابت نثارىنگ قىلسه تانگ يۇق كيم، بۇلور
كېچقورون شاه اولسه مهمان، كيمسه گه بسيار خرچ.

نقد رحمت خرچىنگ ايتسه حق، نې تانگ، اول كيم تاير
سېن كېيى محبوبى و صلين، ايله گه ي ناچار خرچ.

فاش ايتيب نقد شفاعت قىلدىنگ امتنى خلاص،
ايله گن دېك نقدىنى تاپقان قىزىق بازار خرچ.

بحر رحمتدين كه، تاپتىنگ، خلق اوزه بير قطره بس،
گرچه تېنگ اولا دور اېتمك دخل ايله اظهار خرچ.

مغفرت گنجى سنگه تمليك اېرور، مانع اېمس،
ايله سنگ عصيانى كۇپ امتقه هر مقدار خرچ.

سېن كيم و نعتين دېمك، تيل اسره غيل كۇپ نكته دين،
اى نوايى، معرفتنى قيلمه هر نې بار خرچ.

۹۵

مى لعلينگ اېرور جان بيرله ممزوج،
يۇق اېرسه آب حيوان بيرله ممزوج.

جگرگون دور سرشكيم، نېگه كيم بار
بغير بو اشك غلتان بيرله ممزوج.

جهاننى بوزدى اشكىم آه ايلن كيم،
اېرور صرصر بو طوفان بيرله ممزوج.

قوشولدى كۈزلىرىم نىنگ اشكى وهم اېت
كه، قۇلۇم بۇلدى عۇمان بيرله ممزوج.

كۈنگۈل قان بۇلدى و عشقىنىڭ اۋتيدىن،
بو قان محلول پىكان بيرله ممزوج.

يوزىگە توشدى زلف ابلەنگ نظاره،
كه بۇلدى كفر ايمان بيرله ممزوج.

منگە هر مى كه توتتى ساقى دور،
بورون قىلدى انى قان بيرله ممزوج.

مى وصل ايسته مه كۈپ، اى كۈنگۈل كيم،
اېرور اول زهر هجران بيرله ممزوج.

نوايى صور ماتم بۇلدى كيم، بار
سرود عيش افغان بيرله ممزوج.

«چ» حرفى نىنگ چابكلرى نىنگ چهره گشايلىغى «غرايب» دىن

۹۶

كۈنگۈللر نالەسى زلفونگ كىمىدىن ناگهان كۈرگىچ،
اېرور انداق كه، قوشلر قىچقىرىشقەيلر يىلان كۈرگىچ.

كۈنگۈل چاكين كۈزۈمدە اشك رنگين اېلگە فاش اېتتى،
بليغ زخمينى فھم ايلرلر اېل دريادە قان كۈرگچ.

كۈزۈم قان ياش تۈكر، نېتىب كۈنگۈل زخمين ياشورەى كيم،
تاپرلر يېردە زخمين صيد قانيدين نشان كۈرگچ.

بۇيالغان قان ارا جان پردەسى بېتكچ غم ھجرينگ،
كۈنگۈل باغيدە برگي دوركە، آل بۇلميش، خزان كۈرگچ.

خندگينگ زخمى ايچيندين بلالرنى يوغان ياشيم،
اېرور طفلي كە، آغەى قوش بالەسین آشيان كۈرگچ.

كۈنگۈللر نقديني تاراج اېترگە ياپماغينگ برقع
انينگ دېك دوركە، يوز باغلر قراقچى كاروان كۈرگچ.

يوزين زلف ايچرە تا كۈردوم اۋلوب وصيلغە يېتمسمېن،
غلط اېرميش يوز اورماق، كېچە اۋتنى ھر قە يان كۈرگچ.

اېرور چون عالم ايچرە جاھ فانى، يىخشى آت باقى،
پس اېل كامين روا ايله اۋزونگنى كامران كۈرگچ.

نوايى، خردە نظمينگنى انداق ايله دينگ تحرير،
كە ساچقى خردە باشينگ اوزرە شاھ خردەدان كۈرگچ.

۹۷

جمالين وصف اېترمېن ھمدميم اول گلەذار اۋلغاچ،
قوروق شاخ اۋيله كيم ظاهر قيلور گللر، بهار اۋلغاچ.

قاشین كۆرگچ حسددین ایسترم اېل كۆزى باغلنغەى،
نېچوك كیم كۆز توترلر اېل ینگى آى آشكار اؤلغاچ.

جنون اېرمس كییکلر صحبتی دېرمېن منگه شاید،
بیر اؤق تېككى غلط، اول قاشى یا گرم شكار اؤلغاچ.

هوس عشق ایلەگن آزاده، كېچکیل بو خیالینگدین،
كه چیقمس بو تیكن كۆنگلونگده ناگه استوار اؤلغاچ.

دېالمس درد ایلە ایتتیم، ولې بیلگیل كه، چېكمیشمېن
بیر آهې برچه عالم غصه دودى بیرله تار اؤلغاچ.

قیلیب منع جنونوم اول پرى کویگه یوزلنگن
سۆزى حشو اېركنین فهم ایلەگهى، بې اختیار اؤلغاچ.

قنى حاتم، قنى قارون، قنى جمشید و افریدون؟
پس احسان قیل سنگه گردوندین ادنا اعتبار اؤلغاچ.

غرور جهل جامی بیرله مست اؤلمه كه اؤلمك دور،
معاذالله، بو میغه چرخ دوریدین خمار اؤلغاچ.

نواىی شمع دېك ییغلب، کویوب حالیمنى شرح ایلەى،
اول آى بزמידه بیر تون راست عاشقلرغه بار اؤلغاچ.

۹۸

حسنی آرتر یوزده زلفین عنبر افشان ایلەگچ،

شمع روشنراق بۇلور تارين پريشان ايله گچ.

يوزنى گللردين بېزب مو بيزنى قربان ايله دينگ،
يا يوزونگ گه تېگدى قانلر بيزنى قربان ايله گچ.

تيغ ايله پيكانلرينگ يېتتى كۈنگول بۇلغاچ خراب،
سوو قويوب تخم اېكتينگ، اول كشورنى ويران ايله گچ.

قان اېمس كيم ياپتى گلگون حله جنت خازنى،
عشق مقتولين شهيد ايلردە عريان ايله گچ.

آشكار ايلب يوزين كۈزومنى حيران ايله دى،
ياشورون آلدى كۈنگول كۈزومنى حيران ايله گچ.

جانغه قۇيغچ نقد عشقينگ قىلدى كۈنگولمنى هلاك،
اۋلتورور محرمى سلطان گنج پنهان ايله گچ.

اي نوايى، عشق اگر كۈنگولونگنى مجروح اېتمەدى،
پس نېدوركيم، قان كېلور آغزينگدين افغان ايله گچ؟!

۹۹

يېتيشسه عشق ارا يوز محنت و بلا، قدح ايچ،
نفس-نفس كويوبان مى تۇلا-تۇلا قدح ايچ.

مكدر اۋلسه ضميرينگ زمانه محتيدين،
اگر دېسنگ، بېرەى اول كۈزگوگه جلا، قدح ايچ.

نشاط بزمیده ساقی ماهوش سرخوش،
باش اورسه داغی، ایاغ توتسه، قۇل سالا قدح ایچ.

جهان ایشیده باقیب خلق ابتالریغه،
الردپک ایسته مه سنگ اؤزنی مبتلا قدح ایچ.

دپسنگ خلا و ملاده بۇله ی نشاط بیله،
اگر ملا قدح ایچگیل، وگر خلا قدح ایچ.

ریا ایچینده نی کیم حاصل ایتتینگ، ای زاهد،
دپسنگ خلاص اؤله ی، ایت رهن و حاصل، قدح ایچ.

سنگه که دیر ایللی نینگ شاهیسپن، نوایی، اگر
یؤلوقسه دیرده مخمور، اوروب صلا، قدح ایچ.

۱۰۰

فقر اهلیغه پادشا محتاج،
اؤیله کیم شاهغه گدا محتاج.

یارغه بیلگچ احتیاجیمنی،
بؤلمه دیم کیمسه که ینا محتاج.

اشتیاقیم کؤپ، احتیاجیم هم،
انگه مشتاقمبن و یا محتاج.

یؤق گدالیغده اختیاریم کیم،
تپنگری قیلیمش مبنی سنگا محتاج.

كويىگە كىرگىنىمىدە توسن اېدىم،
لېك بۇلدوم تورا-تورا محتاج.

تېنگىرى رزاق كېلدى روزى اوچون
ايله مە اۋزنى خلق ارا محتاج.

بېنوا دور نوایی آلىنگە،
تانگ اېمىس، بۇلسە بېنوا محتاج.

«ح» حرفى نىنگ حرامىلىرى حسن آرايلىغى «غرايب» دىن

۱۰۱

زەھى تىلىنگ انە افصح تەكلىمىدە فصیح،
سېن املح اۋلدىنگ، اگر دلربالر اۋلدى ملیح.

طلوع صبح سعادت یوزونگ صباحتیدین،
زەھى کمال صباحت، زەھى جمال صبیح.

خمیر مایه جسمینگدین آرتقنى قضا،
ایكى بدنە قیلیب روح اتادی خضر و مسیح.

فلکنى چاک قیلیب اۋتگننگدە گر بعضى
توهم ایلەدى، شق القمرده بۇلدى صریح.

قدم قویاش اوزە قۇیدونگ عروج شامى نې تانگ،
کفینگنى گر ید بیضاغە قیلسه لر ترجیح.

اېرور كلامې كيم، انده حروفِ علت يۇق،
قېو حديث كه، سېندىن بيانغه كېلدى صحيح.

اېمس نوايى و مدحىنگ دېمك كه حد، بس دور
انگه بو قدر كه، مادحلىرىنگه بۇلسه مديح.

۱۰۲

بدنغه كېلمه دى تا عزم كويونگ ايله دى روح
كه، روح شخصىنى اول غمزە ايله دى مجروح.

حياتبخش اېسه اول حور عكسىدىن باده،
محلّ حيرت اېمس، حور عكسىدىن دور روح.

قىزدى لاله و سرغردى صبح خجلتدين،
بو لاله لر كه، عذارىنگه آچتى جام صبح.

وفاغه وعده قىلىپتور دېب اؤتمه، اى قاصد،
خدای اوچون منگه كىفيتىن دېگىل مشروح.

حيات يار وصالى دور، اى كۇنگول، يۇق اېسه،
سېنى فراقده فرض ايله يىن كه، بۇلدونگ روح.

بويورمه توبه ينه، ناصحا، كه مغبچه لر
هواسى قىلدى مېنى توبه توبه سیده نصوح.

فغان كه، تيره كۇنگول كنجيده نهان رازيم

پياله شەشەسىدىن ابل ايچرە تاپتى وضوح.

بسا كيشى كە، ايشى مسجد ايچرە بند اۋلدى،
چو آچتى دير فنا اېشىگىن يېتىشىدى فتوح.

نوايا، نېدىن اول غمزە تيغ تارتىدور،
گر ايستەمس كە كۈنگول صيدىن ايلە گەى مذبح.

۱۰۳

كۈنگولنى مغبچە آلدى مغانە توت اقداح،
كە يۇق صلاح ايلە بۇلماغلىق اېملى بيزگە صلاح.

بىر آى فراقىدە بېخودلوغ ايستەم تۇلە توت،
اگر قىليب اېسنگ افلاك جرمىدىن اقداح.

حلال بۇلدى خرابات عشق اھليغە مى،
توتربىز اھل ورع، كيم كە آنى توتسە مباح.

حياتبخش لىبىنگ روح اېمىشتوك، اى ساقى،
مگر كە واوينى اعلال اېتىب قىليب سېن راح.

يۇق اېرسە جىسمە اول حاصل ايلە گن قاندىن،
حكيم نې اوچون اجزاسىنى دېدى ارواح.

صباح ميكده باغليغ دور و خمارىم تند،
تعجب اېتمىنگ، اگر ذكرىم اۋلسە، يا فتاح.

نې اېردى مىكده غوغاسى، رز قىزىن گۇيا
بو شام قىلدى نوايىغه پېر دىر نكاح.

۱۰۴

نېگه كۆرگوزدى ساووغ آه و سريغ رخسار صبح،
گر نهاني مهريدين مېن دېك اېمس بېمار صبح.

گر هوايى بۆلمه سه مېن تېلېه ينگليغ، پس نې دور،
كۆنگلكين چاك ايله بان تاغ اوزره مجنون وار صبح.

مهريدين مېن دېك نهاني تازه داغى بۆلمه سه،
يوزده نېوچون كوكب اشكين قىلور اظهار صبح.

دېمه شنگرفي بولوت هر يان اېرور قانليغ ماموق،
تازه داغيدىن اېرور مېن دېك مگر خونبار صبح.

غم تونى آھيم شراريدىن توتشتى كۆك كه اؤت،
كيم انينگ آتين قۇيوپتور گنبد دوار صبح.

كون شعاعى خطلىرى اېرمىس كه توتميش ماتميم،
يوزنى انجم تيرناغى بيرله قىليب افكار صبح.

ساقيا، توتقىل صبحى باده كيم، بو ديردين،
بىز كېتىب بو نوع طالع بۆلغوسى بىسيار صبح.

اي نوايى، ايسته سنگ برگ و نوا بو باغ ارا،
گل دېك اؤل راع كېچه، بلبل كېيى بېدار صبح.

روزه و گل يېتى و ايچمس اول آي گلگون قدح،
نې كۈنگول خوشلوق بيله تارتهى مېن محزون قدح؟

يا مېن محرومغه خونابه هجران بېرىب،
اۈزگه محرملىر بيله اول آي چېكر گلگون قدح.

بارې هر تقدیر ايله كيم، بار مېن لب تشنه غه
توتمس اېرميش زهر غمدين اۈزگه دهر دون قدح.

ساقيا، بو غصه دفعى مست و بېخودلوغ دورور،
توت شفق گون مى تۈله گر خود اېرور گردون قدح.

روزه آيين كۈرمه ي ايلگينگدين قدحنى سالمه غيل،
لېك آل بېرهم هلالى هم كۈرونكن تون قدح.

جام اېرور مېن تېلبه گه قانليغ كۈزوم نينگ كاسه سى،
لاله لر صحرا ده بس، گر ايسته سه معنون قدح.

چون فنا ديرىغه كيرديم باده توت، اى پير دير،
ظرف خواه اېسكى سفال اۈلسون، وگر آلتون قدح.

يوز قدح قيلغيل مرصع كيم چېكرسېن جام مرگ،
هيچ كيم خود تاپمه دى جمشيددين افزون قدح.

اى نوايى، بيزنى ياد اېتكه ي مو برق اندان كونى

ايچسە جامِ جم تىلب ثانى افرىدون قدح.

۱۰۶

اي منگە جانبخش گلبرگِ ترينگدين تازه روح،
تازه-تازه هر بيرى شوقين ساليب آوازه روح.

روح محض اول تازه و تر سرو رعنادېك قدىنگ،
نې عجب بۇلسە روان بۇلغاندە اېلگە تازه روح.

كويى گريددين اۋلوگ جان تاپسە تانگ يۇق، نېگە كيم
توفراغ اۋلدى كويىدە بېحد و بې اندازە روح.

بۇلغوسى جانان كېيى بۇلسە مجسم صورتى،
حُلّە كييسە سورتوبان جنت گليدين غازە روح.

چىقتى جاندين پىكر ايلب ناز و حسن اظهار ايتىب،
زار اول پىكرگە جان، واله بو حسن و نازە روح.

شوق تيغى بيرلە سالك ايله سە كۈنگلىنى چاك،
فيض شەرستانى سيريغە تاير دروازه روح.

اي نوايى، شكر كيم، يۇل تاپتى جانان كويىگە
هجر شامى ظلمتيده يۇلنى آزه-آزه روح.

«خ» حرفى نىنگ خوبلىرى نىنگ خرامى «غرايب» دين

گدای فقر ايله سؤز ايتە آلمس پادشا گستاخ،
شه آينده نېچوک کيم، دم اوره آلمس گدا گستاخ.

نې قوت بيرله شه گستاخ سؤزلشگه ي انينگ بيرله
که وهم اېتگه ي باشيغه سايه سالماقتين هما گستاخ.

عروج ايستر اېسنگ بو دير ايچينده فاني اولغيل کيم،
ملک اوزره قدم باسيب اوتر اهل فنا گستاخ.

بلا ايچره دلير اورمه قدم تا عاشق اولمه يسين،
سمندر بولمه غونچه کيرسه بولمس اوت ارا گستاخ.

نې محرق وادي ابرميش عشق کويي دشتي کيم، اول يان
اوتە آلمس سموم اولماق هراسيدين صبا گستاخ.

شجاعت بيرله کيرمک کلبه فقر ايچره بولمس کيم،
بو ويراني قيله آلمس وطن هر اردها گستاخ.

چو تاپمس هر نې کيم، تقدير دور بو دير ارا تغيير،
ادب ابرمس دورور قيلماق هر ايشني مدعا گستاخ.

نې نازک خويي بار اول دلربانينگ کيم، نياز اهلي،
شکايته نې يېتگه ي کيم، دې آلمسلر دعا گستاخ،

نوايي عشق استغناسيني تا انگله دي وه کيم،
قيله آلمس فغان فارغ، چېکه آلمس نوا گستاخ.

بهار سېنسيز اۋلۇپتور منگە عجب دوزخ،
قىزىل گل اندە اۋت و آق شگوفەلردور يخ.

بهار سېنسيز اگر دوزخ اۋلسە تانگ اېرمىس،
بەشت ايچىندە لقا بۇلمەسە اېرور دوزخ.

خيالى خىلى كۆزومگە كېلورگە دور گۇيا،
يوزوم كە يۇل-يۇل اۋلۇپتور سىرشكىدىن رخ-رخ.

غريب كېلمەدى شىرىن لىنىگە اچىغ سۇن،
اېمىس غريب چوچوك مېو بۇلسە خستەغە تلخ.

كۈنگول فنا كوچىدىن زور بازو اىستر كىم،
وجود پنجه سىنى انگلەمىش بغايت شخ.

نوايى اېگنى يلىگ دور دېمىك، كە بار دور انگە
فنا حصىرى، بلا خارەسى نسيج ايله نخ.

مگر شە اشەبى آلىندە پىك بۇلدى سېهر،
كە قىلمىش اۋن كېچەلىك آينى اېگنىدە ناچخ.

تانگ اېمستور، بۇلسە هر سرو پرى رخسار شوخ،
لېك اېرور سرو پىرويوم مېنىگ بىيار شوخ.

گر مېنينگ شوخ ستم کاريم پريزاد اولمه سه،
ممکن اهرمس آدمی بولماغليغ اول مقدار شوخ.

تورمه سه قان بو کچه کؤکسوم شکافيدين ني تانگ،
کيم اهرور کؤنگلومگه کيرگن چابک عيار شوخ.

وه، ني تانگ هر لحظه بي طاقتليغيم کيم، دلبريم
با وجود حسن، هم شيرين اهرور، هم بار شوخ.

تا يپتيشگه ي جانغه يپتکورگن کؤنگولگه يوز بلا،
شکر اهرمين کيم، نصيب اولميش منگه دلدار شوخ.

شوخلردين توز قدم قويماق چو کيلمس، واقف اول،
کيم ستمگر چابکي دور چرخ کج رفتار شوخ.

گر دېسنگ کيم جانغه يپتمه ي هر زمان بير جوردين،
اي نوایي، پند اېشيت، يا ايسته مه بسيار شوخ.

۱۱۰

وه که، هجران شربتيدين بيزگه بولدي کام تلخ،
هر کيشي زهر ايچسه بولغه ي کام انگه ناکام تلخ.

هجر يپتسه مي بيله دېديم آوونغي مېن، ولېک
يارسيز بار اهرميش ايچمک باده گلغام تلخ.

شام هجر يمدين ني آگه اول که هجران تونلري
تانگه تېگرو تۆکمه دي شورابه ني بير شام تلخ.

شربتِ صبرِ آتینی توتمنگ که، بیر آی هجریدین،
آغزیمه حیوان زلالین ایلهمیش ایّام تلخ.

آغزیدین اچّیق سؤز آیتیپ ظاهر ایتسه زهرِ چشم،
عیب اېمستور پسته شور و تانگ اېمس بادام تلخ.

جامِ هجران چپککه لی بیلدیم که جورینگ صعب اېمس،
می نیچه تلخ اؤلسه، کؤرمس آنی زهر آشام تلخ.

ناصر اؤلمس کؤنگولگه بیتسه خونا ب فراق،
نې اوچون کیم تلخ می ایچگندن اؤلمس جام تلخ.

عمر شهیدی بس چوچوک دور، لېکن آخر فیلمه سه
مرگ زهری بیرله آنی دهرِ نافر جام تلخ.

وصل جامیدین نوایی اېلگه بؤلدی بهره نوش،
وه که، هجران شربتیدین بیزگه بؤلدی کام تلخ.

۱۱۱

سالدی بیر آیدین ایرو مېنی ابتلاغه چرخ،
قالدی اؤز آیی هجریده مېن دېک بلاغه چرخ.

گر خان و مانیم ایسته مس اېردی قرا، نېدین
قیلدی اسیر اول کؤزی، قاشی قراغه چرخ.

فرهاد بیرله وامق و معجون چیقیب اېدی،

سالدی مېنى الر عوضى دېب اراغه چرخ.

اول نې قوياش دورور که بجز صدقه ايله مک،
تاپمس انگه اوزين نېچه قيلسه مراغه چرخ.

نې ريو و مکر ابرور که کيريب عشق يۇلیدين،
بېچاره قيلدی سلطنت اهليين گداغه چرخ.

غم شامی باردی اول قوياش انداق که گردینی
تاپمس تيلب اؤکوش کؤز ايله توتياغه چرخ.

می توت که، فانی اؤلدى فلکدين بسی بنا،
هرگز خلل يیتورمه دی دير فناغه چرخ.

اهل وفا يۇق ابرسه، نې تانگ، چرخ جوفیده
هرگز چو ميل قيلمه دی رسم وفاغه چرخ.

تقدیردين نې کېلسه، نوایی، اطاعت ایت
کیم، سېن کيبي زبون ابرور امر قضاغه چرخ.

۱۱۲

خانقده حلقه ذکر ايچره غوغا قيلدی شيخ،
اهل دللر نقد اوقاتيني يغما قيلدی شيخ.

اول بیری دام ابردی، بو بير دانه اهل صیدی اوچون،
هر قچان کیم عزم تسبیح و مُصَلّا قيلدی شيخ.

يا خيالِ بنگ ياخود خانقه فكري اېدى،
هر كرامات و مقاماتي كه افشا قىلدى شيخ.

كف ساجيب، فرياد اېتيب، سېكريب، پريوشلرنى صيد
قىلغەلى، دېوانه ليغلر آشكارا قىلدى شيخ.

توق چىقريب خلوتدين، اوزنى روزه دېب، جھالدين
اسرو كۆپ ناداننى اوز طورىغە شيدا قىلدى شيخ.

با وجودِ مسخ و نادانليغ مريد ايلر اوچون،
كۆپ اوزيدىن مسخ و نادانلرنى پيدا قىلدى شيخ.

دير پيرى نىنگ مريدىمېن كه فيضِ عام ابرور،
خانقه ده فيضِ عام ابلدين تمنا قىلدى شيخ.

دير ارا تىندى قولاغيم، راهبا، ذكرىنگ بخير،
كيم سحر ذكر ايتوریده كۆپ علالا قىلدى شيخ.

اي نوایی، خرقة سين بېردى، كرامت ايله دى،
كيم منگه ترتيب وجهى رهن صهبا قىلدى شيخ.

۱۱۳

ساجىنگ كه هر طرف ايرىلدى بير معنبر شاخ،
حيات گلشنى نىنگ سنبلې دورور هر شاخ.

باشىنگدين ايرىليبان شاخ-شاخ كيم كؤرميش
بو نوع سنبل تر بؤلغانين سراسر شاخ.

يشيل تۇن و ايكي يېنگ بىرلە قامتىنگ اول سرو
كە، ايكي يانيدىن ايرىلميش ايكي اخضر شاخ.

قدىنگ خراميده ايلگىنگ جفاسى اؤكسومه دى،
غريب نخل كە، دايم انگه بېرور بر شاخ.

لېىنگ كە، باده لعل اندىن آقتى مست اۋلغچ
اېرور مشابھ مرجان و انده احمر شاخ.

قدى حياتيم اېرور، اورسە تاش و ئارتسە تيغ،
بو نخلدىن خوش اېرور گر ثمر دورور، گر شاخ.

چو ياغدى تاشى نوايىغه كۆپ شكست اۋلدى،
قوروق يىغاچقە ياغيب ژاله سىندى اكثر شاخ.

«د» حرفى نىنگ دلاراملرى نىنگ دورانى «غرايب» دىن

۱۱۴

آدم كە، بشر نسلى سلكىگه اېرور پيوند،
صورتده سنگه والد، معناده سنگه فرزند.

يوسف كە، جمال ايچره معدوم اېدى مانندى،
تاپمه دى ملاحته حسيني سنگه مانند.

عيسى دميدىن اۋلگن كيم، روح تاپر اېردى،
بيلگچ كە، تاپر دينىنگ، جان تاپتى بۇلوب خرسند.

دوران چمنیدین سېن اول لحظه كه، چیقیدینگ، گل
تیرناغلر ایله قیلدی رخسارینی یوز پرکند.

شهلرغه گدا انداق کیم کېلدى بوکون محتاج،
تانگله بؤلوبان شهلر احسانینگه حاجتمند.

گېسو سنگه بؤلمیش دور چون سلسله مقصود،
مجنونونگ ابرور جانلر قیل سلسله بیرلن بند.

شکرگه عذوبتده نطقونگ نې عجب کولسه
کیم، اېرنینگه اېش بؤلمیش اخلاق ارا شکرخند.

یوق بؤلدى کلامینگدین اسفار سما برچه
اسفار سماویدین بؤلغان کبى یوق پاژند.

نې کېلسه نواییغه سېندین یوز اېوورمس کیم،
اول ذره دورور، سېن مهر، اول بنده و سېن خاوند.

۱۱۵

سېن اوز خلْقینگنی توزگیل، بؤلمه اېل اخلاقیدین خرسند،
کیشیگه چون کیشی فرزندى هرگز بؤلمه دی فرزند.

زمان اهلیدین اوز پیوند، اگر دېسنگ بېراو بیرله
قیلى پیوند بارې، قیلمه غیل نا اهل ایله پیوند.

کونگول کامینی قوی، گر خود مېنینگ دېوانه کونگولومنی

تا پرسېن اۋىلە يۈز پركند و سال هر ايتگە بير پركند.

اېشىتمەى خلق پندىن، طرفە كىم، پند اېلگە هم دېرسېن،
قىلە آلسنگ، اېشىتگىل پند، سېن كىم، اېلگە بېرمك پند.

بو فاني دير ارا گر شاهلىغ اىستر اېسنگ، بۇلغىل
گدالىغ نانيغە خرسند و بۇلمە شەغە حاجتمند.

بۇلوب نفسىنگە تابع، بند اېتسېن توشسە دشمنى،
سېنگە يۇق نفس دېك دشمن قىلە آلسنگ انى قىل بند.

شكر لېلر تبسم قىلغەنن كۇرگىچ كۇنگول بېرمە
كە، بېدللرنى اچىغ يىغلە تور آخر بو شكر خند.

جهان لذاتىنى شيرىن كۇررسېن، لېك بندىنگ دور،
گرفتار اۋلمە، واقف بۇل كە، قيد و قند اېرور مانند.

كۇنگولدىن جھل رنجى دافعى گر اىستەسنگ باردور،
نوايى باغ نظمى شكرستانىدە اول گل قند.

۱۱۶

ياپ اول يۈز آيينەسېن چېكسم آه درد آلود،
بو وجەدىن كە، قىلور ميل خوبلر سىرى دود.

جهان كە، آھىم ايله تيره دور اېمس ممكن،
بو شام دفعى يۈزونگ صبحى بۇلمەيىن موجود.

يوزونگده هر ساريدين اېگمه قاش اېرور ياخود
بت آليده ايكي هندوغه واقع اولدى سجود.

مي ايچتي دېب مېني يازغورمېنگ، اي مسلمانلر
كه، رحمتيدين اېمس نا اميد گېر و جهود.

قدح كه، ديرده ايسترمېن اوشبو كوزگودين،
بيلينگ كه، مغېچه اېسكي اېرور منگه مقصود.

قاورلر ايتلري اول كوي ارا فغانيمدين،
ني ايت كه كۆپ اولوسه، اېل ارا بۇلور مردود.

دېديم كه: سود قيله ي جان بېريب وصال ي اوچون،
نوايا، چو فراقيده عمر چېكتي، ني سود.

۱۱۷

قاشينگ محرابيني وصل اهلي اېتميش قبله مقصود،
باشيم يوز قتله كورسم يېرگه هجرينگدين منگه ني سود.

ايچيمده عشقدين يوز برق و دم اورمقچه زهره ي يوق،
اوي ايچره اؤت ساليب، وه، مشكل اېرميش اسره ماغليغ دود.

يده تاشيغه قان يېتگچ ياغين ياغقن دېك، اي ساقى،
ياغر يامغوردېك اشكيم چون بۇلور لعلينگ شراب آلود.

چو قۇيدونگ داغ تيندوردونگ كۇنگولنى دردينگ ايستردين،
درم بيرله گداني اؤيله كيم، قيلغه ي كيشي خوشنود.

جنون بو بۇلسە كىم ياغدى پريوش طفللر تاشى،
مناسب دور بو تاشلر عقل اپشيگين قيلغهلى مسدود.

تۆكولدى گل، فغان بس قيلدى بلبل، شكر كيم، بارې
سپنينگ حسنونگ، مپنينگ عشقيمدە نقصان بۇلمەدى موجود.

تون و انجم دېمە دورانغه راحت قيلمەسون دېب ميل
قضا گل ميخلر قاقتى قيليب گردوننى قير اندود.

خرابات و مناجات اهلى ئينگ مطلوبى سپن دورسپن،
منگە كۇرستمە سنگ يۇل، نەيله يين قى سارى دور بهبود.

نوايى، كعبه ذكرين قۇى كه، بيز دير فنا ايستب
ذَهَبْنَا وَادِيَ الْمَقْصَدِ، وَجَدْنَا مَا هُوَ الْمَقْصُودُ.

۱۱۸

اي عارضى نسرين، ساچى سنبل، قدى شمشاد،
بلبل كېيى هجرينده ايشيم ناله و فرياد.

صيد اۋلدى كۈنگول كۈزلرينگه، وه، قوتولورمو،
بیر قوش كه، انينگ قصديده بۇلغەى ايگى صياد.

اول مكتب ارا كيم اۋقودونگ ناز رموزين،
گۇيا كه وفا علمين اونوتميش اېدى استاد.

اشكىمنى كۈروب تېز بۇلور كۈنگلى جفاغه،

آري، ايتيمس چونكه سويى بولمه سه فولاد.

مينگدين بير اېمس اوز يوره گى زخملىرىدىن،
هر نېچه كه تاغ بغرىنى زخم ايله دى فرهاد.

اؤلوگنى كيشى دفن ابته آلمس ولى هر كون
يوز تيغ قىلور دفن كوزونگ بولغەلى جلاد.

گل يفراغى تيرناغلر اپرور بو چمن ايچره،
بلبل پر و بالينى يولوب بېرگەلى برباد.

نې عيب، نوايى كېيى دېوانه ليغ ابته،
هر آدمى كيم، بولسه انينگ يارى پريزاد.

۱۱۹

ايله مس هر نوع بولسم اول بت رENA پسند،
بولمه غان كۆپ يخشيراك عالمده مېن دېك ناپسند.

عمر اؤتوب بير خدمتيم اول آي پسندى توشمه دى،
وه نې عمر اپركين، نې قىلسم ايله گەى آيا پسند.

يار اگر مشكل پسند اؤلميش كورونگ مشكل كه بار
مېنده يوز مشكل ايش، اول قىلمس بيرين اما پسند.

عشقيدە قىلديم جهاندين قطع و جاندين هم، نې سود،
چونكه اول جان و جهانيم ايله مس قطعاً پسند.

ای کۆنگول، کۆیدور طمع تخمین، تمنا مزرعین،
بو اېکیننی چونکه هرگز قیلمه دی دانا پسند.

دولت فقر ایسته گیل، نهو چون که بار، اول کوی ارا
صدق ایله کیرگچ، اگر اعلا و گر ادنا پسند.

چون فنا شالینی کیدیم اطلسینگ ییغ، ای سپهر
کیم، بو بازار ایچره اهرمس هرگز اول کالا پسند.

ساقیا، بېر اؤت که، کول قیلغه ی وجودوم خرمنین،
ایله مان حیوان سویین کیم، ایله گه ی احیا، پسند.

بو نې عقل و زهد بؤلغه ی، زاهدا کیم قیلمه غای،
مېن کبېی عالمده بیر دېوانه رسوا پسند.

کېچ بو باغ و گلریدین هم نوایی کیم، اېمس
اهل تحقیق آلیده دنیا و ما فیها پسند.

۱۲۰

تاپقه لی خاکی تنیمغه ناوک عشقینگ کشاد،
کۆنگلوم ایتور خیر مقدم، جانیم ایتور خیر باد.

خط مو دور یاخود بیاضیده یوزی نینگ کلک صنع
خوبلوغ طغراسینی زنگار ایله قیلدی سواد.

خطی نینگ وصفین یازمېن کیرپیک و خالی بیله،
خط یازرده چون ضرورت دور قلم بیرله مداد.

طعن قىلمىڭ كىم، بۇلۇب عاشق مرادې تاپمەدىڭ
كىم، اپرور بىزگە بو اىشتىن نامراد اۋلماق مراد.

كىردى گر شىدا كۈنگول، اى عشق، ناصح پندىغە،
غم يېمە دېوانەلر خويىغە بۇلمس اعتماد.

بو نفس كىم اۋلگەلى يىتمىشېز آنىڭ يادىدىن
اول مسىحا بىر عيادت بىرلە قىلمس بىزنى ياد.

اى نوایی، غم يېمە باشىڭگە بۇلسون مستدام
اول كە، باردور وارث تخت جم و تاج قباد.

۱۲۱

عارضىڭ مشتاقى دور بو كۈز كە بۇلمىش دردمند،
گرچە باردور دردىغ كۈزگە ياروغلوقتىن گزند.

درد اۋتىن ياقى كۈزومگە هجر، چون كۈردوم يوزىن،
كويدورور البتە هر دارو كە بۇلغەى سودمند.

بو قىزرغان كۈز ارا مردم اېمس كىم اېل كۈزى،
تېگمەسون حسنونگە دېب اۋت اوزره سالىمېن سېند.

تا كىم اول بېمار كۈز آشفتهسى بۇلمىش كۈزوم،
اىستەبان جنسيت آغرىق شېوھسىن قىلمىش پسند.

كۈزلىرىم لعلىغە ھمرنگ اۋلدى، وه، نې حال اېكىن

كىم، بو اچىغ يىغلهغان سايى اول ايلر نوشخند.

كۈزنى بير ايز توفراغيدىن روشن ايت كيم سود اېمس،
شاف كافورى چېكىب آسماق انگه مشكىن پرند.

اول قوياش هجرينده بيلمان كيم، نوايى كۈزيگه
برچه عالم تيره دور يا باغلهميش دور چشم بند.

۱۲۲

چېكر اون كۈنگلوم اورسنگ تىغ بېداد،
نې تانگ، سو قويغچ اېتمك شعله فرياد.

كۈنگول سېنسيز تاير غم شادليغدين،
غمينگ يېتگچ ولې ايلر انى شاد.

نې تانگ مېنونلوغوم كيم، جلوه ايلر
كۈزومگه لحظه-لحظه بير پريزاد.

كۈنگولنى، ساقيا، ميدىن قىليب خوش،
بوزوغنى سيل ايله ايلرسېن آباد.

مېنى شاد ايله گيل بير جرعه بيرله
كه، غمدين جانغه يېتتى جان ناشاد.

صنم آليمده ميدىن باش كۈترمان
كه، قىلدى دېر پيرى مونداق ارشاد.

سېنىڭ يادىڭ بىلەن ئۆلدى نوايى،
تېرىگ بۇل، گرچە ئنى قىلمەدىڭ ياد.

۱۲۳

جلوهده حسن اهلى ايچره كۆرمىشم بسيار قد،
قامتىڭ دېك ظاهر اپتكىن كۆرمەدىم رفتار قد.

كويىگە بارورغە يۇل بېردى الف دېك فال ارا
چونكه مېن قىلدىم تفاؤل، ظاهر بېتى يار قد.

نې صنوبر قالدى اۆز حاليدە، نې گل باغ ارا،
گل كېبى يوز بىرلە كۆرگوزدونگ صنوبر وار قد.

يوز كۆنگول بىرلە صنوبر بېدل اۆلغەي قديغە،
جلوه بېرسە، زارلر كۆنگلېن آلب دلدار قد.

صنع كلكى بير اليف چېكىش قدين كيم، اؤخشەمس
بىر انگە حسن اهلى تارتىب مشق اوچون بسيار قد.

عازم ميخانه مېن كيم، ناگە اول جانب منگە
كۆرگوزوب قىلدى نھان اول مھوش خمار قد.

اي نوايى، اول قوياش وصلين گداليغ قىلغەلى
ظاهر آلبمېن سريغليغ دلق و گردون وار قد.

۱۲۴

مېندىن اېل ھر سۆز دېسە، باور قىلور اول سرو قد،
يۇق منگە سۆز دېرگە حد، ھر نې دېسەم ھم برچە رد.

چون دېسە مقبوللر كۆپ نكتە، مېن مردودمېن،
مېن كە قولوم برچە رد، سۆز دېرگە تاپكەيمېن مو حد.

بېوفا احبابدىن بىر ھم منگە بۆلمەي مەد،
طرفە كۆر كىم، برچە ايلر مدعى سارى مدد.

طرفە راق بودور كىم، اول كىم جان انگە قىلدىم فدا،
باور ايلب حاليمە ھر نې كە دېب اھل حسد.

دەر اېلىدىن گوشە توتماق بۆلدى اول اۆيلە كىم،
توتمەغاي اول قوم آتین، تاپسە كىشى عمر ايد.

ساقيا، بېھوش دارو اېز، دغى توت بادە كىم،
اندىن اۆلسون ھوش، دارو ايلە زایل كىم خرد.

رندلر سر خيلى مېن دورمېن بوگون دىر اھليغە،
مىكدە توفراغيدىن مسند منگە بس دور سند.

عشق وادىسىندە مقصد ايچرە دور اۆل قدم،
اۆزلوگونگ كۈھ بلاسى بۆلمەسە آلىنگە سد.

اي نوايى، قىل فنا حاصل كە، ايستر چاغدە دۋست
بېلگە رۇست ايلب اېتك تېررگە بۆلغەيسېن مۇعد.

یؤق که آهیمدین قیلیبدور تیره بو ویراننی دود
کیم، قارانغو ایله میش ویرانه دوراننی دود.

دود آهیم کیم، چیقراوی تونگلوکیدین بو تره بان،
داشخانه ایله میش بو کلبه احزاننی دود.

آه دودی مو اپکین، یا عشق او یومگه سالدی اؤت،
بو که توت میش حجره و گنبدنی دود، ایواننی دود.

هجر زندانی سیه چال اؤلدی آهیم دودیدین،
اېمدی زندان اېتی عشق اهل یغه بو زنداننی دود.

آه وقتی چون آقرا شکیم قرا هجران تونی
مهره یی ایلر شبه هر بیر دُر غلتاننی دود.

تیره آهیم هر دم انداق تؤلغشور بؤغز و مغه کیم،
چیققه لی قویمس کؤنگول دین ناله و افغاننی دود.

کېچه اول آی کویی دوریده چېکیمېن اؤتلوغ آه،
خیل انجمنی شرر بیل، گنبد دوراننی دود.

چرخ ماتم کسوتی بېر میش منگه یا آه دین
پرده شېگون بيله یاپمیش مېن عریاننی دود.

باده شمعی بیرله، ای ساقی، یاروت کؤنگلومنی کیم،
آه دین قیل میش قرا بو کلبه ویراننی دود.

عالم اھلى نىنگ وفاسىزلىغىدىن چېكىم آھ،
سنىستان ايلەگەى يوز گلشن و بوستاننى دود.

اى نوایى، اسرو روشن اپردى ھجرىم شامى كىم،
تيرە آھىمدىن قاراق ھم قىلور ھجراننى دود.

۱۲۶

اونوتمە غىل كە تا ھجر اېتتى بېداد،
مېنى بىر نامە بىرلە قىلمە دىنگ ياد.

كۈنگۈل ياد اېتمە سىنگدىن بۇلسە غمگىن،
ولې روھوم اپرور يادىنگ بىلە شاد.

بوزوغ جىسمىم اووين يىقتى فراقىنگ،
بو اويدە كۆپ بوزوغلۇغ قىلدى بىياد.

كول اۋلدى سرو تا گلگشت اېترگە
قدىنگ بزم طربدىن قۇپتى آزاد.

مېنى گە دشت و گە تاغ اوزرە كۈرگن
تيرىلمىش ساغىنور مجنون و فرھاد.

كۈنگۈلنى مى بىلە معمور قىلدىم،
خمار دورانى قۇيمس آباد.

نوایى تېلە بۇلغان چاغدە كۆردى،

پرى بىرلە انى ساغىندى ھىمزاڧ.

۱۲۷

وہ کہ، ھر ساعت بۇلورمېن وىلىدىن يېتکچ نويد،
ياردين اميدوار، اما اۋزومدين نا اميد.

دېدى، مھمانىنگ بۇلوب يوز جور ايله ايله ھلاک،
وہ کہ، بار اول شوخ نىنگ ھر وعدەسىندە يوز وعيد.

قتليم اېتتىنگ، ايله سونلر اېلتىپان کويونگدە دفن
کيم، بارور جنتقە ظلمونگ تيغيدىن بۇلغان شھيد.

تيکتى کۈکسوم چاکين و تيغين تنيמדە قيلدى گم،
اېل اېشیکنى قفل اېتىپ توفراققە کۈمگن دېک کليد.

ايسلرەم کويونگ ايتى نىنگ نېچەسىن، نې ايشگە کيم
آنچه آسایش دماغيغە يېتورمس مشک بيد.

دۋست چون جان ايچرە دور، قۋى، «نَحْنُ اقْرَبُ» سۋزىنى
توت بۇيون بس کيم، يقينراق کېلدى «مِنْ حَبْلِ الْوَرِيدِ».

اي نوایی، شە خيالىن اسرە کۈز ملکی ارا
کيم، اېرور ھر باغ زاغان اندە ھر باغ سفيد.

۱۲۸

ايش منگە قيلماق دورور او شوخ بې پروانى ياد،

اول اونوتمیش آنی کیم، قیلغهی مېن شیدانی یاد.

خلد ارا بولسم انینگ کویین ساغینغوم، وه، نې تانگ
غربت ایچره ایله مک اهل منزل و مأوانی یاد.

بؤیله کیم لعلینگ میی نینگ شوقیدین مست اؤلیمیشم،
باده دېک قانیم تۆک، اېتسم باده حمرانی یاد.

لعلی اهلنی تیرگوزورده اؤزگهلرنی یاد اېتر،
اؤلتورورده غمزه سی ایلر مېن رسوانی یاد.

رشکدین بېخود تیلر مېن خلقتی کیم، قیلمه غای
جنس آدم اول پری پیکر ملک سیمانی یاد.

کؤر مونی کیم اندین اؤزگه کیمسه بار مو یادیمه،
ای که دېرسېن، قیلمه غیل اول چابک زبانی یاد.

دیر پیری ایلگیدین زُنار اېتر مېن آرزو،
هر قچان کیم، ایله سم اول دلبر ترسانی یاد.

دؤست یادیدین کؤنگولنی اؤیله ایستر مېن تۆله
کیم، اول ایله آلمه غای دنیا و مافیهای یاد.

چونکه توفراغ اؤلدی یادینگدین نوایی سېن دغی،
نېتتی قویسنگ جرعه یی توفراققه، ایلب آنی یاد.

«ذ» حرفی نینگ ذوی الحیاتلری نینگ ذوفنونلیغی «غرایب» دین

زهد و طاعت شهیدینی اهل زمان کورمس لذید،
هر نې نافع دور، مریض ناتوان کورمس لذید.

ظلمت اهلی غفلت ایسترلر که عالم کامینی
اویقوچه شبگیر قیلغان کاروان کورمس لذید.

قوت باطن ایسته کیم، ظاهر غذاسی بیرله طبع
بیر زمان گر تاپسه لذت، بیر زمان کورمس لذید.

عار ابتر پشمینه دین ابله تیلب زر رشته نی
کیم، ایشک حلوانی انداق کیم سمان کورمس لذید.

هر نې ایلدین قوتقروور لذتلیغ اول دور کیم، فقیر
مهر قرصین اویله کیم بیر پاره نان کورمس لذید.

یوتمه یین خونابه ییتمس وصلی آنینگ، اهل عشق
تاپسه کوثر شربتی، انداق که قان کورمس لذید.

تاپمه یین لذت نوایی سالدی کوزدین اشک دپک
باده نی تا خسرو صاحبقران کورمس لذید.

اېمس غمیمنی یازر خطقه زرفشان کاغذ
که، شعله چپکتی دمیمدین بیتیر زمان کاغذ.

سپهر دوری بو سرگشته آهیدین بؤلیمیش،
مگر بو آه توتون بؤلیمیش، آسمان کاغذ.

تیریلیمیشم بیتینگینگدین قیلورده مَهر، مگر
لینگه تپگدی و کپلتوردی تحفه جان کاغذ.

عذار و لعل لینگ و صفینی قچان یازدیم،
آقیب کوزوم یاشی گلرنگ بۆلدی قان کاغذ.

آچیلدی خسته کۆنگول رفعه سین یاره مغه یاپیب،
یاروغ بۆلور اېمیش اوی، بۆلسه تابدان کاغذ.

یازر فرشته قویاش صفحه سیغه و صفینگی،
مگر کیم اول فلکی تاپمس آبدان کاغذ.

کۆنگول شکافیغه کاغذ ارا ابرور مرهم،
غمیم سؤررغه رقم قیلسه داستان کاغذ.

کۆنگول صحیفه سین اسره خطور بحریدین
که سوغه ضایع اؤلور توشسه ناگهان کاغذ.

خمار دفعیغه قوللوق خطین تیلر ساقی،
نواپیا، دېمه حجت کپتور روان کاغذ.

۱۳۱

دېمه گیل کویینی بی نام و نشانلرغه ملاذ
کیم، ابرور تاج ده و ملک ستانلرغه ملاذ.

آچسه لر لعلِ می شوقی بيله ميخانه،
ساحتی بؤلغه ی الم دفعیغه جانلرغه ملاذ.

ای یاغیندین پنه ایستر کپی کویونگ یادی
وادی فرقت ارا اشک فشانلرغه ملاذ.

دیر پیری قولى دورمېن کیم، انینگ درگاهی
یخشیلرغه پناه اؤلدی و یمانلرغه ملاذ.

حبّذا، عشق که کړیاسی فضاسی دور انینگ
برچه بی منزل و مأوا و مکانلرغه ملاذ.

کیر فنا ملکيگه فارغ که، ابرور اول کشور
آهی سؤزانلر ایله اشکی روانلرغه ملاذ.

شاهِ غازی ایشیگین تېنگری بسی توتسون کیم،
ناتوانلرغه پناه اؤلدی و خانلرغه ملاذ.

«ر» حرفی نینگ رعنالری نینگ رستاخیزی «غرایب» دین

۱۳۲

ای ذاتینگه هر نېچه قلیب عقل تفکر،
اول فکرگه بؤلمه ی ثمری غیر تحیر.

یوز مهرگه نېتسون چو ابرور موجب حیرت
هر ذره که، تحقیقیده عقل ایتسه تفکر.

ادراک کمالینگنی خرد حدی ساغینگن
بیر قطره ارا ایله دی یوز بحر تصور.

کونین عدم بؤلسه، وجودینگنه نی تغیر،
گر موج سکون تاپسه، تېنگیزگه نی نغیر.

قهرینگ یوق اېتر خلقنی کیم تورغەلی بؤلمس،
صرصر یؤلیده پشه گروھیغه نهوڑ.

بو طرفه که، دفعینی یریم پشه غه قویدونگ،
هر پیل نهادی که سنگه قیلدی تکبر.

هجرینگ تونیده شمع کپی قالدی نوایی،
هر تون نی عجب کویسه تۆکوب اشک تحسّر.

۱۳۳

پریم بؤلسه اوچوب قاچسم اولوستین تا قناتیم بار،
قناتیم کویسه اوچماقدین، یوگورسم تا حیاتیم بار.

چقیب بو دیردین عیسی غه نهوچون همنفس بؤلمی،
بحمدالله تجرد بیرله همتدین قناتیم بار.

خلاق صحبتیدین مینگ غمیم باردور که مفت اولغهی،
اگر مینگ جان بهرب بیلسم که بیر غمدین نجاتیم بار.

چپکیب اغیاردین مینگ جور و تارتیب یاردین مینگ غم،

نې اۋزگە خەلقىدىن غىرت، نې اۋزومدىن اوياتىم بار.

كېچىب كۈزدىن يازەي بىر خەت كە دەر اھلىغە كۈز سالىمى
بو دم كىم، كۈز سوادىدىن قرا، كۈزدىن دواتىم بار.

تيلر كۈنگلۈم قوشى عنقادىن اۋتسم نارى يوز وادى،
مونونگ دېك سىر اېترگە قافدىن آرتوق ئباتىم بار.

نوايى، بىل كە شە كۈنگلى منگە قىد اۋلمەسە، بالە،
اگر كۈنىغە خاشاك چاغلىغ التاشىم بار.

۱۳۴

كېمە آغزى دېمە كىم، عشقىنگە كۈكسۈم چاكي دور،
بەر موجى يۇق كە، اشكىم سىلى نىنگ كولاكى دور.

سودە اېرمىس مەر عكسى، بلكە دريا جانىغە
سالغان اۋتلر خستە جانىم آھ آتشناكى دور.

خس اېمىس گرداب ارا كىم باشىنگە اېورولگەلى
سو اوزە سرگشتە عاشق جسمى نىنگ خاشاكي دور.

وہ كە، اول كشتىدە دريا كىش، منگە خود يۇق حيات
اېل دېگندىن كىم، فلان نىنگ كافىر بې باكى دور.

اول بلىغ توتقندە سالىب شىصت و آنىنگ رشكىدىن،
سودىن ايرىلغان بلىغ ىنگلىغ كۈنگۈل تاپاكي دور.

كۆرمە فقر اھلى سرشكى بحرىدە ھر يان حباب
كىم، فنا كوكبلىرى، بلكىم بلا افلاكى دور.

اى نوايى، كېمە تىرى كۆكسوم ايچرە ھجر اۋقى،
كېمە آغزى گۇيا عشقىدە كۆكسوم چاكى دور.

۱۳۵

آغزىم آچىتقان دمبدم اول لعل شگرخند اپرور
وہ وہ، توز اپرمیش اول کہ، مېن قىلدىم گمان كىم قند اپرور.

اۋتسنگ غمىم صحراسىدىن، قانلىغ كۈنگول اجزاسىدىن،
ھر لالە برگىن انگلە كىم، بىر داغلىغ پر كند اپرور.

كويونگدە مونگلىغ جانغە تن، يوز زخم ايلە دور خرقەيى
مرھم بىلە قۇيغان مموق ھر يان انگە پيوند اپرور.

مجنون كۈنگول قىلمس ھوا ھر يان كۈنگولدىن گۇيا
كىم، بو تېمور بىرلە يىغاچ حبسىغە آنىنگ بند اپرور.

باققچ قوياش رخسارىغە اندىن قىلورمېن كۈز ياشى
كىم، اول مسافر آيمە حسن ايچرە بس مانند اپرور.

غم برقى و محنت تونى زاینده بۇلسە عشقدين
تانگ يۇق کہ، اۋتقە گە شرر، گاهى توتون فرزند اپرور.

دنیا عروسى زلفىنى توتكن نې آگە فقردىن،
گنج ايستەمس اول كىم، يىلان توتماق بىلە خرسند اپرور.

مینگ ناله تارتیب کۆرمه‌ی اول گل وصلی آخر اؤلگنیم،
بو باغ نینگ بلبلری گر بیلسه‌لر، خوش پند ابرور.

کۆز اوچی بیرله باقتینگ و قییدینگ نوایی کۆنگلینی،
بیلدینگ انی کیم، بیر قییا باقماقچه حاجتمند ابرور.

۱۳۶

ای تیلیدین جانیمه گر یوز بلا موجود ابرور،
غم ییمان، گر اول قیزیل تیل تیغی خون آلود ابرور.

یوز اوزه سیمین زرخدانینگده خط مشکبوی،
اؤتقه قۇیغان آلمه‌دین گویا که چیققن دود ابرور.

جان بیریب آلدیم جنون و عشق تا بۆلدوم فنا،
الله-الله، اول نې خوش سودا، بو نې خوش سود ابرور.

هجر بېدادیدین اول یوز شوقی آرتر هر نېچه
کیم، خزان آسیبیدین گل یفراغی نابود ابرور.

کسوتې دور خلقتیم عشق آفتی شخصیه کیم،
رشته جان انده تار و تار جسمیم پود ابرور.

قیلمه‌دینگ عهدینگده بیر عهدې که قیلغه‌یسپن وفا،
بهوفالر عهدی مونداق گویا معهود ابرور.

مهر ایسی بو مجمر فیروزه‌دین کۆز توتمه کیم،

برچه قد شمشادی بو مجمر ایچینده دود ابرور.

ای که قدینگ بؤلدی خم، عالم بيله قیل خیر باد
کیم خم ایتمک قد همیشه لازم پدرود ابرور.

ای نوایی، ابرمس اول لازم کؤزی اویقوده کیم،
ظلم ایشیگی شاه غازی عدلیدین مسدود ابرور.

۱۳۷

یغله سم کؤنگلومگه ایشیم آه درد آلود ابرور.
اؤتقه کیم یامغور یاغر آنینگ نشانی دود ابرور.

لعلی شوقیدین کؤنگول خرسند ابرور خوناب ایچیپ،
تېلبه گه رنگین سو بېرسنگ، می دېبان خوشنود ابرور.

یوز ایاغی توفراغیدین آلمان اوشبو وجه ايله
کیم، نېچه توفراغ ایچینده تورسه آلتون سود ابرور.

چیقمس آهیم شدتیدین اول مه خرگه نشین،
شمعغه فانوس یېلیدین اسره ماق مقصود ابرور.

وصلین ایستب کؤپ اېنلیدیم، قاودی کوییدین مېنی،
بؤلسه مېرم شېوه، البته گدا مردود ابرور.

تلخ میدین، ساقیا، تاپتی چوچوک جانیم حیات،
ای بسا مکروه کیم، ضمنیده بیر بهبود ابرور.

تېلەبە ايتدېك دور نوایی اول پريوشسيز نې تانگ،
آغزیدین گر اوت ساچیب اعضاسی گرد آلود ابرور.

۱۳۸

اول که یوز محنتقه جانیم عشقیدین پامال ابرور،
انگه رحم و منگه طاقت یوق، عجایب حال ابرور.

زېب ابرور حسن اھلیغە اھل نظر نظارەسی،
کۆزکە، بلبل تیکتی گل رخساری اوزره خال ابرور.

خط شوقیدین تۆکولدی جسمیم اول ینگلیغ قوروب
کیم، سؤنگکلردە قلم کۆرگن ساغینغە نال ابرور.

لعلیدین کام آلمە غونچە بیلەدیم شیرینلیغین،
برگ گل زنبور کامی ایچرە کیرگچ بال ابرور.

گلخنی مجنون دېک آھیم چیققچ، آققن یاشلریم
تېلەبە کپینیدین یوگورگن گوییا اطفال ابرور.

بو چمن گلبرگی خوشرنگ اؤلسە، میل اېتمنگ کە، اول
غازە بلبل قانیدین سورتر کە، رنگی آل ابرور.

ای نوایی، کیمگە کیم بیر جرە چپکتی جام وصل،
سؤنگرە ھجران زھریدین یوز جام مالامال ابرور.

۱۳۹

یؤق عجب، لعلینگدین ار بېخودلوغوم آیین اېرور،
چونکه اوسروکرک بؤلور هر می که، لب شیرین اېرور.

رز قیزی تا پرده درلیق آیله گهی تلبیس اوچون،
شیشه معجر دور انکه و موجی آنینگ چین اېرور.

قان یاشیم تأثیریدین ساریغ یوزوم نینگ صفحہ سی
کاغذی دور کیم، حنا سویی بیلہ رنگین اېرور.

مهلک اؤتومنی دمینگدین تېز قیلہ، ای مسیح،
کیم بو اؤتقہ ماتم اشکی سوییدین تسکین اېرور.

اول پری عشقیدہ اشکیم لہو تخمی دور دېمنگ
کیم، ملک تسبیحیغہ بو دانہ دین تزیین اېرور.

آلمہ یین یېردین قدم سیر مقامات ایلہ مک
چنگ پیریدین بو بزم اھلیغہ کؤپ تلقین اېرور.

سبز و وصل، ای عیش اھلی کیم، نوایی جانیغہ
اندہ ہجران ازل دېوانیدین تعیین اېرور.

۱۴۰

تا لبینگ شوقیدہ جسمیم غرقہ خوناب اېرور،
ھر جنون تاشی انکہ کیم، تېگدی لعل ناب اېرور.

گر اسیر اؤلدوم، تانگ اېرمس کیم، کؤنگول نینگ لامی دېک،

مبتلا کونگلوده زلفی تاریدین قُلاب ابرور.

قدی یادپکلرنی زار اېتمیش هلالِ جام اوچون
اېگمه قاشینگ کیم، اؤزی راکع، اؤزی محراب ابرور.

کؤز قراسین یوب، سريغ عارضنی بی قدر اېتتی اشک،
گؤیا هر وجه ایله عین آفتی سیماب ابرور.

غم تونی گر تابسیز جسمیم کؤیر، وه نی عجب،
کؤیدورورلر کپچه کؤیراک رشته کیم، بی تاب ابرور.

هر طرف نعل و الف جسمیمده، گؤیا عشق ارا
خطِ ادباریمنی واضح قیلغه لی اعراب ابرور.

سپنده دور مقصود گنجی، لپک جسمینگ دور طلسم،
وه که، بو گنج اول طلسم ایچره عجب نایاب ابرور.

ای نوایی، جسم ارا جان رشته سین توتقیل عزیز
کیم، باری لولی وشیم لعبی اوچون اسباب ابرور.

۱۴۱

اول پری کؤنگلی اوچون روحوم اسیر و زار ابرور،
بوالعجب تاشی قنات سیز قوشقه بدرفتار ابرور.

هر کپچه قان بیرله جسمیم صفحه تقویم دپک،
گؤیی انجم تیرناغیدین سر به سر افکار ابرور.

كافر مستې دور اول كۆز كيم، كمنډ زلف انگه
يېشىيان يانیده قۇيغان رشتە زُنار ابرور.

بختيم اويقوسيدىن افغانلر چېكرديم گۇيا،
هر كېچە كۆز يوممه‌ى انجم تا سحر بېدار ابرور.

ينگله كۈنگلوم وصل تاپتى رحم قيل، اى آه كيم،
تۇ يېلدين يىنگى بوتكن ياره‌غه آزار ابرور.

قتليمه اول كۆز سوادى هيتيدين بغريغه
بیر قرا تاش باغله‌غان قان قيلغۇچى خونخوار ابرور.

اۋقوسم نامه‌نگنى پېچ و تابليغ بېخود تنيم
گۇيا كيم نامه‌نى چيرمب يوبارگن تار ابرور.
چون قوياش دېك يېرگه كيرگونگ، نې آسېغ، گر يوز قوياش،
مسندينگ طاقیده هر يان شمسه‌ دېوار ابرور.

تيرگوزوب، دېسېن، نوایى جانېغه منت قۇيه‌ى،
گر سېن اۋلتورسنگ كه اول جان بيرله منتدار ابرور.

۱۴۲

كۈنگول كه، عشقیده دېرسېن بلا نې بۇلغوسى دور؟
نې كيم بۇلور، سنگه بۇلغه‌ى، منگا نې بۇلغوسى دور؟!

اول آى جماليغه عشقيم خود آرته‌دور هر دم،
بو ايشته عاقبتيم، وه كه، تا نې بۇلغوسى دور؟

دېمە نې بۇلغوسى اول زلف قىدىدە، كۈنگلۈنگ
اسىر و والە و شىدا يىنا نې بۇلغوسى دور؟

فراق دردىگە دېرسېن دوا نې بۇلغەى اېكىن؟
بو دردغە ھەم اۋزونگ دې، دوا نې بۇلغوسى دور؟

بھشت، محنت اېمىس، بۇلسە وعدە دىدار،
وصال امىدى بار اېرسە، جفا نې بۇلغوسى درو؟

بو يۇل مسافرى نىنگ ھالى، آھ كىم، مطلق،
بىلىنمەدى كە، نې نۇع اولدى يا نې بۇلغوسى دور؟

نوايىا، دېمە فانى بۇلوب وصالغە يېت،
مىنگە كە، ھجر چېكىمېن، فنا نې بۇلغوسى دور؟

۱۴۳

جفا قىلور برى گلچەرلەر، وفا قىلە كۇر،
وفا ھەم اېلگە قىلورسېن، ولې مىنگا قىلە كۇر.

نې تېلەنى كە، مقىد تىلرسېن، اى گردون،
انىنگ سلاسل زلفىغە مبتلا قىلە كۇز.

دېسنگ ھىجابنى آلغەيلەر، اى كۇز، آلىنگدىن،
نې گرد انىنگ يۇلىدىن قۇپسە توتيا قىلە كۇر.

تجلى اىستەسنگ اول يوزدىن اۋرتەبان جىمىنگ،

كولى بىلە كۈنگۈل آيينەسىن جلا قىلە كۆر.

اميد وصل ايله كويونگ گە باردى خستە كۈنگۈل،
يىگىتلىگىنگ حقى، اول حاجتىن روا قىلە كۆر.

بىيىك نشىمن اپرور، اى كۈنگۈل، وصال اوجى،
طلب قناتى بىلە اول طرف هوا قىلە كۆر.

نوايا، چو المسيز مراد ممكن اېمس،
دېسنگ كە، وصل تاپەي، ھجر اۋتىغە ياقىلە كۆر.

۱۴۴

جانيم آرامى اوچون قاصد كە جاناندين كېلور،
گۈيا جان پرور نسيمې آب حيواندين كېلور.

نامە قاصد ايلگىدين، قاصد حبىيم آليدين،
مژدە جان يېلدين و يېل ماھ كنعاندين كېلور.

وعدە وصىلى كە جاناندين كېلور ھجران كۈنى،
تىندورور كۈنگلۈمنى سۆز يىنگلىغ كيم، اول جاندين كېلور.

گوهرې دېك دور كە، چىقمىش خامەسى نىنگ نوكىدين
نامە اوزرە شادلىغ اشكىم كە، مژگاندين كېلور.

شادلىغدين جان نثار اېتسم، نې تانگ كيم، بو خبر
ھم كۈنگۈلدين، فى المثل، ھم كۈنگۈلۈم آغاندين كېلور.

وہ کہ، مضمونی دور اہل درد سرگردانلیغی،
ہر بلا مکتوبی کیم، بو چرخ گردان دین کپلور.

دہر اہمیش نامہ مغہ قیل میدور نوایی جان نثار،
اندہ جان بولسہ قچان بو نوع ایش آندین کپلور.

۱۴۵

توتولمیش اپردی غضبدین اولوسنی قیلدی اسیر،
قویاش توتولسہ، بلې، فتنہ دور انگہ تأثیر.

اگر چہ یادہ گرہ بولسہ، اوقی توزچیقمس،
قاشی گرہ بیلہ ظلم اوقین اہتمہ دی تقصیر.

کۈنگولنی کۈزلرینگ آلدی، نې تانگ، ایکي بۈلمک
بیر اہل دیننی ایکي مست کافر اہتسہ اسیر،

کۈروب یوزیدہ غضب زلفی ساری قاچتی کۈنگول،
کۈنگولگہ سایہ کبرہ ک ایتیک اۈلسہ مہر منیر.

خدنگینگ اۋتتی کۈنگول پردہ سیغہ یپتمس اپکچ،
نې حد منع خصوصاً قضا اۋقیغہ حریر.

غم اۈلسہ، سالمہ گرہلر قاشینگغہ کیم، قیلمس
غلیظ اۈلوب بو قرا منع خامۂ تقدیر.

نواییا، سنگہ بو سۈزدہ شبہہ یی بۈلسہ،
قدح کپتور کہ، خطوطیدہ کۈرگوزہ ی بیر-بیر.

پریشیم قاره بۆرکین که، بیر یان اېگری قیلیدور،
مگر که شمع جمالی فتیلهسی اېگیلیدور.

خط اېرمس اول که، چیقاریب سویینی مهر گیه نینگ
قویاش صحیفه سیده رحمت آیتی بیتیلیدور.

نې نوع سینگره مهین هجر ارا که، بغریم و کۆنگلوم
فراق ایگنه لریدین اۆته. اۆته تیشیلیدور.

دلیل اېرور که، کۆنگوللرنی قیلیمیش اۆلغەسین آزاد،
بو کیم سلاسل زلفونگ توگونلری ییشیلیدور.

مسیح ایگنهسی مریم ایگیرگان ایپ بیله گویا
چیگیلیب، اېگنیگه جانبخشلیغ تونی تیکیلیدور،

اگر مسیح دعاسی اۆلوگنی تیرگوزور اېردی،
نې نطق اېرور که، سۆکونچونگ بیله اۆلوگ تیریلیدور.

تۆله قدح کېره ک ایچسم کۆنگولنی قیلغەلی خالی
که، انده دور اېلیدین درد و غصه کۆپ ییغیلیدور.

فلک دقایقیدین کیمسه باش چیقرمه دی هرگز
کیم، اوشبو رشته نینگ اسرو توگونلری چیگیلیدور.

کۆپ اېتمه وعده نواییغە وصل و قیلمه تمسخر

كە، بو محال ايش اېركنى اول هم اېمدى بىلىدور.

۱۴۷

كۆزى اول يوزاۋتىدىن خلق ايچىنى داغ اېتەدور،
ياخود ايكى قاشى نىنگ يالرىنى چاغ اېتەدور.

عشق كۈنگلۈمنى شيار ايلب و كۈزدىن سوغرىب،
مگر اول گل يوزى نىنگ حسرتىدىن باغ اېتەدور.

لعلدىن مست اۋلوبان باردى خمارىم مرضى،
طرفه مى دور بو كە، هم اوسروك و هم ساغ اېتەدور.

سوونگ اول آى اېوى نىنگ تامىنى بلچىغ يىسەبان
پىكرىم نىنگ اېوينى، هجر كە توفراغ اېتەدور.

هجرى اشكىم تېنگىز و جسمىم اېتىب كۈه بلا،
عالم عشق ارا بحر بىلە تاغ اېتەدور.

غم تۈنى مەرسىز اۋلدى كە، سېھرا نىجمىدىن
مەر رخسارىنى رېش اېتكەلى تىرناغ اېتەدور.

بو بلاغە نې دوا دور كە، نوايىنى اول آى
نېچە كە كۈرسە، مونى عشق انگە امراغ اېتەدور.

۱۴۸

كوندوز اول خورشيد رخشاندىن كۈزۈمگە ياش اېرور،

كېچە حالىم زلفى سوداسى بىلە چىرماش اپرور.

آلمەغان دىن نەقدى بىرلە يىقمەغان مىھراب يۇق،
اى مىلمانلار، نى كافر كۆز، مەفتىن قاش اپرور.

چاك كۆكسومدىن اىچىمگە سالىب اول آى كۆنگلى دېك
اسررم كىم، ھم اول آى باشىمغە آتقن تاش اپرور.

رحم اپمىس بېرھملىق دور سورمەسنگ باشىمغە رخىش
كىم، بو كۆپ قتەلە انىنگ پامالى اۋلغان باش اپرور.

عشق سىرىن نېچە كۆنگلوم اىچرە پىنھان اسرەسم
ھم، كۆنگول اۋتى زبانه چېكىچ، اېلگە فاش اپرور.

قىسى گل بزمىن كە سوغە، يۇقسە اېلگە بېرمەدى.
بو چىمىندە تا بولوت سقا، صبا فراش اپرور.

بېنوالر آلىدە عمر ابدىدىن يىخشىراق
كىم، نوايى دىر اىچىنىدە داخل اوباش اپرور.

۱۴۹

تېلرەب ايتكن كۆنگول يادىمغە كىرسە گاهلر،
يىغلب اېل كۆنگلى بوزولغودېك چېكرمېن آھلر.

اۋتتى خوبلر آى كېبى، يۇقتور ارادە اول قوياش،
وہ كە، اول بد مەھرنى كۆرمان اۋتادور ماھلر.

خوبلر زلف و زنخدانیغه باردینگ، ای کۆنگول،
حاضر اؤل، تون دور قارانغو، یۆلدە باردور چاهلر.

گر مصور سیزسه دېوار اوزره اول گل خرمنین،
جو به جو مېندین نشان بېرگوسی بېر-بېر کاهلر.

ای کۆنگول، فرهاد ایله وامق دغی مجنون قنی؟!
بۆلمه غیل غافل که، بېر-بېر باردیلر همراهلر.

تۆکتی قان گلگون لباسین کیگیچ اول خوبلر شهی،
قان تۆکر اېرمیش، قیزیل تۆن کیسه بې شک شاهلر.

ای بهار حسن، اېشیتسنگ نوایی آهینی
کېرەک، البتّه، خزان یېلین ساغینسنگ گاهلر.

۱۵۰

یوز تومن محنت اؤقی اندوهلیغ جانیمده دور،
تا هوادین سرزنش سرو خرامانیمده دور.

حاجتیم بودور، خدایا کیم، کرامت قیلغەسېن،
ناتوان جانیمغه هر زحمت که، جانانیمده دور.

درد مېنده سېندین آرتوق بۆلسه، جانا، نې عجب
کیم، سېنینگ جسمینگده دور زحمت، مېنینگ جانیمده دور.

سؤردوم، آغزی طعمی تلخ اېرمیش، عجب یوق اولمگیم
مېن که، بو ینگلیغ اچیغ طعم آب حیوانیمده دور.

ای مسیحا، صبحِ عیشیم تیرە بۆلمیش گۆیا،
ذرە بې تابلیغ خورشیدِ تابانیمده دور.

دەر باغی ایچرە برباد اۆلمەغان گل چیقمەدی.
یۆق عجب، گر ییلدین آسییې گلستانیمده دور.

ای نوایی، سۆرمەدینگ دېرسېن ملول اۆلغانده یار،
ساغینورسېن گۆیا کیم بخت فرمانیمده دور.

۱۵۱

کیردی سیمایی لباس ایچرە ینە اول گلەزار،
اول قویاش دېک کیم، انگە مانع بۆلور ابرِ بهار.

اول بولوت ینگلیغ لباس اوزرە سیزیلغان خطلری
بار انینگ دېک کیم، یاغین توشکی بولوتدین تار-تار.

بو لباس سیمگون ایچرە سېنینگ نازک تنینگ
اول کوموش دېک دور کیم، اول سیماب ارا توتقی قرار.

مهرِ رخسارینگ لباس سیمگوندین مطلقا
اول قویاش دور کیم، قیلور کۆزگودە عکسین آشکار.

بۆلدى سیمایی لباسینگ رنگی بس کیم، ایله دیم
کۆز سحابیدین باشینگە اشک سیمابین نثار.

تننی چون سیماب اپتر بو چرخ اخضر عاقبت،

تۇن اكر سىمابى اۋلسون، گر ىشىل، بىر حكىمى بار.

اى نوايى، كسوتى گر آبگون دور، نې عجب،
بو يقين دور كيم، اپرور سو ايچره دُر شاهوار.

۱۵۲

فرقتينگدين زعفران اوزره تۇكرمېن لاله لر،
لاله لر اپرمس كه، بغريمدين اپرور پرگاله لر.

در تيشينگدين دانه صبريم قالور بې بر دېسم،
كولوب ايتور كيم اپكين نينگ آفتى دور ژاله لر.

برگ گل اوزره ياپيشيدور شكر هر ساريدين،
يا مگر لعلينگ اوزه قيندورور تبخاله لر.

تاله-تاله نى اۋقونگ كۇكسومده گۇيا سيندى كيم،
تېرورولوپتور ناتوان كۇنگلومده بىر-بىر تاله لر.

فتنه ليك تۇقۇز فلک گردينگده، جانا، طرفه دور،
كيم كۇرورپتور بىر قوياش دورينده مونداق هاله لر.

بارديلر احباب و مېن يىغلمېن اۋز احواليمه،
كارواندين قالگن ايت ينگليغ كه، قيلغەى ناله لر.

كوه غم بۇلدى نوايى، لاله لر گلگون سرشك
تاغ اكر بودور، بلي، اشك اۋلگوسى دور لاله لر.

اول ملاحت شمعیدین مونداغ که جسمیم یانه دور،
هر بیر اوچقون غم شبستانیده بیر پروانه دور.

شام هجریم شرحین ایل افسانه قیلدی، آه کیم،
اویقوغه سالغان قرا بختیمنی بو افسانه دور.

غیر کیم، محو اؤلدی و سېنسېن بوزوغ کؤنگلوم ارا،
جغد ایتیب، طاووس بیر توتمیش عجب ویرانه دور.
کؤکسوم ایچره کیم غمینگدین ناردیک بؤلدی شکاف،
گؤیا هر بیر بغیر پرگالهسی بیر دانه دور.

کوییده سؤرسنگ کؤنگوللرنی اونوتمه، ای صبا،
مېنینگ آواره منی کیم، هم خسته، هم دېوانه دور.

چرخ شېگردیغه گؤیا نقدِ عمرونگ دور غرض،
تېگرننگ گه هر تون که، ایکی بوکره ییب ایلانه دور.

سؤرمه هجرینگده نوایی یارین و سر منزلین،
یار انگه دردینگ، وطن بیر کنج محنتخانه دور.

تا خیالینگ گه کؤنگول، گه کؤز ارا مهمان اېرور،
کؤز بیلن کؤنگلوم اراسیده حسددین قان اېرور.

کؤنگلومه پیکانلرینگدین قطره-قطره سو اېمس

حالىمە كۆزدېك بېغىنە اول دغى گريان ابرور.

غرقەمېن اشك ايچرە كيم، عشقینگ تنيمنى اؤرتەمس،
يؤقسە اؤت كيم كۆردى كيم، خاشاك ارا پنھان ابرور.

ھجر اؤقيدىن كيم ابرور بغيريم ارا يوز مينگ تېشوك،
ھر تېشوك بير كۆز دورور كيم، حالىمە حيران ابرور.

حسن ميدانيدە اول كۆز چابگى دور كيم، انگە
خال مشكين گوى و زلفونگ عنبرين چوگان ابرور.

دھر بوستانيدە باش چېككن نھال اطرافيدە،
شاخ اېمس، ناوك دېگيل، يفراغ اېمس، پيكان ابرور.

تيغ ايله دشوار ايلبسېن نوايى قتلىنى،
چھرەدين برقعنى آغيل كيم، بسى آسان ابرور.

۱۵۵

غنچە خندان بيله حسنونگ گلى خرم بهار،
خطینگ انداق سبزە كيم، بؤلغەى انگە ھمدەم بهار.

يوز اوزە تېردىن خطینگ گر باش چېكر، اى گل، نې تانگ،
سبزەغە باعث دورور، چون بؤلدى اېرسە نم بهار.

شادليغدين گلشن وصلينگدە ييغلب چېكسم آه،
ياپسە، يوز كيم، گلگە بؤلمس ييل ياغيندين غم بهار.

عارضيم عكسى يوزونگ آينه توشكن طرفه دور،
كيم كؤروپتور هم خزان بير آيده بؤلماق، هم بهار.

واي كيم، بير گل خزانغه سالدی عيشيم گلبنی،
اوشبو فصل ايچره كه تايميش جمله عالم بهار.

رعد و سيل ابرمس، فغان و اشك ابرور بو كيم، هر ابل
گل يوزونگ كؤرگچ توتر اؤز حاليله ماتم بهار.

قصدي بلبل كؤنگلي قيدي بؤلمه سه، نهوچون سالور
باغ شوخی سنبل زلفيله پيچ و خم بهار.

گل ابرمس، بو باغ تاراجيله اينك لعلدين
آيله دي آويه مهري دوريله خاتم بهار.

اي نوایی، چين بهار ابركين بو، ياخود كؤرگوزور
باغ خلقيدین اولوسقه داور اعظم بهار.

۱۵۶

وه كه كؤنگلوم غصه سی هر لحظه قصد جان قیلور،
هجریم اندوهی بوزوغ صبریم اویین ویران قیلور.

كؤپ مدد دور هجر اندوهیده ساووغ آهله،
كيم سينگورسه مهن كبی اؤزيگه قصد جان قیلور.

نېچه ييلليک محنتيم عشق ايچره بيلگه ی عاشقي
كيم، حديثين يار ايله اغياردين پنهان قیلور.

جاننى اىسترمېن چىقىرىم، اويىدىن كۆزلىرىنى ھىم
كۆنگلۈم اول دم كىم، خىيالىن لحظه يى مېھمان قىلور.

اسرەدېم جان ايچرە مېرىن، بىلمەدېم آخر نفس
اول مىسحا اۋلمگىم انگلب اۋزىن نادان قىلور.

فقر يۋلىندە ايرىك پشمىنەدىن عار اېتمە كىم،
ھىر تحركدىن تعين بندىنى سۇھان قىلور.

ساقيا، حالىمنى بىلدىنگ، اېمدى توتقىل باده كىم،
بو صعوبتلرنى بېخودلوغ منگە آسان قىلور.

راستلرغە چىرخ اگر ھىر لحظه قىلمىس سرزىش،
شمع پس ھىر تون نېدىن يىغلب كويوب افغان قىلور.

دفع اېتر دردىن نوايى نىنگ اۋشول مى كىم مدام
خسرو خسرو نشان ساقىلىرى احسان قىلور.

۱۵۷

ترردە عقدەليغ زلفىن مىسلسل ايله دى چىنلر،
گرە «مىم»، ايكى زلفى «لام»، اينك تراغ «سىن» لىر.

گرھلر زلفىدە گۇيا حساب ايلپتور اول كافر
آلورده زھد و تقوا اھلىدىن تاراج اېتىب دىنلر.

آسىب نېوچون فغانە سالدى زلفىدىن كۆنگوللرنى،

قرار و صبر نقدین آغەلى گر ايله مس قينلر.

نې يوز دور، الله-الله، باده تابيدىن كه، هر ساعت،
آچر نسرينلر اوزره گل، ساچر گل اوزره نسرينلر.

كېلور اول سرو كيم گلر ملون قىلدى گلشنى،
كىررده شه نېچوك كيم ملك اېلى باغلرلر آيينلر.

دېسم حسن اهلينى كۆرمنگ كه، ظالم دورلر و قاتل،
كۆنگول ايتور كۆرهى، شايد كه مونداق اېرمس اېركينلر.

اېرور محزون كۆنگولر ظلمتى زلفيده زار انداق
كه، شام هجریده عشق اهلیدین هر ساری غمگینلر.

نې يېلنماقدور، اى شه، مور خيلى دېك چېريگدين كيم،
سليمان دېك بو وادى ايچره برباد اۋلدى چندينلر.

نوايى، بۆلمه يين زار و ضعيف اۋلمس نوا تاپماق،
بو اېرميش پير چنگ اوتاريدىن دير ايچره تلقينلر.

۱۵۸

آليم اول آى سجده سيدىن رېش اېرور حاليم بو دور،
طاعت مقبولوم اول دور، داغى اقباليم بو دور.

اۋقلىرىدىن قوش دېك اۋلدوم جانغه اول كوى آرزو
اوچماق ايسترمېن، ولې كۆر كيم، پر و باليم بو دور.

بس غنیمین کوہِ غم بیرله جنون تاشی ارا،
اینک اینک تختِ جاهیم اول دورور مالیم بو دور.

یار شوقیدین اؤلر حالتده دورمبن، ای طیب،
نې علاجینگ بار مېنینگ خود ضعیف احوالیم بو دور.

چؤمغه لی قؤیمس قورق نې دېک سونگکلر اشک ارا،
طرفه کؤرکیم، بحرِ بی پایان ارا سالم بو دور.

تاپمه یین دنیاده کامې، دینی برباد آیلهدیم،
حیف دوزخ هم منگه، بالله، گر اعمالیم بو دور.

ای نوایی، گر اؤلرده جان تلشسم قیلمه عیب،
دېرمبن اول آینی کؤروب، جان بیرسم اھمالیم بو دور.

۱۵۹

تیرگوزور هر دم رقیبلرنی و مېنی اؤلتورور،
اؤت یاقیب اېل جانیهه مېنینگ ایچیمنی کویدورور.

کؤنگلوم احوالین صبادین سؤردوم اېرسه دېدی کیم:
تېلبه لردېک بیر پری کوییده سرگردان یورور.

اول قویاش یوزیگه باققن سایى آرتر کؤز یاشیم،
مهر تابیدین اگرچه هر نې کیم، اؤلدور، قورور.

قان یاشیم رنگی یاشوردی خاتم لعل آغزینی،
اؤینه ماقده یاشلر انداق کیم اوزوکنی یاشورور.

سېن كە يۇقسېن ماھ رخلر جلوھ ايلرلر ولېك،
كېچە ايشنر قورت نوري مهر چيققچ بيلگورور.

اول قوياش هجرانيدە هر تون ايكي مونگلوغ كۆزوم،
تانگه تېگرو صبح دم يۇليغه باقيب تېلمورور.

توزلوک ايلب شمع دېك، وه، بيلمە ديم كيم، بو نهال
محنت اۋتي گل آچر، ياش قطره سي بر كېلتورور.

بوالعجبيغله بهار عشق ارا كۆر كيم، مېنى
گە بولوت دېك ييغله تور، گاهي چاقين دېك كولدورور.

زهد آهنگين نوایی هر نېچه كيم ساز اېتر،
بیر نوا بیرله مغنی يانه يۇلدين آزغورور.

۱۶۰

ينه سېنسيزين مونسيم غم بۇلوپتور،
كۆزومگە يوره ك قانى همدم بۇلوپتور.

قاراريب كۆزوم دمبدم زار ييغله،
انگه شام هجرينگده ماتم بۇلوپتور.

ياره مدين چېكرگه اۋقین سعی قيلمنگ
كه پيكان سۇنگك ايچره محكم بۇلوپتور.

ايچيمدين نېچوك تارتكه يلر اۋقین كيم،

كۈنگۈل قۇيمس و جان مدد ھم بۇلۇپتور.

كۈنگۈلگە ياقىر كىرپىكىنىڭ نىنگ خىالى،
مېنىڭ زخمىمە نېش مەرھم بۇلۇپتور.

غبارىم تىلىب يىغلمە ھىر دم، اى كۈز،
كە اشكىنىڭدىن - اوق يېرى يوزى نىم بۇلۇپتور.

بو گلشن ارا برگ طوطىلىرىغە
خزان طفلى بس باغى رىم بۇلۇپتور.

وفا شىخسى نىنگ فرقىنى چىرخ نىغى
ايكى بۇلدى، وە كىم، بىرى كىم بۇلۇپتور.

اېمس غىم يوكىدىن كە، قاشىنگىنى كۈرگىچ،
نوايى سجد اېتكەلى خىم بۇلۇپتور.

۱۶۱

كۈزۈنگ نې بلا قرا بۇلۇپتور
كىم، جانغە قرا بلا بۇلۇپتور.

مجموع دوانى درد قىلدى
دردىنگ كە مىنگە دوا بۇلۇپتور.

عشق اىچرە انىنگ فداسى يوز جان
ھىر جان كە سىنگە فدا بۇلۇپتور.

بېگانە بۇلۇپتور آشنادىن
بېگانە غە آشنا بۇلۇپتور.

تا قىلدى يوزونگ ھواسى جانىم،
يوز سارى انگە ھوا بۇلۇپتور.

باقى تاپر اول كە بۇلدى فانى،
رھروغە بقا فنا بۇلۇپتور.

تا توزدى نوایی آيتِ عشق،
عشق اھلى ارا نوا بۇلۇپتور.

۱۶۲

كۆك غزالى چونكە كافور اوزره مشك افشان بۇلور،
كوكب افشان كۆزلرىمىدىن اول قوياش پنھان بۇلور.

مونگرەيب انداق سىنوق كۈنگلوم بوزولور كىم، سپەر
بوالعجب حالىمغە يوز مىنگ كۆز بىلە حيران بۇلور.

گە يوروب، گە اۇلتوروب، بىر لحظه توتەمسەن قرار،
غصّە بنىدىدىن برى عالم منگە زندان بۇلور.

گە كۈنگول اۋتى اورر كۈكسوم شكافىدىن الم،
گە بغير پرگالەسى كۆز يۇلىدىن غلتان بۇلور.

اۇلتورور اوى سقىغە آھىم تفىدىن قطرەلر
يا مېنىگ حالىمغە دور كىم، تام و تاش گريان بۇلور.

ای که، ایسترسپن سلامت، عشق کویین سؤرمه غیل
کیم، بو یؤلغه هر کیشی کیم، توشتی سرگردان بؤلور.

ایسته گنگه دؤست کامین ایسته بان کویمک نی تانگ،
گر توتون سنبل، اؤتون اشجار و اؤت ریحان بؤلور.

ایچنی عریان قیل که تاشینگ زبِ منع فقر اېمس،
فقر اېمس تور، گر ایچینگ مملو، تاشینگ عریان بؤلور.

ای نوایی، عشق منعین اېلگه ارشاد ایله دینگ،
الله-الله، بو نی مکر و حيله و داستان بؤلور.

۱۶۳

وه که، میدان عزمیغه سېکریتتی اول چابک سوار،
کیم دورور کیم، اسره غه ی اېمدی عنان اختیار.

قاش و کؤزونگدین اگر آرتر جنونیم نی عجب،
تېلبه لیک که هم ینگى آی دور مدد، هم نو بهار.

چاک اېتینگ کؤکسوم که، چیقسون اؤتلوغ آھیم شعله سی،
بیر نفس بؤلغه ی که، بو اندوه اؤتی تاپقی قرار.

عقل و فهم آشفته حال اؤلدی ییگیت جانینگ اوچون
کیم، ینه اویدین مونونگ دېک چیقمه غیل آلفته وار.

ساقیا، چون ایچکومیز دور عاقبت جام اجل،

بادە توت اندین بورون کیم، بیزنی اۆلتورگهی خمار.

بیر زمانلیغ هجر اوچون مینگ ییلچە بار، اۆلسم نې تانگ،
چونکه بۆلمس هیچ کیشی نینگ عمری مینگ ییل پایدار.

ای نوایی، شکر کیم، میدانغە اول شه قۆیدی یوز
کیم، یۆلیدە قالمەدی نومید جانی خاکسار.

۱۶۴

وحی نازل بۆلدى ياخود يارنېنگ پېغامى دور
کیم، غمىم تسکینی غمگین خاطریم آرامی دور.

صفحه کافور اوزه مشکين رقم کیم ايله مېش،
گۆيا صبح سعادت اوزره دولت شامی دور.

هجردين جانيم اراسيغه اگر خود کيرمه دی،
نېگه شکلی جان ارا کيرگن الف اندامی دور.

کیردی جان جسمیمغە خطِ صفحه سین کۆرگچ، مگر
اېلگه جان بېرمککه مهر اوزره مسیح ارقامی دور.

وعدۀ وصل اېردی مضمون، گه اۆلوگمېن، گه تیریگ،
انگله مان قاتل مو دور بو مژده، روح افزا می دور.

وادی حیرتده قالغانلرغە جان حرزی اوچون
رقعۀ مقصود کامل نطقی یا اعلامی دور.

ای نوایی، نېگه سورتوب کؤزگه سالمه‌ی جانغه کیم،
هم کؤزوم نینگ نوری، هم آزرده جانیم کامی دور.

۱۶۵

برماغی حیرت بيله کیم لعل خندان ایچره دور،
اول الف ینگلیغ دورور کیم، فی‌المثل جان ایچره دور.

خان حسنی ذوقینی بيلمک‌که یاخود برماغی
لعل خندان ایچره اېرمس کیم، نمکدان ایچره دور.

لعلی بیر سؤز بیرله یوز ییللیق اولوگنی خضر اېتر،
گؤییا روح‌الله اوشبو آب حیوان ایچره دور.

منفعل دور یوز و زلفیدین که تېبرنگه‌ی نسیم،
جلوه‌گر طاووس کیم، فردوس رضوان ایچره دور.

عارضینگ هجرینده هر قانلیغ کؤزوم دور لاله‌یی،
داغلا کؤزینگ قراسین انگله کیم، قان ایچره دور.

توتمه الفت باغ ارا کیم صرصر دیدین دورور،
ایمن اول قوش کیم، انینگ مأوایی ویران ایچره دور.

ای نوایی، بیرگه یوز جام بلا تورمیش توله،
هر نېچه کیم ساغرِ عشرت بو دوران ایچره دور.

۱۶۶

قاشىنىڭ كۆزدىن نھان، اندىن نھانراق خال مشكىن دور،
بو آنىڭ نىقەسى دور، گۇيا اول «نون» تىنىن دور.

كۆنگۈل زلفونىڭ غمىدىن تازە داغ ايلە گۇيا
كە، نىصفى قان و نىصفى مشك بۇلغان نافە چىن دور.

ايتىنىڭ نىڭ گاه ايزى، گە پنجهسىدىن دور دماغىم خوش،
بو بىر دور مشك بىد، اول بىر انگە گۇيا كە نىرىن دور.

نېدىن بىلمان يوزوم سىرغىدى محرق عشق تايىدىن،
يوزى اۆتقە يقىنراق بۇلغان اېل نىڭ چۈنكە رنگىن دور.

ايچىمدە انداق اۆت دور كىم، توگان جىسمىمدە كۆيدورسم،
انگە بو اۆتدىن انداق كىم، سودىن بو اۆتقە شىكىن دور.

يوزونىڭغە باقسە بۇلغەي آي و كۈنچە، نۇرى اۆكسۈلسە،
يقىن اېرمىس بو ھم، استغفراللە، بلكە تخمىن دور.

قىزىل تون بىرلە چىقتى، لالە رىخلر نې كۆرونىڭەي، ۋە،
بو گلىدىن خلعت اېتگن سىرو، الر ھىر يان رىاچىن دور.

جھان مكارەسى دلكش دور، اما كىم كە عقد اېتسە،
ايپىك جان رشتەسى، يارماق انگە دىن نقدى كابىن دور.

قاشىنىڭ محرابىغە، اى مغبچە، يوز قۇيغەلى قۇي كىم،
بو طاعت دىر پىرىدىن مىڭە عشق ايچرە تلقىن دور.

يوزونىڭ كۆرمىك تىلب تىنمىس نوايى كۆنگلى سالماقتىن

خدای اوچون آلیب بُرقعی آنینگ کۈنگلینی تیندور.

۱۶۷

نقطه خالینگ که کۈزدین دایما معدوم ابرور،
نقطه خال ابرمس اول کیم، نقطه موهوم ابرور.

تانگ ابرمس اول نقطه گر کۈزدین نهان دور، وه نې تانگ،
مردمین کۈرمکلیگیدین کۈز اگر محروم ابرور.

بس که خالی کۈزده دور بۆلمیش جهان بیر صفحه کیم،
رمل مشقی ینگلیغ انده نقطه-اوق مرقوم ابرور.

اختر بختیم دورور اول خال، یوقسه کۈرمه دوک
کوکب انداق تیره کیم، خورشید اوزه معلوم ابرور.

خال رخسارینگ کوموش مسنده هندوستان شهی
آلیده صف تارتیان خط، تابع و محکوم ابرور.

ای که میدین خالی ابرمس، دېب مېنی طعن ایله دینگ،
بارې کۈرگوز آنی کیم، بو دیر ارا معصوم ابرور.

داغ پنھان دور نوایی کۈنگلیده، ای لاله رخ،
نقطه خالینگ که، کۈزدین دایما معدوم ابرور.

۱۶۸

هر لبینگ اۋلگننی تیرگوزمکده، جانا، جان ابرور،

بو جهتدين بير-بيريسى بيرله جاناجان اپرور.

جانيم انداق تۇلدى جاناندين كه، بۇلمس فهم كيم
جان اپرور جانان اپمس يا جان اپمس، جانان اپرور.

بۇلسه جانان باردورور، جان هم چو جانان قىلدى عزم،
جان كېتىب جانان بيله جاناندين منگه هجران اپرور.

جان منگه جانان اوچون دور، يۇق كه جانان جان اوچون،
عمر جانانسىز قتيق، جانانسىز ولي آسان اپرور.

بارسه جان، جانان ييتىر، گر بارسه جانان، جان كېتىر،
كىمسه گه جانان و جانانسىز عمر نې امكان اپرور.

خوش تورور جان و جهان جانان بيله، جانان اگر
بۇلمسه جان ايله كيم، اۇلمس جهان، زندان اپرور.

جانيم آل، اى هجر و جانانسىز منگه رنج ايسته مه،
چونكه جانانسىز نوايى جانيدىن رنجان اپرور.

۱۶۹

هر قچان كيم كهمه گه اول آى سفر رختين سالور،
موجلوغ دريا كېبى آشفته كۇنگلوم قۇزغه لور.

يىغلمه اى كۇز، نېدين ساحلغه چىقمس كهمه دېب
كيم، ياشينگ درياسى دور هر سارى كيم اېل كۇز سالور.

تیتربان سیماب دېک کۈنگلوم، یېتر جان آغزیمه
تند یېل تحریکیدین هر دم که دریا چیقهلور.

صبر کۈنگلومده، کۈنگول اول آیده، اول آی کیمده،
وه که، باریب تېلموروب کۈز، مونگره ییب جانیم قالور.

دم توتولغاندین اۋلر اېل دېک یېتیمین اۋلگه لی
سورمه سون دېب کیمه سین بس کیم نفسلر اسره لور.

کیرمه سودا بحر یغه عالم دین ایستب سود کیم،
سیم نقدی توشسه، لېکن عمر نقدی سییغه لور.

غرق اېتر بحر فنا غم زورقین، ای پیر دیر،
ایلگیگه چون کیم نوایی باده کشتیسین آلور.

۱۷۰

جان بېرور اېلگه اگرچه لیدین قان تامه دور،
وه، دېمه قان تامه دور، بلکه چوچوک جان تامه دور.

ناز اۋقی بیرله کۈزوم مردمین اېتدینگ مجروح،
اشک گلگون دېمه زخمیدین آنینگ قان تامه دور.

وه، یرهم ایچره نی قان دور بو که دېوانه کۈنگول
تاپسه تسکین توره دور، ایلهسه افغان تامه دور.

گۈیا فتنه سحابیدین اېرور سیل بلا،
رخشیدین قطره که، جولان ارا هر یان تامه دور.

تامچى دېك اشكىم اېمس، كۈنگلوم اۋتى دفعى اوچون،
گە بدن كلبەسىنى قىلغەلى ويران تامەدور.

وہ کہ، گل شمعین اۋچورمکلیک اوچون دور گر خود
قطره اۋرنیغە بولوتدین در غلتان تامەدور.

لعلی وصفیدہ نوایی سۋزیدین آب حیات
قیلسە پیدا، آقەدور، ایلەسە پنهان، تامەدور.

۱۷۱

خال و خطینگ خیالیدین، ای سرو گلغزار،
گاھې کۈزومگە خال توشوپتور، گھې غبار.

یوزونگدە خال صفحەدە تامغان کبى قرا،
خالینگ ملاحظى توز اپرور کیم، قرادە بار.

جانیمنى اۋرتە گن یوز و خالینگنى بیلەسنگ،
اۋت شعلەسیدە ایلە گمان بیر اۋچوک شرار.

بیلمان کۈنگولده خالترینگ نینگ خیالى دور،
یا کیرپیگینگ تیکنلرین ایلېسېن استوار.

هر دم کۈنگول هلاک و کۈزوم تیره بۈلمەغین
بیلگەى بیراو کہ، یاری اپرور شوخ و خالدار.

مشاطه قضا بېزەمیش خال و خطینی،

بې اختيارلىقده منگه بار مو اختيار.

مسكين نوایی خال لبینگ كؤرسه جان بېرور،
باقسنگ نې بؤلدى صورتِ حالېغه، ای نگار.

۱۷۲

چىقتى آو عزمېغه جولان آىلب اول چابك سوار،
جان نثار اول صيد اوچون كيم، جان انگه قىلغەى نثار.

بو اېدى قصدیم كه بېر كۈن صيد فتراك ايله گەى،
قىلغانیم عمرې كىيكلر بېرله صحبت اختيار.

چون كىيك قتلینی ایستر، كاشكى روحوم اوچوب،
بېر قتل اېتگن كىيك جسمی ارا توتقى قرار.

تا كه يېتكورسم ركابېغه باشیمنى، كاشكى
قىلسه شخصیمنى قضا ایت شكلى بېرله آشكار.

قامتى هجریده هر يان ياره دین قانلیغ كۈنگول
بېر كىيك دېك دور كه، اۈز زخمى بيله بؤلمیش فگار.

گور اوچون آچماق نې دور هر لحظه بهرامى كمند،
چون سېنى بهرام دېك ایلر اجل گورى شكار.

ای نوایی، اول قویاش نینگ سایه سیده كؤر ایتین،
كامران و یوق سنگه آلیده ایتچه اعتبار.

برگ گل یوزینده لعلینگ رشکیدین خونابلر،
غنچه کؤنگلی ایچره آغزینگ حسرتیدین تابلر.

صفحه‌یی دور عارضیم دیاچه عشق اوراقیغه
قان یاشم نینگ خطلری شنگرف بیرله بابلر.

اشکیم ارتیلغان اوچون هم بؤلمه‌میش کیرپیکلریم
کیم، یسبدور کؤز خیالین چبککه‌لی کولابلر.

هجریدین کؤزلرگه کیم اشک اهورولور، اول اشک اېمس
کیم، اهرور درد و بلا دریاسیغه گردابلر.

عیبیم اېتمنگ باش کؤترمیدور دېان خُمخانه‌دین،
قیلمه‌یین مو سجده تاپسم بو صفت محرابلر؟!

هجر ارا ایکی کؤزوم ایچره بېلینگ نینگ نقشی دور،
اؤتکورو توننی خیال آیل ب کچه بی خوابلر.

روزگارین قیلدی مظلوم آهی نینگ دودی قرا،
کؤرمه ظالم خلوتی نینگ کؤرکه‌سین سنجابلر.

تېرگه باتقان گرم رولردین مگر دفع آيله‌میش،
اؤزلوگی چرکین تحرکدین ایریک ماشابلر.

دؤستلر، مسکین نوایی تیره شامین یاد اېتینگ،
یار ایله جام هلالی چبکسنگیز مهتابلر.

تېلە كۈنگلۈم، ۋە كە، ھەر سائەت بىراۋ سارى بارور،
مەن قىلدىم اېرسە، بىرەيم آغرىغۇدېك يالبارور.

قۇيدۇم اېرسە، كېلتورور مونگلوغ باشىمغە يوز بلا،
قۇيمەسم جانغە ضرر يېتگۇدېك اۋزىدىن بارور.

قۇيمەسم بو، قۇيسم اول، ۋە، بۇلسە يوز جانىم فدا
اول كىشىگە كىم، حەزىن جانىمنى اندىن قوتقارور.

عقل وسواسىنى قۇيسم اولى اول كىم، مېن دىغى
باشىم آلىب كېتكەمەن ھەر سارى كىم، اول باشقارور.

ساقيا، بىر نۆعمەن لب تشنە يۇق كىم آغزىمە،
ھەر يارەم آغزىغە قۇيسىنگ بىر قەدەن سىپقارور.

ايگى يوزلۇك بۇلمە كىم، بو باغ نىنگ رەناگلى
گر قىزارور بىر يوزى، لېكن ىنە بىر سرغارور.

كۈلدە پىنھان اۋت كېيى تاپمىس نوايى كۈنگلىنى،
ھەر نېچە كىم عشق كۈل قىلغان وجودىن اختارور.

اول آى كە، جفا نردىنى خۇبلىردىن اۋتوپتور،
يارب، نې بلا، مەر و وفانى اونوتوپتور.

آغزی بیلە پستە اۋچشور پوچلیغیدین،
بیلمان کە اۋشول آغزی آچوق قیدە بوتوپتور.

هر دم قیزیق آهیم تفیدین مضطر اۋلورمېن،
اۋتلوغ نفس، ای وای کە، آغزیم قوروتوپتور.

ییلر لبِ لعلینگ غمیدین جانِ حزینیم
حسرت سویینی خونِ جگر بیرلە یوتوپتور.

عکسینی کۋنگول کۋزگوسیدە کۋردوم و اۋلدوم
کیم، غیرین انینگ ابویگە نېوچون یوتوپتور.

هجران کونی عشق اهلینی اۋرترگە مگر چرخ
آتشکده سیدە شفق اۋتین یاروتوپتور.

بلبل کببی خوشگوی نوایینی قیلیب خوار،
اول گلنی کۋرونک جانبِ بدگوی توتوپتور.

۱۷۶

برچه خوبلرنینگ قد و رخسار و خط و خالی بار،
لېک اول کیم بیزنی بېحال ایلر اۋزگە حالی بار.

یوزوم آلتون دېک دورور بو وجهدین کیم، حالیا
سیمبرلر اول کیشی نینگ دور کیم آنینگ مالی بار.

کیرگەلی کۋنگلوم ارا بیر-بیر اۋقونگ بۋلمیش تنیم
اول قلم دېک کیم، آنینگ ایچیدە توز-توز نالی بار.

سنبولنگ توشسە اياغىنگ آستىدە نې عىب كىم،
گل بىلە خورشىدنىنگ آستىدە لام و دالى بار.

اول سبىدىن، زاهدا، مشغول اېمىمېن زەھد ایلە
كىم، كۈنگۈل نىنگ مطرب و مى بىرلە كۈپ اشغالى بار.

آدم اۋلەمىشمېن كە، عشق اھلى منگە اولاد اېرور،
يۇقسە ياشدىن مېنچە كىم نىنگ يوز سارى اطفالى بار.

گھر مقصود چون وابستە توفىق اېرور،
دېسە بۇلمىس كىم، مونونگ سعيى، انىنگ اھمالى بار.

اي نوایی، تاپمە سنگ كامې لب جانبخشيدين،
سېنىنگ اوچون بۇلسون انىنگ غمزە قتالى بار.

۱۷۷

چارە کار ایستەبان بېچارەلیغ کۈنگلوم تیلر،
خان و مانیم ترکین قیلیب، آوارەلیغ کۈنگلوم تیلر.

ایسترمه آلینگده قیلمس سجده و اۋپسم لېنىگ،
بت پرستش ایلەبان، مېخوارەلیغ کۈنگلوم تیلر.

بغریم و کۈکسوم بیلە کۈنگلومنى قیلدینگ یارەلیغ،
جاننى هم بو حال بىرلە یارەلیغ کۈنگلوم تیلر.

عاشق ایشی چون سَوَاذُالْوَجْهِ فِی الدَّارِین اېرور،

بو ملامت كوييده يوز قارهليغ كۈنگلوم تيلر.

قصديمه هر ياندين اول كوي ايتلرين قۇي، اي رقيب
كيم، سلامت پردهسين يوز پارهليغ كۈنگلوم تيلر.

تن غبارين جان يوزيدىن رفع قيل، اي درد كيم،
كۈزنى اول يان گە - گەھي نظارهليغ كۈنگلوم تيلر.

اي نوايى، نېچە كيم كۈنگلومگە توشكن درد اوچون
چارە ايستمېن، ولې بېچارهليغ كۈنگلوم تيلر.

۱۷۸

هر اۋقى اول قاشى يانينگ جاننى كيم قربان قيلور،
راست بير اۋق دور كە، قربان كۈنگلوم ايچرە سىنچيلور.

ايستەسە وصلې كۈنگول، كۈز رشكدين قان ياش تۈكر،
كۈز يوزين كۈرگچ، كۈنگول يوز نالە غيرتدين قيلور.

تيغى كۈكسوم چاك اپتيب، كۈنگلومنى آچسە نې عجب
كيم، روان سودين هميشە خلق كۈنگلى آچيلور.

گرم اۋلوب هر يان اول آتشپارە كيم ناوك آتر،
راست اۋتدېك دور كە، گرديدن شررلر ايريلور.

يوزنى اۋن تيرناق ايله كيم غصهدين قيلديم شيار،
دانه اپركين كۈز ياشيم كيم، هر دم انده ساچيلور.

باده ايچ کيم، چرخ جامی سرّینی جم بيلمه‌دی،
گرچه اول یوز جم کبی میخواره نینگ دورین بیلور.

آه اؤتیدین شکوه گر ایلر نوایی عیب اېمس،
تېله‌لرنینگ هر نې کیم، آغزیغه کېلسه ایتیلور.

۱۷۹

ای صبا، شرح آيله اوّل دلستانیمدین خبر،
سؤنگره دېگیل کؤنگول آتلیغ ناتوانیمدین خبر.

چون منگه بېردینگ خبر، لطف آیلې اول یان داغی اېلت،
خاطر مجروح آيله آزرده جانیمدین خبر.

گر بولر کؤنگلیگه تأثیر آيله مس دېک بؤلسه، ایت
یېر یوزین غرق آيله گن اشک روانیمدین خبر.

ور مونگه هم قيلمه‌سه پروا، دېگیل افلاک اېلین
کېچه. کوندوز جانغه یېتکورگن فغانیمدین خبر.

قیلسه استغنا کبره ک کیم، ايله گهی، البته، رحم،
گر دېسنگ جانیم ارا داغ نهانیمدین خبر.

آیت کیم، توتقیل خبر مېندین یؤق اېرسه، تاپمه غونگ
عالم ایچره ایسته‌بان نام و نشانیمدین خبر.

عرض قیل تدریج ايله کیم، شادلیغدین اؤلمه‌یین،
ای نوایی، کېلسه ناگه دلستانیمدین خبر.

يارب، بو نې گل دور کيم، باشيغه چېچک سنچر،
گه اېگري قۇير بۇرکين، گه بېلگه اېتک سنچر،

کۇنگلومگه چېکيب ناوک، عاج ايله دی پيوندین،
هر زخم که اول تېشتی اېل انگه سۇنگک سنچر.

باشيمده هوس لعلينگ، عالمغه وداغ اېتتيم،
چيقسه کيشی مجلسدين، باشيغه گزک سنچر.

غم کلبه سیده، جانا، اول خسته غه رحم اېت کيم،
تېرنسه بغير آغري، دم اورسه يوره ک سنچر.

قلاّب محبت دور سرگشته کۇنگوللرگه،
چون قوش ساليب اول چابک، باشيغه کجک سنچر.

هر کوکب اوچين گردون نيش اېتتى شعاعيدین،
غم شامی وفا اهلين هر نوع کپره ک سنچر.

سنچيلغان اجل خاری عشق اوچره سه بيلگه يسهين
کيم، جانغه بلا نيشين هجر اؤزگچه ره ک سنچر.

جسمين چو نوایی نينگ پیکانی تېمور قيلدی،
بيلمان که، سنان اېمدی بغريغه نېتک سنچر؟!

غمىنگ اۋقى كە كۈنگۈللەر اۋيىن نشانه قىلور،
مېنىڭ چو خاكي تىم ايچرە يېتتى، خانه قىلور.

لېىنگ بهانه سىز اېل قانىنى تۈكر هر دم،
منگە چو يېتتى ايش، البتە، بير بهانه قىلور.

كۈنگۈل بېرورده فسولوغ كۈزىگە بىلمس اېدىم
كە، اېل ايچىندە مېنى عاقبت فسانە قىلور.

كۈنگۈلدە جوهر پىكانىنى كە يىغمىش جان
عجب اېمس كە، بو ويرانەنى خزانه قىلور.

دېسە كە، مهر گياھىن كۈكر تيرەيىن گردون،
زمانە اھل وفا كۈز ياشىنى دانە قىلور.

ھلاك دامى يايىر صبح خىز قوشلار اوچون
سحر يېلى كە، چمن سنبلىنى شانه قىلور.

نصيب بلبل اوچون خار غم دورور، اول ھم
نوايى نغمەسى بيرلە مگر ترانە قىلور.

۱۸۲

تا بۇلدى كۈنگۈل اول كۈزى اوسروك كە گرفتار،
اېل كۈزىگە ساغمېن، لېكن اۋز-اۋزومە بېمار.

تانگدين تىم آقشامغچە تاش زخمى بىلە رېش،
توندى بدنيم تانگغچە تيش زخميدىن افگار.

کلبم نینگ اېمس خشتلری درزی که، آچمیش
حالیمغه فغان قیلغهلی آغزین در و دېوار.

خلق ایچره کؤنگول عشقینی فاش ایلهدی آهیم،
اوی ایچیده اؤت بار اېکنین دود اېتر اظهار.

اول بت غمیدین کافر عشق اؤلغهلی کؤنگلوم
جان رشتهلرین جمع قیلیب باغلهدی زنار.

خوش گلشن اېرور دهر بودور عیبی که، انده
پیوسته خزان ییلیدین آزرده دور اشجار.

یار آلیده گر بار، یؤق اېرسه عجب اېرمس،
اغیار چو بار انده، نوایی سنگه نی بار؟!

۱۸۳

فغان که، یار وفا اهلیمغه ستم قیله دور،
نیاز و عجز گناهیمغه متهم قیله دور.

نعیم وصلیمغه خوی آیه گن کؤنگوللرنی،
اسیر هجر اېتیبان مبتلای غم قیله دور.

رقیب بېهوده تقریری بیرله یوز تقصیر،
ضعیف غمزده لر آتیغه رقم قیله دور.

نی حکم قیلسه وفا اهلی جرمیده غم اېمس،

بو ظلم اپرور كه، جفا اهلينى حَكَم قيله دور.

اؤز ايلگى بيرله گر اؤلتورسه باك يۇق، وه كيم،
رقيب آليده افتاده و دژم قيله دور.

محبت اهلينى، وا حسرتا كه، كؤپ اؤرتب،
الرنينگ آهى اؤتيدىن هراس كم قيله دور.

چو گل وفاسيز اپرور، نېچه اسره سم، وه كيم،
كؤنگول قوشى بو گلستاندين اېمدى رم قيله دور.

زمانه اؤق كېيى توزلرنى سيندوروب، «يا» دېك،
الر كه اېگرى دورور شهغه محترم قيله دور.

نوايى اؤلگه ي اېدى بؤلمه سه اميد وصال،
بو قصدلر كه، انگه هجر دمدم قيلور.

۱۸۴

اول كه آنسيز خسته كؤنگلوم نينگ يوز آه و وايى بار،
هجرىدين يوز مينگ مېنينگ دېك اؤلسه، نې پروايى بار.

چرخ تانگ آتقونچه ييغلر مھرين اېلدين ياشوروب،
گؤيا اول سرگشته نينگ هم بير مسافر آيى بار.

گنج حسنونگ ينگليغ اؤلميش مخزن مھريم مېنينگ
كيم، نېچه اسراف بيرله خرج قيلغان سايى بار.

زهرِ هجران کیم چېکرمېن، طعمینی بیلگه‌ی مگر
بېدلې کیم، بیر وفاسیز کافرِ خودرایي بار.

عشق ملکیدین خبرلر تاپسه لایلا تانگ اېمس
کیم، انینگ مجنون کبې پیک جهان پیمایی بار.

مهرنینگ کؤرمه شفق ایچره شعاعي خطرلین
کیم، سپهر آسییدین مژگان خون پالایی بار.

هجر ارا قیلدی نوایی فاشلرینگ کؤنگلیده نقش،
رمز اېلی دېک ایش کونی قربانده ایکی یایی بار.

۱۸۵

وای، یوز مینگ وای کیم، ترک محبت قیلدی یار،
بیلمه‌یین قالدیم مېن و قیلمه‌ی خبر ایریلدی یار.

باردی اؤق دېک تېز و یادېک قامتیم یاد اېتمه‌دی،
عشق ارا گؤیا مېنینگ اېگریلیگیمنی بیلدی یار.

چون گدالر بیرله شهلر قیلمس اېرمیش یارلیغ،
مېن گدانی کؤزگه پس نه‌وچون بوروندین ایلدی یار.

پند اېشیتیب، دؤستلر، هیچ کیم بیله یار اؤلمنگیز
کیم، مېنینگ بغریمنی تیغ هجر بیرله تیلدی یار.

مېندین ایریلغان بلا و درد اوچون مو ییغله‌یین
یا انگه کیم، باریبان اغیار ایله قاتیلدی یار.

يىغله شيب غم شامى ظاهر آيله سونلر درد اۋتين،
كىمگه كيم بيت الحزنده شمع دېك تاپيلدى يار.

اي نوایی، يار اوچون تارتر اېدينگ غربته رنج،
يۇلغه توش، اېمدى روانراق بۇل، عزيمت قىلدى يار.

۱۸۶

هر قه يان باقسم كۆزومگه اول قوباشدين نور اېرور،
هر سارى قىلسم نظر، اول آي منگه منظور اېرور.

چون مثل بۇلدى ساچينگ ظلم ايچره، ياشورماق نې سود،
مشك ايسين ياشورسه بۇلمس، بو مثل مشهور اېرور.

تېلبره بمېن تا انى كۆرمان، عجايب دور بو كيم،
اول پرى دېوانه كۆزىدين دغى مستور اېرور.

چون مدام اېرينگ مې قاشينده دور كافر كۆزونگ،
نېدين اېركين كيم، دمې اوسروك، دمې مخمور اېرور.

دلربالر داغى جانيم صفحه سیده گۇيا
درد اېلى عشقيم اوچون مهر آيله گن منشور اېرور.

پر اوروب باشينگه توتمه اوج كيم، هر نېچه مور
كيم، قناتلنغھى قچان اوچماق انگه مقدور اېرور.

گر نوایی سيمبرلر وصفين آيلب كۆرسه رنج،

يۇق عجب نېچونكە خام اپتگن طمع رنجور اپرور.

۱۸۷

يار باردی و كۈنگلومده انینگ نازی قالیپتور،
انداق كه قولاغیم تۆله آوازی قالیپتور.

كۈز خانه سینی قیلدی برانداخته بو اشك،
كۈز باردی ولې خانه براندازی قالیپتور.

كۈنگلوم قوشی تا سنبلونگوز دامیغه توشتی،
بلبل كېبی هر گل ساری پروازی قالیپتور.

اول قوش سفر ایلې نې طرب گلبنین آچقی
کیم، باغ ارا بیر سرو سرافرازی قالیپتور.

مېن عشق رموزین دېمه ی اۋلدوم، سفر اپت کیم،
فرهاد ایله مجنون نینگ اۋكوش رازی قالیپتور.

تقلید قیلیب كۈنگلومه عشق اهلی چېكر آه،
اول باردی و اېل ایچره سر **آوزی** قالیپتور.

هجران و وصالین كۈپ و آز دېمه نوایی،
یوز شکر دې کیم، كۈپی باریب آزی قالیپتور.

۱۸۸

اول ملک سیما پری کیم، خلق انینگ حیرانی دور،

جانلر آشوبی ولی آشفته جانیم جانی دور.

طفل اوراق ایچره بیر-بیر برگ گل تهرکن کپی،
نامه هجران ارا تیم-تیم سرشکیم قانی دور.

کؤرسه جان زخمیده قانلیغ مرهمین ایلر گمان
کیم، بوزولغان کؤنگلوم اؤتیدین قیزیق پیکانی دور.

یوزونگه می گللی یوز فتنه قیلدی گؤیا
فتنه هر گل کیم، آچر، یوزونگ انینگ بوستانی دور.

بار مو دور کؤنگلومده کپسکن هم الف، هم نعل و داغ،
یا بو مرآت ایچره سالغان عکس حسنونگ آنی دور.

دهر تاراجی قیلور عریان چمن رعنالین
یپلدین اون چپکمس ییغاچلر کیم، چمن افغانی دور.

ای نوایی، بیل که تانگ آتقونچه ییغلر هر کچه
چرخ دپک هر کیم که، بیر بد مهر سرگردانی دور.

۱۸۹

شهسواریم هر قچان جولان قیلور،
محو اولوب بیلمان اؤزومنی، حق بیلور.

انگه هر کؤز کیم توشر، کیرپیکلری
خسته کؤنگلومگه تیکن دپک سنچیلور.

آچیلور کۈنگلوم سمندى سیریدین،
غنچه ینگلیغ کیم صبادین آچیلور.

ایریلور گۈیا قویاشدین بیر شهاب
آتی نعلیدین هر اۋت کیم، ایریلور.

آه تارترده مگر جان پیچ اورر،
اۋق آترده هر قچان کیم قیریلور.

توسن گردوننی مرکب قیلمه کیم،
ییر بیله راکبئی آخر تهنک قیلور.

تهز ابتر تیغینگ نوایی عشقینی،
گرچه اۋت اۋچر، اگر سو ساچیلور.

۱۹۰

قیسی بیر کۈک نینگ یوزینگ دېک مهر عالم تابى بار؟!
قیسی گلشن نینگ جمالینگ دېک گل سېرابى بار?!

زلفیدین، ای زخملیق کۈنگلوم، قوتولغونگ یۇقتورور
کیم، سېنینگ هر حلقه زلفونگده بیر قلابى بار.

زلف و یوزیدین دم اورمنگ، تون بیله کون چشمهسى
کیم، بو سنبل بیرله گل نینگ اۋزگه آب و تابى بار.

نې اوچون هر دم سريغراقتور یوزوم نینگ آلتونى،
با وجودى کیم یوزیده اشکدین سیمابى بار.

سجده گر ایلر ملک، نې تانگ کیم اول آی قصری نینگ
کنگره شکلیدین اطرافیده کۆپ محرابی بار.

دولتِ ظاهر که، محبوب ایلهدینگ، ترک ایله کیم،
قیدینگه زلفینی دال و لامیدین اسبابی بار.

یوز و لعلینگدین نوایی بېخود اؤلسه سؤرمه غیل،
بیر ایتینگ دور کیم سحر وقتیلده شگر خوابی بار.

۱۹۱

اول که یوز مېن دېک جهانده واله و شیداسی بار،
نېچه کیم باردور نیازیم، ناز و استغناسی بار.

دمبدم کؤنگلوم بېریب جان نقدی ایستر وصلینی،
الله-الله، تېلبه کؤنگلوم نینگ عجب سوداسی بار.

کؤنگلکیم قانلیغ توگانلر اؤرنیده گل-گل اېرور،
اول کتان دېک کیم، یوزیده هر طرف تمغاسی بار.

تا اؤقونگ یامغور کېبی کېلدی، کؤزوم بؤلْمیش صدف،
با وجودِ اول که دُرْدین یوز سری دریاسی بار.

جان بېریب، دردینگ آلیب کؤکسومده اسررمېن، نې عیب،
اسرهسه صندوق ارا اول کیم ثمین کالاسی بار.

بؤلْمه ایمن چرخ دوریدین مرقع پوش دېب

كىم، قوياشدىن بو مرقع ايچرە اۋتلوغ طاسى بار.

ايتلرينگ بۇلميش نوايى كۇنگلى اوچون مېمان،
بو كېچە اول كوى ارا كۇر كىم، عجب غوغاسى بار.

۱۹۲

ينه غريب گلى جانيمه جفا قيله دور،
ينه عجب تيكنى كۇنگلوم ايچرە سنجيله دور.

ينه بير اۋزگە عشق ايگى ايلگى زور يىدىن
بغير بيله يوره گيم بير-بير يىدىن ايريله دور.

قلەدى وه كه، اۋتون دېك سۇنگكلىمنى سېھر،
بو ينگى اۋتقە كه تن كلبه سيدة ياقيله دور.

فراق كاجلرى بيرلە، وه كه، نې اۋتلر
بولوت دېك اشك فشان كۇزلىمگە چاقيله دور.

سرشك ايلهدى خاكي تىمنى انداغ كىم،
قدم قۇيەى دېسە اويقو كۇزومگە، تاييله دور.

قاچر بو تېلبه كۇنگول، ينه واقف اول، اى عقل،
كه تالپينور كۇپ و كۇكسوم شكافى آچيله دور.

غريب قصه ابرور عشق كىم توگنمهدى هيچ،
اگرچه بۇلغەلى عالم بناسى ايتيله دور.

نوايي، اهل جنون قیدی یار زلفی اېمیش،
خرد طنابینی اوز، بند اگر بو سلسله دور.

۱۹۳

میدین آیرو گل اېمس گؤیا ابرور گلگون حریر،
کیم کېسیب گل هیئت بیرله سپپیتورلر عبیر.

بزم اېمس باغ ایچره میسینز کیم، هنرور ایلگیدین
بؤلدی رنگین موم هر قالب بیله هیئت پذیر.

تا قیزیتمیدور قولاغنی می گلی یکسان ابرور
بلبل آغزیدین صفیر و باغ اېشیگیدین صریر.

ساقیا جانیمغه یېتیم توبه دین، جانینگ اوچون
بؤل منگه بیر لب به لب پیماننه بیرله دستگیر.

بادهیی کیم، یېتکچ آغزیمغه، چیققرغه ی نشئه سی
تقوا و اسلام و عقل و زهد جانیدین نفیر.

تا بؤلوب رسوا ینه بیر جام اوچون مغ کوییده
هر زمان اوزومنی کافرلرغه قیلغه یمپن اسیر.

ای نوايي، معصیت عذریده اؤلسنگ یخشیراق،
زهد عجبیدین مکدر بؤلغوچه لوح ضمیر.

۱۹۴

ساقيا دى شدتيدىن عقل و حس بې تاب اېرور،
چارهسى جام بلورين ايچره لعل ناب اېرور.

تين و قاقمى راکب شوخلر اوز اېگنيدىن
تاب بيرله يوزگه چېککندىن کۈنگول بې تاب اېرور.

عشقدين يۇق کيم، ساووغدين آتشين گل ايسته بان
تاپمه غاندين بلبل اعضاسيده پر سنجاب اېرور.

سيم اۋتدين سو بۇلور، يېلدين عجايب دور بو کيم،
تيتره مکدين سيمبرلر جسمى چون سيماب اېرور.

تۇلون آى اېرمىس، تون آقشام کيم قوياش ننگ چشمهسى
موز تۇنگوپتور کيم، ضياسى تيره چون مهتاب اېرور.

سيمدين بهمن چمن قافىنى تا زال ايله دى،
قوشلر اول سيم آستيده سيمرغ دېک ناياب اېرور.

اي خوش اول کيم، لعل گون مى ايچ دېبان تکليف اوچون
ايلگى بير زرین کمر ننگ بۇينىغه قلاب اېرور.

کيش و اۋرمک قيديدين اۋت، عيشنى فوت اېتمه کيم،
کيش قاراق تولکو، اۋرمک يوپقه راق ماشاب اېرور.

اي نوایى، گر مهيا تاپمه سنگ اسباب عيش،
غم يېمه، شه قولوغى يوز عيش اوچون اسباب اېرور.

اول سرافرازې که، عالي درگهى ننگ هيئتى

برچه سرکشلرگه باش قۇيماق اوچون محراب ابرور.

۱۹۵

عارضینگ خورشید و آغزینگ ذره دین تمثال ابرور،
ذره اوزره نقطه ینگلیغ آغزینگ اوزره خال ابرور.

کاکلینگ دور مشک و اوستیده گره مشک اوزره «میم»،
قامتینگ شمشاد و زلف آستیده توشکن دال ابرور.

قاش و قد و زلفیدین پیوسته تا نعل و الف
تنده کپستیم، ناله دین آزرده جسمیم نال ابرور.

چون دېدیم: خالینگ بيله کؤز مردمی نینگ حالی بار،
دېدی اول کیم: خال دېسپن، نقطه سیز هم حال ابرور.

نقطه دېر حالتده تار آغزینگنی کؤرگوزگن لبینگ،
گويا زنبور نیشیدین تپشیلگن بال ابرور.

دُردکشمېن پیر دیر آلیده مقبول اؤلغه لی،
دولت اهلی نینگ قبولی کؤرکه، نی اقبال ابرور.

ساقیا، گر دور تعجیلین کؤروب قان بیغله مس،
پس نوایی دېک صراحی اشکی نهوچون آل ابرور.

عارضىنىڭ كۆزگۈسى مو تېر كىرتىدىن سودە دور
ياخود اول عارض سويى نىنگ عكسى مو كۆزگۈدە دور؟

دېمە عىن نازدىن اول كۆز آچىلمىدور كە، بار
كافرې كىم مستلىغ افراطىدىن اويقۇدە دور.

تاپماغىم اۋزنى محال اۋلمىش فراقىنىڭ شامى كىم،
تب ارا دور خستە جسم و تاب اول گېسودە دور.

سېن آتسېن ناوك و كۆكسوم شىكافىدىن كۈنگۈل
كۆرگەلى كېلمىش، خطا قىلمە كە، خوش قابۇدە دور.

سجدە قىلماق نې تفاوت كعبە ياخود بۇتقە كىم،
قاشى محرابى، قە يان قىلىسم سجدود، اۋتروودە دور.

اۋلمىگىمدىن زلفونگە گۇيا پرىشانلىغ يېتىپ،
ماتم اھلى دېك قويى سالىب باشىن قىغودە دور.

نوح عمرى و سلېمان ملكىگە يۇقتور بقا،
ايچ، نوايى، بادە كىم عالم غمى بېھودە دور.

عارضىنىڭ كۆزگۈسىدە خط سېزە دور كىم، سودە بار،
يا مگر زىنگار سو تاثيرىدىن كۆزگۈدە بار.

اۋقلىرىنىڭ پىكان بىلە ھر يان قوروق جىسمىمدە دور،

شاخلر اوزره کؤنگوللردېک که اول ناجوده بار.

زهر هجرینگ قیلدی دفع اول کؤز قراسی، وه، بو نوع،
قیده بیرگه‌ی خاصیت پا زهر کیم، آهوده بار.

باردورور محراب تورغچ بُتقه قیلغان دېک سجود،
سجده قیلسم قبله‌غه تا قاشلرینگ قرشوده بار.

زلف ارا خالینگ اگر دین قصدی ایلر نې عجب،
مونچه کافرلیغ رگی، وه، قیسی بیر هندوده بار.

عشق وادیسین خطر دور علم ایله قطع ایله‌مک،
سالک ابرسنگ تشله معلومونگنی و آسوده بار.

یوزین ایسترسین، نوایی، قاچمه زلفی فکریدین
کیم، سېن ایستر عیش نینگ امیدي بو قیغوده بار.

۱۹۸

یوزونگده زر ورق هر یان که لطفی بېنهایت دور،
جمالینگ مصحفیده هر بیري گویا بیر آیت دور.

ساجینگده زرفشان چهره‌نگ ضلالت شامیده هر یان
تجلی مشعلیدین یاروغان شمع هدایت دور.

یوزونگده نیل خالی روضه ایچره نیلوفر شبھی،
بنفشه گلشن ایچره یوزده نیلینگدین کنایت دور.

كۈنگۈل صىدىغە آچمە سىنبۇنگ دامىن يوز آچقىل كىم،
گل اۇق آچىلسە قىد اېتمك كە بىلبنى كفايت دور.

اېل ايچرە كۈپتورور افسانە ليلا حسنىدين، لېكن
سېنىگ حسونىگە تشبیه اېتمك آنى نې حكایت دور.

كۈنگۈل قانين كۈپ اول خونخواره كۈز ايچتى، اېمس گۇيا
يوزونگ گلگونه دين گلگون كىم، اول قاندين سرايت دور.

دېمە توش وقتى اول يوز كۈندىن آرتوقتور، مونى كۈرگىل
كىم، اول ياندين نهايت بۇلسە، بو ياندين بدایت دور.

اېرور بېداد، بارينده ترحم، دۈست دين يوز حيف
انگە كىم، شكر بارينده ايشى دايم شكایت دور.

نوايىغە كۈنگۈل بېردىنگ كە، جانين آغەسېن بىر كون،
اېرور اۋز نفعى، شەدين گر رعیتقە رعایت دور.

«ز» حرفى نىنگ زىبالرى نىنگ زىنتى «غرايب» دين

۱۹۹

جهان بوقلمون ايچرە توشمىش اېلگە گداز،
مگر كە طاسيغە اۋت ياقتى چرخ شعبده باز.

بو طرفه راق كە، مونونگ دېك تموغ ارا توشمىش،
سمور و قاقم اوچون عالم اهليگە تك و تاز.

نې كۆك كە چىقماق ابرور دالبا و اۋتغە بىلە
كە بال و پر بو ايسە، ممکن اېمس اول پرواز.

نې گرمليغنى قۇير، نې فسردەليغنى بشر
نېچە كە كويوب ابرير اۋت و موز كېبى قيش و ياز.

فلک عروسيدە يۇق مەر و دلربالغ كۆپ
نېچوك كە حسن و جمال اهليگە وفا بىلە ناز.

اېگىليب اۋيسە يېر، اهلى غرور حرمت اوچون،
شبه ابرور انگە مطلق كە مست قىلسە نماز.

خوش اول جريده كە، بير نوع قىلسە سير و سلوك
كە، سايە همقدم اۋلسە انگە، كمر همراز.

نوا اگر تيله سنگ، توت قيراق كە، ايگرى بىمى
نې كۆپ تپانچە يېر و نې بىيك چېكر آواز.

نوايى، يار ايله بۇل كيم، بو دور حرم وصلى،
مقامينگ اۋلسە عجم يا عراق يا كە حجاز.

۲۰۰

رفيقلر، مېن محزون نېچوك بۇلى غمسيز
كە، كۇنگول ابرمس المسيز، كۇزوم اېمس نمسيز.

سينوق كۇنگولده چو يۇق شادليغ، ساغينورمېن
كە، يۇقتورور بارى عالمده بير كۇنگول غمسيز.

دېمىنگ كە، ھىجر دە مى ھىمدىم اۋلسە غىم كىم اۋلور
كە سىم دورور، دىم اېمىس، بادە يار و ھىمدىمىز.

خوش اول كە، يار فراقى و يا كۈنگۈل غىمىدىن
تمام ىمرىدە بىر لىھزە اېردى ماتىمىز.

كۈنگۈل غىمىنى دېب اىباب، رىم قىلدى ىبىب،
مېنىگ جراحىتىم اېردى كە، قالىدى مرھىمىز.

كۈزۈمدىن اېتمە گىل، اى سرو، ھىچ جانىب مىل
كە، ىخشىراق كۈرونور سرو كىم، بۈلور ىمىز.

نواىنى ورع و زەھد قىدى اۋزىلۈگىدىن
ىلاص قىلمەدى، اى عشق و مى، مگر ھىم سىز.

۲۰۱

تىرگوزور ھىر ىستەنى بىر ناز اىلە اول دىلنواز،
چون يېتر مېن ىستەغە نوبت، قىلور يوز نوع ناز.

زاهدا، ھىر دىم دېمە كىم مذهبىنگدە بار قىصور،
قىسى مىسجددە قىلىپ اېردىم سېنىگ بىرلە نماز؟!

عشق ارا كۈنگۈمنى اول يوز مېرىدىن مىن اىلە مىنگ
كىم، اېمىس مىمكىن سىمىندىر اۋتدىن اېتمىك اىتزاز.

بىر كون اھىمىدىن اۋشول بد مېر كۈنگىلى يوشەغەى،

نېچه كيم پولاد اپرور قتيق تاير اوڭدين گداز.

يارب، آخر، نېتگه مېن اول شوخ بد خو بيرله كيم،
ظلم اپتر، قيلم تظلم، ناز اپتر قيلم نياز.

چرخ مينايى خطى سريغه همراز ايسته مه
كيم، بو خط مضمونيدىن دم اورمه ي اوتميش اهل راز.

اي نوايى، سېن سېي آلوده دافنسېن، مگر
عشق اول پاك ايله اوينرسېن كه دېرلر پاكباز.

۲۰۲

رميده كؤنگلوم اپرور عشق مبتلاسى هنوز،
باشيده باردورور اول سرو قد هواسى هنوز.

يوزونگ فراقيده هر بير كؤزوم مېنينگ بير داغ
قؤيوپتورور، ولي توشميدورور قراسى هنوز.

فقيه قيلدى دعا «عشقدىن قوتولغىل» دېب،
قبول قرييده اپرمس اپميش دعاسى هنوز.

نېچوك طمع قيلمه يين مهر ايله وفاسين كيم،
حقير جانيمه درخورد اپمس جفاسى هنوز.

هلاک اؤقى كؤزونگ اورميش كؤنگولگه تانمه كه، بار
يانيده كيرپيك و قاشينگدين اؤق و ياسى هنوز.

هلاکینگ اۋلغەلى جان كۈز قارادى، وه، يوز آچىب،
قرادىن آنى چىقرغىل كه، بار عزاسى هنوز.

سپهر ظلميدىن اول نوع ماتمى دور صبح
كه، عمرلر اۋتوبان چاك ابرور يقاسى هنوز.

نوايى جان بېرور، اول مدعيني محرم اېتر،
بو ايشچه يوز مينگ اېمستور انىنگ سزاسى هنوز.

۲۰۳

جماعتى كه، جنون منعيني منگە قىلەسىز،
تاش آتيان نې اوچون تېلەلرگە قاتىلەسىز؟

كېتىنگ، كۈنگول بىلە جان كىم، وداعىنگىز قىلدىم،
فراق اگر بو دورور، اېرتە كونى كېچ قىلەسىز.

فراق وقتى دور، اى كۈزلر، اېمدى قان يىغلنگ،
بيلورموسىز كه، بوكون نې كىشىدىن ايرىلەسىز؟

كۈزوم حقىنى بهل قىلدىم، اى جواهر اشك
كه، بارې هم انىنگ. اۋق مقدمىغە ساچىلەسىز.

فراق نېشلىرى، وه كه، ينه رحم اېتمى،
نفس-نفس نېگە مجروح ايچىمگە ساغىلەسىز؟

كۈنگول فسانەلرى، سىزنى، وه، نېتىب ياشورەى،
بو نوع كىم، يوز اوزە قان ياش ايله يازىلەسىز.

نوايي هجرغه قالدی، قیلینگ وصالده شکر
جماعتی که، سپور یارینگیز بيله بيله سیز.

۲۰۴

نو بهار ایامی بؤلمیش، مهن دیار و یارسیز،
بلبل اؤلغان دېک خزان فصلی گل و گلزارسیز.

گاه سرو اوزره، گهپی گل اوزره بلبل نغمه ساز،
وه که، مهنمهن گنگ و لال، اول سرو گلرخسارسیز.

تانگ اېمستور گر دیار و یارسیز آزرده مهن
کیم، اېمس بلبل گل و گلزارسیز آزارسیز.

روضه اشجاری اؤتون دور، گللری جانیمغه اؤت،
ممکن اؤلسه انده بؤلماغلیغ دمی دلدارسیز.

می چو بېردینگ زلف ایله بند اېت مهنی، ای مغبچه
کیم، خوش اېرمس مغ بيله ایچمک قدح زنارسیز.

تاپمه دوق گلرنگ جامی بی خمار، ای باغبان،
وه که، بو گلشن ارا گل بوتمس اېرمیش خارسیز.

اهل زهد ایچره نوايي تاپمه دی مقصدقه یؤل،
وقتینگیزی خوش توتونگ، ای جمع کیم، خمارسیز.

۲۰۵

اۋزگە بۇلدى يار و مهرى مېندە باقى دور ھنوز،
ناتوان كۈنگلۈمدە اول آى اشتياقى دور ھنوز.

گرچه اۋزگە يار ايستر خاطريم، باردور ولېك
جان انگە منزل، كۈنگول آنينگ وثاقي دور ھنوز.

غير عشقى كۈنگلۈم اويىندە نېچوك قىلغەى نزول
كيم، خيالى مسكنى كۈزوم رواقى دور ھنوز.

عشق ايله مى تركين، اى ناصح، بې نوع ايلهى قبول
كيم، كۈنگولگە آرزو اول طرفە ساقى دور ھنوز.

فرقت اۋتى دافعى داغ اۋرتەمك دور دېمە كيم،
اۋرتەگن جانيم اول آى داغ فراقى دور ھنوز.

چرخ يالغيز قيلمەدى فرھاد قانين لالەزار،
لالە قانين تۈككۈچى آنينگ نفاقى دور ھنوز.

اى نوايى، گرچه مېنى مھرسيز دېر اېردى يار،
اۋزگە بۇلدى يار و مهرى مېندە باقى دور ھنوز.

۲۰۶

خرم اۋلدى باغ و بير گلدين ايچيمدە غم ھنوز،
كولدى هر يان غنچە و كۈنگلۈم ايشى ماتم ھنوز.

بلبل اۋلدى گل حريمى خرمنى نينگ محرمى،
گلعداريم كوييدە مېن تېلبە نا محرم ھنوز.

چىقتى توز هر نخل اوزه بير عشق پىچان چىرمه شىب،
وه كه، بير قد عشقىدىن جىسمىمده پىچ و خم هنوز.

آچتى سودا دفعىغه سنبىل مىسلسل طره سىن،
آه كىم، بۇنىنومده زنجىر جنون محكم هنوز.

ساقيا، رحمى كه تارتىب لاله ساغر دمبدم،
لاله گون ساغرغه مېن بۇلمەي دمي همدم هنوز.

فقر نخلىدىن گل مقصود اوزمك ايستمە،
يېتمەي انده آه و اشكىنگدىن هوا و نم هنوز.

بىر سۇزىن ايستب نوايى اۋلدى، وه كىم، يېتمەمىش
حقە ياقوتىدىن كۇنگلومگە اول مرهم هنوز.

۲۰۷

سىل اون چىكتى و سودا مېنده بې پايان هنوز،
دشت سىرسىز اۋلدى و مېن تېلبە سرگردان هنوز.

گىنبىدىن قىلدى عمارت غىچە نىنگ ياز يامغورى،
تېلبە كۇنگلوم اويى سودا سىلىدىن ويران هنوز.

هر قوروغ شاخ اۋلدى دشت اوزره صبادىن حله پوش،
تىنمە غور جىسمىم جنون وادىسىده عريان هنوز.

تانگ نىسىمى بىرلە نىسان يامغورى نې سود كىم،

آه و اشكیم دهر ارا هر دم سالور طوفان هنوز.

یانغیل، ای عیسا دمیم، حسنونگ بهاری حقّی کیم،
باردورور مهلك جنونومغه دوا امکان هنوز.

نې آسیغ هر آق گل اؤلسه مرهم اوچون بیر ماموق،
چونکه چیقمیدور یاره مدین غنچه دېک پیکان هنوز.

دشت حیوانی قاچرلر صحبتیمدین رم قیلیب،
عقلی یوق ناصح گمان ایلر مېنی ائسان هنوز.

کام یېتکورمک غنیمت انگله حاجت اهلیغه.
ای غنی، بو دم که کامینگ بیرله دور دوران هنوز.

شیخ منع ایلر جنون هر دم نواییغه، کؤرونک
کیم، بهار ایامیده عاقل دور اول نادان هنوز.

۲۰۸

کویونگ باریده قیلمان جنتقه گذر هرگز،
قدینگ قاشیده سالمان طوبی غه نظر هرگز.

اؤقونگه کؤنگول مایل، موجب نېدور، ای قاتل
کیم، اؤتکنیدین بؤلمس کؤنگلومگه خبر هرگز.

بو جسم نزار ایچره کؤنگلومنی گمان قیلمنگ،
شاخی که، قورور، انده کیم کؤردی ثمر هرگز؟!

لعلينگدين ملاحتيدين جان كاميده دور لذت،
بو طعم قچان بېرگه ی توز بېرله شکر هرگز.

کۈنگليگه فغانينگدين رحم اۋلمه سه، ای بلبل،
گل غنچه سيغه بار مو نالنگدين اثر هرگز.

پيل اۋلسه سېنينگ خصمينگ، دېسنگ که ضرر تاپمی،
بیر پشه غه عالمده يپتکوره ضرر هرگز.

مخلص تيله سنگ غمدين دهر ايچره نوایی دېک،
قۋيمه غه سېن ايلگينگدين ساغرني مگر هرگز.

۲۰۹

زمانې گرچه ياديم قيلمس اول نا مهربان هرگز،
فغان کيم، يادی چيقمس خاطريمدين بير زمان هرگز.

آتی آغزيم ارا مذکور، اۋلرمېن آه کيم، بۋلمی
آتيم آغزيغه بير مذکور بۋلورغه کامران هرگز.

کۈنگول تا ودي عشقيغه توشتی، قيلمه دی بير هم
وطنی ياد اول آواره بی خان و مان هرگز.

لېينگدين کيم، کۈزوم ياشی جهاننی لعل گون قيلدی،
بغير جزويدين ايرو تاپمه دی بير قطره قان هرگز.

ايتی فرياديني ياقمنگ منگه کيم، خوييدين عمرې،
اولوغراق تينمه ديم، ني نوع چېککه يمين فغان هرگز.

يارىب كۆكسوم جنون تعويدى دېك جان پرده سين آچمه
كه، فاش اۆلميدور اول قانليغ نېچه داغ نھان ھرگز.

غم و اندوه يا جوجيغ ھر دېوار سدې دور،
فنا ميخانه سي دېك تاپمه دوق دارالامان ھرگز.

بو دمنى توت غنيمت كيم، كېلور دمدىن اثر يۇقتور،
دې دم كيم، اۋتتى، خود اندىن كيشى تاپمس نشان ھرگز.

قران قىلدينگ، نوايى، نظم ارا كيم التفات اپتمس،
سۆزنگدىن اۋزگە سۆزگە خسرو صاحبقران ھرگز.

۲۱۰

ھر نېچه كۆنگلومنى چاك اپتسنگ قىلور عشقینگ ستېز
اول صفت كيم، اۋتنى يارغان سايى بۇلور شعله تېز.

صبر ايله عشقيم خصومت باشلب اۋرتلر مېنى،
اۋت بۇلور زاینده، تاش اپسه تېمور بېرله ستېز.

غم تونى رحلت سحابى ژاله سى دور يا ابرور
ماتمىمغه چرخ انجم جوهرىدين اشكرىز.

وصل ارا اشكيم قىلور طغیان اۋشول يوز تابىدين،
ياز فصلیده قویاش تېز اۋلسه بۇلور سيل خيز.

سرو و غنچهنگ جلوه سى كويدوردى اپلنى، آه كيم،

دەر ارا طوبى و كوثر بيرلە سالدینگ رستخېز.

كۆز اوييدىن اول پرى رم قىلدى، مردم اشكيدىن
بۇلدى چون همخانه تردامن اپرور اوللا گرېز.

چون نوایی وصل تاپتی، اېمدى بير دور، اى طيب،
شربتین گر زهر ياخود آب حيوان بيرلە اېز.

۲۱۱

محنت اۋتيدىن ياروقتور هر طرف كاشانه ميز،
بۇلدى گۇيا اژدها كامى بيزینگ ويرانه ميز.

طاير وصل اوچتى اشكيم دانه سيدىن وهم اېتيب،
قوشقه، وه كيم، رم بېرور طالع يۇقىدىن دانه ميز.

اول چراغ حسن ويران كلبه نى ياروققه لى
مهر شمعين ياروتوپتور هر كويوك پروانه ميز.

بۇلدى عاشق عقل ايله هزل ايله بان واله كۇنگول،
اۋتقه توشتى اۋينه ي- اۋينه كول بيله دېوانه ميز.

اېل تيليدىن اويقو اوچمىشتور كۆزومدىن گۇيا
كيم، اپرور بخت اويقوسى نینگ باعشى افسانه ميز.

اۋلتورەى بير مى بيله دېب، تيرگوزورسېن، ساقيا،
آب حيوان بيرلە گۇيا كيم تۇلر پيمانه ميز.

مرشدې کیم، قیلسه ارشادِ فنا، باللّٰه انگه
بو وجودِ عارضی دین اؤزگه یوق شکرانه میز.

کوییده کؤنگلوم کؤنگوللر ایچره کؤردوم، طرفه کؤر،
طرفه راق کیم، آشنالیغ بیرمه دی بېگانه میز.

۲۱۲

بؤلمه سه اول بت قاشی محرابیم ایچره جلوه ساز،
قبله غه، کافر مېن، ار باش اېندوروب قیلم نماز.

قان یاشیم دین لعل گون کیرپیک بیله ایتور کؤزوم
عارضینگ نظاره سین ایلرده یوز تیل بیرله راز.

قدی وصلین ایسته سم رعنا لیغ ایلر ناز ایله،
حسن بوستانیده اول سرکش قد اېرمیش سرو ناز.

آدمیلیغ دین قاجیب یېتیم جنون اؤتین ساچیب،
ای سلامت اهلی ایله نگ تېله ایتدین احتراز.

چهره آچ کؤنگلومنی دېسنگ کویدوره ی، هجرانی قوی،
اؤت نې حاجت، موم تاپسه مهر تابیدین گداز.

رشته اشکین توتوب توفراغ ساری تارتر فنا،
اول سبیدین اېگمه قد ظاهر قیلور اهل نیاز.

ای نوایی، غیر نقشین پاک یوب جان لوحیدین،
یار اوچون جان اؤینه سنگ، اول لحظه بارسېن پاکباز.

جلوه مو قىلدى سريغ بۇركين كىيب اول سرو ناز،
يا كه چېكتى شعله اخضر جسم ايله شمع طراز.

كويسه مجنون كۈنگلوم اول يوز لمعه سىدين تانگ اېمس،
نې اوچون كيم ايله مس دېوانه اۋتدين احتراز.

اول كه اېرمس عشقى پاك و سجده ايلر كۈرسه حسن،
اۋيله دور كيم، ايله گه ي فاسق طهارتسيز نماز.

راز عشقینگ دېرگه پىكانینگ اېرور كۈنگلومگه تيل،
لال تيل بيرله قىلور اېرميش تكلم اهل راز.

سېكرىتيب چىقتى ينه ميدان سري اول تورك مست،
تا ينه قيسى كۈنگول ملكيگه قىلغەي توركتاز.

عشق اگر كامل دورور، عاشق قىلور معشوقنى،
يۇقسە نېوچون ايله دى محمودقه قوللوق اياز.

هر مقام ايچره كه بۇلسنگ اېرو بۇلمه ياردىن،
اي نوايى، حاجت اېرمس قىلماق آهنگ حجاز.

تو فراغيمدين كاشكى جسمي مرتب قىلسنگيز،
بىر ايت اۋلسه كويده روحىغه قالب قىلسنگيز.

يېتمە گەي چابك سواريم گۈزەل، اى اهل عشق،
مەھرنى راکب قىلىپ، گۈزەلنى مەركب قىلسىڭىز.

بادە نوشوم بزمى غوغاسىدىن، اى جان و كۈنگۈل،
سەمەيغە يېتمەس نېچە فەرياد و يارب قىلسىڭىز.

عالم عشق اوزرە بس لايىق دورور، اى درد و شوق،
دود آھىمنى سېھەر، اشكىمنى كۈكب قىلسىڭىز.

مەركبى نەلەن مەجلا قىلغۇچىلار زىب اوچون،
عارىمىغە سورتۇنگ اول دىم كىم، مەزھب قىلسىڭىز.

غەير نۇشانۇش ازل ساقىسىدىن كېلمەس خەتاب،
بىزنى پەس مى جەرمىدىن بۆلمەس مەخەتب قىلسىڭىز.

تا نوايى، قەسمەت اۋلغان مەينى اىچمەس چارە يۇق،
دۈستەر، اولى بو كىم، جامىن لبالب قىلسىڭىز.

۲۱۵

يوزۇنگ فەراقىدە ھەر آھ اۋتىن كە چەكتىم تېز،
اول اۋت شرارەلرى بۆلدى ھەر طرف گلرېز.

قضا مەصۇرى گۇيا حل اېتتى لعلى رەنگ
لېنىگ عەقىقىنى ايلەر مەھلەدە رەنگامېز.

لېنىگ مەلاحتى غوغا كۆپەردى عالمەدىن،
شەكرنى بۆيلە كىشى قىدە كۆردى شورانگېز.

ايتىنگ كە شېر زبون دور انگە، تاپە آلمان،
دېسەم كۆرەي انى باشىمدىن اۋزگە داستاۋېز.

چو كېلدى خستەليغىم سۋرغەلى قدح نوشوم،
كېتور پيالە كە، اۋلسم ھەم ايلەمان پرهېز.

دېسنگ زمانە ستېزىنى ھەر زمان كۆرمى،
زماننى خوش توت و قىلمە زمانە بىرلە ستېز.

گل صباح يوزىن كۆرمەگەيسېن، اى بېل،
بو گلشن ايچرە نوايى دېك اۋلمەسنگ شېخېز.

۲۱۶

ياردىن ايرىلغەلى شيدا كۆنگول بې خواب كۆز،
ھەر زمان ظاھر قىلور سودا كۆنگول، خوناپ كۆز.

كۆز و كۆنگولم بحر و بر سىر اېتتىلر يار ايستەبان،
بو سفردە تاپتىلر يىغما كۆنگول، غرقاب كۆز.

كۆز و كۆنگولمدىن بىرى كويوب، بىرىسېن بوزدى سيل،
يۇقسە نېچون بۇلدى ناپىدا كۆنگول، ناياب كۆز.

دېپ اېمىش ھجرىمدە مېن دېك كۆز و كۆنگولن اسرەسون،
واي كىم، يۇقتور منگە خارا كۆنگول، قصاب كۆز.

و، نې كون بۇلغەي كە، يېتكى وصلىغە كۆز و كۆنگول،

تارتىيان فرىاد و واويلا كۈنگۈل، يىغلاپ كۈز.

كۈرمەيىن دېپ كۈردى كۈز، كۈرگچ كۈنگۈل قىلدى ھوا،
بۇلدى زار اپتگن مېنى رسوا كۈنگۈل، قلاب كۈز.

دۈست كۈزلە، خىمىدىن اوزگىل كۈنگۈل كىم، توشسە ايش،
بېرمىس و آلمىس اپمىش اعدا كۈنگۈل، احباب كۈز.

اي نوايى، گۇيا كىم، يار مېھمان بۇلغوسى،
كىم مرتب ايلەمىش ماوا كۈنگۈل، ابواب كۈز.

۲۱۷

تىرە دور اۋىلە كىم، ياروغلوغ انگە قۇيمىس يوز،
شام ھجرىمدە اگر بۇلسە قوياش ھر يولدوز.

اۋتتى ھجران كېچەسى رنجىدە عمروم، يارب،
بىر كون اۋلغەى مو كە، اوشبو كېچە بۇلغەى كوندوز.

خوبلر انجمنى ايچرە نظيرىنگ يۇقتور،
مېھرنى انجم ايچىدە دېسە بۇلغەى يالغوز.

اپگرىلىكلر اپسە زلفونگ حركاتى نې عجب،
كىم يىلاننى حركت قىلغانىدە كۈرمىش توز؟

سېندىن ايرو اپمس، اي دۈست، اۋلوگ و تىريگىم،
قھر و لطفونگ بىلە گر اۋلتور، اگر خود تيرگوز.

گلدە يۇق سۈرۈ قىدى، سۈرۈدە گل رخسارى،
سۈرۈ گلۈرۈيۈم اېرۈر حسن طرېقىدە تۈكۈز.

ساقيا، مى تۈلە كىم عربدە اىستر كۈنگلۈم،
اى مەنى، چالە باشلە اۋكۈرۈر كۈكدە قۇبۇز.

غم غىداسى آرەسىندە قنى توركانە اياغ،
تۈرە آيىنى بىلە تامسە تۇقۇز، آقسە اۋتۇز.

اى نوايى، تىلەسنگ يار ايلە تاپماق پيوند،
غىرىدىن سەي قىلىپ رشتە پيوندنى اوز.

۲۱۸

يۇق كە اول كۈز قارە دور حسنۈنگ ارا، اى قارە كۈز،
كىم قاشىنگ داغى اېرۈر اسرۈ قرا، اى قارە كۈز.

گر كۈنگۈللەرنى جلاي وطن اىستر بۇلسنگ،
يېش توگونلەرنى و زلفونگى تەر، اى قارە كۈز.

قارە نرگس كۈز و گل يۈز بىلە گر سېن كېيى يۇق،
بىلبې مېن كېيى يۇق نغمە سرا، اى قارە كۈز.

كۈزلەرىنگ زخم اگر قىلمەدى ھر كىرپىك ايلە،
پس، نېدۈر كۈنلۈمە يۈز يېردە يرا، اى قارە كۈز.

مېنمېن و بىر يەرەمس كۈنگۈم، انىنگ قتلى اوچون
كۈز قرا قىلمە، بىر ايشىمگە يرا، اى قارە كۈز!

گاه فقر اہلیغہ ہم رحم کؤزی بیرلن باق،
کیم دعاگو یونگ ابرورلر فقرا، ای قارہ کؤز.

سپن نواییغہ وفا ایلمہ سینگ، بار اؤلسون
شاہ ابوالغازی ابن بایقرا، ای قارہ کؤز.

۲۱۹

منگہ اول کؤزی قرا دہدی چوچوک چندین سؤز،
نہ عجب آنی قرا کؤز دہسم و شیرین سؤز.

لبی یوز وعدہنی انداق منگہ یالغان قیلدی،
کہ دہی آلمس کیشی یوز ییلدہ بیر انداق چین سؤز.
ہجرینگ افسانہ سیدین سؤز دہر اہسم وصل تونی،
تاپمہ غای تانگنچہ تون ییلچہ اہسہ تسکین سؤز.

بہلی و لعل لبی آلیدہ لال اؤلدی خرد،
کیم ابرور بیر دقیق و بیر بس رنگین سؤز.

ہر فصاحت کہ، لبینگ قیلدی، مسیحا اہشیتیب،
جان تاپیب، کہلمہ دی آغزی ارا جز تحسین سؤز.

حسنی وصفیدہ سؤزوم توتتی بری عالمی
مرشد عشق منگہ ایلمہ گہلی تلقین سؤز.

بزم عیش ایچرہ نوایی، نہ عجب اورمہ سہ دم،

ايته آلمس چو نشاط اهلی ارا غمگین سۆز.

۲۲۰

نکتهسی مفهوم اولور، بؤلمس ولې مفهوم آغیز،
تانگ اېمستور هیچ مفهوم اؤلمهسه معدوم آغیز.

الله-الله، طرفه دور بو کیم ایکی جانبخش لب،
ایککی یان معلوم و اېرمس اؤرتتهده معلوم آغیز.

وهمنی یوز مینگ گمان ایچره سالور موندین که بار
خطِ موهوم اول بېل، اما نقطه موهوم آغیز.

اول الفدېک قد لطافت ایچره بؤلدى بیرگه اؤن،
صفردېک تا بؤلدى آنینگ ضمنیده مرقوم آغیز.

دال انکه کیم عشق کتمانی کبره ک عشق اهلیغه،
عشقینگ اسراریده سرې دور عجب مکتوم آغیز.

وه که، اول یوز و آغیز شوقیدین اؤلدوم، لېک بار
یوزیدین یوز نا امید و آغزیدین محروم آغیز.

زهر هجر آغزیم تؤله نیله ی قیله ی اؤپمک خیال،
حیف دور کیم، یبتکی آغزی نوشیغه مسموم آغیز.

پاک لفظ ایتورغه آغزینگ پاک قیل کیم، حیف دور
یخشی سۆز بارینده سورگهی نکته مذموم آغیز.

ای نوایی، مخلص ایستر بؤلسنگ ابل تیل، آغزیدین
نظم‌دین هم تیلنی تیغیل، نثر دین هم یوم آغیز.

۲۲۱

اول پری کوییده مهن دېوانه‌نی بند ایلنگیز،
بند-بندیم زلفی زنجیریغه پیوند ایلنگیز.

خلق، ترکِ عشق ایلرگه مهن دلخسته‌نی،
اؤلتوروب عالم اېلیگه موجب پند ایلنگیز.

تېله کؤنگلوم تاپسنگیز، ای یار کویی ایتلری،
تؤش-تؤشیم‌دین تیشله‌بان پرکند-پرکند ایلنگیز.

باده عشق اسرو مست اېتمیش مهنی، ای دؤستلر،
جامیمه افیون اېزیب بیر دم خردمند ایلنگیز.

یغله‌سم اچّیغ ملول اؤلماق نی دور، ای خوبلر،
هزل اوچون گاهی باقیب، سیز هم شکر خند ایلنگیز.

عشق بحریده در وصل ایسته‌مگ ، ای اهل درد،
کؤنگلونگیز اول نقد یادی بیرله خرسند ایلنگیز.

قیلسنگیز تصویر لیلی حسنین اول آی دېک سیزینگ،
لېک مجنوننی نوایی بیرله مانند ایلنگیز.

۲۲۲

غم یوکی قیلیمیدورور یالغوز مېن محزوننی کوژ،
هم بو یوک قیلیمیش اېدی فرهاد ایله مجنوننی کوژ.

قیلیدی چون فرهاد ایله مجنون قدین خم، نې عجب
یوز الرچه ضعف ایله گر قیلسه بو محزوننی کوژ.

یوک اگر بو دور نې فرهاد و نې مجنون و نې مېن،
راست گر دېرسم بو یوک ایلتورور گردوننی کوژ.

وه، نې یوک دور بو که گردون قامتین کوژ ایله دی،
اؤیله کیم گردون نینگ آستیده کؤرسین نوننی کوژ.

یوزی مهتاییده مشکین قاشی نهو چون کوژ ابرور،
اؤغریلیق گر قیلمه دی اول هندوی موزوننی کوژ.

اېگریلیک که شهره بؤلماق ایسته مسسین، ایله مه
اهل عصیان خدمتیده قد بی قانوننی کوژ.

گر نوایی کوژ ابرور شه خدمتیده نې عجب،
چونکه قیلیمیش قوللوغی جمشید و افریدوننی کوژ.

«س» حرفی نینگ سیمینبرلری نینگ سوداسی «غرایب» دین

۲۲۳

دهر سودیدین طمع اوز کیم، زیانی بېش ایمس،
عمرنی توتقیل غنیمت کیم، زمانی بېش ایمس.

اوی بنا ایلب عجب تور ایلنی مهمان ایله مک،
اول که بو اوی ایچره بېش کون مهمانی بېش اېمس.

قوی توانالیغ سۆزین، یاد اېت اجل خارین که، پیل
پشه لر نیشی قاشینده ناتوانی بېش اېمس.

کیر فنا دیریده کیم، هر شیخ و یوز سودا انگه،
اول که آتین خانقه قویمیش، دکانی بېش اېمس.

ای که، بولمیش خلعتینگ زربفت باری بیل کیم، اول
معنا اهلین کولدورورگه زعفرانی بېش اېمس.

مهر تاج و چرخ تختینگ بولسه غافل بولمه کیم،
مهر بی مهر و فلک نا مهربانی بېش اېمس.

شهغه ایش اېل فکرینی قیلماقدور اول کیم، زب کیم،
بیر سوروک قویدور رعایا اول شبانی بېش اېمس.

گر نوایی ایسته دی آواره لیغ، ای اهل هوش،
غم یېمنگ دېوانه بی خان و مانې بېش اېمس.

اوج دولت اوزره بولسون دایما بلقیس عهد،
کیم زحل قصریده هر تون پاسبانی بېش اېمس.

۲۲۴

نی عجب گر نقل تخمی غم قوشین رام ایله مس،
مست چون بیر دم آوچ قاقماقدین آرام ایله مس.

تون قویاشقه یاووی آلمس دېک دور اول کیم، می سری
تیره لیک شخصی عزیمت بیر-ایکی گام ایله مس.

فکر و غم قاچماققه میدین ایسته سنگ روشن دلیل،
شیخ یا زاهد نېدور کیم باده آشام ایله مس.

عین ناز و عشوه دین کافر کؤزونگ، ای مغیچه،
طرفة العینی اېمس کیم قصد اسلام ایله مس.

جسم ارا پیکانلرینگ سو قیلدی کؤنگلوم آه ایله،
باده شوقین عجب کیم، ایچکه لی جام ایله مس.

واعظا، ایلب طمع قان یوتمه غیل کیم، پیر دیر
باده دین اؤزگه سوال اهل یغه انعام ایله مس.

دېمه عشق اؤینب نوایی عاقبت نې بؤلغوسی،
کیم بو ایش آغاز قیلغان فکر انجام ایله مس.

۲۲۵

کیک چرمی ضعیف اېگنیمگه مجنونلغ نشانی بس،
جنون تاشی سینوق باشیم اوزه قوش آشیانی بس.

دمینگی اسره، ای عیسی، که رنجیم دفعیغه هر کون
غذا اول آی قیلیچی زخمی نینگ بیر قطره قانی بس.

سېن و حیوان سویی، ای خضر، توتقیل ترک جانیم کیم،

منگە يار آليده اۆلمەك حيات جاويدانى بىس.

شە و عزت سىرى كىم، اگر بو دور جهان جاهى،
منگە ادبار كويده مۇلت خاكدانى بىس.

غنى و كۈنگليده پنهان درم فكرى و عشق اۋتى
مېنىڭ كۈنگلۈمدە كويدورگن نېچە داغ نھانى بىس.

سنگە كوثر سويى و لحن داۋدى كە، دىر ايچرە،
مغنى نغمەسى بىرلە منگە جام معاني بىس.

حوادث دفعيغە شە كۆك حصارى اوزرە گر چىقسون
كە فقر اهلى اوچون دىر فنا دارالامانى بىس.

فغان كىم، لطف و قهرىغە تفاوت يۇقنى ھم انگلې،
فنا اھليغە جورين قيلمەدى بو دىر فانى بىس.

نوايى دېك اۋلر حاليمدە دېمىڭ حور و جنتدين،
سىزىڭ برچە كە بو آوارەغە بىر كۆرمەك آنى بىس.

۲۲۶

نەيس كىيگۈلۈك اۋلسە يلىڭ تىمىغە ھوس،
حصير نقشى حصيرى لباس اۋرنىغە بىس.

سرشك يۈلىنى خىس بىرلە توتتىلر، ياخود
كۈزۈمنى يۈلىغە سورتىدە مونچە تۈلمىش خىس.

بیر اؤت دماغیمه هجر اوردی کیم، نفس اندین
چیقیر سموم اؤلوب، ار خود بؤلە ی مسیح نفس.

عظیم اینیگ دېک اېرور عشق محملى کیم، انګه
قضا فلکنی ایکی بؤلسه بؤلغه ی ایکی جرس.

تنیمغه چاکلر آچتی، نې عیب اگر اؤلسم،
که روح بلبل ی نینگ لایقی اېمس بو قفس.

کؤنگول که، کافر عشق اولدی عار اېرور زنار،
نېدین که مغېچه زلفین بېلیگه قیلدی مرس.

فنا هوس قیل و فقر اېت هوا نوایی دېک،
ولې هوا و هوس، قیلمه غیل هوا و هوس.

۲۲۷

دمې اېرمس که، لعلینګدین کؤنگول یوز لخت قان اېرمس،
دغی هر لخت قان یاشیم بیلە کؤزدین روان اېرمس.

یوزونګ مهری ایچینده کؤز سالیب آغزینګنی کؤرمسمېن،
اگرچه ذره خورشید آلیده کؤزدین نهان اېرمس.

اوشلغان هر سؤنګک جسمیمده گؤیا کعبتینې دور،
نهانی داغ زاید نقطه سی دور کیم عیان اېرمس.

اېرور دردیمگه تسکین بو کېچه لېکن تېشوک کؤکسوم،
عجب گر ناوکی کؤنگلومگه کیرګندین نشان اېرمس.

مېنى اۋلتورگەلى غمىزەنگ اۋقى عمرې دورور، لېكن
تېرىك لىلىنگ خىالى بىرلەمېن، جىسمىمدە جان اېرمىس.

لحد كنجىن وطن ايلب تىنىپتور عمرىدىن مجنون،
نې بۇلسە، مېن كېبى آوارە بې خان و مان اېرمىس.

بو دور ايچرە قچان جام فراغې بېتگەى، اى ساقى،
چو بىر دم درد و محنت زھرى چېكىمكىدىن امان اېرمىس.

اگرچە قان يوتر بلبل، وې نې غم انگە چون كيم،
نوادە غنچەدىن اىرو و گلدىن اۋزگە خان اېرمىس.

نوايى اۋلدى، گر پروانە كويدى، بلبل اون چېكىنى،
بولر گر يىخشى دورلر، عشق ارا اول هم يمان اېرمىس.

۲۲۸

سنبلىن لىلا ساجىپتور، يىل عبىر آسا اېمىس.
داغىنى مجنون قانتىمىش، لالە حمرا اېمىس.

نسترن كۈزگوسىدە بىر سارى مېن، بىر سارى يار
چەرە عكسىن كۈرگوزوپتوربىز، گل رعنا اېمىس.

گلنى اۋخشتقان اوچون يارىمغە گۇيا باغ ارا،
مضطرب كۈنگلوم قوشى دور، بلبل شىدا اېمىس.

سنبلىن اوستىدىن نسىم اېسگىچ، نكارىم طرەسىن

ياد قىلديم كيم، دماغ آشفته دور، سودا اېمس.

نرگس آلتون جامى نينگ آليده كافوري حرير
پردۀ جانيم دورور مرهون، قدح پالا اېمس.

دېمه، افغانيمده بلبل نالهسى دېك يۇق نشاط،
بو هم اندوه زا اېمس، گر اول نشاط افزا اېمس.

گلنى سرو اوزره خيال اېتيم كۈنگول بوستانيده،
راست آيتهى: سرو گلر ويوم كېبى زېبا اېمس.

بۆلمنگيز مغرور حسن، اى شوخلر، كيم باغ ارا
سيز كېبى بيلتورغى گلردين بيرى پيدا اېمس.

منگه گلرخ ساقى و بلبلگه گل توتتى قدح،
مست اېرور اول هم نوايى دېك، ولې رسوا اېمس.

۲۲۹

دېمه كيم، نوش لبدين قوت جان قىلديم هوس،
آب حيواندين حيات جاودان قىلديم هوس.

لعل نوشيدين گر اولسم هم اېمستور عيب كيم،
هضم اېته آلمس غذا مېن ناتوان قىلديم هوس.

تاش يېپان اطفال كامى بيرله جان بېرسم نې تانگ،
كيم پرى و صليغه جاني كامران قىلديم هوس،

آستانینگ ایستەدیم باش قۇیسەم اېرمس عیب کیم،
سلطنت تاختین مېن بی خان و مان قیلدیم هوس.

هر فتیله زخم ارا کیم، ابردی چېکتیم جان ارا،
کۇنگلومه قۇیماق نېچه داغ نهان قیلدیم هوس.

زهد ایله یۇل تاپمەدیم مقصدغه می توت، پیر دیر
کیم اۋزومنی اېمدی رسوای جهان قیلدیم هوس.

ای نوایی، تاغ و وادی توتماغیم عیب اېتمە کیم،
یاشورون دردیم دېمک تارتیب فغان قیلدیم هوس.

۲۳۰

پس نېدور کۇزگر خیالینگ خیلغە منزل اېمسی،
هر قرا بیر اۋت یېری دورینده کیرپیک خار و خس.

جنت اهلغە اېرور هر لحظه کویونگ آرزو،
دوزخ اهلی اۋیله کیم جتنی قیلغەیلر هوس.

ناوکینگ پیکانینی تا چېکتیلر نالان کۇنگول،
ایله مس افغان کۇنگولسیزلیکدین انداق کیم جرس.

دېمە مېن مجنونغه، ای ناصح، که بس قیل آھنی،
کیم منگە ایش اول پری عشقیده بۇلمیش آه و بس.

ضعفدین بېخود کۇروب، آغزیمغه اول یوز کۇزگوسین
قۇیسنگ اول دم اورمە غەیمین باللہ ار اۋلسم، نفس.

دیر پیری خدمتیغه چېکمه یین مو بېلنی چُست،
کیم نېچه زناردین تانگمیش بېلیمگه بیر مرس.

ساقیا، دوران اگر بو دور، نوایی هر زمان،
جامیغه بېهوش دارو قاتماغ ایلر ملتمس.

۲۳۱

آه اؤقین جان ایچره اسره ب، کۈنگلوم اظهار ایله مس،
یۈقسه بیر دم بار مو کیم، یوز جاننی افکار ایله مس.

وه نې یوز دور اول که تقلیدین قیلیب نقاش چین
چېکسه یوز صورت، بیرین یوزدین نمودار ایله مس.
عشقدین چون منکر اۈلمیش کۈنگلوم اۈلتورمک نې سود،
هجردین تا آنی قۈرقوتمس سېن اقرار ایله مس.

قۈیدونگ، ای عقل، آچقه لی یوز پاره کۈنگلوم زلفینی،
هر بیرى بیر رشته سین قاندىن که زناړ ایله مس.

جان فدا قیلغوم دورور، لعلینگ قبول اپتسون دېسم،
دېر که: روح الله بو نوع ایشلرگه بېگار ایله مس.

نې آسیغ هر ذره غه آهیم قویاش دېک سالسه اۋت،
اول قویاش کۈنگلیگه چون کیم ذره یی کار ایله مس.

ساقیا، دور ایچره اول یوز عکسی کۈرگوزگن قدح،

فتنه ايلر كيم، سپهر و مهر سيّار ايله مس.

فانى اؤل، گر ايستر اپرسنگ مهر كيم قيلمس نصيب
كيمنى بير دولتقه كيم تېنگرى سزاوار ايله مس.

دېمىنگيز كيم، برخبر بؤل، تېلبه كؤنگلومدين، چو اول
قیده كيم بارسه نوایینی خبردار ايله مس.

۲۳۲

زلفيدین ايرو جنونومغه دېسم تدبير اېمس،
تېلبه ايتكه چاره دېر كيم، قتل اېرور زنجير اېمس.

عارضین كؤرسم، نېدور دېب سؤرمه كؤنگلوم حالتین،
چهره تغیریدین انگله حاجتِ تقرير اېمس.

هر تون انجمدين مېنىنگ حالیمغه گردون اشكى بیل،
چرخ اوزه آھیم بخارى تفتیدین تأثر اېمس.

زلفی پېچ و تابيغه باریب كېلور شیدا كؤنگول،
با وجودِ تیره ليك، كؤرگیل كه كؤپ دلگیر اېمس.

ایسته سنگ قتلیم چیقارغیل تیغ و اھمال اېتمه كیم،
نې دېسنگ مېندین بؤیونسونماقده خود تقصیر اېمس.

دیر ارا اوسروك كؤروب، زاهد مېنى عیب ايله مېش،
بیلمه مېش مسکین كه، هیچ ایش خارجِ تقدیر اېمس.

اول پری قیلمیش مہنی مجنون و رسوا شہر ارا،
ای نوایی، گوشہ توت کیم، حاجتِ تشہیر اہمس.

۲۳۳

دمبدم لعلینگ خیالیدین ایچیم قان مو اہمس،
قطرہ-قطرہ کوز یولیدین یوزگہ غلتان مو اہمس؟

گہ اؤلوب، گاہی تیریلسم، تانگ اہمس، وہ، غمزہ سی
قاتل اہرمستور مو یا نوشِ لبی جان مو اہمس؟!

نہ عجب، عشق آفتیدین چیقسه جان تن ملکیدین،
شحنہ ظالم مو اہمس، یا ملک ویران مو اہمس؟!

ناوکِ ظلم اورماغینگدین تانمہ غیل، ای قاشی یا،
تندہ زخم اہرمس مو، یا کؤنگلومده پیکان مو اہمس؟!

تہلبہ کؤنگلومنی دہمہ کؤپ والہ اہرمس عشق ارا،
شہرہ آفاق، یا رسوای دوران مو اہمس؟!

دھر شوخیگہ کؤنگول گر بہرمہ دیم، عیب اہتمنگیز،
عشوہ سی چین مو اہمس، یا عہدی یالغان مو اہمس؟!

دشت ارا کؤرسنگ نوایینی اہمس مجنون دہمہ
تاش مو اورمس کؤکسیگہ، یا جسمی عریان مو اہمس؟!

۲۳۴

چاك بۇلغان كۈنگلۈمە قىلماق علاج آسان اېمىس،
غىچە كىم آچىلدى، بوتكرمك انى امكان اېمىس.

كۈنگۈم ايچرە گلېن درد اوزرە هر يان غىچە دور،
اي معالج، دفعيغە سعى اېتمە كىم، پىكان اېمىس.

مهرىم اۋتين هوش و صبر و عقل و حس ياشورمەدى،
مهر لامع تۋرت برقع كېنىدىن پنهان اېمىس.

آتشين لعلينگ غمىدىن كۈنگلۈم اېرور پستەيى
كىم، كويوبان چاك اۋلۇپتور غىچە خندان اېمىس.

زاهدا، منع ايله دينگ كۈنگلۈمنى مىدىن، يىلمە دينگ
كىم، سمندرغە ياليندىن سود اېرور، نقصان اېمىس.

يېنگسە دىر ايچرە مېنى حيرت نې تانگ، اي مغىچە،
كىم دورور بو كارگە وضعيغە كىم حيران اېمىس.

درد هجرينگدين نوايى كۈكسى اوزرە داغ و نعل،
تن حريميغە عجب گر شمسە و ايوان اېمىس.

۲۳۵

خستە كويونگدە ياتميشم بې كس،
توتقوچىم، قاپقوچىم ايتىنگ دور بس.

اشك ارا اۋرتەدى تىمنى غمىنگ،
گرچە كويمس سو ايچرە توشكن خس.

جان و نالان كۈنگۈل بىلە نې عجب
پاسبانىڭ كېچە يۈرۈتسە جرس.

اۋقلىرىڭدىن ايچىمدە ايستەسە عشق
يسەي آلور كۈنگۈل قوشىغە قفس.

خوان حسن ايچرە خالىڭ و آغزىڭ
كېلدى خشخاش نىڭ يانپدە عدس.

تار اميد ارا حريصنى بىل،
رشتە عنكبوت ايچىندە مگس.

ايتىڭ اۋلدى نوايى، اى چابك،
بۇيىغە محكم ايله حلقە مرس.

۲۳۶

بىزگە عالم باغيدىن اول سرو گلرخسار بس،
گاه اندىن جلوه، گاهي دولت ديدار بس.

ياغليغىن زخمىمغە باغلرغە نې حدىم ايستەمك،
قىلسە لطف اندىن مونى تىكمك اوچون بير تار بس.

مېن كيم و زلفونگ تمناسى، اگر كفر ايستەسم،
ايتلىرىڭ بۇيىنى طنايىدىن منگە زنار بس.

ھجر اۋتىدىن سىندى كۈنگلۈم ايستەمم قىصرىڭ پناھ،

سايە بىر كۈنگىلى بوزولغانغە بوزوغ دېوار بىس.

كۈزدە بىر اويقونى كۇرسىم، اويقودە كۇرسىم سېنى،
تا اجل اويقوسى اوشبو دولت ديدار بىس.

واعظا، مېن عاصى اېرمان حور و جنت لايقى
مغېچە ساقى، مقامىم كلبە خمار بىس.

اۋزلوگونگىدىن اۋزنى سىلپ اېتىسنىڭ غرض بىر گام دور،
اي نوايى، قىلمە غىل بو شېۋەنى زىنھار بىس.

۲۳۷

منزلې كىم اول پرى پىكرنى كۆردوم بىر نەفس،
گرانى تايمان همول منزلنى قىلىم طوف، بىس.
رەنگىز خالى يوزى نىنگ زېبى دور، ۋە كىم، دېگى:
حسنى خوانىغە كېرەكلىك مونچە بۇلغەي بىر عدس.

بەند زلفونگ بۇيىنىمە توشكىچ ھلاك اېتتى مېنى،
ايتكە، جانا، ھېچ كىم اۋلتورگەلى تاقىمىس مرس.

عشقىنىڭ ايچرە بوالھوس گر دېسەلر، يۇقتور غىمىم،
باك يۇق بو طەندىن بۇلسە مىنگە وصلىنىڭ ھوس.

اشك بحریندە اگر جىسمىم غرىق اېرمىس، نې تانىڭ،
يۇق انگە اول وزن كىم چۇمغەي تېنگىزگە توشسە خىس.

بو چمن نینگ گللىرىدە يۇقتور، اى بلبل، وفا،
اولى اول كيم، ايله سنگ گلبنگ چىكىمكىلىكى بس.

چاره نې بۇلغەى نوايىغە فراقىنگ شامىدە،
گر خىالىنگ بۇلمەسە بېچارەلرغە چارە رس.

۲۳۸

فغان كيم كۈنگلوم آغان دلبرىم دلدارىلغ بىلمس،
بيلور عاشقنى غمگىن قىلماق و غمخورلىغ بىلمس.

نېچوك دېى يار اېمس، دشمن دېمك بۇلمس، خود ايتەى كيم،
اېرور خود يار اول، اما طريق يارلىغ بىلمس.

كۈنگولده زارلىغ بىرلە فغان كويونگده عىب اېتمە،
گداى خستەىى دور جز فغان و زارلىغ بىلمس.

آغىرراق دور فراقىم تاغىدىن بختىم نىنگ اويقوسى
كە، نالم بۇلدى رستاخيز و اول بېدارلىغ بىلمس.

بۇلوب مجنون پرى دېك ايتمىشم، نېچونكە يارىم هم
پرى پىكر دور، اما غير مجنون وارلىغ بىلمس.

كېتور، اى ساقى مېوش، منگە بىر ساغر دلکش،
كە دوران يارلىغ، افلاك جز غدارلىغ بىلمس.

قضا ايلگى تىلرمېن بىر بىلە هموار قىلغەى كيم،
زمان اهلى زمان دېك غير ناھموارلىغ بىلمس.

مېنىڭ يارىمىدە ئانى دورا، اندىن ئورتۇر جانىم،
كە ئانى ھەر قوياش يۈزلۈگ شۇرگفتارلىغ بىلمىس.

نوايى كۈزلۈرى نىڭ مەردمىدىن جورى قان تۈكتى،
درىغ اول شوخ مەردمەكش كە، مەردمەدارلىغ بىلمىس.

۲۳۹

چاڭ اېتىپ كۈنگلۈمنى آچىلسون دېمەك امكان اېمىس،
غىچەنى ەمدآ آچىپ، گل ايلەمەك آسان اېمىس.

دېمە زاھد كىم، نېدىن حىرانسېن اول رەخسارغە،
عالم ايچرە بىر كىشى تاپ كىم انگە حىران اېمىس.
قۇرە سولر دور كۈنگۈل ئۈتۈغە تەسكىن بېرگەلى،
كىم اول آي ياغدوردى قاشى قوسىدىن پىكان اېمىس.

ھىجر دشتىدە قويون دېكەن، ولې اول مېن كېيى
خاكسار و بادە پىما داغى سەرگردان اېمىس.

گرچە ھسنۈڭ كۈزگۈدىن كىردى تېمور قۇرغان ارا،
مەردېك آيىنە گۈن، افلاكىدىن پىنھان اېمىس.

گر وفاسىزلىغلىرىنى شىرھ اېتر مىڭ داستان،
اېل گمان قىلغان كېيى بىلبەدە مىڭ داستان اېمىس.

اي نوايى، اول پرىدىن آدمىلىغ كۈرمەسەنگ،

عیب اېمس، اول حور دور یاخود ملک، انسان اېمس.

۲۴۰

خوبلرغه مېنگ اول آی نینگ تازه قوللوق داغی بس،
کۆزلریگه سورمه کویی نینگ قرا توفراغی بس.

بېستون سیرینی نیله ی کیم منگه اېگنیمده گی،
کۆک رواقیغه ستون بؤلغان ملامت تاغی بس.

چون تنیم زاغ و زغنگه طعمه بۆلدی، ای سپهر،
یوز بلا قلابین آغیل کیم الر تیرناغی بس.

شاه و تاج و خلعتی کیم مېن تماشا قیلغله لی
اؤزبېگیم باشیده قلیاق، اېگنیده شیرداغی بس.

گوشه میخانه دین گلشنه بارمان کیم منگه
گل اوزه نسیرین می گلرنگ اوزه کپ یاغی بس.

یاشینگ اېللیک بۆلدی، یوز قۇیغیل فنا توفراغیغه
کیم شباب ایامی عیش و بی ادبلیغ چاغی بس.

گر نوایی حالیه اول شوخ باقمس رحم ایله،
گاه عبرت بیرله هم اول یان نظر سالماغی بس.

۲۴۱

سېندېگ و کییگن شب اندر روز حله ننگ دېک اېمس،

كېچە و كوندوز لباسين كييسه لر آي و گونس .

عشق سرگردانلري باشيمغه اهورولمك نې تانگ،
كيم بو وادیده قويونمېن، اول جماعت خار و خس .

عشق اېلى كۈنگلوم فغانيدىن تا پر مقصدغه يۈل،
دشت ارا هر يان آزيققنلرنى چرلر بو جرس .

زلف ارا خالينگ كۈنگوللر خيلينى تاراج اېتر،
قلب شېرولر لباسين كېچە آغان دېك عسس .

آق اوييدىن هيچ جانب اول پرى فيلمس هوا،
نې عجايب، قوشقه كۈركيم، نې مناسب دور قفس .

صدق اهلى آهيدىن، اى حسن شمعى، وهم قيل،
كيم كواكب شمعين اېتتى تيره صبح اورگچ نفس .

دير پيرى مست اېتيب، كۈنگلومنى آلدى مغېچه،
قيلمگ، اى احباب، مغ ديرى تماشاسين هوس .

باش آقاريب، يوز قرالغ دورينه ترك ادب،
دۈست غيرت ايله مسدين بورنه قيل عصياننى بس .

تاق نوايى بۈينىغه دېسم طناب زلف، دېر:
كوى ايتى بۈينىغه كيم تاققندورور مشكين مرس .

«ش» حرفى نينگ شوخلرى نينگ شمالي «غرايب» دين

زهی کمال ایله کونین نقشیغه نقاش،
مُکونات وجودین وجودینگ ایلب فاش.

وجودینگ ایله دی موجود اولوسنی کیم، بۆلمس
وجود ذره غه موجود بۆلمه غونچه قویاش.

سنگه بیتیشمه سه تانگ یوق بو عقل ظلمانی،
که مهر شمعیه پروانه بۆلمه دی خفاش.

قایو پریغه که قیلدینگ یوزین قویاش، ببردینگ
کۆنگول جنونی اوچون عنبرین هلال ایله فاش.

انگه که، بۆلدی جنون عشق ایچینه یاغدوردونگ
خرد قوشینی اوچورماققه طفللردین تاش.

انینگ که کۆنگلیده عشق اخگرینی یاشوردونگ،
نهانی اوتین اولوغ تینماغیدین اپتینگ فاش.

مُوسوسی که معاشینی عقل ایله توزدونگ،
فنا یۆلیده ایادینگ بپرورگه عقل معاش.

حکیم قدرتینگ آکینده چرخ ایله انجم،
محقر اویله که خشخاش و دانه خشخاش.

یۆلونگده اۆلدی نوایی و بۆلدی توفراغ هم،

ياپوشسه اېردى بو كوى ايتلىرى اياغيغه كاش.

۲۴۳

مېن سرگشته جسمين داغ ايله قان لاله زار اېتميش،
قويون ياخود توكولگن لاله زار ايچره گزار اېتميش.

تيمدين قان چيقرغان هر طرف پيكانلرينگ گۇيا
اېرور يامغور كه، توفراغدين چېچكلر آشكار اېتميش.

كۇنگول بيرله سۇنگك منقل ارا اؤت و اؤتون دېك دور،
ملا مت تاشلرين تا عشق تېگرمده حصار اېتميش.

يوزين مى گل - گل اېتكندين خراش اېرمس اونوم، بلكيم
كۇنگولده خار - خارى نالم اندامين فگار اېتميش.

لبينگ جانيمغه سالغان شعله لر ايچره قضا گۇيا
اولوغراق لعلدين اخگر، كيچيكراكدن شرار اېتميش.

بؤله آلسم اولوسقه اول قوياشنى كؤرگه لى مانع
نې غم دور گر يۇليده چرخ جسمينى غبار اېتميش.

هلاكم بيلگه ي اول كيم، باردور اول ينگليغ جفاكارې،
كه طورين حسن بي پرواليغى آلفته وار اېتميش.

كبوتر قصر برجيده اېمس شه شصتيدن ايمن،
خوشا، اول جغدكيم ويرانه كنجين اختيار اېتميش.

معاف اپرمیش قە يان گام اورسە رھرو ناقە جسمى،
نفس تارين قضا چون بورنيغە آنينگ مھار اپتميش.

مغنى نغمەسى جان بېرسە بزم اھليگە تانگ يۇق كيم،
نوایی رشتە جانين اپشيب چنگيگە تار اپتميش.

۲۴۴

كۈنگول كيم زر نشان پيكانلرينگدين ناتوان بۇلميش،
مگر بو باغ ارا اول برگلر بيرلە خزان بۇلميش.

گل رعنا كېيى كاغذ اوزە نامينگى يازمەيمېن،
سريغ اپردى يوزى خوناب اشكيم بيرلە قان بۇلميش.

يوزومنى اشك مو يۇللر قىليپتور، يا نظر پيكي
سېنى ايسترگە كۆپ هر يان يوگورمكدىن نشان بۇلميش.

قوروغ شاخى دورور جسميم كە، كۆز دوريدە كيرپيكدىن
خيالينگ قوشلريغە اندە ايكي آشيان بۇلميش.

كۆزوم خوناب ارا بۇلميش بعينه اويلە كيم كۈنگلوم
قراسى قان ارا كۈنگلومدە گى داغ نھان بۇلميش.

سرشك آليدە مژگان شاخى سنجيب باغله يين دېرمېن،
يۇلين بو سيل نينگ كيم، اېلگە اندىن كۆپ زيان بۇلميش.

يوزونگ ھجريدە بيل كيم قان ياشيم آقميش چمن ايچرە،
قچان كۆرسنگ كە هر بير شاخ اوزە گل ارغوان بۇلميش.

مرصع قىلمە چترىنگ لاجوردى اطلسىن، اى شىخ،
گدا آلىندە كىم، بو نوع چتر آسمان بۆلمىش.

نوايىغە دېمىنگ اول طفل عشقین اسرە غىل مخفى،
بو دم كىم حالى شهر اطفالى ايچرە داستان بۆلمىش.

۲۴۵

چىقتى يارىم كېچە يۇل عزمىن قىلىپ اول بغرى تاش،
بس عجاب دور قارانغۇ كېچە چىقماغلىغ قوياش.

گر قوياشقە ابل نظر قىلسە كۆزىگە ياش تۇلر،
اول قوياش بارغاچ نظردىن، كۆزلىرىمگە تۇلدى ياش.

زخمىدىن كۆپ قان باروردىن قالدى چاك اۋلغان كۈنگۈل
زنگ دېك افغان چېكىپ، خىلىدە بۇلغەى اېردى كاش.

فرقتىنگىدىن يىغلەبان حقدىن وصالىنگ اىسترم،
گە ساچرمېن باشقە توفراق، گە قۇيرمېن يېرگە باش.

قطرە قانلر كىم تامر كۆكسومگە اورغان تاشدىن
زخمىدىن دور دېمە كىم، قان يىغلر احوالىمغە تاش.

چون توشلر عاقبت اوستونگگە خارا بىرلە فرش،
نې آسىغ آستىنگدە گر چرخ اطلسىدىن دور فراش.

فاش اېتر مېرىن نوايى نىنگ سريغ رخسارەسى،

صبح دېک کیم سرغریب رخساری آیلر مهر فاش.

۲۴۶

قتیق دردیمل زلال اشک اېتر فاش،
سوزوک سو ایچره قالمس یاشورون تاش.

هلاکیم وصل ارا مینگدین بیر اېتتینگ
که بېرگه ی تېنگری بیر یاشینگه مینگ یاش.

دېمک که فتنه تعلیمین بولوب خم،
قولاغینگ ساری باش اېلتیتور اول باش.

مگر ساچینگنی تیدینگ فتنه دین کیم،
پریشان حال ایاغینگه قویر باش،

یسر چاغده لبینگ رنگینی گویا
اېزیتور آب حیوان بیرله نقاش.

قدح، ای مغ که، جان ایله ی نثارینگ،
نېچه بولسم خرابات ایچره قلاش.

نوایی جانی سېنسيز درد سر دور،
بارورده آنی هم آله ی اېدینگ کاش.

۲۴۷

چو بیلدی شمع کیم، غم شامی کؤنگلومنی هلاک اېتمیش،

تئين اشك اېتمەدى يۇل كيم، ياقە حاليمغە چاك اېتميش.

چمندە يۇق كە بلبل، زاغ ھم اون چېكسە ضعف ايلر
حزين كۈنگلومنى كۈر كيم، فرقتينگ نې دردناك اېتميش.

كۈنگولدين غير يادى چيقتى يېتكچ تير بارانينگ
كدورت نقشيدىن يامغور سويى بو اوينى پاك اېتميش.

قويون ينگليغ گذر كوييگە قيلماغ گر ابرور ممكن،
غم اېرمس، وادى ھجرانى گر جسميمنى خاك اېتميش.

سو ايچمەى كۈنگلى زھدومدين اگر كېتميش اېدى ساقى،
وضو ابريقيده مى دور تۇلە، كېلدىك نې پاك اېتميش.

فلك پىكانِ ظلمى، وە كە، تېشميش خستە كۈنگلومنى
نېچوك كيم، تامچى بير يېر اوزره كۈپ تاميب مفاك اېتميش.

قدح توت كيم، قيزرگەى چهرە، اى ساقى، كە ھجرا نينگ
يوزومنى اصفر انداغ كيم، خزانى برگ تاك اېتميش.

بلا دور نفس شركى، فقر يۇليده خوش اول فاني،
كە بير رھروغە جسمى توفراغين گردِ شراك اېتميش.

نوايىنى دېدينگ كيم، بير جفا بيرلە ھلاك ايلهى،
وفا قيل اېمدى كيم، بو آرزو آنى ھلاك اېتميش.

۲۴۸

كۆز كۆترمان اول قوياشدىن گر كۆزوم قىلماققە رېش،
پشەلر يىنگىلىغ هوا اوزره چېكر هر ذره نېش.

تېلەلىك باغى گل و نىلوفرى اېركىن بو كىم،
هم كۆكردى خلق تاشيدىن تنىم، هم بۆلدى رېش.

خوشتورور كۆنگلومده زلف و قديدين نعل و الف
كىم، بو قربان دېك تاپيلمس انداق اوق و ياغه كېش.

بېلى تارى هجرىدىن جىسمىم بۆلۈپتور تاردېك،
اي فلک، رحم اېت، بو ايگى رشتەنى بىر- بىرگە اېش.

طرفه كۆر كىم، كۆنگلومه عشقىنگ كىررگە يول بۆلور،
نېچە كىم، عشقىمنى ترك اېتكىل، دېيان كۆكسومنى تېش.

ايسته سنگ دير فنا طوفىن بېلىنگدىن، اي فقيه،
قيد زنارین اوزوب، زنار قىدىن داغى يېش.

طعن قىلمىنگ كىم، نوايى بې كس و بې يار اېمىش،
كىم انگه عالمده عاشقلىق ايش اۆلمىش، عشق اېش.

۲۴۹

عارضىن ياپىغچ كۆزومدىن ساچىلور هر لحظه ياش،
اۆيله كىم پيدا بۆلور يولدوز، نهان بۆلغچ قوياش.

قوت بىر بادام و بېرىم گوشه محراب اېدى،
غارت دين اېتتى ناگه بىر بلالىغ كۆز و قاش.

بو دمامد آھیم افشا ایلر اول آی عشقینی،
صبح نینگ بات-بات دمی انداق که ایلر مهر فاش.

بوسه یی قیلمس مروّت اسرو قتیق دور لبینگ
دېسم، آغزی ایچره ایتور لعل هم بار نوع تاش.

ناوکینگ کۋنلومگه کیرگچ جان تلشماق بو اپکین
کیم، قیلور پیکانینی کۋنگلوم بیله جانیم تلاش.

عمر جاوید ایسته سنگ فرد اؤل که بوستان خضری دور،
سرو کیم، دأب ایلهدی آزاده لیغ بیرله معاش.

قاشی آئنده نوایی بېرسه جان عیب اېتمنکیز،
گر بو دور محراب، بیر-بیر قیغوسی دور برچه باش.

۲۵۰

سریغ گل دېمه کیم، چون سرو نازیم باغ ارا بارمیش،
یوزین کۋرگچ قیزیل گل ضعف اېتیب، اول نوع سرغارمیش.

کۋنگول اطرافیده آچقن اوچون هجران اؤقی یؤلر،
بلا خیلینی عشقینگ شهنه سی اول ساری باشقارمیش.

غمینگ منت قۋیوب جان آلدی، وه، جانیمغه یوز منت
که خود باری تیریگلک منتیدین جاننی قوتقارمیش.

کلامینگ گوهری دېک تاپمه میش، گرچه صبا ایلگی

يَقاسين غنچە نىنگ يىرتىپ نېچە كىم قۇيىن اختارمىش.

كۈنگۈلنى چاك-چاك اپتكىچ، يېتىشتى اۇقى ھەرياندىن،
اۋتون قۇيماققە گۇياكىم بو اۋت نىنگ توش-توشىن يارمىش.

نېچە كىم قەچىكر، سرکشلىك ايلر غىبرىن زلفى،
اگرچە كۈن بىيك چىققندە دايم سايە قىسقارمىش.

اىلىگ بۇغىزىگە اپلىتىپ، شىشە تۈكمىش قان ياشىن مېن دېك،
مگر ساقى اياغىن اۋپكەلى اول داغى يالبارمىش.

يۈگۈرمە رزق اوچون نې يېتسە حقدىن انگلەكىم كامىل
نې كېلتۈرگىل دېمىش، نې غىبىدىن كېلگىنى قىتارمىش.

فراق و زەھد دىفعىغە نوايى عشق صەھباسىن
مگر تۇقۇز توتوب، تۇقۇز فلەك جامىنى سىپقارمىش.

۲۵۱

پارساوش دىلستانىم بۇلغان اپرمىش بادە نوش،
تا باشىم بۇلغەى اياغىنگ بۇلغوسى، اى مىفروش.

ايچگىن كۈرگن زمان-اۋق مست بۇلغونگ دور، دېمىنگ
كىم اېشىتگن لحظه مېندىن زايل اۋلمىش عقل و ھوش.

بزم وصلىدىن يىراق اغزىمدە خەم دېك مۇھراپور،
تانگ اېمس قانىمغە مى دېك شوق اۋتىدىن توشسە جوش.

جان و كۈنگلوم قان يوتوب افغان چېكرلر هجرىدين،
عشرت اهلى مى ايچيب بزميده قىلغان دېك خروش.

چاك كۈنگلك بيرله تا اوسروك چىقىپ سېن، آه كيم،
كسوتين ميخانه رهنى ايله مېش يوز خرقة پوش.

صبحدم اول بت صبحى بزمين اېتتيم آرزو،
چىقمه غيل دير فنادين دېب ندا قىلدى سروش.

اي نوايى، قارو اېرمس بولسه يوز مينگ جان فدا،
گر قدح نوشوم ايكي لعلى ميدين توتسه قوش.

۲۵۲

سېنى كۈرگچ دېر اېديم، بير مهربانيم بار اېمېش،
الله-الله، نې بلا باطل گمانيم بار اېمېش،

عارضينگ ماهيت و آغزينگ سۈزين شرح ايلره،
وه، نې طبع پاك و ذهن خرده دانيم بار اېمېش.

چاك قيل كۈكسومنى، اي بد مهر، تا كيم بيلگه سېن،
تيغ هجرينگدين نې نوع آزرده جانيم بار اېمېش.

نې حيات اېردى، اولر حاليمده كيم، كۈرگچ مېنى،
ناز ايله دېدى هنوز اول ناتوانيم بار اېمېش.

جوهر عشقين آلورغه خلق مخفى نقدى دېك
جان ايچينده بير نېچه داغ نهانيم بار اېمېش.

يوز غمىم بار اېردى، مغ كويىگە كىرگچ بۇلدى دفع،
وہ كە، مېن غافل عجب دارالامانىم بار اېمىش.

دېر كە، يالقيىمېن نوايى اونىدىن، وہ، يىخشى دور،
كىم تىرىكلىكىدىن نشان دېك بىر فغانىم بار اېمىش.

۲۵۳

وسمە بىرلە قاشىن اول مېوش كە رنگىن ايلەمىش،
كۆزى جالادى قىلىپچىغە يىشىل قىن ايلەمىش.

كۈنگلوم اۋتىن دېمە كىم، تارتىر زبانه زلفىدىن،
كىم اول افعى تىل چىقارماغلىغىنى آيين ايلەمىش.

سنبولونگ افعىسىدىن زىخى يېمىش گۇيا تراغ،
يۇقسە نېچون عارضىن باشتىن-اياق چىن ايلەمىش.

تيتىرە گۈچدىن قىلمىش اول كىرپىك يىسالىغە الم،
وہ، يىنە تا نې كۈنگۈل يىغماسىغە كىن ايلەمىش.

اۋىلە دور كىم، ايلگىنى حىنا اوزە قىلمىش نكار،
اول كە گلگون كۈنگلەك اوزرە تۈنىن اېپكىن ايلەمىش.

رز قىزىدىن، ساقيا، بىر دم مېنى شاد ايلە كىم،
چرخ زالى غىصەسى كۈنگلومنى غمگىن ايلەمىش.

گر نوايىغە سلىمان ملكىچە بار دور نې تانگ،

بو که بلقیس زمان نظمینی تحسین ایله میس.

۲۵۴

نې ابرش دور که، سپکریتمیش ینه میدانغه اول مهوش،
قیزیل، آق گل بيله ییلدین مگر خلق اؤلدی اول ابرش.

جهان میدانیده تا شوخ چابکلر قیلور جولان،
کیشی کؤرمیدور انداق ابرش اوزره اول صفت مهوش.

اېمس ابرش، سپهرې دور شفقدین کؤرگوزوب انجم،
قویاش تور کیم انکه راکب، تانگ اېرمس گر ابرور سرکش.

نېچوک اؤلمه ی اول ابرش اوزره اول مهوشنی کؤرگچ کیم،
هم اول ابرش ابرور سرکش، هم اول مهوش ابرور سرخوش.

مېن مجنون ییقیلسم کؤرگچ-اؤق، حیرت ییری ابرمس
که عقل کلگه هر ساعت ابرور نظاره سیدین غش.

پریوش رخس اوزه سرخوش پری جولان قیلور، نېتسون
جنون جامیغه قیلمه ی باده پالا اهل تقوا فش.

قویون ینگلیغ اېگرسه ابرشین اول شوخ، دم اورمان
نواپی دېک، نېدین کیم اوشبو سؤز بار اسرو کؤپ چیرمش.

۲۵۵

اول سرو عذاری گل سپراب دېک ابرمیش،

لعل لى گل اوزره مى ناب دېك اېرميش،

كۆردوم قاشى عكسىنى كۈنگول كۆزگوسى ايچره،
بو قبله نما، اول مونگه محراب دېك اېرميش.

كۆردوم كۈنگول احوالىنى كۆكسوم تۆشوگىدىن،
لعلينگ غمىدىن قطره خوناب دېك اېرميش.

حسن انجمنى ايچره يوزين كۆرمه مېش اېردىم،
انجم ارا خورشيد جهانتاب دېك اېرميش.

دېوانه كۈنگول قيد جنوندىن نې قوتولسون
كىم هر خم زلفونگ انگه قلاب دېك اېرميش.

توت فقر اېتگين، اطلس زربفت سۆزين قۇي
كىم اول دغى تن حفظيده ماشاب دېك اېرميش.

بىر يۇلى نوايىنى يىراق سالمه نظردىن
كىم اول دغى بىر كون سنگه احباب دېك اېرميش.

۲۵۶

نې عجب گر بار اېسم دېوانه وشليغ بىرله خوش
كىم كۈنگول آغان پىرويوم اېرور دېوانه وش.

منع اېترسىز هوشى يۇق كۈنگولمگه لعل بادەسىن،
ايتىنگ، اى هوش اهلى، كېلگەى مو بو سۆز اوسروكە خوش.

صافِ وصلی بۆلمه سه گر برچه زهرِ هجری دور،
ساقیا، بیر جرعه توت کیم، آلدی جانیمنی عطش.

سالدی کۆنگلومنی غمِ هجران گدازی ایچره یار،
گۆیا کیم عشق ارا اول قلبده بار اپردی غش.

وه، نې ینگلیغ ساغ اؤلی مېن تېلبه بو حالتده کیم،
اول پری هم باردورور دېوانه وش، هم جرعه کش.

شیخ باشیغه بلا ابرکن دورور دستار کیم،
عشق اسرارین ایشیتمکلیک که مانع بۆلدی فش.

دېمه کیم، بیر یخشی سؤز بیرله نوایی جانینی
آلسم اول بۆلغه ی مو راضی، یخشی سؤز که نې کینگش.

۲۵۷

تا کۆز بيله کۆنگلومنی اول غمزه مقام اېتمیش،
قانیمنی حلال انگلب، اویقومنی حرام اېتمیش.

سرو اؤلمه دی باغ ایچره آهیم یېلی بیرلن خم،
باق کۆز اوچی بیرلن کیم، قدینگه سلام اېتمیش.

حیوان سوی دی دور شودرون، عیسا دی دور سلقین،
بوستان سری جانانیم گۆیا که خرام اېتمیش.

هجر اؤقلری زخمیدین جسمیم بيله اشکیمنی
توتماقچه بلا صیدین، غم دانه و دام اېتمیش.

تا عاشق و شیدامېن قتليم قیلور اول کؤزلر،
مجنونغه کییکلرنی عشق الفتی رام اېتمیش.

معشوق قیلور جلوه، هر کیم که انینگ کؤنگلین
درد اؤتی کولی بیرله عشق آیینه فام اېتمیش.

اسکندر و جملیق دور عشقینگده نواییغه
کیم رخشینگ ایز و نعلین کؤزگو بیله جام اېتمیش.

۲۵۸

بارغانینگدین جان تلشماق اېردی مېن محزونغه ایش،
کېلدینگ و جانیمنی آلدینگ، اول باریشقه بو کېلیش.

وصل عاشق جانی دور مېن جان تلاشیم هجر ارا
هجر باریب وصل یېتکچ، اولمک اېرور طرفه ایش.

تیغی تا کؤنگلومنی یاردی ناله قیلماں ضعفدین
راست انداق کیم، قؤیر افغانی چاک اؤلغان قمیش.

کییمه میش اول سرو گلگون تۆن که، تانگ اېرمس بو رنگ،
نخل کیم، کؤز باغیده قان بیرله تاپتی پرورش.

اعتدالی دور هوای عشق ارا کیم، خوش کېچر
ساووغ آهیم بیرله یاز و کؤنگلوم اؤتی بیرله قیش.

جسمیم اوزره بار ینگی بوتگن کؤکمتول داغ دېک

سوزِ هجرینگدین که اوردوم غصه‌دین هر بیرگه نیش.

کیش و سنجابین نی تانگ گر کیسه مودی بازگون
کیم چیقرمیشتور کیشیلیکدین انی سنجاب و کیش.

توز بؤل اؤقتک گر تیلرسپن اوج، یا کیم، اېگری دور،
دور هر بیر گوشه‌دین بؤغزیغه سالیپتور کبریش.

ای نوایی، هر دم اول آی مهری آرتر کؤنگلومه،
گرچه ییللر دور کیم، اول ترک محبت آيله‌میش.

۲۵۹

عارضین کؤردوم، نهان اشک ايله‌دی سریمنی فاش،
یاشورون قالمس اؤغورلوق، اوی ارا کیم بؤلسه یاش.

زلفی سرکشلیک قیلور هر نیچه اول آی چپکسه قد،
سایه گرچه قیسقروور دایم بییک بؤلغچ قویاش.

هر سر مو اول پری هجرانیده بیر یاره دور،
بس که آفتلی جنون باشیم اوزه یاغدوردی تاش.

ایله گیل نالم خراشیدین حذر، ای سیمبر،
کیم بو سوهان بیرله ناگه تاپمه‌غای سیمینگ خراش.

کعبه دور کؤنگلوم اوئی آیلنگ طواف، ای درد و شوق،
انده محراب اؤرنیغه بیر توتقه‌لی اول اېگمه قاش.

دهر باغی ایچره چون بیر گلگه یۇق بوی وفا،
قیلمه‌غای ابردی هوا کؤنگلوم قوشی اول گلگه کاش.

ای نوایی، دیر ارا توتسه ایاغ اول مغبچه،
نوش ایتیپ آلمه ایاغیدین انینگ اؤلگونچه باش.

۲۶۰

هر کون آقشامغچه هجرینگده منگه زارلیغ ایش،
کپچه تانگ آتقوچه اندوه ایله بیدارلیغ ایش.

ایش وفا قیلماق ابرور، گر قیله آلسنگ که اېمس،
ای وفاسیز، بو جهان ایچره جفاکارلیغ ایش.

عشق ارا قاچمه کؤنگول خوار و زبونلیغدین کیم،
عاشق اؤلغانغه زبونلیغ بؤلور و خوارلیغ ایش.

لطف و دلجوللیغ ابرور خوب پریوشلرغه،
ای پری، بیل که، اېمس جور و دل آزارلیغ ایش.

تقوا اهللیغه بیلینسه ابدی چرخ اوضاعی،
آیله‌گه‌یلر ابدی بو دیرده خمارلیغ ایش.

عالم اهلی بیلینگیز کیم، ایش اېمس دشمنلیغ،
یار اؤلونگ بیر-بیرینگیزگه که، ابرور یارلیغ ایش.

خسته کؤنگلینی نوایی نینگ آلیب اسره که، بار
سنگه دلدارلیغ ایش، بیزگه دل افکارلیغ ایش.

يار كيم يارليغ بيله كوكسوم يراسين باغله مېش،
انده اؤت توشمېش كۈنگولدين قان ترشح قىلمه مېش.

بو كه پاره-پاره دور كويگن بغير بيرله كۈنگول،
ايتلري آليده اول كافر همانا تۇغره مېش.

رشته زلفونگده كيم، توشمېش گرهلر بي حساب،
گوييا قتل آيله گن ابل نينگ حسابين اسره مېش.

بیر كيشى سودايى اؤلمه ي قالمه غاي بو نوع كيم،
عالم ايچره سنبل زلفونگ نسيمي بوتره مېش.

باشيمه تيغ اوردى، كوكسوم چاك و بغيرم قىلدى زخم،
مست بي باكيم دېديم قهر اېتمېش اول خود اؤينه مېش.

هر سارى بير زخميلىق عضووم اوزولغان تاپمېش ابل
ناتوان جسميمنى كيم، كوييده ايتلر سودره مېش.

عالم اهلى ايچره بيلديك مغتم، هر كيمسه كيم
هر وفاغه مينگ جفا ايلر كيشيگه اوچره مېش.

قۇزغمه بلبلنى كۇپ، اي گل كه، دوران باغيده
قالمه مېش قۇزغلمه يين اول كيم، بيراونى قۇزغمه مېش.

اضطرابيدىن نوايى كۈنگلى بير دم تۇقته مس،

سېنسيزين، ساغينمه كيم، غربتده كۈنگلى تۇقتەميش.

۲۶۲

كۈنگلومە كېلمس خزانى باغ ارا نارنج خوش
كيم خزان هجر ارا بۇلدى يوزوم نارنج وش.

چهره نارنجي و مېن نارنج ينگليغ تلخ كام،
قىده كېلگەي كيمسە گە بول حال ارا نارنج خوش.

شوڭ نارنجي لباسې هجرى كۈنگلوم اۋرتەدى،
شربت نارنج اپتە آلمس منگە دفع عطش.

بۇلمەسە آلتون پيالە، بۇلمەسون، كېل، اى رفيق،
جام اپتيب نارنج نصفيدىن بۇلالى جرعه كش.

اول پرى عشقيده آتيم بۇلدى مجنونلوققه فاش،
اندىن آرتوق كيم بورون موندىن منگە اپردى ادش.

شيخ دستارين چو مى وجهى يۇق اپردى سىرمەديم،
ميغه مرهون قيلغەلى اول يىخشى مى سوزمككه فش.

اى نوايى، نهيله اېل ترخان بيله برلاسىنى
كيم بېرور كۈنگلومگە حالا مالش اول شوڭ ملش.

سېندىن اىرو تىندە كۈنگلوم يۇقتور و كۈنگلومدە ھوش،
بېدل و بېھوشلردېك نې عىجب قىلىم خروش.

بادە وىلىم آلور ھوشونگى دېب قۇرقوتىمە كىم،
وھم بو سۇزدىن بىراو قىلغەي كە، بۇلغەي انگە ھوش.

ھىجردىن مخلص تىلب نوش ايلرەم زەر اول صفت
كىم يېتىشسە زەردىن اچىغ دورور آغزىمدە نوش.

عشقە غىرت تىلىمنى لال اېتىدور، اى رفيق،
ھىجر ظلمىدىن اېمستورمېن سۇزوم يۇقتىن خىموش.

برچە جىسىم ھىجر اۋتىدىن رېش و مرھملىق ماموق
اتىالىدىن مېن عىرمانى دېرلر خرقە پوش.

ھىجردىن جان يېتتى آغزىمغە آلىب جان نقدىنى ،
قوى كە، كۇپ آغزىنى آغزىمگە قۇيەي، اى مىفروش،

اى نوايى، ھىر نې عالم اىچرە بۇلغەي سەل توت،
لېك مطلوبونگ تىناسىدە بۇلگىل سىخت كوش.

سورمە بىلن مو اول آي كۇزنى قرا ايله مىش،
يۇقسە ختن جىرانى مشك اىچىدە اغنە مىش.

كويىدە مېن ضىعفدىن اۋىلە كە، ھىر يان مېنى

ايت دېمەيىن، بلكە مور طعمە اوچون سودرەمىش.

غمزەنگ اۋقى كثرى كۈنگلوم ارا مو اېكىن،
يۇقسە بو قوش پرلرین ھجرینگ اۋتى چورکەمىش،

حلە زربفتدين قیلدى مو اول آی سېپىچ،
يۇقسە شعاع خطين باشقە قوياش چيرمەمىش.

عالم ارا بير كيشى تېلبرەمەي قالمەغاي،
بۇيلە كە يېتكىچ نسيم زلفونگ ارا بوترەمىش.

وادى ھجر ايچرە كيم بۇلدى سۇنگگ اهل عشق،
بو دور اۋتون كيم انى غم سېھى اۋرتەمىش.

لمعە رخسار ايله اۋرتەدى عشاقىنى،
غیرت حسنى مگر زارلرین تېرگەمىش.

تېگمەسە بزمینگدە مى، بس دورور اول سو منگە
كيم سېن ايچر جامنى سوچى آليب يايقةمىش.

نەيلە گەمېن باغله مەي مغېچە زنارینی
كيم بو كھن دیر ارا عیسی انی باغله مېش.

مهر و وفا عییدین پاک دور ابنای دهر،
پاک نظر دور كيم اول ساری نظر سالمەمىش.

توتتى نوایی عزیز کوییده اول تاشنى كيم،
گاه انی باشیغە، گە باش انگە یستەمىش.

لعلی عشق اهلیدین آنچه غارت جان ایله میش
کیم، اولوک که جان بېرور آیین آسان ایله میش.

کوییده اطفال عشاق اولتورور بېداد ایله،
شه مگر شهر ایچره ایت قتلغه فرمان ایله میش.

صبح عیشیم ایسته میش غم شامیغه بولماق بدل،
یوقسه نهوچون یوز اوزه زلفین پریشان ایله میش.

یارب، اول توننی یاروتمه مهر بیرله تا ابد،
کیم غریبی مهربان یارینی مهمان ایله میش.

اهل دوران کونگولوم آشوبین نیتیب منع ایله گهی،
کیم انی آشفته بیر آشوب دوران ایله میش.

گل کبی ساچ خرده کیم، ییل ییرتیان تاراج ابتر
غنچه کیم، اوز نقدینی آغزیده پنهان ایله میش.

ای نوایی، دېمه کیم بغریم ابریتمیش عشق اوتی،
کیم انی هجران کونی نینگ اندوهی قان ایله میش.

اول گلی کیم، بزمیده زاغ و زغن قیلغهی خروش،
اولی اول کیم، بلبل اوچقی، اوچمه سه بولغهی خموش.

گر سلیمان مجمعیده بۆلمه‌غای جز اهرمن،
کیمگه اول مجمع ارا، یارب، ندا قیلغه‌ی سروش.

یارغه اغیار خیلی بۆلدی مطبوع، ای کؤنگول،
اېمدی غم خمخانه‌سیده یأس جامین ایله نوش.

شاه بزمی دور دغی محکوملوغده، دیر ارا
حاکم ایلر بیر قدح بیرله گدانی میفروش.

هوشمند اېل ساری بو دیر ایچره یاقمس مغیچه،
بیر قدح لطف ایتسه پیر دیر ایترمین ترک هوش.

سختکوش اېلگه دېمه، آخر فلک دور سختگیر،
ارزیمس عالمده هیچ ایش خود بۆلورغه سختکوش.

ایکّی دنیادین اگر کپچسه نوایی عیب اېمس،
هر قچان کیم بو بُت خمار ایلیدین ایچسه قۇش.

۲۶۷

قیلغه‌لی کییگن لباسین اول بت زیبا بنفش،
وه که، یاقمس خاطریمغه هیچ رنگ الا بنفش.

سرو رعنا حله مو کییمیش بنفشه برگیدین،
یا لباسین ایله‌میش اول چابک رعنا بنفش.

خوش تورور گر خلعتین قیلسه قرا یا سوسنی،
کیم قویاش مشکین بولوتدین خوش کؤرونور یا بنفش.

اېمدى جنت گللىرىدىن رڭ نقاش قضا،
سېن كىردېك چۈنكە بۇلمس دەر ارا پيدا بنفش.

تا بنفش اېتمىش تۇنين اول گل بارورمېن هوشدين،
باغ ارا هر گلى كىم كۇرسم مېن شيدا بنفش.

گل بنفشه زار ارا توشگن كېيى اول شوخ نىنگ
كۇنگلكى والا بنفش و تۇنى هم كىمخا بنفش.

سېزەدە سوسن يره شقان دېك، ملايم دور بېي،
شوخ سېزە رڭلر نىنگ رڭگىگە دىيا بنفش.

جز بنفشه باغ ارا گل اېكمه گيل، اى باغبان،
كىم لباسى رڭگىنى اىستر بىزىنگ ميرزا بنفش.

بۇيله كىم، ساقى تۇنين قىلمىش بنفش اېرمس عجب،
عكسىدين بۇلسە بلورين ساغر صهبا بنفش.

چرخ رڭگامىز اېرور، كۇرمە تفاوت زنهار
رڭلر كىم كۇرگوزور كۇك و یشیلدين تا بنفش.

اى نوایی، اول بنفشه پوش گل نىنگ وصفیده
بۇلمه سون هر نې يازرسېن كاغذى الا بنفش.

۲۶۸

توزمه گەى اېردى قضا بو جسم ويرانىمنى كاش،

چونكه توزدى، سالمه غاي ابردى انگه جانىمنى كاش.

تن اويىگه جاننى سالغىچ قيلمه غاي ابردى مقىم،
اول اوى ايچره كۈنگول آتلىغ زار حيرانىمنى كاش.

بۇلدى چون جان و كۈنگول بارى، نظر شمعى بيله
قىلمه غاي ابردى منور چشم گريانىمنى كاش.

چون عدم صحراسيدىن كېلدىم وجود ايوانىغه،
بوزغى ابردى مرگ سىلايى اول ايوانىمنى كاش.

چون توزلدى تن اويى، قاوغى اېدى اندىن روان،
يۇق كۈنگول دېوانه رسواى نادانىمنى كاش.

چون انى هم قاومه دى، كور اېتسه ابردى تيغ ايله
كۈز دېگن قان ياش ايله آلوده دامانىمنى كاش.

چون بو داغى بۇلمه دى قيلمه سه ابردى جانىمه،
مونچه زېبا و مليح و شوخ جانانىمنى كاش.

چون بو ينگلىغ بۇلدى جانان قۇيسه ابردى مرهمى،
كه. گهى كۈرگچ كۈنگولده داغ هجرانىمنى كاش.

عشق ايچىنده چاره اۇلمكدين نوايى دېمه، حق
روزى اېتگهى لعل جانبخش آب حيوانىمنى كاش.

دېدېم، اول پيكاننى لعل اپتكن يوره ك قانى اېمېش،
غنچه ننگ ارمانیده اول خود لعل پيكانى اېمېش.

پرده جان ايچره تيم-تيم قان سراسر لاله دېك،
فرقتينگدين تازه-تازه داغ پنهاني اېمېش.

لېلرين توزلوق تكلم بيرله فهم اېتتيم سؤروب،
لعلدين خوانِ جمالى نينگ نمكدانى اېمېش.

بیر جَزَع سالمېش ملايك خيلى ايچره رستخيز،
اېمدى كيم فهم ايله ميشلر كوئنگلوم افغانى اېمېش.

غم تونى دېدېم بولوت نينگ پرده سيدين چيقتى آي،
زلفدين چيقتن جمالينگ مهر رخشانى اېمېش.

دور اياغين، ساقيا، قويمه ييگيت جانينگ اوچون،
كيم ييگيتليك روزگارى عيش دورانى اېمېش.

اي نوايى، چاك بولغان كوئنگلونگ كه قيلدېم نظر،
يار باقى انده، باقى اوزگه لر فاني اېمېش.

۲۷۰

ايلگيگه ماوي كتان اول شوخ نېوچون چيرمه مېش،
گويا كوئپ تيغ ظلم اورماقتين آغريب باغله مېش.

اؤلتورورده كاش اول ياغليغ بيلن-اوق باغله،
كوئزليمنى كيم، آنى ايلگيگه حالا چيرمه مېش.

كۆرگۈزۈر اېردى ىد بىضا اورردە تىغ قتل،
باغله مېش چۈن ايلگىن، اېل كۈزىن قارانغو ايله مېش.

انگله غونچە كۈنگلۈمە يۈز داغ اندۈە اۋرتەدى،
اول كە كۈرگچ پنجه سىن باغلىغ، دېدىم داغ اۋرتە مېش.

كاش جانىم رشتە سىدىن بۇلسە اېردى ياغلىغى،
كىم اول آى نىنگ دست بوسى دولتىغە اوچرە مېش.

ساقيا، مى كىم، انىنگ ايلگىدە ياغلىغ تارى دېك
درد و غم خىلى بوزولغان خاطرىمنى قاپسە مېش.

اۋلتورور ايلگىدە گر تىغ اۋلسە آنىنگ گر حرير،
هېچ بىلمان كىم، نوایى نې بلاغە اوچرە مېش.

«ص» حرفى نىنگ صنملرى نىنگ صىتى «غرايب» دىن

۲۷۱

دېمە نې سود اېرور اۋلماق فنا حرىمىغە خاص،
ىنە نې سود كېرەك اۋز لوگونگدىن اېتسە خلاص.

عوامدىن، دېمە كىم، اۋزنى قوتقرەى، اېر اېسنگ
اۋزونگدىن اۋزنى قوتولماققە جھد قىلغىل خاص.

كۈنگول عىلىل اېسە فارغ اېمس خواطردين،
جراحت اوزرە يىغىلماق دورور چىيىنلرە خاص.

عجب اېمستور اگر تاپتی گوهر مقصود
بیراو که، بۆلدى فنا اشکی بحریده غواص.

آوچ قاقرمېن اؤز احوالیمه تحیردین،
رمیده کۆنگلوم اېرور بو اصول ایله رقاص.

دېسنگ، بو یۆلده اؤلی، نفسنی بورون اؤلتور،
که عشق شرعیده گؤیا بو نوع کېلدى قصاص.

رضا یۆلیده نوایی بارور فه یان چېکسنگ،
چو عشق باغلهدی بۆینیغه رشتۀ اخلاص.

۲۷۲

گلرخوم یادی بیله کۆنگوم اېرور گلگه حریص،
کیم بېرور یوسف ایسی قان ارا یوز پاره قمیص.

لطف وقتیده اول آی آلیده اېل دور مخصوص،
وه که، بېداد قیلورده مېنی ایلر تخصیص.

ای اجل، کېلمک اېمیش باشیمه اول عمر منگه
رحم قیل جانینگ اوچون بېر مه زمانې تنقیص.

باده کۆنگلومنی خلاص ایلهدی دوران غمیدین،
گویی اول اؤت بیله بو قلبغه بۆلدى تخلیص.

عشقیم ایلر سېنی قان تۆککهلی هر دم ترغیب،

حسنونگ ایلر مېنى جان بېرگه لی هر دم تحریص.

بند اېتوپتور جدل اهلی ایشین اشکال انداق،
کیم نې «مفتاح» انګه سود قیلور، نې «تلخیص».

وصل حرمانی نوایغه اېمس هیچ عجب،
چونکه محروم بؤلور هر کیشی کیم، بؤلسه حریص.

۲۷۳

جان یېتیب آغزیمغه تاپمان درد هجران دین خلاص،
جاننی هجران دین خلاص اېت یا مېنى جان دین خلاص.

انداق آچتی سنبلین گل اوزره یېل کیم، بؤلمه غای
بیر کؤنگول عالمده اول زلف پریشان دین خلاص.

دېمه، ناله نګدین اوچر هر شام اېل دین اویقو کیم،
تون نینگ اول باشیده اېل اېرمس بو افغان دین خلاص.

گرچه یېر تاپتینگ کؤنگولده وهم اېت آه و اشک دین،
کیم، کیریب ویرانغه بؤلمس کیمسه طوفان دین خلاص.

یاغسه معجون کؤنگلوم اوزره شوخلر دردی نې تانګ،
تېلبه، اطفال ایچره بؤلمس سنگباران دین خلاص.

ایسته مس بیر- بیرنی سېنسیز جان و تن، تېنگری اوچون
کیم انی موندین خلاص اېتگیل، مونی آن دین خلاص.

هجر اویى ایچره قېلمیش یار هجریدین کۋنگول،
وه، قچان بۇلغەی بیزینگ توتقون بو زنداندىن خلاص.

جام دوریدین خلاص اۇلماقنى زنهار ایسته مه،
ای که، بۇلماق ایسته دینگ اندوه دوراندىن خلاص.

بند زلفونگدىن نوایینی خلاص اپتکیل دېسم،
دېر که، بۇلمس، بۇلمه غونچه حکم سلطاندىن، خلاص.

۲۷۴

باده مېنى ایله دی زهد و ریادین خلاص،
زهد و ریا یۇق که، مینگ رنج و عنادین خلاص.

اۋزلوگومه اۋت سالیب بېردى منگه عشق دهی
زهد و ورعدین فراغ، درد و بلادین خلاص.

جاننى خلاص ایله دی جام فنا زهددین،
یارب، انى ایله مه جام فنادین خلاص.

یار ایله اغیاردین بیر نفس ایریلمه سون،
کیم که تیلر بۇلمه غای ناز و جفادین خلاص.

کۋنگلومه یاغدوردی اۋق چرخ فراقینگ تونى،
ممکن اېمس بۇلماغى مونچه یرادین خلاص.

حسنونگ که تا کیم نظر بۇلغوسی نظاره گر
بۇلمه غونگ ایلب جفا اهل وفادین خلاص.

اۋزنى نوایی خلاص ایسته‌مس اۋز یاریدین،
یارب، انی قیلمه اول ماه لقادین خلاص.

۲۷۵

ای، سېنینگ خنجر هجرینگ یاره‌سی جانیمه خاص،
هر جنون تاشی که آتسنگ تنِ عریانیمه خاص.

شاه قصریده تیلنگ عیش و طرب خاصلرین،
کیم ابرور خیلِ بلا کلبه ویرانیمه خاص.

اویقو خاص اۋلدی مېنینگ بختِ گرانِ خوابیمغه،
اویقوسیزلیق نېچه کیم دیدۀ گریانیمه خاص.

تارتماق ظلم و ستم جانیمه خاص اۋلغان دېک،
قیلماق اول ایگینی حق ایله‌دی جانانیمه خاص.

ای اجل، هجر تونی جانیمه قصد ایله‌مه کۋپ،
کیم هلاک اېتمک ابرور محنتِ هجرانیمه خاص.

خوبلر نازیدین اۋلمیش متنفر کۋنگلوم،
نېگه کیم، بۋلدی بو آیین کۋنگول آغانیمه خاص.

ایسته‌مه باغده بلبل اونیدین عشق اثری،
ای نوایی، کیم ابرور بو صفت افغانیمه خاص.

«ض» حرفی نینگ ضیمران بویلری نینگ ضیاسی «غرایب» دین

۲۷۶

بیراو که امر خلافیدین ایله گهی اعراض،
اگر اولوس شهی دور یوق انینگ کبی مرتاض.

ریا و عجب و حسد دفعین ایت فنا بیله کیم،
کپتر بو دارو ایله مونچه مختلف امراض.

عملغه باقمه که بی بهر فضل اپرور یکسان،
فضیل برمکی اولسون و گر فضیل عیاض.

زمانه اهلینی بو کارگاه ارا بیلگیل،
ظروف کیم توله دور انده مختلف اغراض.

هلاک نفس ولی نطقی بیل که، رشته کفر
کپسر ایشیگه علی ذوالفقاری دور مقراض.

زمانه مشکونگ که کافور قتی، کوز آچقیل،
که چون کوز آلیده دور بولمس ایله مک اغماض.

سواد جلینی یوب، وقت اپرور که اوغانسنگ،
که عمر شامیغه صبح اجل کپتوردی بیاض.

فقیر یاشورون آهیغه باقمه کیم، اؤرت
جهاننی گرچه اپرور بو چاقین ایشی ایماض.

بؤلور اولوک که نوایی حدیثی جان بېرسه،
نېدین که فیض اېشیگین باغله میدورور فیاض.

۲۷۷

ایچیپ اول شوخ گلگون قیلدی لعل ناب ایله عارض،
مېن محزون نېچوک کیم دمبدم خوناب ایله عارض.

مگر سیماب اشکیم قیلغه لی شنگرف گون اول شوخ
قیلور شنگرفدین گلگونه یوب سیماب ایله عارض.

هم اول کون مهر اقبالیمنی شام غم نهان قیلدی،
کیم اول گل قیلدی پنهان سنبل سېراب ایله عارض.

قویاش نینگ پرتوی بیرله اگر اول یوزنی تېنگ توتسه،
اېرور انداق که تېنگ توتقی قویاش مهتاب ایله عارض.

مگر زنجیر زلفونگ شامیده ماتم نصیبیم دور،
که هر ساعت خراش ایلر مېن اول قلاب ایله عارض.

قاشی بیرله اشارت سجده گه ایلر خوش اول دولت
که، ایلر سجده روشن قیلسم اول محراب ایله عارض.

دېمه قیش ساووغ، آھیمدین دورور کیم، چېکتی اول چابک
قاشی اوستیده کیش بورکین یاپیب سنجاب ایله عارض.

طلب یولینده یوز قوی هر اېشیک توفراغیغه، یعنی
بیر اهل دل ایاغیغه یېتور هر باب ایله عارض.

نوايي، عارضی سرغردی غم یېب بېخود اؤلماغدین،
نېچوک سرغرمه‌غای بو نوع خورد و خواب ایله عارض.

۲۷۸

جانغه زلفونگ تابیدین اول لعل خندان دور غرض،
خضرغه ظلمت تیلردین آب حیوان دور غرض.

شوق اؤتیغه اورمه‌سم سو کویلدور کؤنگلومنی پاک،
ایسته‌گندین اؤق‌لرینگ کؤنگلومگه پیکان دور غرض.

نېوچون، ای هجران، عذاب ایلرسېن آئسین جانیمه،
ایسته‌گیل کیم، تاپشوره‌ی گر خود سنگه جان دور غرض.

یوز توگان قؤیدوم اېمس قانع کېتینگ جان و کؤنگول،
گؤییا اول بېوفاغه داغ هجران دور غرض.

آل اېتر بؤلسنگ کفینگنی دهشت اېتمه، تیغ سور،
مېن بېلمېن گر سنگه بو بیر آوچ قان دور غرض.

عالم و آدم فدانگ اؤلسون که بارسېن، ای حبیب،
سېن غرض انساندین ار عالمدین انسان دور غرض.

ای نوايي، واقف اؤل حالینگه کیم یار آلیده
بس فراوان دور غرضگو اسرو پړان دور غرض.

۲۷۹

ای صبا، جانیم هلاکین ایله جانانیمغه عرض،
یؤق که جسم ناتوان احوالین ایت جانیمغه عرض.

آه دودین، اشک قانین، ناله مدّین ایله گیل
زلفی سنبل، یوزی گل، سرو خرامانیمغه عرض.

کفر زلفی، دین و ایمانیمنی برباد ایله بان،
قیلغهنین جان قصدی ایتکیل نامسلمانیمغه عرض.

وعدّه وصلیغه ییتمه ی اولگنیمنی، ای رفیق،
قیلغهنین هر یپرده کؤرسنگ عهدی یالغانیمغه عرض.

عاشق اولتورمک که چیقمیش مست، وه، عشقیم سوزین،
ای رقیب، ایتسنگ نی اول بی باک نادانیمغه عرض.

وصل شوقی غالب و مین گنگمین کیم، ایله مک
حاجت ابرمس کاشف اسرار پنهانیمغه عرض.

ای نوایی، هجر زندانیده جانینگ خوفی بار،
قیلغهنین تاپسنگ محل، البته سلطانیمغه عرض.

«ط» حرفی نینگ طنازلری نینگ طراوتی «غرایب» دین

۲۸۰

نفس قطاع الطریق منزلی دور بو رباط،
نقد دین حفظیغه قیل اؤتگونچه اندین احتیاط.

منزل اپتسنگ بو رباط ایچره اقامت قیلمه کیم،
هر کون اؤزگه کاروان آرامگاهی دور رباط.

نی تۆشرسېن تختِ جاهینگ فرشین آلتون خشت ایله،
کیم سېنینگ دېک شاهنی کۆپ اۆتکریپتور بو بساط.

طوقِ لعنت دېسەلر بۆیۈنۈندە تسبیحین نی تانگ،
مکر و حیلت بیرلە شیخ اېل بیرلە قیلسە اختلاط.

شیخ جاهل بۆلماق اؤز اسراری بیرلە منبسط،
غفلت اهلی بنگ ایله قیلغان کېی دور انبساط.

زرق جامی بیرلە وجد اپتگن ابرور اول طفل کیم،
می دېبان رنگین سونی قیلغەی ایچیب عمداً نشاط.

فقر کویی ایتلریدین کیم که کم کۆردی اؤزین،
تاپسنگ آنی، ایتلری سلکیده تاپقیل انخراط.

وصلغە یؤل هجردین فقر اؤلدی کۆرگیل طرفه کیم،
بیردین اوچماغ دور خجل، بیردین تموغ، بیردین صراط.

ای نوایی، عشق ارا بی ربط اگر سورسم حدیث،
انده مضمون بیل غرض مقصود کۆرمه ارتباط.

۲۸۱

یوزده خالینگ دور مو یا تحریر اپتر حالتده خط،
تامدی قدرت کلکیدین کون صفحه سیغه بیر نقط.

سبزه خطينگ كؤزومنى ياروتور باققن سايى،
كؤپ نظر قيلسه، اگرچه تيره ايلر كؤزنى خط.

آينى رخسارينگ دېديم گؤيا قرانغو اپردى تون،
كيم منگه اسرو ييراقتين واقع اولميش بو غلط.

جان اراسيغه كيرر هر دم خرامان قامتينگ،
گرچه ساكن دور الف كيم، جانغه بولميش دور وسط.

تورك انجم شام هجرىمنى ياروتمىس، گؤيا
ناوك آهيمندين اولميش توسن گردون سقط.

مسكنينگ مى اؤتيدىن، اى مغ، ابرور آتشكده،
انده بير اؤتلوغ سمندر مى توله هر سارى بط.

زاهد اؤلدوم دېب، نوايى عشقنى ترك اپتمه كيم،
بؤلمه سه اول شور توزسيز لقمه دور زهدى فقط.

۲۸۲

قيلسه بؤلمس آه و افغاندين مېن شيدانى ضبط،
اؤيله كيم جور و جفادين اول بت ترسانى ضبط.

هر دم اهل قانين توكر اوسروك چيقيب بېداد اپتيب،
كيم دورور كيم، قيلغه اول شوخ قدح پيمانى ضبط.

شوخليكدىن ظلم قيلماققه ابرور بې اختيار،

ممکن اېرمس قيلماق اول حور ملک سيمانی ضبط.

زلفی زنجيریغه اهل عشق کؤنگلین تارتیان،
یخشی قیلدی بیر سورورک دېوانه رسوانی ضبط.

تېلبه کؤنگلوم دشتنی قیلسه مساحت عیبی یؤق،
عامل ار مجنون دورور قیلغهی مگر صحرانی ضبط.

غنچهلر آچیلسه، اؤلگنلر تیریلسه نې عجب،
ایلهی آلمس کولگودین چون لعل روح افزانی ضبط.

ضبط ایلهی آلمس اهل عشق کؤنگلی کشورین
خسروې کیم ایلهی آلهی سر به سر دنیانی ضبط.

اشک موجین منع اېترسیز مېنده هم یؤق اختیار
کیم، قیلیپتور خاصه چیققلغان زمان دریانی ضبط.

دور اېلی ظلمین خیال اېتمک بیله بؤلدوم هلاک،
تیندی اول کیم، قیلدی بیر وسواس ایله سودانی ضبط.

دیر پیری بندهسی دورمین که نافذ حکم ایله
ایلهمیش یوز مینگ جهود و گبر ایله ترسانی ضبط.

ای نوایی، سېن دغی دېوانه سېن، کؤنگلونگ دغی،
گر سېنی ضبط اېتسهلر کیم ایلهی آلهی آنی ضبط.

۲۸۳

رخسار ايله لېنگدین اېتر كۆنگلوم انبساط،
كیم گل چاغیده باده اېرور موجب نشاط.

ای آی، سپهر عرصه سیده اؤزنی ساتمه كۆپ،
شاهیم رخین اونوتمه كه، خالی اېمس بساط.

قیلمنگ نظاره آغزیغه كۆپ كیم، تاپیلمه غای
خورشید ایچینده ذره نی كۆپ ایلب احتیاط.

اول شوخ نېچه غیر بیله بؤلسه مختلط،
مېن غیرى بیرله ممكن اېمس قیلماق اختلاط.

شهر، دېمان كه، قوللوغومه بؤلدى منخرط،
گر قوللرینگ نینگ اؤرته سیده تاپسم انخرط.

قؤیمه كۆنگولنی دهر نینگ اېسكى رباطیغه،
سایرغه چون محل اقامت اېمس رباط.

آشفته بؤلسه نظم نواییغه، ای پری،
دېوانه لر سؤزیده طمع قیلمه ارتباط.

«ظ» حرفی نینگ ظریفلىرى نینگ ظهورى «غرایب» دین.

۲۸۴

طریق عشق دین بؤلمیش منگه بلا ملحوظ،
نېچوك كه فقر تیلردین اېرور فنا ملحوظ.

اگرچه دردسيز اؤلمس دوا ولېک مېنينگ
بو درد ايسته گنيمدين اېمس دوا ملحوظ.

اياقچه کيرسه نې بوشقى بلا مغيلانى،
گر اؤلسه باديه دين کعبه صفا ملحوظ.

اېرور ملاحظه م اول آي رضاسى عشق ايچره،
اگرچه اېلگه وصال اؤلدى عشق ارا ملحوظ.

فريب بيرمه منگه انتهادين، اي زاهد،
که باردور اهل حقيقتقه ابتدا ملحوظ.

نيازينگ اؤلسه يېتر دير پيريدين قدحې،
يؤق اېرسه بزميده اېرمس شه و گدا ملحوظ.

مى ايچ که، خلق گناهين يوماقچه ابر کرم،
ياغر محلده اېمس رند و پارسا ملحوظ.

عجب که، فيض چراغى ايشيگه سالغهي نور،
بيراو که بؤلغهي انينگ زهديدن ريا ملحوظ.

نوايي، اېمدى قدح شمعيني ياروتقىل کيم،
ياروغلوغ اؤلمه دي تقوا بيله منگا ملحوظ.

۲۸۵

رشته دقت دور کلامينگده دُر شهوار لفظ،
رشته غه درلر چېکرسېن چون تاير تکرار لفظ.

لعلِ جانبخشينگ ابرور گؤيا كه روح الله كيم،
ساجيلور جان هر طرف قيلغان سايي اظهار لفظ.

گؤيا حيوان سويدين قطره سېكير هر ساري،
چون تكلم وقتي لعلينگدين چيقر دُر بار لفظ.

گر اولوگني تيرگوزور، وه كيم، تيريگني اولتورور
لعليدين قيلغچ عيان اول شوخ شيرينكار لفظ.

دېمه لفظين كيم تيلي ابرورولمه گاندين دور سينوق،
كيم تاير تار آغزيدين چيققونجه كوپ آزار لفظ.

سر عشقيمني تيلرمېن شرح قيلمه ي انگله سنگ،
كيم اېمس عشق آيتيغه محرم اسرار لفظ.

اي نوايي، چون گهر بي قدر ابرور شاه آليده،
ني عجب گر بولسه نظمينگدين قاشيده خوار لفظ.

۲۸۶

مسيح آيين اگر منبرده ظاهر قيلسه دم واعظ،
نبي اورنيغه اورماق بېحيالغ دور قدم واعظ.

انينگ بو جراتيغه بولمه غان بولسه جنون باعث،
نېدين ساليب اياغ ايلگين چېكر اون دمبدم واعظ.

اياغ منبرغه قاقيب ايله مك دستارين آشفته،

نېدور گر زرق محض اېرمس دورور سر تا قدم واعظ.

اگر جام غرور ايچمک که مجلس توتمه مېش، نېوچون
نظايرخوان ايله اوز لحنين ايلر زير و بم واعظ.

ملاده قيچقيريب مي منعين اېلگه ايله مک نې سود،
اېرور چون خلوت ايچره مي ايچرگه متهم واعظ.

کرم ترغيبي ايلر مجلس اهليغه فغان ايلب
ربا وجهيني اېلدين آلمه سه، ايلر کرم واعظ.

مگر کيم آسمان نينگ زينه سي بولدي انگه منبر،
که انده چيققن اوز غيري گمان ايلر عدم واعظ.

قدح آل دير پيريدين که، بو دير فنا ايچره
قيلورلر زرق يخشي انگله سنگ هم شيخ و هم واعظ.

نوايي تانگ اېمس بو وعظدين ميخانه غه بارسه،
که شاد اېتکه ي اوزين کيم، کوپ انگه يېتکوردی غم واعظ.

۲۸۷

بو نغمه اېردی مو يوق اېرسه آفت، اي حافظ،
که بزم اهليگه سالدینگ قيامت، اي حافظ.

اولوستين آلدی اونونگ هوش، سپن سلامت بؤل،
گر ايتتی اېلگه طريق سلامت، اي حافظ.

نېچه که نغمه ننگ ابرور مستقیم و لحنینگ توز،
ولېک اېلدين آلور استقامت، ای حافظ.

نې هوش ملکیده تاپقی اقامت اول که دمې،
اؤقورده تاپسه یانینگده اقامت، ای حافظ.

مگر مسیح ایله داودسېن نفس بيله کیم،
حیات و موت ابرور اول علامت، ای حافظ.

قیلیب تلاوت اسلام اېلیکه قصد اېتمه،
که تېنگری آلیده تاپقونگ ندامت، ای حافظ.

مگر که حافظ شیراز سېن که، بیر ساغر
توتوب نواییغه قیلدینگ کرامت، ای حافظ.

«ع» حرفی نینگ عیارلری نینگ علامتی «غریب» دین

۲۸۸

ایسته سنگ کیم اورغه سېن دورانغه تیغ انقطاع،
اول وداع اېتکونچه سېن قیلغیل بورونراغ الوداع.

جان بېریب شیرین و مهلک جاه اوچون ایلگینگده تیغ،
نزع وقتی شربت مرگ ایستب ایله یسېن نزاع.

اسره دینگ کتان کفن قیلماق اوچون، نې سود کیم
حشر بازاریده بې قیمت دورور مونداق متاع.

مسكنىنگ آخر چو توفراغ دور، نې اۋتكرمك دورور
مدفنىنگ ايوانىغە كۆك گنبدىدىن ارتفاع.

صندل آيين ابو يسب، اېلدىن كۆررسېن سرزنش،
كىم بو يىنگلىغ كۆردى صندلى كە، يېتكورگەى صداغ.

يېر اۋپرېن رزق اوچون منت يوكىدىن خم بۇلوب،
تېنگرى يارىنگ كىم، قىلىب سېن خوش نمازې اختراع.

دُر قولاغىندە ماموقدىن بىر چىگىت دور، اېل سۆزىن
بو ماموق بىرلە چىگىتدىن ايلەمسىن استماع.

بېشە شېرىن گر زبون قىلسنگ شجاعتدىن اېمس،
نفس ايتىن قىلسنگ زبون عالمده يۇق سېندىن شجاع.

اي نوايى، تېنگرى اسراريغە تىل محرم اېمس،
چاك كۆنگلونگ ايچرە توت كىم «جاوَزَ الاثْنَيْنِ شاع».

۲۸۹

جسمى وصلين قىلدىم اول زلفِ سمنسادين طمع،
اول كيشى يىنگلىغ كە قىلغەى سيم سودادين طمع.

لعلدىن تىرگوزمك اېتسم آرزو عيب اېتمىگىز،
كىم كيشى اۋلتورمك اېتمەيدور مسيحادين طمع.

ذرّەنى خورشيدچە روشن طمع قىلغانچە بار،
ذرّەچە مهر اېتمك اول خورشيد سيمادين طمع.

نې عجب قىلىسم طمع آواره كۈنگلومدىن جنون،
قىلىسه اۋلىمس عقل خود مجنون شىدادىن طمع.

داغ اېتىب كۈنگلوم توقع قىلدى صبرىم نقىدىن،
اهل ظلم انداق كه قىلغەي نقد تمغادىن طمع.

گلخنىدىن گلخن آلاتىن طمع قىلماقدورور،
هر كىشى دىئالىك اېتسه اهل دىئادىن طمع.

سرو و گلدىن كۆپ دېمىگ سۆز كىم، نوایى آيله مىش،
برگ گلدىن خلعت اېتگن سرو آزاددىن طمع.

www.ezgu.org

کۆزومنى تاكه قىلميش اول سعادىت اخترى مطلع،
قراغ اهرمس كه، شىگون حله دىن قىلدىم انگه برقع.

لىنىگ هجرىنده قان ياشىم كېلور بغيرىم شكافىدىن،
عجب اهرمس بو يىنگلىغ سوغه بۆلسه اول صفت منبع.

قىلورلر قصد جانىم كېلتورۇپ بىر- بىرگه باش، گۇيا
بو كىم پىكانلرىنگ كۆنگلوم حرىمىن قىلدىلر مجمع.

بو نې راكب دور و مركب كه، جولان وقتى باردورلر
قوياشدىن پايله ده اعلى، فلكدىن پويه ده اسرع.

توشر كۆنگلومگه اول يوز پرتوى كۆكسوم شكافىدىن،
بو روزنى نې بۆلغەي قىلسىنگ، اى تيغ قضا، اوسع.

نې تانگ هر كون اگر بر بېرسه يوز آفت كه انجمدىن
ساجىپتور يوز مخالف خاصيتلىغ تخم بو مزرع.

نوايى واقف اول گردون عروسىدىن كه قصدىنگغه
آچر كه شامدىن گېسو، كىير كه صبحدىن مقنع.

اوچوق اهرمس كه چون بۆلدى سهيل عارضىنگ طالع،
عقيقىنگ رنگ آلورده بۆلدى خالىنگ سايه سى مانع.

گلستان دېمه كىم، چهرهنگ آچرده صنع نقاشى

قىلورغە امتحان اول رنكلرنى ايلهدى ضايغ.

چو هر يان تيغ سالدینگ اول حسددین ييغلهديم، لېكن
نېتاي كيم برق اۋتيغە بۆلمەدى يامغور سويى دافع.

كۈنگول قسديغە يالغوز تيرباران قيلمەدى غمزەنگ،
بالا و فتنە خيلى كېلگەلى هم ايلهدى شارع.

هلا كيم قسدى واقع بۆلمەدى اول غمزەدين، لېكن
لېيىنگدين اېلنى تيرگوزمك مېنى اۋلتوردى فى الواقع.

چو تيغينگ كيردى جانيمغە فرح بۆلدى منگە افزون،
نېچوك كيم ميگە سو ممزوج اۋلور كۆپرەك بۆلور نافع.

لېيىنگە جان بۆلور مايلى، تنيم خاك رهينگ بۆلسە،
عجب اېرمس بۆلور چون برچە اشيا اصليغە راجع.

نېچوك زنار باغلب باده ايچمى، اى مسلمانلر،
كە پير دير هر ايش كيم قىلور بارمېن انگە تابع.

نوايى فقر كويىدە تعلق كفر محض اېرميش،
بیر الله دۋست دين نې كيم، نصيبينگ بۆلسە، بۆل قانع.

۲۹۲

داغ اوزە داغدين آواره كۈنگول دور ضايغ،
نې قراكونلر انگە واقع اېرور فى الواقع.

تير بارانِ غمینگ قیلدی زره جسمیمنی،
گر زره بو اېسه کۆپ بؤلغوسی اؤقدین مانع.

هجر اؤتی دودی کؤزومدین نې عجب تۆکسه سرشک،
چونکه تون خیلغیه انجم سپهی دور تابع.

لعلی شوقیده سریغ یوزنی یاشوردی قان یاش،
گرچه صفراغه چوچوک شربت اېمستور دافع.

اؤرته نور عشقیده پروانه، چبکر اون بلبل،
اول گل شمع جبین عشقیده مېندین جامع.

اېل نصیبی چو ازل قسمتیده تاپتی رقم،
سېن که سعی آرتوق اېترسېن نېچوک اؤلغهی نافع.

اول قویاش هر کیشیگه طالع اېرور، وه نېتهیین،
کیم نواییغه بو نوع اؤلمه دی بیر کون طالع.

۲۹۳

وصل شامی خلوتیده یاقسه لر ناگاه شمع،
رشکدین جانیمنی گاهی سایه اؤرت، گاه شمع.

روشن اېتسه اوینی دلخواهیم، یاروتمنگ شمع کیم،
شمع بزمیم بؤلدی چون دلخواه، اېمس، دلخواه شمع.

اورمه سین کۆپ لاف کویمکدین که، هجران تونلری
توزمس اېردی آلیده تارته ی دېسم بیر آه شمع.

رشته جانى كوير اشكى آقېب، جسمى اپرىب،
تېرە شامىم ظلمىدىن بۆلمىش مگر آگاه شمع.

آھىم انداق تېرە قىلدى كۆكنى كىم تاپمس اوزىن،
گر قوياشدىن ياقمەسە عىساي روح الله شمع.

تاپسە حرمان ظلمتى ايچرە نې تانگ حيوان سويى،
كىمگە كىم بۆلسە ھدايت نوريدين ھمراھ شمع.

ھجر ارا ايستر جمالينگ ھم نوايى، ھم كۆنگول،
كىم تىلرلر تېرە تونلردە گدا و شاھ شمع.

۲۹۴

يوزىگە كۆزگونى ھر دم قىلور اول سىمىر مانع،
انىنگ دېك كىم قوياش رخساريغە بۆلغەي قمر مانع.

جھاننى اول قوياش نىنگ برق حسنى اورتەگەي اپردى،
كرانسيز بحر اشكىم بۆلمەسە اپردى اگر مانع.

قوروق جسمىمنى غم تيغيدىن اسرر درد ايله شوقونگ
يىغاچقە كېسمگيدىن اؤيله كىم بۆلغەي ثمر مانع.

قبول اېتمان قنات اپگنيم اوزە چىقسە آغير دېب كىم،
يۇلونگدە برق دېك پويەمغە بۆلغەي بال و پر مانع.

كۆزوم اوزرە حباب اشك اول يوز مانعى اپرمىس،

بعينه شيشه دېك كيم بولمس ايلرگه نظر مانع.

دېمه زاهد كه، تقواغه نې مانع دور كه، باردورلر
شباب و باده و عشق و جنونوم سر به سر مانع.

آغيز بيرله قد و قاش و كوزونگ زهدومغه قويمسلر،
نېچوك قيلغه كيشي بير ايش كه، بولغه بو قدر مانع.

كؤنگول بيت الحرامى طوفيعه مانع خواطر دور،
سفرغه كعبه سارى اويله كيم بولغه خطر مانع.

نوايي جانيعه تن گردې ابرميش مانع مقصود،
نسيم وصل ايسكچ فيض باغيدين كېتر مانع.

«غ» حرفى نينگ غزاله لرى نينگ غوغاسى «عرايب» دين

۲۹۵

مهرسيزليكدن فلک اېل قتلين ايلر بېدریغ،
يؤقسه نېوچون دفن اېتر هر کون قوياشتین بېرگه تیغ.

تیغ ظلمی زخمیدین هر شام انداق کیم شفق
قان و توفراغ ایچره دور خورشید عارضلر دریغ.

کون اېمس، عالم کؤزیگه منتشر ایلر بیاض،
تون اېمس، بلکیم چېکر خورشید رخسایغه میغ.

کیمگه کیم، دولاب چرخى دېک سالور سرگشته لیک،

بۇغزىن ايپ بىرلە بۇغر قىلغان سايى فرياد و چىغ.

نېچە كىم يىغسە اۋزىن، شەلر باشى اوزره چېكر
چتردېك كىمنى سرافراز ايله مكلىك قىلسە يىغ.

گۇيا آنى سبب قىلدى مسبب نې اوچون،
كىم انگە بو قىلماغيدىن نې زيان دور، نې آسىغ.

اي نوايى، بىل نې كىم بۇلغاننى حق تقدىريدىن،
موندىن اۋزگە امردين كۈنگۈلنى اۋز، ايلگىنگى يىغ.

۲۹۶

ضعيف تنده غمىنگىدىن يوز اېسكى بۇلغان داغ،
هر اېسكى داغ بو شاخ اوزره بىر قوروق يىغراغ.

يوزونگگە حسن فزون بۇلدى نىل زىنتىدىن،
مگر كه يارودى گوگرد اۋتيدىن بو چراغ.

قدىنگ چو ايله دى گل گشت، سرو و گل دېمە كىم،
بۇيلدى قانغە الفلر كېسىب غمىنگىدىن باغ.

ساچى اسيرىمېن اۋپمەى ھنوز خالين، وه،
كه دانه غە آغيز اورمەى نصيبىم اۋلدى توزاغ.

علاج سلسلە زلفى دور جنونومغە،
اگرچه مشك ايسيدىن اېمگە نور ضعيف دماغ.

چو بۆلسه غير هجومى وصال ممكن اېمس،
شهود اۆلور مو خواطردين اۆلمه غونچه فراغ.

اگر نوايى ايكي نرگيسينگ خيالى بيله
مريض و مست جهاندين اوتر، سېن اۆلغيل ساغ.

۲۹۷

ساقيا، هجر ايلگيدين كۆپ قارته دورمېن زارليغ،
مى كېتور كيم، مصلحت اېرمىس منگه هوشيارليغ.

قصديم اېتميش هجر و بېخودلوع علاجيم دور دمې،
ميغه افيون يار قيل گر ايلر اېرسنگ يارليغ.

مست قيل انداق كه، باش قويسم مگر بۆلغهي منگه
محشر اهلى يارب و غوغاسيدين بېدارليغ.

چارهسى يا باده دور، يا وصل، يا مرگ، اي طبيب،
هر كيشى كيم تاپسه هجران درديدن بېمارليغ.

بر يېگيل، يارب، حياتينگ باغيدين، اي مغبچه،
كيم مي لعلينگدين اۆلدى بيزگه برخوردارليغ.

زهد، اي ساقى، بلا اېرمىش، خوش اول ميخانه كيم،
ايچكهلى جام بلا بۆلميش ايشى خمارليغ.

اي نوايى، زهددين يوز قتله آرتوق در به در
ببر سفال ايلگيمده مغ كوييده قيلسم زارليغ.

اول سمىبر قدى نىنگ سروىغه كۈنگلوم بۇلدى باغ،
آتشىن گللىر انگه هر يىنگى قانلىغ تازە داغ.

ھىجرارا اول شوخ كۈنگلوم صىد اېتر رخسار آچىب،
طفل آقشام قوش توترغه روشن اېتكىن دېك چراغ.

موجبى كۈپ يىغلهماق اېرمىش نظر پاك اۋلماغى،
اۋيله كىم ايلر سويىن افزون آرىتماغدىن بولاغ.

اى حكيم، آغىل صراحى لولەسىدىن پخته كىم،
سود اېرور قانين نېچە دفع اېتسە محروور دماغ.

غنىچەدىن تا چىقدى گل، مست اۋلدى بلبل، ساقيا،
مى صراحىدىن كە چىقمىس دھردىن تاپمان فراغ.

خطّ و خالى نقطەسى يوز چاكلىك كۈنگلومدە دور،
بىر قفسدە طرفە دور، وە-وہ كۈرورنگ طوطى و زاغ.

نېچە رنگىن اشك تۈكسىم كۈزدە اول گل نقشى دور،
لالەدىن اۋزگە نې گل بېرگەى سويى قان بۇلسە باغ.

ياغمە غونچە اشك دفع اۋلمىس كۈنگولدىن تىرەلىك،
بو ياغىنى گۈيا دېپتور قضا اول اۋتقە ياغ.

فقر يۈلىدىن نوياى ايله گىل باشتىن قدم،

كىم بو يۇل قىطعىدە باش قۇيماقدورور قۇيماق اياق.

۲۹۹

اۋرتنورمىن كېچەلر ھىجرىنگدە انداق كىم چراغ
روشن آيلە رشتە جىسمىم دور، كۈنگۈل اۋت، اشك ياغ.

سرو و سنبىل لالەدېك قد، زلف و يوزونگ ھىجرىدىن،
ھىم الف، ھىم نعل كېستىم كويىدوروب يوز يېردە داغ.

بىر كۈزۈمگە سرو اۋق دور، بىر كۈزۈمگە گل تىكن،
سېنسيزىن، اى سرو گلرخ، ناگە اپتسىم گشت باغ.

جانىم ايچرە اۋت دورور بىر لعل مىگون ھىجرىدىن،
ساقيا، نوبت منگە يېتكىچ لبالب توت اياغ.

ساغ بۇل، دېوانە اپتسىنگ مېنى بىر مى بىرلە كىم،
ھىجردىن دېوانەمېن بۇلدوم اپسە بىر لحظە ساغ.

اىستىرەم آغزىن قىلىب لعل و خط و خالىنى وصف،
خلق غايىدىن نشانلر ايتىب اپتكىن دېك سۇراغ.

اول فراغ و بول تردد ايتتى مقصود اۋرتەدە،
گم بۇلوب مقصود، اۋتتى ھىم تردد، ھىم فراغ.

روزگارى تيرە، نطقى لال بىلبىلر مگر،
كىم خزان فصليدە ايلرلر تصور آنى زاغ.

تېلە دېب قىلمە نوایی نینگىلاجى، اى حكيم،
كىم مشوش دور انكه بير اؤزكه سودادين دماغ.

۳۰۰

گرچه مېن هجرينگدين اولدوم تارتتيان كۆپ زارليغ،
سېن حياتينگدين تاپ، اى بدمهر، برخوردارليغ.

خسته ابرديم كؤزيدىن يېتكوردى لعلين آغزيمه،
تېنگرى جان بېردى، ولې چېكيتيم سېي بېمارليغ.

كېچەيى كيم توشكه كيرگه اى اول سعادت اخترى،
بېرمه گيل يارب، منكه اول اويقودىن بېدارليغ.

بادە لعلينگ بيله مونداق كه اوسروكمېن مدام،
كافر عشق اؤلغه مېن، گر ايسته سم هوشيارليغ.

بو كؤنگول آزاريدىن بېزارمېن بار مدتي
بؤلغه لى بيزلرارا آزارليغ، بېزارليغ.

نې بنا اپركين بو كيم، بير پاره قاشى توشمه دى،
قىلغه لى بو طاقنى صنع ايلگى ميناكارليغ.

اى نوایی، صحبتينگدين قىلسه عار اول كؤركه باى،
يؤق عجب نېوچون كه سېنسېن بير گدا، اول بارليغ.

۳۰۱

نېچە، ای آرام جان، هجرینگده بې آراملیغ،
دۈستلۇغ كۈرگۈزكە، حددين آشتى دشمن كامليغ.

شكر شمعين ياقمه ديم وصلينگده، يېتتى داغ هجر،
بىزنى بو اۋتلرغه كويدورگن ابرور اول خامليغ.

اېرمس اۋتلۇغ كۈنگلوم آغزىنگ نقشى دور كۈكسوم ارا،
قطرە قان آتشرين گل غنچەسى اندامليغ.

دېب اېميشسېن ترك ايتىب عشق و محبت شېوھسېن،
آت چىقرميشسېن صلاح ايچرە، زھي بدناملېغ.

لعليدىن ضعف اېتتى قان بۇلغان كۈنگول، وھ، يادەدين
نفع تاپمس اېرميش اول كيم، قىلسە خون آشاملېغ.

كۈز ياشيمدين نم تاپيبدور، گرچە معمار قضا،
باغله دى كۈك گنبدى طاقىنى استحكامليغ.

زلفيده درد و بلا ايستر نوايى عشقيدين،
اول گدادېك كيم، تيلر اھل كرمدين شاملېغ.

۳۰۲

لالە گون بۇلميش سورردە قتليمة دلدار تيغ،
يا بلا تاغيدىن اېتميش لالەزار اظهار تيغ.

گل تنى يوز چاك اۋلوب بو كيم بۇيلميش قان ارا،
تېگدى غمزەنگ خيليدىن گۇيا انگە بسيار تيغ.

تيغ تارتيب يېتكچ-اوق قىلديم فداىى جاننى كيم،
بۆلمە غاي آزرده قاتل، كۆرمە گەي آزار تيغ.

جسم پىكانىنگ بىلە تۇلدى و جان دور غمده كيم،
ايله سنگ قتلىمغه رغبت بۆلمە غاي ناكار تيغ.

عشق دشتى سبزە سىدىن لاله هر يان ساچيلور،
يعنى اول صحرا گياھى بار اېمىش خونبار تيغ.

عالم اهلى قتلىنى بير دمده قىلسنگ آرزو،
يوزدين آل برقعنى، قىندىن چېكمە گيل زىنھار تيغ.

نظم ملكين تيل چېكيب آلمىش نوايى اؤيله كيم،
چېكسە عالمى آلور شاه فلک مقدار تيغ.

«ف» حرفى نىنگ فتنه لرى نىنگ فسونى «غرايب» دين

۳۰۳

كېچتى عمروم نقدى غفلت بيرلە نادانليغده حيف،
قالغانى صرف اؤلدى اندوه و پشيمانليغده حيف.

جانغه بير دشوارليغ قؤيمە رياضت رنجيدىن،
صرف بؤلدى نقد اوقاتىم تن آسانليغده حيف.

باغله ديم پيمانە دين پيمان، فغان كيم، عقل و دين
بؤلدى بو پيمانە و اول سست پيمانليغده حيف.

ای مسلمانلر، بیلینگ کیم، بۇلدى عمروم حاصلی
نفسِ کافر فتنه سیدین نامسلمانلیغده حیف.

حیف کیم نفع ایله مس هر نېچه کیم تارتیب ایلیک،
دېسم اؤز احوالیمه بو نوع حیرانلیغده حیف.

انداق ایش قیل کیم، پشیمان بۇلمغەیسېن کیم، اېمس
هیچ آسیغ چون ایش خطا بۇلدى پشیمانلیغده حیف.

هر نې اؤتکن سؤزلریم چین دور دېسم یالغان اېرور،
چین بو دور کیم، دېگه مېن عمر اؤتتی یالغانلیغده حیف.

چون یېنگیلرک دور حساب اؤلغانده سلطانلرین گدا،
حیف کیم، بۇلغەی گدا اوقاتی سلطانلیغده حیف.

ای نوایی، واقف اېرمان خلقدین، باری مېنینگ
کېچتی عمروم نقدی غفلت بیرله نادانلیغده حیف.

۳۰۴

زار جسمیمده قیلیچینگ زخمی هر یان مختلف،
هر بیرى دور صرف قدینگ حسرتیدین بیر الف.

تال نهالیده اېمس یفراغ که تیللر تارتیبان،
سرو آزادیم اوچون قوللوققه بۇلمیش معترف.

قاش و کؤزین کؤرگه لی، ای شیخ، بیلدیم، مکرى بار

هر سیه پوشی که محراب ایچره بۇلغەی معتكف.

عنبرین خط بیرله اول یوز بۇلدى عالم آفتی،
عالم آفتسیز اېمس خورشید بۇلغچ منکسف.

ساقیا، اول کۇثر آسا باده دین بیر جرعه توت،
کیم مېن حیرانغه بۇلغەی کشف سړی لَو کُشف.

باده مقصود جامی ذوقیدین طبعیم یوزین،
وه، نېچه دایم خمارِ جهل توتقی منکسف.

جان بېریب آلسنگ، نوایی، باک اېمس اول باده دین،
کیم ابرور یُحیی العظام اوصافی بیرله متصف.

۳۰۵

یاشورون غمزەنگ قیلیچی کیم قیلور کؤکسوم شکاف،
بو که مخفی دور، انکه گؤیا قاشینگ بۇلمیش غلاف.

قاشلرینگ نې صف چېکیب بۇلمیش قراوول کیرپیکینگ،
کیم کۇنگول سلطانی خیلیغه اېمس حاجت مصاف.

مهر انگلب عاشق اۇلدوم سۇنگره یېتسه کوه غم،
نې عجب عشق ابتداسی «عین» ابرور، پایانی «قاف».

قاشی کۇنگلوم اؤغریسی دور راکع اؤلماغلیغ نې سود،
اؤغری باش سالغچ قویی باردور دلیل اعتراف.

عشق ارا مجنوننى دېر بعضى فزون، بعضى مېنى،
لېك حاليم انگلەغان تاپمس محلّ اختلاف.

بۇل صفا اھليغە ھەمد، يار وصيلين ايستەسنگ،
عكسينى سالغەي مو ساقى بۇلمە غونچە بادە صاف.

اي نوایی، گر قیلور کۈنگلونگ حرم طوفینی قصد،
قطع ایتیب دشت فنا مقصد حریمین قیل طواف.

۳۰۶

کۈرگوزور ھجران حروفی نقطه سین جان هر طرف.
سېنسيزين يعنى كه قۇيميش داغ ھجران هر طرف.

اۋيله شدت بيرله چرخ ايلر مېنى سرگشته کيم،
زخمى کۈپ تندين ياغر شودرون کېي قان هر طرف.

کۈنگلوم احوالين ني دېي کيم، شھريغە بير تيل دورور
کۈکره گيمدين باش چيقرغان نوک پيکان هر طرف.

تشله ديم يېتکچ جنون خيلي توگانلر تخته سين،
يعنى آچتيم مهمانلر آليده خوان هر طرف.

عشق قانليغ کۈزنى اېلتور اۋيله کيم، سو لاله ني،
بۇلمە سه يۇلينده مانع خار مژگان هر طرف.

رشکدين کۈپ مضطربراق دور کۈنگول اول گويدين،
کيم کھسيب باشيمنى اول شوخ اورسه چوگان هر طرف.

قۇۋى بىشرنى، گر ملايك دامى اېرمىس يىخشى دور،
اول پرى مونداق كه، زلف اېتميش پريشان هر طرف.

نېتىب اۋلمەي كيم، ينه اول شوخ اوسروك آتلىب،
تېر سويى مركب يېلىدين سالدى طوفان هر طرف.

كۆر، نې حيرت دور منگه كيم، باردورور بو دير ارا
دانشى يوز مېنچەلر، يوز مېنچە حيران هر طرف.

شيشەدېك كۈنگلومنى پيدا اۋرتەدى ساقى ولېك
داغين اېتتى مى حباب آستيدە پنهان هر طرف.

اي نوايى، نوحه هجران توزوب اون چېكمە كۆپ،
كيم كيشى قالمس تيريگ يېتكچ بو افغان هر طرف.

۳۰۷

بادە خوشتور گر حريفيم بۇلسە بير يارِ ظريف،
مى حريفى گر ظريف اېرمىس، انگه اېرمان حريف.

اول صفت ذاتينگ لطافت عيندين جانبخش دور،
كيم همانا آنى مظهر قيلدى اسم اللطيف.

ضعفدين گر دردِ عشقينگدين شكايِت ايله ديم،
عشق شرعى ايچره اېرمىس معتبر قولِ ضعيف.

خاكِ پايينگنى ملايك قيلدیلر تاجِ شرف،

اللّٰه-اللّٰه، كيم كۆرۈپتور بو صفت ذات شريف.

ضعفيم انداق دور كه دم اورسم اپرور بيم هلاك،
نې اوچون كيم اول تحرك دور انگه بېحد عنيف.

دور رنجيدين تيلرمين ميغه توشمك اويله كيم،
ميگه توشكن قيل كېي غرق اؤلسه بو جسم نحيف.

اي نوايي، قيلغه لي طبع اهلي جنس شعر نظم،
نظمينگ اؤلدی برچه سيغه قافيه، بلكيم ردیف.

۳۰۸

بزم ارا گر يوق مي بيله دف،
هم يمان اپرمس اون بيله كف.

ساقی گلرخ، باده كپتور،
كيم منگه حددين آشتي شعف.

دور ايله دير ارا مي چېككه لي،
چېكمك نېچه مسجد ارا صف.

باده غه بېرسم جان نقدي،
بؤلماق اوچون دور نقد تلف.

كېل بېري كيم، يوق سنگه وبال
لېكن اپرور كۆپ بيزگه شرف.

شیخ ریایی فانی ابرمس،
اول طرف اؤلسون، یا بو طرف.

اؤقونگ اوچون خسته نوایی
کؤزی قراسین قیلدی هدف.

«ق» حرفی نینگ قیامتلى نینگ قرانى «غرایب» دین.

۳۰۹

زهې ازلدە كرم ايله بان سنگه خلاق،
كریم خلقت ایچینده مكارم اخلاق.

سپهر گنبدينی روشن اېتكه لی ذاتینگ،
چراغ اؤلوب، انكه قندیل عرصه آفاق.

نجوم کؤزلرینی گرد مرکبینگ یاروتوب،
گهې که سېکریتیان چرخ ساحتیده براق.

رکابینگ اؤپمگی نینگ آرزوسیده آی و کون
بېریب براقینگ اوچون اؤزلیگه شکل چناق.

هلال و مهر و شهاب اؤلدى نعل و داغ و الف،
فلک که بؤلگه لی سېندین نصیب درد فراق.

سپهر هر کېچه یوز مینگ کؤزین نېدین یوممس،
وصالینگه ینه بیر کېچه گر اېمس مشتاق.

مقامىنگ گە يېتەيىن دېب نوايى ايلر سير،
گهې عجم بيله نوروز، گە حجاز و عراق.

۳۱۰

ياردىن ايرو كۈنگول ملكې دورور سلطانى يۇق،
ملك كيم سلطانى يۇق، جسمې دورور كيم جانى يۇق.

جسمدىن جانسىز نې حاصل، اى مسلمانلر كيم، اول
بىر قرا توپراق دېك دور كيم، گل و ريحانى يۇق.

بىر قرا توپرخ كيم، يۇقتور گل و ريحان انگه،
اول قرانغو كېچە دېك كيم، مە تابانى يۇق.

اول قرانغو كېچە كيم يۇقتور مە تابان انگه،
ظلمتي دور كيم، انىنگ سرچشمه حيوانى يۇق.

ظلمتي كيم، چشمه حيوانى آنىنگ بۆلمه غاي
دوزخې دور كيم، يانيدە روضه رضوانى يۇق.

دوزخې كيم روضه رضواندىن اۋلغەى نا اميد،
بىر خمارې دور كه اندە مستليغ امكانى يۇق.

اى نوايى، بار انگه مونداق عقوبتلر كه، بار
هجردين دردى و لېكن وصلدىن درمانى يۇق.

۳۱۱

بۆلمس اېرميش دلربالر عهدى محكم، اى رفيق،
گر كيشى دېر كيم، بۆلور، توتمه مسلم، اى رفيق!

هر پريزادې كه اؤز مجنونىغه قيلميش وفا،
بلكه اندين دور كه، اېرمس نسل آدم، اى رفيق!

ماهوشلر شام زلفى نې اوچون آشفته دور،
توتمه ميش بۆلسه وفا اهليغه ماتم، اى رفيق!

درد مهلك عمرنينگ تعجىلى كۆپ، جانينگ اوچون
كيم مسيحيمنى كېتور باشيمغه بير دم، اى رفيق!

قويدى بير اؤتلوغ فتيله داغ اوچون هر غنچه دين،
چرخ تاگلشنى كوردى سبز و خرم، اى رفيق!

گل اېمس گلبنده قانليغ داغ ابرور كيم، نستر
تېروروك اېلپتور ماموق قويماقغه مرهم، اى رفيق!

بو منقش سقف تاريخى يازيغليق چون اېمس،
كۆپ مشقت چېكيتيم، اما قالدى مبهم، اى رفيق!

مېن خود اېتتيم عزم مغ كوييده رسوا بؤلغه لى،
سؤز اېشيت، البته، مېندين قالمه سېن هم، اى رفيق!

ايچ دغى توتقىل نوايىغه قدح كيم، ارزيمس
بير نفس هوشيار بؤلماغليغقه عالم، اى رفيق!

سنگه ايش جولان قىلىپ ميداندە چوگان اۋىنەماق،
منگە آلىنگدە باشىمنى گۈى اپتىب جان اۋىنەماق.

باش آوۋچىلپ اېگمە قامت بىرلە قالمان رخشىدىن،
تا تىلر چابىك سوارىم كۈنگلى چوگان اۋىنەماق.

كۈز قراسىن اۋىنەتور ھەر لحظە اول مردمنى كۈر،
ھندويى دېك كىم ابرور آيىنى قىلقان اۋىنەماق.

اۋىنەى-اۋىنەى ايلە دىنگ كفر ايلە دىنىمنى بدل،
اللہ-اللہ، بو مو دور، اى نامىلمان، اۋىنەماق.

جور تاشىن اول پرى اۋىنپ آتەى دېر اېل سىرى،
وہ کہ، بو دېوانە غە يېتکچ نې امكان اۋىنەماق.

ھەر سىرى اشكىم يۈگۈرماق نې عجب كىم عىب اېمس،
تىرە اويدىن چىققىچ-اۋق ياشلرگە ھەر يان اۋىنەماق.

چىرخ اۋيون بىرلە آلور دىن نقدىن اېلدىن، واقف اۋل،
بو مشعبد بىرلە بۇلمس اھل عرفان اۋىنەماق.

وعدە كۈپ قىلدىنگ نوايىغە و لېكن اۋىنەبان،
مونچە بۇلغەى اېل بىلە، اى عھدى يالغان، اۋىنەماق.

آہ کیم، غم تیغیدین کۆکسومنى قىلدى چاک عشق،

دودِ آهیمدین کۆزومنی ایله دی نمناک عشق.

درد کیرمک بیرله جان چیقماققه گر یؤل قیلمه دی،
نې اوچون غم تیغیدین کۆکسومنی قیلدی چاک عشق.

اول پری کوییده کیم هر لحظه یوز مینگ باش بارور،
سودره بان ابلتور مېن دېوانه نی بیباک عشق.

کۆزومه هر دم یاروغراق دور یوزونگ نینگ کۆزگوسی،
خاصیت مونداق اېمیش هر کیمده بۆلسه پاک عشق.

عاشق اؤلدی خسته جان کؤرگچ اول آتش یاره نی،
الله-الله، برق ایله اؤینایدورور خاشاک عشق.

عشق وادیسینه کیرگن، یان که اندین هر قویون
کیم چیقیر سرگشته یی دور کیم قیلیدور خاک عشق.

ای نوایی، عاشقی کیم، سېن کبېی ایستر فراغ،
گر ابرور مجنون که، اول قیلیمیدورور ادراک عشق.

۳۱۴

وه، نېچه جسمیمنی غمدین ناتوان اېتکه ی فراق،
ناتوان جسمیمگه هر دم قصدِ جان اېتکه ی فراق.

جسمیم ایلب ناتوان جانیمغه قصد ایلب نهان،
قصد قیلغان جانی رسوای جهان اېتکه ی فراق.

جاننى رسوا ايله گندىن سۋنگ قناعت قىلمەيىن
يوز غم و اندوه خدنگىگە نشان اېتكى فراق.

اېمدى كيم اندوه و محنت اۋقىغە قىلدى نشان،
هر جراحت اوزره يوز داغ نهان اېتكەى فراق.

اى كۈنگۈل، سالمە اۋزونگى درد ايله مردانه بۇل،
بىزنى شايد كيم بو يىنگلىغ امتحان اېتكەى فراق.

وصليدىن دم اورمەيىن قىلساق فراق ايچره بصر،
شايد اۋزىن بىزگە بىر كۈن مهربان اېتكەى فراق.

كويدى جانيم وصليده اېل رشكيدىن تايىتتى هجر،
وصل مونگلوغ جانيمە اۋت سالدى تا نېتكى فراق.

دۋستدين اىستر رضا زنهارةنى كۈرمە كيم،
وصل قىلغەى كامران يا ناتوان اېتكەى فراق.

ايچ، نوايى، مى بغير قانيدېگ و بېخود يىقىل،
نېچە وصل اميدىدىن بغيرىنگى قان اېتكەى فراق.

۳۱۵

قان ياشيم ساريغ يوز اوزره آشكار اېتتى فراق،
زعفرانزارىمنى غمدىن لاله زار اېتتى فراق.

تا فراق اويىگە كىردىم، وه كه، اشكىمدىن اېدى،
گرچه يوز گوهر اياغيمغه نثار اېتتى فراق.

دېمېدم آھىم چېېرگە صبر ايلە طاقتنى عقل
اختيار اېتتى، ولې بې اختيار اېتتى فراق.

جان تالاشور اېلنى مرگ انداق كە ايلر مضطرب
لېلرېنگ ايستر كۈنگۈلنى بېقرار اېتتى فراق.

دېب اېدۈك عشق اندوھيدىن ھر دم افغان قىلغەلى،
وہ كە، بو دعوادە بېزنى شرمسار اېتتى فراق.

كېت فرح كيم غمنى محنت تاشىن اېلې كۈنگۈلمە
يوز تومن مسمار بېرلە استوار اېتتى فراق.

اي نوايى، وصل ارا بۇلغەي كە باقىب كولگەمېن
داغلرنى كيم كۈنگۈلگە يادگار اېتتى فراق.

دېمېنگيز نېتتى فراق آخر كە بۇلدونگ دشمنى،
منع وصل خسرو جم اقتدار اېتتى فراق.

۳۱۶

جنون تاشى خرابات ايچرە ھر دم كۈكسومە اورماق،
اېرور تقوا و دانش بتلرين تاش بېرلە سىندورماق.

قوياش كيم ذرە قۇزغېب كېرسە ويرانىمغە ھجرىنگدە،
كۈزۈمگە كول ساوورماق، بېل انى، كۈنگۈلمگە اۋت اورماق.

چو پېر دېر تقوا خرقةسېن كويدور دېدى گر خود،

انینگ هر تارى دور جان رشتهسى بولمس باقىب تورماق.

لېنىگ هجرينده خاكي تن ارا كؤنگلومنى حبس اېتتيم،
نېچوك كيم جانسيز اېلنى رسم اېرور توفراققه تاپشورماق.

دېمه، اول دلرباغه نې اوچون كؤنگلونگى آلدوردونگ،
اؤز اېركى بېرله نې ممكن كيشى اؤز كؤنگلېن آلدورماق.

اگر آھيمدين ايلب جلوه ياغدوردى جفا تاشين،
نې تانگ گلېن صبا تحريكيدىن گل برگى ياغدورماق.

بنفشه سالخورد اېل دېك كه باش سالدى قوبى، گؤيا
يقين انگلب جزانى عمر انگه دأب اؤلدى قىغورماق.

قدح ايچمك يازوق دېب اسرو مردود اېتمه گيل، اى شېخ،
بو قىسم اېرسه ازلدېن بې جهت تور بېزنى يازغورماق.

قىراغلردىن پولك جان رشته سىدين حلّه وار اېتگيل،
قاشىنگ ياسين نوايى قصديغه گر ايسته سنگ قورماق.

۳۱۷

يار چون ايستر كه، بؤلغه يمېن مدام اندين ييراق،
اول جهتدين برچه وصل ايستر، مېن محزون فراق.

يخشيلرغه بس يماندور حال كيم يار آليده
تېنگ دورور يخشى-يمان، بلكيم يمانراق يخشيراق.

شە يانين فرزين كېيى كچلر مقام اېتميش، نې تانگ،
راسترو لر عرصە دىن گر توتسە لر رۇخ دېك قىراق.

تازە ھر يان داغ اېمس جسمىمدە اول يوز عشقىدىن
كىم، بو كوكبلرغە بۆلمىش اول قوياشدىن احتراق.

بو يىراقلىقدىن يقىندور اۋلگە مېن، وە، يارنىنگ
اىستە بان رايىن بۆلۈپتور مېن يقىنلىقدىن يىراق.

مە جىيىنلردىن سىە دىلىك نې تانگ، آى كىم انىنگ
باطنىن كۆرسنگ قرا دور، گر كۆرۈنور ظاھر آق.

كۆپ حجاز آھنگى توزمە يار ايلە بۆل بىرچە وقت،
اى نوايى، گر عجم بۆلسون مقامىنگ، گر عراق.

۳۱۸

چىقسە جانىم، عىب قىلمە، جسم بېمارىمغە باق،
كويسە جانىم، حىرت اېتمە، نالە زارىمغە باق.

ھجر دشتى نىنگ گلى گر لالە بۆلسە، سىل قان،
قىلمە غىل، اى گل، تعجب چشم خونبارىمغە باق.

اى كە، كۆرمە يسېن قوروق شاخې بېزگن گل بىلە،
ھجر تاشىدىن سراسر جسم افگارىمغە باق.

زلفىن آچتى اول صنم، اى شىخ، باور قىلمە سنگ،
كىم اسير كفر مېن بت بىرلە زئارىمغە باق.

يېرىلە تېنگ قىلدى خاكي تن اويىن اشكىم سويى،
عشق سىليدين يىقىلغان اپسكى دېوارىمغە باق.

قىلمەسنگ توبەمنى سىندورغاننى باور، اى فقيه،
خرقە چاكىمنى كۆر، آشفته دستارىمغە باق.

باش كۆترمەي ميدين اپكتيم جرم تخمى برچە عمر،
اى نوایی، عمر اېتىب ضايىع سىر و كارىمغە باق.

۳۱۹

غمىن كۆپ ايتە آلمسېن نې تانگ كۆنگلوم ھلاک اۋلماق،
ايچىمدە يوز قىليچ، نې عيب كۆكسوم چاك-چاك اۋلماق.

اۋلر دېب شاد اۋلور، كۆپ كۆرسە درديم مدعى بىلىس
كە عشق ايچرە حياتيم باعشى دور دردناك اۋلماق.

اگرچە حسن ايچىندە سېنچە پاك اۋلماق اپس ممکن،
آنى ھم كۆر كە عشق ايچرە بۆلورمو مېنچە پاك اۋلماق.

اگر زھر ايچسم ايلگىنگدين تعجب قىلمە، اى ساقى،
كە بۆلمىش مست و عاشق شېوھسى بې ھم و باک اۋلماق.

چو مېن بير جام اوچون دھقان اسيرىمېن، عجب اېرمس
لباسيم تاک برگى، رشته بېل باغلىرگە تاک اۋلماق.

جهاندين سيلكىنىپ چىققن اپتك تاپىب ياپىشماغلىق

میسر بۇلسە، نې ایش دور طلب یۇلیندە خاک اۇلماق.

نواپی کۆکسیدە عشق اېتمس اۇلسە دفن غم نقدین،
اۋیولوب تازه داغی هر طرف نېدور مغاک اۇلماق.

۳۲۰

دېمنگیز احباب کیم، قیلمس موسېن بس ییغله ماق،
کیم منگه تېنگری نصیب اېتمیش توگنمس ییغله ماق.

اسره ی آلمان اۋزنی، اشکیم توتتی دشت و تاغنی،
نېچه کیم فرهاد و مجنون دېدیله، بس ییغله ماق.

مست و عاشقمېن دغی کۈنگلومده ایریلغان کیشیم،
ای مسلمانلر، نې تانگ مېن زار بې کس ییغله ماق.

تانگ اېمس جسمیم آقیزغونچه کۈزوم گر تۈکتی اشک،
نې عجب ابر بهاری آققوچه خس ییغله ماق.

تیره هجرینگ شامیده گر جان تلشمان تانگنچه،
باشیمه شمع و صراحی نېدورور بس ییغله ماق.

دهر باغیدین وفاسیزلیغ اگر فهم اېتمه دی،
نېگه شبنم اشکیدین فن قیلدی نرگس ییغله ماق.

ای نواپی، طاقینی مېن داغی اشکیمدین ییقی،
چون منگه قسم اېتتی بو چرخ مقوس ییغله ماق.

کیم که، وصلی ایچره یاقسنگ شمع الفت، ای رفیق،
کۆز توت اول شمع اؤتیدین-اؤق داغ فرقت، ای رفیق.

وصل صافی ممکن ابرمس چونکه بی درد و فراق،
زینهار اول باده ساری قیلمه رغبت، ای رفیق.

وصل یوق کیم، عشق لفظین تیلگه مذکور اېتمه گیل،
هر نفس کۆرمه ی دېسنگ یوز نوع شدّت، ای رفیق.

کویمه هر بی مهر اؤتیغه، گر دېسنگ هر دم سپنی
قیلمه غای کول شعله اندوه و غیرت، ای رفیق.

شوخی چابکلر غباری توسنیغه سالمه کۆز،
یوزده ایستر بؤلمه سنگ گردِ مذلت، ای رفیق.

باقمه گل دېک یوز اوزه خوی شبنمین کیم، بوزمه سون
عقل ایله صبرینگ بناسین سیلِ آفت، ای رفیق.

گر سالیب یوز مینگ بلاگه مېن دېک اؤزنی بؤلمه سه
عشقسیز بیر دم سنگه هم صبر و طاقت، ای رفیق.

تا که ممکن دور، کپزب بیر مهربان یار ایسته گیل،
بغری تاشلرنی سپورگه قیلمه جرأت، ای رفیق.

گر نوایی دېک باشینگغه توشسه بیر قاتل غمی،
انده داغی کؤرگه سپن نی بؤلسه قسمت، ای رفیق.

«ک» حرفی نینگ کافرلری نینگ کمالی «غریب» دین

۳۲۲

ای، دېب صفتینگده اهل ادراک،
لَوْلَاکَ لَمَا خَلَقْتُ الْآفَلَاکَ.

افلاک نېچوک که خاک راهینگ
اول یۆلده که، عاجز اولدی ادراک.

دېسم افلاک اېرور طفیلینگ
بس دور گوھیم حدیث «لولاک».

طوبا بیلہ شاخ سدرہ کېلدى،
قدینگ چمنیده ایگی خاشاک.

کیم توتسه شفاعتینگ امیدى،
بې باکلیگیدین انگه نې باک.

چون شام عروج قیتتینگ بات،
صبح اېتتى یقانى غصه دین چاک.

وصفینگده نې آیتقى نوایى،
جز عجز ایله عذر ما عرفناک.

۳۲۳

وہ، نېدور میدانده هر یان عزم جولان ایله مک،
بیزگه بیتکچ اؤزگه یان آهنگ میدان ایله مک.

زلفدین چوگان چېکیب ابل باشینی گوی ایتکه لی،
کؤز یاشیمنی گوی دپک هر ساری غلتان ایله مک.

قان ارا جسمیم بؤیب، دپرسپن که، عشقیم ترکین ایت،
بو اپکین عالمده کافرنی مسلمان ایله مک.

تن غبارینده یاشوردوم داغ عشقین کیم، اېمس
عیب مفلسدین درم توفراققه پنهان ایله مک.

کؤکده گر انجم اېمس آهیم اؤقی نینگ یاره سی
شاملر نېدور شفقیدین کؤنگلکین قان ایله مک.

چرخ صدق اهلین غمین ایستر که، بؤلیمیش صبح ایشی
اشکدین کوکب ساچیب چاک گریبان ایله مک.

گر نوایی جسمینی عشق ایسته مس تاشدین فگار،
پس نېدور آنی جنون کؤییده عریان ایله مک.

۳۲۴

عشق ارا وصلینگ تیلب هجرینگده بؤلدوم دردناک،
خسته ینگلیغ کیم، حیات امیدیدین بؤلغه ی هلاک.

یؤق عجب گر اول قویاش نوحه ننگه باقمس، ای کؤنگول،
اؤتقه نی غم گرچه کویگن ناله ایلر دردناک.

تيككانين يېتكچ آچر پىكانى كۆكسوم چاكى نىنگ،
اول كلىد اۆلمىش اجل دروازەسى گۇيا بو چاك.

ايلر ابردىنگ پاك عشق اۆتىغە كويمك آرزو،
شكرلله عاقبت كويدوردى عشقنىڭ بىزنى پاك.

سالىدى مې اول حور شوقىن كۆنگلومە، اى باغبان،
بېردىنگ اۆخشر پرورش كۆنر زلالى بىرلە تاك.

عشق ارا دوزخدىن، اى ناصح، مېنى فۇرقوتە كىم،
ھجر اۆتىن كۆرگن سمندرغە شرردىن قىدە پاك.

تا تىنىڭ اوج حيات اوستىدە دور سېن خاك بۇل،
اىستەسنگ كىم اوج توتقەيسېن تىنىڭ بۇلغاندە خاك.

اى نوايى، شام غمدىن آيرو يۇقتور صىح وصل،
آق ابرور، لېكن قارارتور ھر نېنى رنگ اېتسە زاك.

۳۲۵

كېلگوسى اول سرو سىمىن بر گل سېراب دېك،
كىم تىمدە ھر زمان تىتر كۆنگول سىماپ دېك.

وہ، نې يىنگلىغ اختر سعد ابردى كىم قىلغاچ طلوع
تون كېچە كۆزوم ياروتتى مھر عالم تاب دېك.

قوچقەمېن بېلىن كمر زنجىر ايلن دېب بۇلدى خم

ناتوان جسمیم مطلا ایله گن قلاب دېک.

سجده اول چابک سوار آلیده اندین ایلرهم،
کیم ایاغی اوزره نقشی کؤرمیشیم محراب دېک.

عقل صرافى لبینگ رنگین و نازک سؤز بيله
تاپتی گلگون رشته اؤتکرگن عقیق ناب دېک.

سیلک اپتک زر رشته بیرله گل تۇقۇلغان جنسیدین
کیم اېمس تارى چو بۇلغان وصله لیغ ماشاب دېک.

کؤر نوایی مسندین عشق ایچره کیم گلخن ارا
شعله آلتایی و کوللر دور انکه سنجاب دېک.

۳۲۶

طرفه رخسارینگ که، حسن ایچره ابرور گلزار دېک،
طرفه راق بودور که، گلزار ابرمس اول رخسار دېک.

سرو نازیم باشیده تورنه پرین کؤر کیم، ابرور
شعله نینگ باشیده کول بۇلغان پریشان تاردېک.

بیر تون اول آی هجریدین کویدم، اولوس کؤردی مېنى
تانگله سی بیر ییل تکرر تارتقان بېمای دېک.

تاشلر کیم اوردی اول شوخ، ایپکه باغلب آسمیشم
بؤینومه کؤنگلوم غمی تسکینیگه طوماردېک.

ضعفدين كوييده قۇيدوم باشيم آستيغه كېسك،
سايە ھەم گر ايستەسم يۇقتور بوزوغ دېواردېك.

اول قوياش مست اۋلدى، گۇيا كيم قىليب اپگرى خرام،
يوز جفا جانىمىغە ايلر چرخ كج رفتار دېك.

تېلە كۇنگولونگىنى، نوايى، ضبط ايلەي آلەمەدينىگ،
اېمدى چېك اندىن ايليك ھەر سارى بارسە باردىك.

۳۲۷

نې نوع باردى اېكىن اويگە كېچە اول چابك،
كە تون قرانغو اېدى، رخشى تند، اۋزى اوسروك.

نېچوك كە يېلدىن اۋلور ھەر طرف نھالغە ميل،
سمند اوزە اېگيلور اېردى اول قد نازك.

اگرچە كىفیت ايچرە كۇرونوبان بير نوع
ولېك كىفیت اندىن كۇنگولگە يوز تورلوك.

گھى كۇز آچىيان كىرپىگى آتيب ناوك،
توشوب قە يان كە آتيب جان و كۇنگول ايچرە تۇشوك.

اگرچە اۋلتوروبان يوز تىرىكنى غمزە سىدىن،
ولېك جان تاپپيان نكتەسى بيلە يوز اۋلوك.

نېتیب اۋز ايلگىدە قالغەي عنان ھوش و خرد،
كە بادە كوچلوك و رخشى عنانى ھەم كوچلوك.

نواييا بو بلالڤر سڭگه كه يوزلندي،
خيال عافيت اپتسڭگ، اؤزونڭگه بار اؤتروك.

۳۲۸

مېن كه چېكيتيم لعلى شوقى بيرله جاناندين ايليڪ،
گؤييا حيوان سويى بيرله يودوم جاندين ايليڪ.

چون مېن حيران انڭه زار و آقراشكيم نې تانڭ
اول پرى پيكر يوسه مېن زار حيراندين ايليڪ.

ايلڭى حنادين مو رنگين دور كه، مېن قربان انڭه،
يا قيلورده قتل، انڭه رنگ اؤلدى قرباندين ايليڪ.

لطف ايشيده كؤرگوزور هر دم يد بيضا اول آي
نې عجب گر اپلتسه موساى عمراندين ايليڪ.

جان چيقر حالتده بس تاپسم ايتيدن پاى بوس
نې حديم اؤپمك اوچون ايسترگه جاناندين ايليڪ.

دېر ارا چون مغبچه اېل يارى بؤلدى، اى كؤنگول،
يو مغانه مى بيله اول نا مسلماندين ايليڪ.

رحم اپتيب حاليمغه سالسه كؤز ياشيمغه بير نظر،
وه، يومهى نېتكه يمېن اول دم عقل و ايماندين ايليڪ.

بېرسه يوز آشوب دوراندين ايليڪ مېن خسته غه

چېكمه گونگدور هرگز اول آشوب دوراندين ايليک.

صيددېک اۋقتين قتيل اۋلدى نوایی کۋنگلی کیم
سوندى آیلر تیغ ایله کېسمک که هر ياندين ايليک.

۳۲۹

مهوشيمده ضعف و مېن بو غصه دين هر دم هلاک
کیم، نې يعنى مېن تيریک بۇلغھيمېن و اول دردناک.

ناگه ای احباب، دوران قيلمه غای بېباکلیک،
یۇقسه بيزدېک یوز تومن جانان اوچون اۋلسک، نې باک.

پاک جانين، يارب، آلمه پاکلر کۋنگلی اوچون،
بۇلمه سه معشوق پاک، آخر نې آسيغ، عشق پاک.

کۋنگلکين چاک ایله ميش اندوهدين گل، چون يقا
چاک قيلسه نیله سون بلبل نینگ اۋلمه ی کۋکسی چاک.

گر بۇلور یوز جان پاک آنینگ فداسی آز دورور،
مېن نې حد بيرله بۇلی، چون کیم اېرورمېن تيره خاک.

چون اجل جامين سومورمه ی چيقمس اېل بو باغدين،
خرم اول کیم باش کۋترمس باده دين انداق که تاک.

ای نوایی، يار دردی نې بلا مهلك اېميش،
کیم انینگ ضعف اېتکنى عشاقنى ایلر هلاک.

سود قىلمس اپتگىنگى ايليگىمدىن چېكىم،
كىم قىامتقە دېگىنچە بو ايليگ دور، اول اپتك.

قانىمە قۇل شىمل و تيغنى چېكىمە كە، قىلور
قتل پولاد قىلىچدىن بورون اول سىم بىلك.

قيد قىلمىنگ كە جنون سىلسەسى قىدىدەمېن،
كىم كېسە آلمس انى قىلسەلر الماس اپگك.

تىرگوزورده نىفسىنگ يوزنى قاقچورماق نې اېدى،
مىل قىلمس خود اۋلوگ كىمسەدىن آماققە موچك.

عشقدين مەخلەسىمە آيلەبان احباب دعا
مستجاب اۋلمەسى آنىنگ مېن محزونغە تىلك.

جندە بىرلە كىشى درويش اېمس، بۇلسە فنا
تېنگ دورور خواه پلاس اۋلسە تۇنونگ، خواه ايپك.

كويىدە اۋلدى نوايى بو صفت كىم، بار اېدى
تكىە خارا و حصيرى يانى آستيدە تۇشك.

كۇنگلكىنگ برگ گل و اوستيدە گلرنگ يىلك،
گل كېيى جىسمىنگ اوزە اۋيلە كە، گلگون كۇنگلك.

قلەغەي **صحفەدە** رقعەنگى كۇروب آقتى ياشىم،

طفل دېك كيم يوگوروب كؤرسه ملون كؤپلك.

كويى نينگ توفراغيدىن قۇپمس اپسم تانگ اپرمس،
غم تاشيدىن چو بوتون قالمەدى جسمىمدە سۇنگك.

بوكون اول نوع كه مېندىن باش اپرور، سېندىن تيغ،
تانگله هم بۇلغوسيدور مېندىن ايليگ، سېندىن اپتك.

يورە گيم ايتلرينگ انداق يېدىلر تيشلەشيبان،
كيم ينه يۇقتور الر آليغه بارمىققە يورەك.

مېنى بير مغبچه آشفته و واله قيلميش،
نيله اسلام اراگر كؤپ اپسه ميرزا و ميرك.

تيشلەبان دير ايچيده جام ھاللي چېكسم،
قرص ليموسى كواكب نينگ اگر بۇلسە گزك.

سلطنت خلعتيدىن آرتوق اپرور ديرە مست،
سودرەسم بادە گداليغيدە ييرتوق كېنك.

اۋزلوگونگ قيدىنى كېسمك كه نوايى بيل كيم،
يۇقتورور دھر ايريكليكلريدن يىخشى اپگك.

۳۳۲

كيمگە بير مجلسدە آه و درد ايله سوزې كېرەك،
مونداغ اۋت ياقماققە اول مجلس افروزې كېرەك.

مجلس افروزی اگر هم بؤلسه مجلس اهلی نینگ
بغیرینی کویدورگه لی آه جگر سوزی کپره ک.

صبح وصلینگ ایچره تیرگوز خیل عشاقینگنی کیم،
شام هجر اؤلتورگه لی مین دپک سیه روزی کپره ک.

کویونگ گه هر کون باریب هر دم کؤره ی دپرمین سینی،
مینگه هر کون بیرهم و هر لحظه نوروزی کپره ک.

یخشی اسره غم تونی آهیم اوقین، ای چرخ کیم،
سین عوض آتماقغه هم چون تیر دل دوزی کپره ک.

بیر خسروش همتین بیرمه ایلیگدین، نینگه کیم
دشت حرمان قطعیه آخر قلاویزی کپره ک.

عشق تعلیمین نواییدین آلورلر اهل درد،
اؤیله درس اهلیغه مونداق دانش آموزی کپره ک.

۳۳۳

کیم که عاشق بؤلسه زار و خسته حال اؤلماق کپره ک،
رشکدین عالم ایلگه بد خیال اؤلماق کپره ک.

وصل تاپماغلیغ که عشق اهلیغه امری دور مُحال،
کپچه و کوندوز ایشی فکر محال اؤلماق کپره ک.

شوق اراگه مویه دین بؤلماق کپره ک انداق که موی
هجر اراگه ناله دین انداق که نال اؤلماق کپره ک.

وصل ممکن یوق، ولی هجرانده هر دم یوز بلا
مونداق آفت مبتلاسی ماه و سال اولماق کپرهک.

عشق کوییده زلال وصل ایچمیدور کیشی،
دیر ساری طالب جام زلال اولماق کپرهک.

ظلم کؤرکیم چرخ ایتیب ایکی سپهنی کینه ور،
مورلر خیلی اراده پایمال اولماق کپرهک.

ای نوایی، ایسته سنگ مخلص کدورتدین سنگه
خانقه دین دیر ساری انتقال اولماق کپرهک.

۳۳۴

یار بؤلمیش اؤرته غه هجران طریقین سالغودپک،
عقل و هوش و جان و کؤنگول خیلی هم قوزغالغودپک.

یار باریب عقل و هوش و جان و کؤنگلوم قوزغالیب،
تن یاتیب، کؤز بوالعجب حالیمغه باقیب قالغودپک.

باشنی حالا کیم، ابرور فرصت، سالاین آلیغه،
تندلوغدین گرچه ابرمس آنی ییردین آغودپک.

ساقیا، می توت، مغنی نوحه آهنگینی چال
کیم سپاهِ عمروم اولمیش کوس رحلت چالغودپک.

هجر ارا، ای خضر فرخ پی قؤلوم توت کیم، ابرور

پويه اورماقتين بو وادی ایچره بغریم تالغودېک.

حُلّه گل برگیدین ایتتینگ پردّه جانیمدین ایت،
بۇلسه آنینگ آستیده ناگه تنینگ تاوشالغودېک.

ای کۈنگول، نقدِ حیاتینگ قیل فنا یۈلیده صرف،
حیف اۋلور گر بۇلسه عمرِ نوح اوچون سییغالغودېک.

بیر زمان دور عمر عزمِ دشت ایتیب آسوده بۇل،
بۇلسنگ ابنای زمان بیدادیدین قیبالغودېک.

ای نوایی، زورقِ جسمینگ نې تانگ بۇلسه غریق،
بحرِ اشک اۋلمیش چو هر دم آه‌دین چیقالغودېک.

۳۳۵

ای، کۈنگولده شهدِ لعلینگ حسرتیدین یوز تېشوک،
هر تېشوک دور شهد زنبوری اوی یینگلیغ چوچوک.

گر تېری بیرله سۈنگکمېن طعمه هم قیلمس ایتینگ
کیم تېری اسرو قتیق بۇلمیش، سۈنگک اسرو چوروک.

نې لېنگدین کام تاپتیم، نې کۈزونگدین جور اۋقی،
بو صفت محرومليقتین نې تیریگمېن، نې اۋلوک.

اۋيله زنجیرِ جنون رسواسیمېن کیم، هر زمان
تېگره‌مه فرهاد و مجنون دېک ییغیلیمیش بیر سوروک.

عشق اۋتيدىن قوللوغونگ داغىنى قۇيدوم كۆكسومە،
اۋزنى بو نوع ايله ديم عشق اهلى ايچره بېلگولوك.

فقر واديسينده اۋزلوك نېچە كمرەك يخشىراق،
يۇلنى آسان قطع اېتر سالك يېنگىلرەك بۇلسە يوك.

اېلگە اۋت سالدینگ، ولې كويدى نوایى غصه دین،
اۋخشەمس اۋت بىرلە كويدورگنگە بو ينگلىغ كويوك.

۳۳۶

جنون صحراسيده بايې يۇق اېركندور بو محزون دېك،
كە بۇلغەي وحشي خيلين توتكەلى چوپانې مجنون دېك.

نې تانگ گر عالم كبرا اېسم هر قطره اشكيم چون
تېنگيز دېك دور ايچيمده يوز توگون هر قيسى گردون دېك.

شفق كۆك ظرفين اېتكەي لعلې، اما لعل هجرينده
قيزرته آلمه غاي عالمى بو اشك شفق گون دېك.

منگه اطفال آتقن تاش و صبريم كشورين كور كيم،
مېن دېوانه غه اول تاغ دېك بۇلميش، بو هامون دېك.

ساچينگ سوداسيدىن ايتور پريشان سؤزلىرىم باردور،
فسونگر صنعت ايلرده ييلانغه قيلغان افسون دېك.

فراقينگ پايمالى قامتيم كيم، حلقه دېك بۇلميش،
نظر قيل كيم، بعينه بۇلدى هجران آستيده «نون» دېك.

قۇيۇب فرھاد و مجنون قصەسىن، كۆر دفتر عشقىم،
كە بىر-ايگى خطىندە تاپىلور اول ايگى مضمون دېك.

چو كۆمدونگ بېرگە قارون گنجى حكىمى توتتى، اى منعم،
توتەى كىم نقد ايله بۇلدى خزانەنگ گنج قارون دېك.

وفا ايلب، وفا كۆز توتمە عالم دونلريدىن كىم،
وفاسىز كېلدى عالم دونلرى هم عالم دون دېك.

منگە دير فنا سينغان سغالى جام جم دېك دور،
كمين سائللىرى اېسكى پلاسى حظ و اكسون دېك.

نوايى نظمىغە سالىسە قولاق شە، نې عجب كىم، بار
انىنگ هر لفظىدە شاهانە لعل و در مكنون دېك.

۳۳۷

لبىنگ كە، سىل سرشكىمنى آقیزور قان دېك،
اېرور بو قان دېك، اېمس اول ولېك قانغان دېك،

تاموغ اۋتى بيله اهل عذاب جانيغە داغ
اېمس فراق اۋتى بىرلە داغ هجران دېك.

فراق دشتىدە كۆنگلومنى قىلدى خار خسك،
تيكن كە هر يانيدىن باش چىقردى پىكان دېك.

بھشت و بۇينومە حورا سلاسل زلفى

چو سېنسيز اۋلسە گمان ايله بند و زندان دېك.

كۈنگۈل كە توشتى جنون دشتيغە باريب، گاهى،
قويون دېك آھيم انينگ تېگرەسىدە ايلاندېك.

وفاغە گرچە فلک دورى عاجز اېرسە، ھنوز
بو شېوہ ايچرە اېمس اېرکين اھل دوران دېك.

قدح توييدە كۈرونك بادە دۈردىنى مخفى،
غم ايچرە قان تۈلە كۈنگۈمدە داغ پنهان دېك.

نوايى اسرو بوزوغ، لېك وامق و مېجنون
اېمسلر ايكيىسى اول خان و مانى ويران دېك.

۳۳۸

ھجر تابى ايچرە كيم كۈرمىش بو جسم زاردېك،
كيم تاپييدور برق شكلى اۋتقە توشگن تاردېك.

اي كبوتر، طوق پيدا ايله گونگ طوطى كېيى،
سوزلوق نامەمنى آسسم بۈينونگ گە طوماردېك.

بۈلدى يوز مينگ پارە جسيمىدە سۈنگك، قان قالمەدى،
مالش ھجرينگدين اۋلميشمېن سيقيلغان ناردېك.

وہ، نې ھجران دور كە، ھم اوّل تونى نينگ تانگلەسى
بۈلميشم يىللر ملالت تارتقن بېماردېك.

ای کۆنگول، دیر ایچره اول کافرنی سېودونگ بیل که یوق
رشته یی اؤزنی انگه باغلا اوچون زناردېک.

یار اگر همپا و پا برجا اېسه بو دور ارا،
باشیغه هر لحظه اېورولمک بۇلور پرگاردېک.

هر سۇنگک یانیمده بۇلمیش بیر تېشوک غم بزمیده،
هر بیریده اؤزگه ینگلیغ ناله موسیقاردېک.

باده ایچمک که مقامی ایستر اېرسنگ، ای رفیق،
مأمنی بو ایشگه یۇقتور کلبه خماردېک.

هر دم اول آی هجریده آواره لیغ ایستر کۆنگول،
ای نوایی، قوی انی هر قیده بارسه باردیک.

۳۳۹

ای تۇقوز طارم اخضر بۇلیان جلوه گهینگ،
خیل انجم سپهینگ، نور غبار سپهینگ.

مژده وصل ایله تاپمه ی دمې آرام، مگر
مقصد صدق بۇلوب بیر نفس آرامگهینگ.

چرخ یوز مینگ کۆزی گؤیا یارودی، تارتیلیان
سورمه گون تون ایچیده سورمه صفت گرد رهینگ.

صوفي عالم قدسي سپن و اصحاب رُسل،
عرشِ اعلی کلبی اول خیل اوچون خانقهینگ.

تە بە تە بو تۇقوز افلاكىدىن اۋتكندە ابدى
يوقارى خالق اۋلوب، ما خلق الله تەينگ.

اېل كۈزىن نور شفاعت بىلە ياروتقانينگ گە
تارتقان سورمە مازاغ ايگى كۈزدور گوھينگ.

اي نوايى، چو شفيعينگ اول اپرور، بۇلدى گناھ
اول ملكلرگە كە يازماق تىلەگەيلر گنھينگ.

۳۴۰

قرا دور خال و خط و كۈز و قاشينگ،
مگر بارىنى كويدورمىش قوياشينگ.

ياشيم تارين اوزتتينگ كيم، سېنينگ هم
اوزلغەي عيش ايله، يارب كە ياشينگ.

باشيمغە تاشلر ياغدورمە كيم، بار
مرصع تاجدين آزرده باشينگ.

خراشيدە كۈنگولدين چيقتينگ، اي آھ،
كە اېل كۈنگلين خراش اېتتى خراشينگ.

نېچوك سېن زلفى ايچرە، اي كۈنگول كيم،
اۋتر بس تيرەليك بيرلە معاشينگ.

پلاس حزن و مېن، اي اطلس چرخ،

منگە لايىق اېمىس والا قماشىنىڭ.

نوايى فانى اۋلدى، اى غم و درد،
انىڭ رختىن فنا كويىگە تاشىنىڭ.

۳۴۱

اى چوچوك جانىم سېنىڭ شىرىن لېنىڭ،
مېۋە جانىم تۇنجى غېغىنىڭ.

مېن كىم و اۋپىمك يوزونىڭ كۆزگۈسىنى،
بىس مېسىر بۇلسە نەل مېركىنىڭ.

نېچە اېلنى كېچە، يارب، اى كۈنگۈل،
قۇيمەغاي اويقوغە «يارب-يارب» يىڭ.

تېزلىككە گرديگە يېتمىس شىھاب،
اى قوياش، جولانغە كىرسە شىھىنىڭ.

يوزىدە تېر قىطرەسىن كۆر، اى سېھەر،
آي اوزە مونداق كۆرونمىس كوكىنىڭ.

شېرىدىن نقصان اېمىس، اى پارسا،
فقرايىلە بۇلسە موافق شىرىنىڭ.

غمزەنىڭ اۋلتورسە نوايىنى نې باك،
سۆز بىلە چۈن تىرگۈزە آلور لېنىڭ.

كولمەدینگ، تا كۈزلریمنى كوكب افشان قيلمەدینگ،
تۈكمەدینگ قانیمنى، تا بغيریم تۈلە قان قيلمەدینگ.

طفل دېك كیم، غنچه آچقى، قيلمەدینگ، ای بغرى تاش،
خاطرینگنى جمع تا كۈنگلوم پریشان قيلمەدینگ.

اېلگە ايتور زهره يۇق، وه، يۇقسە قى بير توركتاز
ايله دینگ كیم يوز كۈنگول ملكينى ويران قيلمەدینگ.

تا قوياش دېك جلوه قیلدینگ، قۇیمەدینگ بير ذرّه كیم،
آفرینش ایچره رخسارینگغه حیران قيلمەدینگ.

يوز بلا تاشینی عشق اطفالیدین یاغدورمه دینگ،
تا جنون تاراجیدین جسمیمنى عریان قيلمەدینگ.

ای فلک، قیسی قویاش یوزلوگنی بیر کون چرخ اوزه
جلوه گر قیلدینگ که، آقشام یبرگه پنهان قيلمەدینگ.

دېمه كیم، قۇیدوم نوایی جانیغه داغ اجل،
شکر باری، مبتلای داغ هجران قيلمەدینگ.

ای، مېنىڭ جانىم آلىب يىخىلىغىنىڭ،
بېرىيان جان يىنە يىخىشى قىلىغىنىڭ.

قەھر ايلە بادە كە توتتونگ اۋلدوم،
زەردېك اۋلتورور اېلنى اچىغىنىڭ.

حسندين مەر غرض دور، اى عشق،
بو مثل دور: سىلىغىنىڭدىن اىلىغىنىڭ.

اسرەدىم سېنى كۆز اىچرە، اى ياش،
قانىمە اېردى تنوغلوغ آسىغىنىڭ.

مست اول كافىر بېياك كېلور،
عقل و دىن اھلى اۋزونگوزنى يىغىنىڭ.

غیر گردى بارور اول پاك سىرى،
قنى، اى كۆز، بو محلدە اريغىنىڭ.

اى نوایی، نېچە سالغەى آشوب،
اول پرى كويىدە دېوانەلىغىنىڭ.

ايكى غنىچەنگ اېرمىس، اى گلچەرە، تېنگ،
آغزىنگ اسرو تار و كۈنگلونگ اسرو كېنگ.

آغزىنگ گە تېگمىس عذارىنگ بىرلە سۆز،

بۆلمەدى خورشید بىرلە ذرە تېنگ.

لالە نىنگ داغى بۇلور چون اۋرتەدە،
نېگە توشمىش عارضىنىڭ يانىدە مېنگ.

بۇلدى ايلگىم داغ و كۆكسوم زخمى فاش،
كىم تىمدە تۇن يۇق و ايلگىمدە يېنگ.

سالغۇچە عالمغە اۋت عارضىنى آچ،
كىم جھاننى كويدورور اول اۋتلۇغ اېنگ.
حسن دعواسىغە قۇل يېنگىدىن چىقر،
يوزىد بىضا چىقرگن دېكنى يېنگ.

دنگ قىلمىشتور نوايىنى خمار،
انگە توتسون بىر قدح، ساقىغە دېنگ.

۳۴۵

شاھ بۇلدى عشق ايچىندە صاحب اسرارىم مېنىڭ،
عشق منشورىدە طغرا دور بو شىكارىم مېنىڭ.

لعلى يادىدىن تىرىگمېن، يۇقسە اۋلگوم ضعفىدىن،
قان كە ھر ياندىن تۇكر بو جسم افكارىم مېنىڭ.

مېن جنون صحراسىدە يىتتىم، گر اندە ھر كىشى
كۆرسە مېنۇننى اېرور، بىلدېگ نمودارىم مېنىڭ.

آغزیدین انداقق عدم کوییده فانی بۆلمیشم
کیم، وجود اقلیمیده تاپمسلر آثاریم مېنینگ.

بوالعجب حالیم جنون ایچره گر اېلنی کولدورور،
وه که، ییغلتور یوز آنچه ناله زاریم مېنینگ.

کۆنگلوم اؤز حالیده یوق، واقف بۆلونگ، احباب کیم،
هجر دردیدین ابرور حال اوزره بېماریم مېنینگ.

کافر عشق اؤلدوم اول بت آلیده، وه، یخشی دور
دیر ارا باغلنمه سه بۆینومغه زئاریم مېنینگ.

سېن دغی کؤرگوزمه مکر و شوخلوق، ای زال چرخ،
کیم بیلور سېندین کؤپ آرتوق شوخ مکاریم مېنینگ.

خاطریم، هم دور و هم دور اهلیدین آزرده دور،
ای نوایی، ایسته مه پند ایتیب آزاریم مېنینگ.

۳۴۶

مطربا، غم بزمیده تا نوحه آهنگ ایله دینگ،
ضعفلیغ جسمیمنی تار و قامتیم چنگ ایله دینگ.

بۆلدی بوستان عذارینگ باده دین افروخته،
مینی گؤیا بوستان افروز ایله رنگ ایله دینگ.

چاک ایتیب اېل کۆنگلین اېتتینگ غنچه دېک کۆنگلوم گره
آچتینگ اېل کۆنگلین اگرچه بیزنی دلتنگ ایله دینگ.

بو که تشبیه ایتتینگ، ای کؤز، خاکِ پاییں سورمه‌غه،
بیل که جوهرنی قرا توفراققه همسنگ ایله‌دینگ.

عشق سَرّی محملین کؤک پیلی چپکمس، ای قضا،
گر هلالیدین گجک، خورشیدیدین رنگ ایله‌دینگ.

نې قتیق وادی اېکین، یارب، سنگه ای عشق کیم،
عقل سرکش توسنین قوینچ قدم لنگ ایله‌دینگ.

قیل نوایینی وجود ننگیدین، یارب، خلاص،
چون وجودین برچه عالم اهلیغه ننگ ایله‌دینگ.

۳۴۷

عارضینگ صبحیدین اېل عیشینی جاوید ایله‌دینگ،
صبح وصلینگدین مېنینگ شامیمنی نومید ایله‌دینگ.

لعل سېراپین تيله قوئی عیسی و حیوان سویین،
ای کؤنگول کیم، آرزوی عمر جاوید ایله‌دینگ.

قاش و یوزی عکسی کؤک جامیغه توشگچ، ای قضا،
بو بیرین قیلدینگ هلال اول بیرنی خورشید ایله‌دینگ.

ای مغنی، زهره‌سیدین کؤکنی قیلغونگ منفعل،
سېن که هر تبر قطره‌سین بیر طرفه ناهید ایله‌دینگ.

ای کؤنگول، آخر قیلیچی خطیغه قویدوم بؤیون،

وہ کہ، سیفِ حرزینی بۛینومغہ تعویذ ایلہدینگ.

وصل سرکش قدیدین قیلدینگ تمنا، ای کۛنگول،
اول الف کیم، یأس ارا دور نخلِ امید ایلہدینگ.

ایتلری سینغان سفالی ایچرہ چبکتینگ دردِ شوق،
ای نوایی، آنی جام، اۛزونگنی جمشید ایلہدینگ.

۳۴۸

عشقیم آرتر خطی ظاہر بۛلغہلی جانانہ نینگ،
شمع دودی شعلہسین افزون قیلور پروانہ نینگ.

ہر دم اشکیم کبالتورور یوز طعن معجون کۛنلومہ،
قسمی یاشلردین ہمیشہ تاش اپرور دہوانہ نینگ.

عارضینگ نینگ نقشیدین بتخانہ دور کۛنگلوم اوی،
عشق بۛلمیش برہمن ایچیندہ اول بتخانہ نینگ.

شامِ ہجریم شرحی اپلنی بپخود اپتسہ نپِ عجب
اویقو کبالتورمک دورور خاصیتی افسانہ نینگ.

سودورور بغریم کہ، پیکانی کۛنگولدین چبکتی باش
نم ہوادہ سبزہ چیققن دپک اوچیدین دانہ نینگ.

یقیمہدی کۛک گنبدین یاغیب حوادث یامغوری،
کیم سوور اپرکین چیقیب تاملینی بو کاشانہ نینگ.

اۋقلىرىنىڭ چاڭ اېتىلەر ھەر يان نوايى كۈنگىلىنى،
يۇللار اېتىگن دېڭ ياغىن دېۋارىنى ويرانە نىڭ.

۳۴۹

تانگ نىسىمىن سايىر اېتىكن گلەلدارىم دور مېنىڭ،
سېكرىتىب ميدانغە كىرگن شەسۋارىم دور مېنىڭ.

گرد اېمس، گردىندە بلكىم كۈرمەسون دېڭ اېل كۈزى،
والە و سرگشتە جان خاكسارىم دور مېنىڭ.

مركىبى نىڭ نعلىدىن ھەر دم چاقىلغان اۋت اېمس،
كىم كۈنگۈل اتلىغ ضعيف بېقارارىم دور مېنىڭ.

بس كە تېلموردى كۈزۈم كىرگەى مو دېڭ ميدان ارا،
كۈز قراسى يۇق كە، داغى انتظارىم دور مېنىڭ.

اول بهار حسن مىنگن قطره افشان باد پاى
گلشن عيش آچقەلى ابر بهارىم دور مېنىڭ.

چابك مەر اۋلدى بېمەر و حرون كۈك توسنى،
توتىمىگ اتىن كىم، اېشىتمك انى عارىم دور مېنىڭ.

يۇلىدە ايلهى فدا كۈز گوهرىن، جان جوهرىن،
اى نوايى، يېتسە اول چابك، نثارىم دور مېنىڭ.

۳۵۰

كاغذ اوزە قلمنى فسونساز قىلمەدىنگ،
بىر رقعە بىرلە بىزنى سر افراز قىلمەدىنگ.

جانسىز تنىم حىياتى اوچون نامە يازمەدىنگ،
كلكىنگ اوچىنى معجزە پرداز قىلمەدىنگ.

وصلىنگ كونى و شام فراقىنگ بيانىدە،
كافور بىرلە مشكىنى همراز قىلمەدىنگ.

بىر مەر نامەسى بىلە سرگىشتە ذرەنى
كون دېك جهاندىە موجب اعزاز قىلمەدىنگ.

تا روزگاريم ايلمەدىنگ دوددېك قرا،
بىر نامە نىنگ سوادىنى آغاز قىلمەدىنگ.

اى كۆك دبىرى، كىمسەگە بىر نامە يازمەدىنگ
كىم خامە يىنگلىغ آنى سر انداز قىلمەدىنگ.

رحمت، نوایا، سنگە كىم يار هر نېچە
ظلمىن كۆپ اېتتى، مەر و وفا آز قىلمەدىنگ.

۳۵۱

غم خزانين ظاهر اېتميش چهره زردىم مېنىنگ،
بارغەلى يېل دېك بهار ناز پروردىم مېنىنگ.

تېلەلردېك سۆزلىشورمېن اۈز-اۈزوم بىرلە مدام،
چون اۈزومدىن اۈزگە يۇق عالمىدە همدردىم مېنىنگ.

توفراغ اۋلسم كويیده، ای ابر رحمت یامغوری،
قیل مدد آنچه کیم، اندین چیقمه گهی گردیم مېنینگ.

چیتی جان بيلمهی مقامین مژده یی بېر، ای مسیح،
کیم قیو منزله دور مهر جهانگردیم مېنینگ.

هر نېچه کۋنگلوم ساووغ آهیدین ایتور، آه کیم،
یارغه یاقمس نې کیم ایتور بوم سردیم مېنینگ.

رزق چون مقسوم ابرور، بیر قرص اوچون هر کون نېدور
چرخ دېک سرگشته لیک کويیده ناوردیم مېنینگ.

ای نوایی، تا که اوردی مهر نقشین طاس چرخ،
بو بساط ایچره عجب ششدره دور نردیم مېنینگ.

۳۵۲

هر کۋنگول آرامی چون بؤلیمیش دلارامیم مېنینگ،
اول سبیدین یؤقتورور کۋنگلومده آرامیم مېنینگ.

دود آهیم سرودېک چیتی و گلگون بۆلدى اشک،
قیلغە لی ترک وفا سرو گل اندامیم مېنینگ.

نېگه کۋرگوزدی شفقدين شعله، کوبکدين شرار،
گر اېمس غم دوزخی بو صبحی یؤق شامیم مېنینگ.

دل بالر عهدیغه هیچ اېتمه سونلر اعتماد،

ای صبا، عشق اھلیغە یتکور بو پیغامیم مېنینگ.

عاشق آتیغە کیریپتور کۈنگلوم و تاپمس وصال،
فاسق محروم دېک بۆلمیش بو بدنامیم مېنینگ.

دائە تسبیح میلی ایلەمس کۈنگلوم قوشی،
رشتە زنار زلفونگ بۆلغەلی دامیم مېنینگ.

ای نوایی، مېن دېک اول بت گویی ساری کیرمه کیم،
کفر ایلە بۆلدی بدل بو یۆلدە اسلامیم مېنینگ.

۳۵۳

نې لطف اېدی که مېنی نامە بیرلە یاد اېتتینگ،
نې نامە اېردی که غمگین کۈنگولنی شاد اېتتینگ.

تیلیم قلم تیلی دېک شکردین اېرور عاجز،
بو نامە بیرلە که بو ناتواننی یاد اېتتینگ.

اؤقورده آقتی یاشیم اختیارسیز، گویا
که هجر دودەسیدین نامەغە مداد اېتتینگ.

یېتوردی جسمیمە روح، ای قویاش، مگر که مسیح
معلم اېردی دمې کیم انی سواد اېتتینگ.

جواهری که ییباردینگ بو نامرادینگ اوچون،
کۈنگول خزانەسینی مخزن مراد اېتتینگ.

نې سود بولسه عمل نامه سی قرا گر خود
آتینگ نشان اوزه جمشید یا قباد ایتینگ.

نواپی، جسمینگ که روح اول قویاش حدیثی اېمیش،
مسیح نطقیغه یوق بیرده اعتقاد ایتینگ.

۳۵۴

ای عشق، ینه فرقت اوتین جانیمه اوردونگ،
جسمیمنی کول ایل، کولینی کؤک که ساوردونگ.

انجم دېمه، گویا که ملایک که توتشتی،
آهیم اوتی اوچقونلری کیم، کؤک که یپوردونگ.

قید اېتمه دینگ و بس خم زلفونگنی کؤنگولکه
کیم غیر خیالین هم انینگ بیرله سوپوردونگ.

پا بوسینی ایستب مگر، ای شادلیغ اشکی،
بو زار ایله دلبر کؤروشور چاغده یوگوردونگ.

فرقت کونی بس تیره دور، ای عشق، همانا
کیم صرصر آهیم بیله کؤک شمعین اوچوردونگ.

هجران تونی، ای چرخ، مشعبد گر اېمسسپن
نې نوع قویاش طاسینی خرقنگده یاشوردونگ.

ترک اېتمه دی باش قویماق اېشیگینگده نواپی،
بو کویدين ایت دېب آنی هر نېچه که سوردونگ.

نېچە جورين تارته يين اول سرو حورى زادنينگ،
يۇق مو دور پايانى آيا ظلم ايله بېدادنينگ.

عقل دېر سال كۈنگلونگگە زهد و ورع بنياديني،
عشق آيتور يۇقتورور بنيادي اول بنيادنينگ.

تاش اېرىتتى، وه كه، خسرو كۈنگلېگە كار اېتمەدى
شعلەلر كيم، تېشەسىدىن سېكريدى فرھادنينگ.

كۈنگلى مھر ايلر عيان، كۈرگچ رقيبى بوزىنى،
كۈرمە گونچە زاك، چىقمس جوهرى پولادنينگ.

تاكه صيدىنگمېن، ايشىنگ نېوچون غضب دور چون مدام
قوش گرفتار اۋلسە كۈنگلى خوش بۇلور صيادنينگ.

اۋلمگىمنى باقمە ھجرانينگدە، اى سلطان حسن،
قتل حكىمى قىلسە شە نې اېركى بار جلادينگ.

راکع اېردىم چنگ اونى كېلدى سحرگە، آه كيم،
باردى مطرب نغمەسىگە حاصللى اورادنينگ.

يۇل قرانغودور، طلب ناقص، قدم نې نوع اورەى،
يارومەى كامل دميدىن مشعلى ارشادنينگ.

اى نوایی، نېچە بلبل دېك فغان اول گل اوچون،

يۇق انگە تائىرى چۈن بو نالە و فريادىنىڭ.

۳۵۶

كۈنگۈللەر قۇتى شىرىن داستانىڭ،
بغىرلەر قانى لعل دُر فشانىڭ.

نەھان و آشكارا مېن سىنگە يار،
سېنىڭ اغيار ايله راز نەھانىڭ.

مەبلەر بىرلە ھەر تون بىزدىن ايرى
قدىلەر كىم چېكىرسېن، نوش جانىڭ.

ولې ھەم ايله اندىن كىم چېكىب وای
دەمەم قان يۈتەر بىر ناتوانىڭ.

عەجب لعلې سېن اى اشك جگرگون،
عەجب يۇق كىم اېرور غم تاغى كانىڭ.

كۈلر، اى باغبان، ھەر غىچە گۇيا
كە غافل دور خزاندىن گلستانىڭ.

نوايى عشق وادىسىغە كىردى،
خەتەرلىق يۇل دور، اى احباب، يانىڭ.

۳۵۷

رفىقلىرىنى بارىن يار و مەتمەد قىلدىڭ،

آزاده تېک مېنى، مردود اېدېم که، رد قیلدینگ.

فلک جفاسی، اولوس طعنی و فراقینگ اؤتی،
بس اېرمس اېردی که، سېن هم ینه مدد قیلدینگ.

کېچیب جهان ایله جاندين سېنى دېدیم، جانا،
مگر که قتلیمه بو جرمنى سند قیلدینگ.

غرض چو اؤلمگیم اېردی، بس اېردی لطفونگ هم،
غضب نې اېردی که، ای شوخ سروقد، قیلدینگ.

غمینگنی چېککه لی یالغوز کؤنگول اېدی عاجز
که تیغ فرقت ایله آنی یوز عدد قیلدینگ.

چو بخت اختری سعد اؤلمه دی نې سود، ای کیم،
سېهر زیجینی حل قیلغه لی رصد قیلدینگ.

نوايي، یار نې جور اېتسه، جانغه منت قؤی،
ازلده چونکه بو دعوانی تا ابد قیلدینگ.

۳۵۸

ایستب اول بتنی خرد بېلیده زنارین کؤرونک،
بیر کلابه ایپ بيله یوسف خریدارین کؤرونک.

لعل و خالی نقشی جانده، تنده قان و تازه داغ،
ظاهریمده باطن احوالی نمودارین کؤرونک.

زار جسميم چيرمشور اول آيغه يازغان نامه غه،
وصل اميديدين بيتيك كه چيرمه غان تارين كۈرونك.

ضعفليغ جسميم اپگيلدى كثر پيكانيدين،
بو ييغاچ نينگ شاخيني خم ايله گن بارين كۈرونك.

عمر دورى نينگ بقاسين بيلمه گنلر هر طرف،
سوده يامغور نقطه سى نينگ دور پرگارين كۈرونك.

اي كه كۈرمه يسيز بنا اهلى فنا توفراغيغه،
سايه سیده مېن بۇلور ويرانه دېوارين كۈرونك.

دېمنگيز هجر اسرو زخم اېرميش نوايى جسميني،
جسميده زخمىچه يوز جانیده آزارين كۈرونك.

۳۵۹

خيالينگ حُسنیغه كۈنگلومده زينت بېرسه هجرانينگ،
اېرور گلگونه قان، مشاطه عشق و كۈزگو پيكانيك.

جفا سر لوحیده قیلدی الف مشقی، كۈزونك يا خود
الف دېك جانغه نيش اورماققه صفلر چېكتى مژگانينگ.

لبينگ خط ظاهر اېتتى، خضر عمرى بېرسه لر اولگوم،
خصوصاً كيم خضرغه همدم اولغەى آب حيوانينگ.

توشومده وصل اېردى، اي كۈنگول، يارب، بلا اورسون
سنگه كيم، مېنى اويغتنى عجب حالتده افغانينگ.

دماغى، يۇق مشوش بۇلمەغان، گۇيا كە بوترتميش،
جهان باغيدە سودا سنبل زلف پريشانينگ.

نېچە ياغدورسە غم تاشين فراق اطفالى، اى مجنون،
نې غم باش اوزره ليلا بارگاھى بۇلسە قلقانينگ.

قفس قيديدە دور بلبل، بو كيم ويرانه توتميش جغد
وفاسى يۇق اپكانين بيلدى گۇيا اهل دنياينگ.

بو بزم اهلى نفاقيدىن تاريقميش كۇنگلوم، اى ساقى،
اېزيب بېھوش دارو توت منگە يېتكندە دورانينگ.

نوايى، هجريدە نې نوع سيل اشك آقيزدين كيم
وصالى بۇلدى چون ممكن، اوترگە يۇقتور امكانينگ.

۳۶۰

چمندە چهره فروغى اوچون قدح آلدينگ،
نې اچيغ اپردى كە گل خرمنيغە اۋت سالدينگ.

عجب يۇق اشكينگ اگر يوممهين آقر، اى كۈز،
كە يار باقمهين اۋتتى و سېن باقيب قالدينگ.

سمندى پويه سيدين صرصر اورغان اۋت ينگليغ،
نې حالت اپردى سنگە، اى كۇنگول كە قۇزغالدينگ.

غميم يوكين كۇتاريب، اى سپهر، هجر تونى

چو قيلمەدينگ حرەت گويى اسرو توشالدينگ.

دېدىم ترانە جانبخش مطربا، سېن خود
فراق سازى توزوب اۋلتورور كۈكى چالدينگ.

وصال گلشنين، اى جان قوشى، كۈپ ايسترسېن،
بو دامگە ارا گۇيا كە اسرو قينالدينگ.

فنا يۈليدە نوايىغە بۇلمەدينگ ھمرە،
بو دشت پويەسىدىن، زامدا، مگر ئالدينگ.

۳۶۱

غم تاشين جسميمدە پىكانىنگ بيلە بند ايله دينگ،
اول ثمرنى بو يىغاچقە برگ پيوند ايله دينگ.

چون شكر شيرينلىك اظهار اېتتى لعلينگ آليدە،
دېمەيىن، قىلدينگ تبسم كيم، شكر خند ايله دينگ.

اېلگە عشرت بادەسى توتتونگ يايىب خوان وصال،
وہ كە، بيزنى قان يوتوب، غم يېرگە خورسند ايله دينگ.

ايستەمس بۇلسنگ مېنى، بلبل كېبى شيدا، نېدين
يوزنى گلگون بادە بيرلە گلگە مانند ايله دينگ.

قىلدينگ اول يوز جنتيدين ايرو بو كۈز مردمين
آدم و ھر سارى ياشين انگە فرزند ايله دينگ.

دھر باغی نینگ گلیده یۇقتورور بوی وفا،
اۋزنی، ای بلبل، اگر پرکند-پرکند ایله دینگ.

ای پری، دېسېن نوایی بار اېمیش مجنون کېی،
بیر یولی اول تېلېه نی قیدین خردمند ایله دینگ.

۳۶۲

ای وصال اهلی، اول آی کۈنگلینی خوشحال توتونگ،
گر هلاکیم خبریدین آونورکیم، آوتونگ.

یوز تومن مېن دېک انینگ کۈنگلی رضاسیغه فدا
مېن اگر اۋلسم اۋله ی، سیز آنی خوشحال توتونگ.

گر سۋزوم یخشی-یمان خاطریغه کېلمس خوش،
اول اونوتقان کېی لطف ایلنگ و سیز هم اونوتونگ.

ماهوشلر بیلە کوندوز بېرىنگیز بزمیغه زېب،
شمع می بیرله شبستان فراغین یاروتونگ.

نازنین خاطریغه کېلمه سنگیز سیز دغی خوش،
یاوومنگ مېن کېی بزمیغه و خونابه یوتونگ.

عشق ارا خوار و زبونلوق کېره ک، ای اهل جنون،
آرهغه غافل و رعنائی دېمان کیم یاووتونگ.

غمزه سی بیمی کۋپ آچیتتی نوایی آغزین،
لعل پیغامی بیلە بیر دغی کامین چوچوتونگ.

عشق كېلتورسە ايشىم دىر فنا عزمىدە اۋنگ،
خانقە كنجى ھوس ايلمەيىن اندىن سۋنگ.

راستلر مأمى دور دىر، توز اور اول سىرى گام،
كىم كە اول اېگرى قدم اوردى، ايشى كېلمەدى اۋنگ.

ھەت اھلى بىلە ھەر تىرەغە تېگمىس پرواز
نسر طائر بىلە نې نوع ھوا قىلغەى قۋنگ.

باركشلىرگە فنا منعى قچان قىلغەى جاھ؟
تېوہ نىنگ كۋنگلى كىچىك دور گر ابرور پىكرى چۋنگ.

آه و اشكىدىن ابرور اۋت و سو ايچرە عاشق،
زاھدا، نې غم انگە گر قىزىغ اۋلغىل، گر تۋنگ.

زور بازو كىشىگە دھر چو قۋىمس جاويد،
سعى اېتىب قۋلدە بىراونى، چو اېتر اېمدى قۋلونگ.

كرمين اىستە نوايى كە، كىشى طاعت اېتىب،
نامە معلوم اېمس، سۋل قۋلىدىن دور يا اۋنگ.

«ل» حرفى نىنگ لعبتلىرى نىنگ لطايفى «غرايب» دىن

ای کۆنگول، یېر- کۆک اساسین اسرو بې بنیاد بیل،
اول کېسکنى سوده کۆر، بو صفحهنى بر باد بیل.

جسم اویى چون کیم ابرور فانی، تفاوت یۇق آنی
گر فنا سیلابیدین ویران و گر آباد بیل.

تۆرت عنصر قیدیدین تاجیقمغه یسېن، نفع اېمس
آسمانی تۆرت دفترنی توتەى کیم یاد بیل.

ای که دېسېن، حقنى نې تعريف و وصف ايله بيلهى،
وصفدين مستغنى و تعريفدين آزاد بیل.

تېنگرى ذکرى کیم، ملایک که غذای روح ابرور،
بو غذانى حق یۇلغیه کیرگن اېلگه زاد بیل.

گر حبیبیم قیلسه اظهار کلام، ای پیر دیر،
عیسای مریمنى اول دم گنگ مادر زاد بیل.

منطق عشق ایچره عاشقنى تصور ايله نوع،
فرد بۇلغانلرنى بو یۇلده انگه افراد بیل.

اېل ایاغیه توشردین باشقه چیقماق رسمینی
مى کهن پیریدین اوشبو دیر ارا ارشاد بیل.

ای سلوک اهلی، قچان مقصود تاپقوم دور دېسنگ،
ماسوی اللهنى فنا کۆرگن کونین میعاد بیل.

ای که دېسېن کیم، بيلهى توحید سریدین خبر،

شرعدين نې كيم تجاوز ايله دی الحاد بيل.

دؤست وصيلين تاپمه غان دنيا و عقبادين كېچيب،
اوشبو دردینگه نوایی حالين استشهاد بيل.

۳۶۵

آغزیدین چیققن حدیثِ نازک و رنگیننی بیل،
لعل سفتیدین چیققرغان رشته دور رنگی قیزیل.

بیر زبانه هر یارمده سوزِ عشقینگدین ابرور،
کؤنگول اؤتی شرحیغه آچقن آغیرلر ایچره تیل.

ای اجل، کوییده باشیم قیل آغیر کیم، ایله میش
هجر اشکیم سیلین ایلدم، ضعف جسمیننی پینگیل،

قان یاش ایچره غرقه دور جسمیم، چیققر، ای مغبچه،
کؤرسنگ انداق کیم اؤلورسپن لعل گون می ایچره قیل.

خوبلر هر دم اؤتر سپنسيز قاشیمدین، وه که، بار
هر نفس هجرینگ منگه بو آیلر اؤتگن بیرله ییل.

صرصرې دور هر دمینگ مقصود ایزین گم قیلغلی،
گر بو وادی ایچره غفلت بیرله یوز مینگ ییل تیریل.

ای نوایی، فقر توغراغیغه کؤپ تۆکتونگ سرشک،
گر تیلر بؤلسنگ فنا هم انده. اؤق اېمدی ییقیل.

انینگ دېك مستمېن دى صبحى كيم، بو مشكل اېرمس حل،
كه مېلىق شيشه قۇيغان شيره دور يا شعله لىق منقل.

قوياش دېك تيتره مك دفعين سحرگه آرزو قيلسنگ،
قوياش دېك جامنى تيتره ب سومورمك فرض اېرور اوّل.

مونىنگ دېك فصل كيم، تون مشكىنى چرخ اېتتى كافوري،
صبحي ميدىن اول كيم، بۇلسه لايىقل اېرور اعقل.

صۇدايم غالب و گلگون ميمىنى محتسب تۇكميش،
تاپىب آليمغه اول بلچىقدىن - اوق سورتى قىزىل صندل.

ساووغ يا تيره اېرسه دى صبحى، ايسته روشن مى،
نېترسېن مهر اۋتيدىن شعله يا آى نوريدىن مشعل.

خوش اول مخمورلوغدىن تيره كۈز كيم، آچقچ - اوق بۇلسه،
اۋشول كۈزگوگه ساقى نىنگ هلال قاشيدىن مصقل.

محاسن صبحدىن باغلب، ساچر اۋت آغزىدىن گردون،
صبح اهلى، نشاط ايلنگ كه، تاپميشسيز عجب مهزل.

مى ايچره عكس اېرور ساقى يوزيدىن انگله مان، يا خود
كۈزوم نظاره دىن تۇرت اۋلدى، يا خود بۇلميشم احو.

قولاق هر سۈزگه سالمه ايسته سنگ عشق ايچره رسوالىغ،
كه واعظ كۈپ چېكىب فرياد و ناصح كۈپ دېگه مى مۇھمل.

میسر دور، نوایی، یار وصلی خلوتی تاپسنگ،
که یعنی بۆلمهسه اول خلوت ایچره اؤزلوگونگ انکل.

۳۶۷

یوزونگنی کۆردوم اېمدی کۆزلیمنی باغله، ای قاتل،
که ناگه بۆلمغهیلر اؤزگه یوزنی کۆرگه لی مایل.

کتاب اوراقی دېک بۆلغه ی مسطّح قالمه یین دوری،
غمیم تاشیغه بۆلسه بیر نفس تۆقوز فلک حامل.

مېن بېدل نینگ آهین اؤگمه کیم، عالمی کویدوردی،
هنوز اېرمس کۆنگول نینگ شعله سی بو اؤت ارا داخل.

تیمده گل اېمس گلخن نشانی تېلبه لیکدین کیم
کول اۆلدوم اؤرتیب عشقینگ اؤتیدین، لېک سېن غافل.

لېینگ شوقی کۆنگولدین خلق طعن ایلب قچان چیقسون،
صبادین غنچه نینگ هرگز بۆلور مو حُمرتی زایل.

نېدور آی صفحه سی بۆلغان قرادین داغلیغ، گؤیا
جمالینگ دفترین یازغانده بۆلمیش بیر ورق باطل.

مېنینگ جرم ایچره عذروم شیخ نینگ زهد ایچره عجبیدین
بتر دور دؤست لطفی حالیمه گر بۆلمهسه شامل.

فغانی اؤقیدین بلبل نینگ، ای گلبن، حذر قیل کیم،

تيكن پيكانىغە گل جوشنى ھرگز اپمس حایل.

نوايى قوللوغىن فقر اهلى نىنگ پىرى قبول اپتسە،
اېرور بىر بىندە آزاد ايله گن يىنگلىغ شە عادل.

۳۶۸

ھجر اۋتىغە ايستەسنگ ياقىلمغە يىسپن، اى كۈنگول،
ياردىن زنھار كىم، ايرىلمغە يىسپن، اى كۈنگول.

وہ، نې طالع دور کہ تايمہی عمرې ايستب يارنى،
چون سېنى يار ايستە گەي تايلمغە يىسپن، اى كۈنگول.

بو کہ قان بۇلدونگ دېسنگ كىم، آشكارا بۇلمەسون،
مىل اپتیب ياشلر سىرى قاتيلمغە يىسپن، اى كۈنگول.

دېسەلر: لىلى مو آرتوق حسن ارا يا اول پىرى؟
گرچە مجنونسېن كېرەك يانغىلمغە يىسپن، اى كۈنگول.

قىلدى چون ساقى لىي يېتكىن قدح ھوشىنگىنى محو،
تا ابد زنھار كىم، آيىلمغە يىسپن، اى كۈنگول.

غىچەسېن غمدين، ولې ساقى بھار عارضىن
آچسە بىلمان كىم، نېدىن آچىلمغە يىسپن، اى كۈنگول.

دولت باقى نوايى دېك اېرور تاپماق محال،
تا تمام اۋزلوكنى فانى قىلمغە يىسپن، اى كۈنگول.

چمندە قانىنى بس كىم آقیزدى زار كۈنگۈل،
ساغىنمە غنچە كە گلبن كېتوردى بار كۈنگۈل.

نې گلرلر آچقى الم گلشنیدە غنچە كېبى
نھانى زخملرین قىلسە آشكار كۈنگۈل.

تۈنۈنگدە توگمە اپمىس برچە لعل پىكاني،
لبىنگ ھواسىغە بارور توزوب قطار كۈنگۈل.

چمندە قان ياغر اۋتسنگ، مگر صنوبر اوزە
آچر جراحتى آغزىنى ھر فگار كۈنگۈل.

توتشقن اۋت دورور اۋتون ارا، بو كىم تاپمىس
فراقىنگ اۋقلىرى بىرلە دمې قرار كۈنگۈل.

فتىلەلرنى يرامدىن چېكىب توتشتوردى،
مگر غمىنگدە قۇير داغ انتظار كۈنگۈل.

فراق زخمیدە آچمىش آغيز كېتور، ساقى،
قدح كە، اىستەمس اۋلماغنى ھوشيار كۈنگۈل.

نې مھر ايسى، نې وفا رنگى تاپقونگ، اى بلبل،
بو باغ گللىگە بېرمە زىنھار كۈنگۈل.

نوايى اپتكەى انىنگ تركين اختيار، ولې
قچان بېرور انگە بو ايشدە اختيار كۈنگۈل.

۳۷۰

مېن جهاندين كېچديم و كېچمس مېنينگ جانيمدين اېل،
مېن ايليگ جاندين يودوم، چېكمس ايليگ قانيمدين اېل.

تؤش - تؤشيمدين بس كه رسوالېغ اؤتى لاو - لاو يانر،
هر طرف يؤلدين چيقرلر اؤتسه لر يانيمدين اېل.

بختيم اويقوسىغه گؤيا كيم سرودې دور حزين،
كوييده بو كيم اويومس هر تون افغانيمدين اېل.

تانيمسلر بير - بيرين ياغقان مذلت گرديدن،
سؤرغەلى حاليم كيريب چيققونچه ويرانيمدين اېل.

مېنده طومار جنون دېك پېچ، وه كيم، بېخبر،
هر طرف كؤنگلومده قانليغ داغ پنھانيمدين اېل.

ايسترەم، اى خضر، كېلگه يمېن قىليب جان بيرله طوف،
كعبه كويين خبر تاپقونچه بارغانيمدين اېل.

اى نوايى، قيلمغە يلر عيب گر دېوانه مېن،
اول پرى وصفين اؤقوغان سايى دېوانيمدين اېل.

۳۷۱

قرا كؤزوم كېل و مردملوغ اېمدى فن قىلغىل،
كؤزوم قراسيده مردم كېبى وطن قىلغىل.

يوزونگ گليگه كۈنگول روضه سين يسه گلشن،
قدينگ نهاليغه جان گلشنين چمن قيلغيل.

تكاورينگه بغير قانيدين حنا باغله،
ايتينگه غمزده جان رشته سين رسن قيلغيل.

فراق تاغیده تاپيلسه توفراغيم، ای چرخ،
خمير ايتيب ينه اول تاغده كوهكن قيلغيل.

يوزونگ وصالیغه يېتسون، دېسنگ، كۈنگوللرنی،
ساجينگنی باشتين-اياغ چين ايله شكن قيلغيل.

خزان سپاهيغه، ای باغبان، اېمس مانع،
بو باغ تامیده گر ايگنه دين تيكن قيلغيل.

يوزیده تېرنی كۈروب اۋلسم، ای رفيق، مېنى،
گلاب ايله يوو و گل برگيدين كفن قيلغيل.

نوايی انجمن شوق جان ارا توزسنگ،
انینگ باشاغليغ اۋقین شمع انجمن قيلغيل.

۳۷۲

نامه سی قۋینومده بس کیم، اضطراب ایلر کۈنگول،
اۋپکه لی چیقماققه گۋیا کیم شتاب ایلر کۈنگول.

تازه بوتمیش اېردی کۈکسوم چاکی، وه کیم، تالپینیب
چیققلی اول رخنه نی هر دم خراب ایلر کۈنگول.

اۋقى زخمى يۈلىدىن سالسىم ايچىمگە نامەسىن،
بىر فەتىلە مرھىم اۋرنىغە حساب ايلر كۈنگۈل.

چىرمەبان جان پردەسىن منشور اوزە والە كېيى
كۈرمەسون دېب غىرانى، گۇيا نقاب ايلر كۈنگۈل.

غىچەدېك قەت-قەت بۇلوب قان اول مسافر شوقىدىن
نامەسى يىنگىلىغ دىمادىم پېچ و تاب ايلر كۈنگۈل.

مېھىم اېرمىش رەقەسى دوران نىنگ، اسرو ياوە كىم،
جانغە بو اندىشەدىن ھەرم عذاب ايلر كۈنگۈل.

اى نوايى، آچتى كۈكسۈم نىنگ تىكىلگەن چاكيى،
نامەسى قۇينومدە بس كىم، اضطراب ايلر كۈنگۈل.

۳۷۳

ياردىن كېلىش مەنگە بىر طرفە مەكتوب، اى كۈنگۈل،
كىم ايرور ھەر سطرى، بل ھەر لفظى مرغوب، اى كۈنگۈل.

لفظ يۇق، ھەر حرفى جان ھەرزى، دغى ھەر نەقشەسى،
مەردەمك يىنگىلىغ بەينە كۈزگە مەطلوب، اى كۈنگۈل.

ايلەدىم طومار اكر طومار اېتر دىفە جنون،
بو مېنى قىلمىش جنون ايلگىدە مەغلوب، اى كۈنگۈل.

صفەدە اېرمىس مەحبەت شەرخى كىم كېلىش كىيىب،

حلە کافورگون بیر طرفه محبوب، ای کۆنگول.

اسرو کۆپ تکرار ایتردین اول پریوش نامەسین،
بۆلمیشم ابل ایچره مجنونلوققه منسوب، ای کۆنگول.

غیردین صفحەنگنی قیلغیل پاک، یعنی آیلەمه
خاطرینگ لوحینی هر خط بیرله معیوب، ای کۆنگول.

غمدین آزاد اولدی خطیدین نواپی، بېرمەسه
بېگیکه قوللوققه خط بۆلغەی مو محسوب، ای کۆنگول.

۳۷۴

اول پری کیم، بند زلفیغه مجانین دور عقول،
مېن کبېی دېوانه لر قیدین قچان قیلسون قبول.

ذره اېرمس کیم قویاش اجزاسی نور ایلرگه کسب
اول پری قصریغه روزندین قیلور هر دم نزول.

عالم آرا حسن ایلە جانبخش نطقونگ مو اېکین،
یا مسیحا روحی یوسف جسمیده قیلمیش حلول.

ای که دېرسېن، کېلدینگ و شاد اولغوسی وصلینگه یار،
شاد بۆلغەی اېردی بۆلغان بۆلسه هجرینگدین ملول.

مصحف اوصافینگده اېرمیش، الله-الله، مجملې،
سوره-سوره هر کرشمەنگ شرحیده اینک فصول.

يېرگە ساچىنىڭ سودرەلور گۈلمىگە كىرسىڭ خىم بۇلۇپ،
مەر پىست اۇلغان زىمان انداق كە تاپقى سايە تول.

ايگى زلفونىڭ تۇلغانور ھەر دم صبا تحرىكىدىن،
ايگى ھىندو نغمە يىرلە ظاھر اېتكىن دېك اصول.

راستلىقدىن دىر طاقىغە مدار اۇلماق نې عىب،
سالكى كىم بۇلسە خىدمىتدە ستون يىڭلىغ ھىم اول.

بۇلمەسە اېردى نوايى سىرى عشقىڭىگە امىن،
نې ظلوم اېتكەى اېدىنىڭ آنىنىڭ خطاين، نې جھول.

۳۷۵

قان تۇكر كۇز عارضىنىڭ گىلگۈنەلىق كۇرگىن مىحل،
نې اوچون كىم سويى آنىنىڭ قان ايلە بۇلمىش بىل.

طاق اخضر قاتتى برچە فتنە و بېدادىنى،
قاشىنىڭگە مىشاپە گۇيا وسمە ايلر چاغدە حل.

نىلدىن گىلگون عذارىنىڭ باغىدە ھەر سارى خال،
نىلوفر گىلشن ارا ھەر يان آچىلمىش فى المىل.

كېچىرك آچماق برقع اېرمىس اېل اۇلر دېب رحم اوچون،
بىلكە ايلرسېن اولوس كۇپىرك يىغىلسون دېب حىل.

باغ ارا ھەر رىنگ تۇن اېگىنىدە چىقمىش اۇيلە كىم،
حور جىنت سىرىغە چىققى كىيب تورلوك حۇل.

تا يودونگ زنار زلفونگنى، ساچيلغان سوييدىن،
كشور اسلام ارا يوز مينگ بنا تاپميش خلل.

دهر شوخيدىن، نوایی، توت قيراق كيم، باغله سنگ
بیر اياق سو بيرله عقدىن، اول دورور جام اجل.

۳۷۶

كوزومده هجر اوتى نينگ حرمتين كور، دېمه قان دور اول،
قرا ساغينمه، پيكانيگ سويى تامغان نشان دور اول.

لېنگ خالى كه خط ياشوردى جاننى ياشورون اورتى،
همانا عشقدين جانيمده غى داغ نهان دور اول.

كۈنگۈل باغى ارا هر يان اوقونگ زخمى اېمس، گۈيا
نهال مھرينگ اېكمكليك اوچون قازغان مكان دور اول.

كۈزوم نينگ مردمى كيم، تا سحر كوكب ستر هر تون
اول اويدىن اويقو عيارين قاورغه پاسبان دور اول.

كۈنگۈلدين كېلگن آھيم خيلينى منع اېتمه سم اولى
كه محنت كشوريدىن عزم قيلغان كاروان دور اول.

قدىنگ سرويده دور كۈنگۈل قوشى، وه، سنبلونگ اېرمس
كيم اول سرو اوزره قوش قصدىغه چيرمشقن ييلان دور اول.

صراحی آغزیده قیل شکلیدین خوشدل مېن، ای ساقی،

مگر عیش و فراغت طایریغه آشیان دور اول.

اېمس بۇلسنگ تعین خانقاھی شغلیدین اېمن،

فنا دیریغه کیر فی الحال کیم دارالامان دور اول.

نواپی ضعفین انگلب اؤزگه گه حمل اېتمه جورونگنی

که ییلر اوشبو آغیر یوکنی چپکن ناتوان دور اول.

۳۷۷

قنی بیر چهره که میل اېتکه ی انگه خسته کؤنگول،

قنی بیر زلف که، بۇلغه ی انگه وابسته کؤنگول.

زخمی آغزیده لبینگ ذکر ی و احوالی قتیق،

جان یېتیب آغزیغه حال اوستیده دور خسته کؤنگول.

غصه تیرناغی بیله کیم قیلور اطرافینی رېش،

نقش اېتر اېگمه قاشینگ شکلینی پیوسته کؤنگول.

غم یېمان بوزدی اېسه کؤنگول اوین کیم، قویمس

مخزن عقیشینى تا بۇلمه سه شایسته کؤنگول.

ته به ته قان دېمه کیم، ایکی یوزونگ شوقیدین

درد باغیده قیلور لاله و گلدسته کؤنگول.

کؤنگلونگ ار بۇلمه سه وابسته، تانگ اېرمس، ای شیخ،

بار مو آخر باری عالم ارا وارسته کؤنگول.

ظلمیدین دېسه نوایی که، قیلەى عشقین ترک،
منع اېتیب ایچکریدین یالبارور آهسته کۈنگول.

۳۷۸

هر کیشی کۈرسه قیزیل خاراده اول مهوش جمال،
قان یاشیم موجی ارا قیلغه‌ی قویاش عکسی خیال.

ناوکین چېکمینگ که، چیرملیمیش انکه جان رشته‌سی
کوچ بیلە چیقماق نې امکان ریشه بېرکیتکن نهال.

اول قویاش نینگ مرکبی کۈک تۈسینی دور نې عجب،
گر رکاب اولماقکه باش بیر- بیرگه یېتکۈرگه‌ی هلال.

نون باشینده شرمه ینگلیغ دور قاشینگ اوزره گره،
عارض اوزره نقطه مثلی دور عذارینگ اوزره خال.

گويا قیلغه‌ی شفق بیرله قویاشتین رنگ حل،
صنع نقاشی تصور قیلسه چهره‌نگدین مثال.

میده ساقی عکسینی کۈرگچ اېگیلیدیم اۋپگه‌لی،
باش کۈترمان اېمدی، یعنی کیم تاپیمین انفعال.

ای نوایی، اولگیل اندین بورنه کیم یېتکی اجل،
کیم اجل یېتکچ اولرگه بېرمه‌گه‌ی شاید مجال.

۳۷۹

قىلدى آواره مېن خستەنى آواره كۈنگۈل،
خان و مانىمنى قرا قىلدى يوزى قاره كۈنگۈل.

ايتلرېنگ آليده يوز پاره كۈنگۈلنى سالدېم،
مونه كۈر، هر بيرى نېنگ آغزىده بير پاره كۈنگۈل.

يار يوزى پاره قىلىپ باردى حزين كۈنگۈلۈمنى،
هيچ اۋسنمەي يەنە هر لحظه بارور پاره كۈنگۈل.

ياش تۈكر كۈنگۈلۈم انېنگ وصلەتە ميل ايله سە كۈز،
قان يوتر كۈز، يوزىنى ايله سە نطاره كۈنگۈل.

ناز اۋقېن جان بيله جىسمىمغە اوروب خود اۋتۇنگ،
باق كە قالدى باقىيان يالبارە-يالبارە كۈنگۈل.

لعبت دەر فرېبى بيله بازى يېمە كېم،
بېرمەدى كېمسەگە بو شاھد مكارە كۈنگۈل.

كۈنگۈلى اېستر كە، سېنوق بۇلسە نوايى كۈنگۈلى،
بۇلمەسون شېشە كۈنگۈل قىلدىدە، وە، خارە كۈنگۈل.

۳۸۰

نې قاش و يوز دورور سىنگە، اى صنع لايزال،
بېر آي باشىدە كۈرمەدى هيچ كېم ايكى ھلال.

آغزى سۈزىن دېمكەدە بېلى يادىمە كېلور،
آرې دقيق نكتە ارا يوز بېرور خيال.

كۆز و قاشىنىڭ بىنە نرگىس باشىندە نون،
زلفونىڭ اياغىنىڭ آستىدە چون ورد اياغى دال.

خط لفظى كىم كە يازسە قۇير نقتە يوقارى،
مشكىن خطىنىڭ نىنىڭ اوستىدە انداق كۆرۈندى خال.

سرسىز اپرور ھمىشە بو گلشندە سرودېك،
آزادەيى كە بۇلسە مزاجىدە اعتدال.

وصل اىسترم عيان قىلىيان اشك درلرلن،
سائل يتىملر يىغىب اپتكىن كېيى سوال.

اول چابك آلىدە باشىن اپتى نوايى گوى،
چوگان سرگذشتىمە بس دور گواه حال.

۳۸۱

يارب، اول آى حسنىن ابل فھمىغە نامفھوم قىل،
بۇيلە موجود اپتمە سنگ، اول مېنى معدوم قىل.

برچە يوزدىن اۋيلە كىم كۆزۈمنى محروم ايلە دىنگ،
برچە كۆزنى اول پريوش يوزىدىن محروم قىل.

بۇلسە عشقىمدە قصورى كۈنگلىنى مېندىن ساووت،
عشقىم ار پاك اۋلسە، تاش دېك كۈنگلىن آنىنگ موم قىل.

قىلسە ظلم اول ظالم اېلنى قىلمە غىل، يارب، زبون،

چون تظلم دور ایشیم دایم مېنى مظلوم قیل.

تا کۆزوم قوتلوغ یوزیدین اۆزگه ساری توشمه سین،
هر نې کۆز کۆرگه ی مېنینگ بختیمغه آنی شوم قیل.

تا تیریکمېن عشقی حرفی دور ایچیمده، ای رفیق،
اۆلسم آنی-اؤق مزاریم تاشیده مرقوم قیل.

دېمه کیم، بار مو اېکین مھریم نوایی کۆنگلیده،
انده سېنسېن، بیر تامل ایله بان معلوم قیل.

۳۸۲

بۆینومغه قیده قیلغه ی اول آی قۇلینی مایل،
کیم بس دورور قلاده ایت بۆینیغه حمایل.

یوز خوب جلوه قیلسه بارمس کۆزومدین اول آی
کیم ذرّه خیلی بۆلمس هرگز قویاشقه حایل.

اول کیم کولوب کۆزیگه سورمه چېکر نې فکری
گر کۆز یاشیمدین اؤلغه ی کۆزنینگ قراسی زایل.

نازاپت که سرو و گلده، بل انس و جنده یۇقتور،
بو حسن و بو لطافت، بو شکل و بو شمایل.

قیل سیغمس آغزینگ ایچره کۆپ نکته تانگ اېمس کیم،
نازکوک اۆلدى قیلدین هر سۆزگه بۆلسه قایل.

بو شکر اوچون کرم قیل، سائلغه، ای غنی کیم،
اېر مستور اول توانگر، سېن خدمتیده سائل.

هجرانده بېخود ایستر اؤزنی نوایی، ای شیخ،
آی و ییل آنی اوسروک کؤرسنگ، دېمه که، آییل.

۳۸۳

زلفینی آچمیش صبا یوزیگه چیقمیش تابِ مُل،
زلف و یوزی عکسیدین تۇنیغه توشمیش دال و گل.
قان یوتوب کؤنگلوم تیلر هر لحظه عشقینگ داغینی،
قرص لیمو ایسته گن دېک اهلِ عشرت اېچسه مل.
پر اېمس بلبده. بلکیم آتشین گل شوقیدین
گلخنی دېوانه دور کیم، یوقمیش اعضاسیغه کول.

یوز و خالینگ اؤتی تا داغ اېتتی، بؤلْمیش لاله دېک
کوه غم تیغ جفادین چاک-چاک اؤلغان کؤنگول.

بارغوسی گردینگ فلک که باد پالر سیریدین،
باد پایینگه نې آسیغ اطلس افلاک جُل.

گر بنفشه خطینگه قوللوق قیلوردین قاچمه دی،
اېل ارا نېوچون اېرور باشی قویی، بؤینیده غول.

کیرپیک اېرمس کیم نوایی اؤتکی اول چابک دېبان،
کؤز قرا سوییغه باغلپتور قمیشلر بیرله پل.

كۈنگلونگ ايستر يارلر بيرلە ھميشە شاد بۇل،
مېندىن و كىمدىن كە كۈنگلونگ ايستەمس آزاد بۇل.

گرچە صبرىم اويى يىنگلىغ ايله دىنگ ويران مېنى،
دايما، يارب كە، حسنونگ ملكى دېك آباد بۇل.

مېن چېكىب اندوھ اۋلەي، اى جانى بۇلسون اول مسيح
ساورول، اى چرخ نگون، وى دھردون، بر باد بۇل.

بېوفالر ظلم و بېدادىغە اېرمىسېن حريق،
اى سىنوق كۈنگلوم، اگر خود شيشە، گر پولاد بۇل.

توتتوم اۋلمكدىن تىرىلمك ھجرىدە تېنگ دور منگە،
اېمدى گر بېرگىل زلال خضر، اگر جلاد بۇل.

چېكمە باش كىم اېمن اېرمىسېن خزان يغماسيدىن،
بو چمن ايچرە اگر سوسن، اگر شمشاد بۇل.

اى نوايى، عالم اھليغە چو يۇق اېرمىش وفا،
كېل و مېندىن نارى، بېكسلىك بيلە معتاد بۇل.

قامتىنگە ھەر زمان يوز جلوه، اى زېبا نھال،
ناتوان كۈنگلومغە ھەر بير جلوه سىدىن اۋزگە حال.

اېورولور كۈنگلومده اول چابك خيالى هر كېچە،
شعلەلىق كۈنگلومنى قىلدى چرخ فانوسى خيال.

باش قۇيەى دېدىم اياغى توفراغىغە دېدى: قۇي
بوسە ايسىتب لعل رنگين سۇردوم اېرسە، دېدى: آل.

غنىچە خندان كە، دېرلر منفعل دور آغزىدىن،
لېك كولمك بىرلە ايسىتر، قىلسە دفع انفعال.

خطّ و خالى حسرتىدىن آنچه اشكىم آفتى كيم،
بىر كۈزوم توتتى غبار و بىر كۈزومگە توشتى خال.

دور خَم قىلدى قىدىنگى، گوشه‌يى توت، يۇق عصا،
نېگە كيم، درد. اؤق بۇلور ظاهر الف ياندشسە دال.

اى كۈز، آنسىز اۋزگە يوز كۈرمكنى قىلميشسېن هوس،
هجر تيغىدىن اۋيول، ياخود نوايىدىن اويال.

۳۸۶

باغ مېن دېك سرغريب، بلبل مېنىنگ دېك بۇلدى لال،
گۇيا مونداق بۇلور بىر گلدىن ايريلغانغە حال.

يېردە گى ي فراغ غريب و خاكسار ار بۇلمەسە،
مېن كېيى نې وجهدىن دور يوزى سريغ، اشكى آل.

سوغە كيم توشميش قىزرغان برگلر، كۈرگن كيشى
كۈز ياشيم ايچرە بغير پرگالەسى ايلر خيال.

شاخ مجنون دور که، عریان بؤلوبان افغان قیلور،
برگ لیلی دور که، نیل و ایگنه بیرله قازدی خال.

هجر ارا آهیمغه باقمه ی باردی، لپکن شکر ابرور
کیم خزانده سروغه آسیب یپتکورمس شمال.

بو سریغ رخسار اوزه هر ساری اشکیم اوخششور
بیر خزانلیغ باغ ایچینده هر طرف روشن زلال.

وصل انگله عشق باغی نینگ بهاریدین نشان،
هجر بیلگیل گر تیلر بؤلسنگ، خزانیدین مثال.

بو چمن رعنالری سرکشلیک ایتگندین نی سود
کیم خزان تاراجیدین اېمن اېمستور بیر نهال.

ای نوایی، بو خزان اولغهی بهار ایله بدل،
کېلسه دولت گلبنی شهزاده صاحب جمال.

۳۸۷

سرو نازیم، یوق عجب، گر روزه دین تاپمیش ملال
کیم سو ایچمسدین تاپر پژمرده لیک نازک نهال.

ییلر آغزیم کیم قوروتمیشسېن زلال وصل اوچون،
بیلدینگ ابرکین شمه یی، کیم صعب ابرکن دور بو حال.

کون توش اولمه ی روزه و ایسیغدین اول آی قیلدی ضعف،

نې حرارت دور قوياش، يارب كه، تاپقه يسهېن زوال.

روژه ضعفيدين كه چيقمس اويدين اؤلميش ماه نو،
ضعف كؤرگيل كيم، تؤلون آييمنى ايلپتور هلال.

روژه مئهرى ساغينيپ دېرمېن كه، آلم تيشله بان
هر قچان كؤرسم انينگ شيرين دوداغى اوزره خال.

شربتېن دېرمېن ابزهى جان شيره سيدين قيل مدد،
ظلمتېنگدين تيره ليك، اى خضر وچشمنگدين زلال.

اېلگه شام اؤلميش، نوايغه يوزونگدين صبح ابرور
كيم ساغينسون روزه شامين، بار اېگچ صبح وصال.

۳۸۸

اويغانيب صبح اويقوسيدين مهر شمعين تار قيل،
كؤز آچيب هر گوشه دين بير فتنه نى بيدار قيل!

كؤزنى افسون ساز اېتيب جانبخش لبدين نكته ايت،
سامري سحرين، مسيحا معجزين اظهار قيل!

كؤز توله اويقو آغيرليق سالماق اوچون قؤل آچيب،
اول محال اميد بيرله بيزنى منتدار قيل!

سهپ قرا يېر اوزره خواب آلود كؤزگه سو اوروب،
كؤز يېترچه يېرنى اول سو بيرله نرگسزار قيل!

اويقودين اول گلنى كۆرمك گر مرادىم بۆلمەسە،
كۆزومە، يارب كە، ھەر بىر كىپرېگىن بىر خار قىل!

دۋست مطلوب اېرسە غفلت اويقوسىدىن كۆز آچىب
اوچماق امىدى، تاموغ بىمىدىن استغفار قىل!

اى نوايى، توشته اول آى دەدى كىم، وصل ايستەمە!
عكس اېرور توش، سېن طلبىنى اولچە ممكەن بار قىل!

۳۸۹

اول مكھل كۆز جفاسىدىن اگر بۆلسم قىل،
سورمە تاشىدىن يىسب قېرىم قۇيۇنگ باشىدە مېل.

لعلى جان آلمان دىلىلى اول كە، يۇقتور اېلگە جان،
بو كە اېلگە جان بغيشلەيدور، بو داغى بىر دىل.

رشكىدىن ھەر سارى عشقىنگ داغىن ايلرمېن نھان،
باغله بان مرھم درم ھەر يان ياشورغان دېك بخیل.

يوزدە يۇللر شكلى توتمىش قان ياشىم نىنگ خطلىرى،
كېل كە، قىلمىش كۆز خىالىنگ خىلىگە قانين سبىل.

عارضىنگىدىن خوى منگە تامغەى مو دېب توفراغ مېن،
اول كىشى يىنگلىغ كە، بۇلغەى آبرو ايستب ذلىل.

ساقيا، توت بىر قدح مى كىم، اېرىتگەى تاشنى
كىم غم و اندوۋە غذاسىدىن اېرور كۈنگلوم ثقىل.

تا انى ايچكچ، نوايىغە آچىلغەى گلستان،
گر سبك روحانه كىرسە اۋتقە انداق كىم خلیل.

۳۹۰

قىلغەلى خلعتىن اول سرو گل اندام قىزىل،
قىلدى قان تۆكمك ايله دهرنى گلغام قىزىل.

لعلى شوقى بيله گر بۆلسە كۆنگول قان نې عجب،
كىم قىزىل مى بيله تۆلسە كۆرونور جام قىزىل.

چرخ اگر حاليمه قان يىغلمه دى هجر تونى،
نېگه پس بۆلدى شفقدىن يوزى اول شام قىزىل.

قىلدى قانلىغ كۆنگول اول زلف خيالىن رنگين،
رقم اېتكىن كېبى شنگرف بيله لام قىزىل.

گل سېورمېن كه، بو رنگ اېتكهلى خلعت اول شوخ
رنگلر ايچره بېرور كۆنگلومه آرام قىزىل.

حسن ساتمه شفقىنگ رنگيدىن، اى زال سېهر،
كىم انى قۇيمغوسى گردش ايام قىزىل.

كام دل گرچه نوايىغە مى لعلىنگ اېرور،
بۆلغوسى چهرهسى خوناب ايله ناکام قىزىل.

۳۹۱

يۇقتورور عالمده اهل عشق دېك بېچاره اېل،
هجر ظلمى بىرلە خان و مانىدىن آواره اېل.

عشق سىلابى جفاسى بىرلە هجران تيغىدىن
خاطرى ويران جماعت، كۈنگلى يوز مىنگ پارە اېل.

چىقسىنگ اويدىن تېلبە بۇلماق عالم اھلى نې عجب
كۈرمەمىش ھرگز چو سېن دېك بىر پرى رخسارە اېل.

انگله كىم، آواره بۇلغانلردور اول آى عشقىدىن،
هجر صحراسىدە كۈرسىنگ تاغ و وادى آره اېل.

اۋرتب، اى هجران، مېنى دودىمنى قىل كويىدە مىغ،
تا اول آى حسنىغە ايلەى آلمە غاى نظارە اېل.

چون قضا تغيير تاپمس كامى آزليغدىن، گلە
محض نا هموارليغ دور ايلەمك همواره اېل.

اى نوايى، فتنە ياغدورسە اول آى عشق اھليغە،
آسماندىن ھر نې كىم كېلسە نې قىلغەى چارە اېل؟

۳۹۲

كېچە باردى يار و اندىن قالمەدى گريان كۈنگول،
آليدە مشعل ساغىندىم بار اېمىش سوزان كۈنگول.

اول صفت كىم، غنچە نىنگ طبعيدە بۇلغەى گل نھان،
عارضىنگ نقشىن ايچىندە ايلەمىش پنهان كۈنگول.

تا پەس اېردىم كويىدە ايستىپ، اگر خود زخمىدىن
تۆكمەسە اېردى قە يان عزم ايله گندىن قان كۈنگۈل.

غنىچە اميد اگر لعلينگدىن اوزم، عيب اېمس
كىم كيشىگە جانىدىن اوزمك اېمس آسان كۈنگۈل.

ھجر ارا جانلر بېرىپ چون كيم قۇشولدى يارىغە،
اى رفيق، ايرىلماق اندىن اېمدى نې امكان كۈنگۈل.

بىر نصيحت قىلغوم، اى عشق اھلى، ايلنگ استماع،
سالمنگىز ھر سارى كۈز، تا بۆلمەسون ھر يان كۈنگۈل.

اى نوايى، ياردىن توشمك يىراق امكان اېمس،
كويىدىن چون اختيار اېتمس دې ھجران كۈنگۈل.

«م» حرفى نىنگ محبوبلرى نىنگ ملاحتى «غرايب» دىن

۳۹۳

بۆلمىش انداق منقطع اھل زماندىن الفتىم،
كىم اوزوم بىرلە چىقىشمس ھم زمانى صحبتىم.

اى خوش اول كيم، توتمىش اېردى وحش ايله صحرا دە انس،
موحش احوالى منگە كيم بار اوزومدىن وحشتىم.

اىستىرم قاچماق عدم وادىسىدىن كيم، كىرگەلى
وامق و فرھاد و مجنون بس غلو دور خلوتىم.

تۇلغانورمېن اۋزلوگومدىن چىقغەلى بو كىم اېرور،
درد وادىسىدە سرگردان قويون دېك ھىتتىم.

اي اجل، تن خرقەسىن كويدور كە، بۇلمىش بس آغىر،
بو ملامت اۋقلىرى بىرلە تىكىلگن كسوتىم.

اي فلک، انجم اوشاق تاشين يىغيب باشىنگە اور،
چون فنا ميخانهسى خشتىدين اۋلدى تربتيم.

يېتى كۆكنى كۆك ورقلردېك ساوورغەى هر طرف،
طاق مينايى ارا چيرملسه آه حسرتيم.

قۇى دُر و فيروزه بحشين كيم، نجوم و چرخنى
نيلوفر برگى اوزه شبنمچه كۆرمىس ھمتيم.

لعل دېك باشيم آسلسون غرقه خوناب اولوب،
لعل تىككن سلطنت تاجيغه بۇلسه رغبتيم.

طرفه كۆركيم، خلق كامى بىرلە عمروم بۇلدى صرف،
طرفه راق بو كيم بىراوگە ياقمەدى بىر خدمتيم.

اي نوايى، ايگى عالمدين كېچيب تاپتيم وصال،
بو ايگى بتخانهدين اېرمىش بو يۇلدە آفتيم.

۳۹۴

اول پرى نظاره سيغه، وه كه، يۇقتور طاقتيم،

كىم قىچان قىلىسم نظر دېوانە ايلر حىرتىم.

پس نې نوع ايلهى تمنا كىم، وصالى شمعيدىن
هجر شامى گە. گهى بۇلغەى منور صحبتىم.

صحبتيدە بار ھم تاپسم بو طالع قيدە كىم،
بىر نفس محرملىرى سلكيدە بۇلغەى خدمتىم.

خدمتىغە محرم اۋلىسم ھم قىچان امكانى بار،
كىم دېگەى بىر لحظه بى بۇلغەى حريف خلوتىم.

بۇلسە ھم خلوت مىسر، وە كە، ھرگز يۇقتورور
پاى بوس دولتىن ظاھر قىلورغە جرأتىم.

گر اياق سونسە كۈزومگە ھم كۈنگول نې واى كىم،
اول زمان كۈز رشكىدىن كويدورگوسيدور غيرتىم.

وصل اميدىن قۋى نوابى كىم، خيالى دور محال،
بو محال اميد ايله ھر لحظه بېرمە زحمتىم.

۳۹۵

چمندە مونسىم نې سرو اېرور، نې گل، نې سنبل ھم،
منگە سروې كېرەك كىم، ساچى سنبل دور، يوزى گل ھم.

عجب يۇق تۇلغانىب جسمىم، قاررسە صبح عيشىم كىم،
توشوب اول كاكل اوزرە چىن، يوزىگە توشتى كاكل ھم.

دېمىنگ اول شوخ ايله اصحاب بزمين قيل تفرج كيم،
تلفظ ايله‌ى آلمان بو حكايتنى، تخيل هم.

يوزونگ بيرله قوياش تعريفده گر دور ابرور حاصل،
كېلور زنجير زلفونگ وصفيده لازم تسلسل هم.

يوز و قديغه حور و طوبى اوخشر دېسېن، اى واعظ،
يىراق ابرمس سؤز ايتورده گهي قيلسنگ تحمل هم.

چېكېب كوه فراقين صبر قىلدېم، و صليغه يېتكچ
فغان چېكسم عجب يوق مونچه اوق بولغهى تحمل هم،

يوزونگ شوقيده كؤنگلوم آهى شمع و گلگه اوت سالدى،
كه كويدى ناتوان پروانه و كول بولدى بلبل هم.

غنيمت انگله سون بلبلنى گل، يېتكچ كه بوستاندين
اوچر گل يفراغى هم، قالمس اوچمه‌ى گرچه بلبل هم.

خمار او لتورميش ابردى بولمه سنگ مغ ديرىغه عازم،
بو ايشگه، اى نوايى، ايله‌دى تېنگرى سېنى ملهم.

۳۹۶

نې تانگ عذاريم اگر سرغريب، قيزردى ياشيم،
كه يوز قرالغ و عصيان بيله آقردى ياشيم.

قوياش كېبى يوز ايله تاغ دېك غمين نېته‌يين،
مېنينگ كه تاغ باشيغه يېتيدورور قوياشيم.

مگر که جان تلشور وقت اوچون عیان بؤلغهی
ملاعبه یوزیدین خوبلر بیله تالاشیم.

زمان اپلی گر اوروشسون و گر یرشسونلر،
که نی اوروشوم الر بیرله بار و نی یراشیم.

اؤقوغان اپلنی هلاک ایله گهی کتابه سیده،
ایچیمده گینی عیان قیلسه قیریم اوزره تاشیم.

یسه سهرلر نی عجب دیر اوزره مزاریمنی
مپینگ که مغیچهلر دور حریف جرعه کشیم.

نواپیا، مگر ادبار گردینی یوزدین
یوغ ندامت و حسرت بیله تۆکولسه یاشیم.

۳۹۷

هجر تاشی نینگ کۆکومتول داغیدین کویدی تنیم،
آه کیم، گوگرد اؤتی بیرله توتشتی خرمنیم.

تیره کلبم ایچره اؤت سالدی فراقینگ، وای کیم،
یارودی کویمک اؤتی بیرله قارانغو مسکنیم.

نیلدین خال و الف یوز اوزره تا نقش ایله دینگ،
داغ کویدورمک ایشیم بؤلمیش، الف کپسمک فنیم.

عشق ارا بۆلدوم غنی، کۆنگلوم ارا پیکانیدین،

كىم تۇلۇپتور اول جواھر بىرلە اوشبو مخزنيم.

زوروق بىرلە بېزبدور گل يوزين، وه، طرفه كۇر
كىم بهار ايچره خزان ظاھر قىليپتور گلشنيم.

اېمن اؤلماڭ خانقاھ و خلوت ايچره عجبدين،
زاھدا، ميخاڭە ملكيم، كۇپ ايچى دور مأمنيم.

اي نوايى، اول خط اېتميش روزگاريمنى قرا،
تانگ اېمس يىرتوق يقا بىرلە قلم دېك شيونيم.

۳۹۸

قىلغەلى يوز تىل كېيى كۇنگلومنى چاك اول قاتليم،
تىغ عشقى لذتين ايلر حكايت هر تيليم.

هر كېچە غم تاغى ايچره جان يېتىب آغزيمغە، بار
مشفقيم باش اوزره بوم و كۆزى شمع محفليم.

يىغلەغان سايى سريغراق دور يوزوم، طالع كۇرونك
كىم ساچرمېن دانه و اندين سمان دور حاصليم.

حلقة - حلقة زلفى دامى ايچره مېن، وه كيم، كېلور،
تۇش - تۇشيمدين نيش هجر و بو زره دور حايليم.

غم سپاھى آليدين قاچماق نې امكان كيم، بېرور
آه اۋتى و اشك قانيدىن نشان هر منزليم.

نېگه دهر آيا وفا اهلى نينگ ايستر اولمگين،
آه كيم، اولگومدورور حل بولمه يين بو مشكليم.

اي نوايى، قيلمه كوپ مجنون حديثى نقلينى،
كيم مېن اپتسم نقل، مجنون بولغوسيدور ناقليم.

www.ezgu.org

بھار بۇلدى و گل مىلى قىلمەدى كۈنگلوم،
 آچىلدى غنچە و لېكن آچىلمەدى كۈنگلوم.

يوزونگ خىالى ايله واله اېردىم انداق كىم،
 بھار بۇلدى و گل مىلى قىلمەدى كۈنگلوم.

گم اۋلدى باغده آغزىنگ خىالىدىن، يوز وە،
 كە غنچەلر آرە اىستب، تاپىلمەدى كۈنگلوم.

كۈزومدە جلوه قىلىپ، كۈنگلوم الماق اىستەدى گل.
 ايتىنگ ايزىچە آنى كۈزگە ايلمەدى كۈنگلوم.

يوزونگ نظارەسىدە مست و محو اېدى، يعنى
 كە گل چاغىدە زمانې ايلمەدى كۈنگلوم.

زمانە گلبنىدە غنچەدېك دور اېل كۈنگلى،
 الرغە شكر كە بارې قاتىلمەدى كۈنگلوم.

نوايى غنچە تىلب، كۈنگلوم آغزىن اېتتى ھوس،
 اگرچە تاپمەدى، لېكن يانگىلمەدى كۈنگلوم.

مگر كە كۈز يۈلىدىن آقتى قان بۇلوب يورەگىم،
 كە تاغ اېتكلىرىدېك لالە گون دورور اېتگىم.

نې توش كە، ھجرى بلاسىن كۈرردە سېسكىنىم،

تۆكۈلدەمك بىلە قۇشنىنى اويغاتور يوره گيم.

غمىنگ بۇغون-بۇغونومنى اييردى هم خوشتور
ايتىنگگە تشله ماق اوچون بيرين-بيرين سۇنگگيم.

اېمس بو حال كه، كۆز عارضىنگغه يېتكندە
قاليدورور ياپيشيب، عين شوقدين نېنگيم.

نې بزم اېرور مى هجرىنگ سومورمگيم، هيها
كه حسرت ايلكى آوچ قاقماغىمدورور گزگيم.

دېمىنگ كه، قاشلىرى محرابيده تىلك تىله گين
مىنگه كه قاشلىرى محرابى-اوق دورور تىلگيم.

چمىندە سوسن و رىنا قدىغه مايلىمىن،
كه سوسنى تۇن ايله جلوه كۆپ قىلور مىرگيم.

۴۰۱

كۆنگول جان بيرله باردى همرهىنگ، مېن درد ايله تورردوم،
سىنگه جان بيرله كۆنگلومنى، سېنى تېنگرىگه تاپشوردوم.

نشان دور تيره بۇلغان اختر بختيم سواديدىن
توگانلر كيم، فراقىنگ اۋتيدىن غم شامى كويدوردوم.

يىغاچ بيرله باشاق كيم، تنده قالميش اول دورور محرم
جنوندىن كيم، فراقىنگ اۋقلىرىن جىسمىمده سىندوردوم.

توتشدى شمع دېك ھر برماغيم ھجران شراريدىن،
ايلگى مرھم قۇيەى دېب چۈن كۈنگۈل چاكيگە يېتكۈردۈم.

چو اول كافر چىقر كۈز سالمە غەيسيز، اى مسلمانلر
كە مېن بېچارە كۈنگلۈمنى باقىب تورغونچە آلدوردۈم.

قاتىدور كۈزلىرىم كىم، نې ياپىلماق، نې تحرک بار،
قىيا باققى مو بىر دېب عزم اېتردە بسكە تېلموردۈم.

يوزىن كۈرگىچ باشىمغە تۈشتى مشكىن زلفى سوداسى،
فغان كىم، بىر باقىشدا يۈز بلا باشىمغە كېلتوردۈم.

كۈنگۈل تىنمىسقا قالمىش اېردى، ھر نۇع آرزۇ بىرلە،
رضا كويىدە تا قۇيدوم قدم كۈنگلۈمنى تىندوردۈم.

مکان گلخن كولین قىلدىم نوایى، تېلەدېك يعنى
جنون تاراجيدىن آخر قرا توفراققە اۋلتوردۈم.

۴۰۲

عينِ ضعيفمدين قۇلوم چۈن قۇلدەدينگ، اى دلبريم،
قۇيمە ايلگىمنى كە قۇرقرمېن تۈكۈلگەى پىكرىم.

تا جنون بېماريمېن، گلخن نىنگ اۋتلۇغ كوللرى،
بۇلدى گلگون رشتەدىن گللر تىكىلگن بىستىرىم.

ساووق آھىمدىن ضرر تاپقى اېدىم غم بزمىدە
جسم اويىندە بۇلمەسە اۋتلۇغ كۈنگۈلدىن مجمرىم.

قطره خويلر ايچره اول عارضنى كوردوم، اي رفيق،
اؤلمگيم اپرمس عجب كيم، سوگه توشميش اختريم.

دېمه، لعليم شوقيدىن سيقرمه دىنگ قان بير قدح،
مېن ايچرمېن، كؤز تۆكر، نېتىب توگنسون ساغريم.

گلشن فقر ايچره تا كيرديم، اپرور بلكيم اپمس
گنبد نيلوفري گلشنده بير نيلوفريم.

هجر تيغى كؤپ اوچون جسميمده هر يان چېكىتى باش،
اي نوايي، مېن مذلّت طايىرى، بو دور پريم.

۴۰۳

تون آقشام بؤلدى و كېلمس مېنينگ شمع شېستانيم،
بو اندوه اؤتيدىن هر دم كوير پروانه دېك جانيم.

نې غم كؤرگوزسه كؤكسوم پاره سين چاك گريبانيم،
كؤرونمس بؤلسه كؤكسوم ياره سيدىن داغ پنهانيم.

غميدىن دُر مكنون دېك، سرشكيم آقتى جيحون دېك،
مزين قىلدى گردون دېك جهاننى اشك غلتانيم.

فلك هم تؤلدى كوكبدين، قوياش هم توشتى اشهدىن،
كېليب توشمس بو مركبدين، مېنينگ خورشيد رخشانيم.

جهاننى ظلمت اېتتى چه، بو ظلمت ايچره اؤلگوم، وه،

منگه بۇلسنگ نې خضر ره، يېتېب، اى آب حيوانيم.

دېمه كۆكتين قوياش كېتميش، فلک كه تيره ليک يېتميش،
اول آي هجریده تار اېتميش فلکني دود افغانيم.

نوايي کيبي هجراندين، بو آقشام اۆلدوم افغاندين،
غميم يۇق بۇيله يوز جاندين، يېتېب گر کېلسه جانانيم.

۴۰۴

عشق ايله بۇلدوم مثل، سودا بيلن افسانه هم،
شکر لله کيم، ينه عاشقمېن و دېوانه هم.

تا اونوتتي آشنالېغ رسمين اول بېگانه وش،
آشنا ييغله مېنينگ حاليم كۆروب بېگانه هم.

غم توني مېن دورمېن آه و اشکدين شمعي اؤچوب،
باشيمه يېمرولگه لي تورميش بوزوغ کاشانه هم.

اېلگه مھرينگ بار، بوزوق كۆنگلومگه هم بير ذره باق،
کيم قوياشينگ تابيدين محروم اېمس ويرانه هم.

اي ملاحه شمعي هر ساعت مېني کويدورمه کيم،
کۆپ يارومس شمع اگرچه اؤرتنور پروانه هم.

يۇق، بو دير ايچره بېرور جام اجل طعميني مي،
کيم اېرور پيمانه تۇلماقدين نشان پيمانه هم.

ای نوایی، گر دېسنگ، اول طرفه قوشنی صید اېتهی،
رشته جسمینگنی دام اېت، کوز یاشینگنی دانه هم.

۴۰۵

کېچه اول مهوشنی یاد ایلې فراوان ییغله دیم،
مهریم آشتی صبح دېک هر نېچه کیم قان ییغله دیم.

شمع اوّل آقشام-اوق کویدی فغانیم اؤتیدین،
کیم مېن اؤت ساچقان بولوت دېک تارتیب افغان ییغله دیم.

تون قارانغو، کلبه خلوت، هجر دین کؤنگلوم توله،
تاش اوروب کؤکسومگه تا بار اېردی امکان ییغله دیم.

یار هجریدین کیشیگه آیته آلمس غصه نی،
کؤنگلوم اېتتی شرح و مېن مهجور و پڑمان ییغله دیم.

چرخ هم تۆکتی قویاش نینگ هجریدین کوکب، ولې
ییغله ماق اول اېردی کیم، مېن زار گریان ییغله دیم.

صبح دېک خورشید وصلیدین اگر کولسم نې تانگ
مېن که، صبح وصل اوچون کؤپ شام هجران ییغله دیم.

ای نوایی، تاش اېشیتسه نوحه قیلغه ی آشکار،
یؤق عجب گر بیر تون اؤز حالیمغه پنهان ییغله دیم.

۴۰۶

ساقيا، كېچە گى مى نشئە سىدىن جان تاپتيم،
ظلمت ايچرە مثلاً چشمه حيوان تاپتيم.

آغزىنگە آلمە آليب كيم منگە تيشلەب بېردىنگ،
هم اوشول آغيز ايله گوى زىندان تاپتيم.

بادە تابى و يوزونگ پرتويدىن تيرە كېچە
تولون آى كوردوم و خورشيد درخشان تاپتيم.

مهردين كۆپ نفس اورمە دېرايدىم تانگە باقىب،
كيم مېن اوشبو كېچە خورشيدنى مېمان تاپتيم.

مېن تۆكوب اشك فلەك دېك ولې بېخودلور غومە
دېمدم يارومە غور صېحنى خندان تاپتيم.

تېلەبە كۆنگلوم كە، لب و زلفونگ اوچون ايتميش اېدى،
كېچە ميخانه ارا مست و پريشان تاپتيم.

چرخدين مهر طمع توتتوم و آفت كوردوم،
ياردىن وصل طلب قىلدىم و هجران تاپتيم.

زلفى فكريده نوايىنى لېبى تيرگوزدى،
ساقيا، كېچە گى مى نشئە سىدىن جان تاپتيم.

۴۰۷

بىتىگىنگىدىن كە، سوادىنى كوروب جان تاپتيم،
ظلمت ايچرە مثلاً چشمه حيوان تاپتيم.

بهردين قطره غه تعظيم ايله تحسين كوردوم،
مهردين ذره غه اعزاز ايله احسان تاپتيم.

هر «الف» سرو اېدى، «ح» غنچه و «دالى» سنبل.
دېمه يين نامه كه، بير تازه گلستان تاپتيم.

عنبرين «مد» لرى كيم مهر اېدى مضمونى انينگ،
هر اوزون كېچه ده بير مهر درخشان تاپتيم.

قطره قانلر كه، كوزوم ساچتى اوقور حالتیده
هر شبه اوستیده بير لعل بدخشان تاپتيم.

نې شبه اېردى كه، مضمونى بيله اشكىمدین
هر شبه اوستیده بير لعل بدخشان تاپتيم.

گه- گهې خسته نوایى تنیغه جان يېتكور
بیتيگینگدين كه، سوادینی كوروب جان تاپتيم.

۴۰۸

وصال تخمینی اېكتيم، فراق بر تاپتيم،
وفا نهالینی تيكتم، جفا ثمر تاپتيم.

محبت اؤتى كه ياقتم وصال شمعی اوچون
اوزومنى عاقبت اول اؤتدين- اوق شرر تاپتيم.

مېن اشك بيرله يودوم غير نقشینی كوزدين،

ولېک غیرغہ- اؤق یاردین نظر تاپتیم.

امید بحریده هر نېچه غوطه کیم اوردوم،
صدف کؤزومدین و کؤز یاشیدین گهر تاپتیم.

دېدیم: بو رمزنی انگلهی، ولې خرد پیرین
بو نکته کیفیتی ایچره بېخبر تاپتیم.

چو درد عشق بیابانلرینی قیلدیم قطع،
عدم ولایتیدین نری یوز خطر تاپتیم.

نواييا، کېچه- کوندوز خط و یوزینی تیلې،
شبانہ نوحہ بیله نالہ سحر تاپتیم.

۴۰۹

وصل برگین اوز که مېن هجران گلین بوی اېتمیشم،
مهر ترکین توت که مېن محنت بیله خوی اېتمیشم.

نخل قدینگغه که، بېردیم کؤز یاشیدین پرورش،
اېمدی باش تارتر که، یاشدین یوز ساری جوی اېتمیشم.

هر سری جولان قیلیب یېتکچ منگه چېکتینگ عنان
بو اېکین جرموم که، یؤلونگده باشیم گوی اېتمیشم.

نامه ایچره چیرمشیان سنگه یېتکهیمین مو دېب،
عارضیم کهبرگ و جسمیم رشته سین موی اېتمیشم.

می بؤلوب اشکیم، غذا بغریم، سرود افغانلریم،
کېلینگ اهل عشق کیم، غم خیلگه توی اېتمیشم.

شیخ باقی بؤلسون و زرق ایچره تینمسلیغ که، مېن
تینمیشم تا کیم فنا دیری سری روی اېتمیشم.

تاپمهدیم گلچهره لر دین شمه یی بوی وفا،
ای نوایی، نېچه کیم اېل دېک تک و پوی اېتمیشم.

۴۱۰

تیریگ یورور مېن و بار مېندین ایرو جانانیم،
بو عمر بیرله یوروب اولمه گن مېنینگ جانیم.
بغیرده یوز خله و «وه» دېمک که یوق زهره م،
کونگولده قان توله و یوق دم اورماق امکانیم.

نې بیر انیس که، اریتسه لاله اشکیم،
نې بیر رفیق که، انگله سه داغ پنهانیم.

کوروب قاشیده محبلرنی جمع و مېن مردود،
مونکه ییبان بوزولور خاطر پریشانیم.

کونگول خود ایتتی و جان همدی بوله آلمان
بیر-ایکی لحظه که، بار اول ضعیف مهمانیم.

عزیمت اېتکه لی اول گنج حسن انداق دور،
که جغد عار قیلور کورسه اېمدی ویرانیم.

نواييا، بو نوالر كه كېچه تارترمېن،
زحل اېشيتور و خورشيد اېشيتمس افغانيم.

۴۱۱

اي قدینگ سرو روان، کویونگ بهار گلشنیم،
محنت و افغان سپینگ هجرینګده کورګن-بیلګنیم.

قبر تاشی دور بېزکلیک سر به سر گل برگیدین،
تازه-تازه داغ ایله کوهِ بلا بولغان تنیم.

چرخ محنت تاشیدین تا روزن آچتی هر طرف،
مېن ملامت بلبلې، گویا قفس دور مسکنیم.

محنت و غم اؤقلىرغە، وه كه، یوز مینگ زخملیق،
اشک سیم اندود قیلغان هیئت اؤلدى جوشنیم.

تیغې کیم، کؤکسوم اوین آچتی، اېشیک دېک دور انگه
آچیلیب یاپیلسه هر دم چاکلیک پیراهنیم.

دؤستلر، مېنى کؤنگولسيز دېب سؤررسيز، شادمېن،
بؤلمه یین مو شاد کیم، دفع اؤلمیش انداق دشمنیم.

عشق نقدی داغ غم کیرمیش نوایی کؤنگلیگه،
وه كه، بیر دم اردهادین خالی اېرمس مخزنیم.

۴۱۲

مهر كۆپ كۆرگۈزدۈم، امّا مهربانې تاپمەدېم،
جان بىسى قىلدىم فدا، آرام جانې تاپمەدېم.

غم بىلە جانىمغە يېتتىم غمگسارې كۆرمەدېم،
ھجر ايلە دلخستە بۆلدۈم، دلستانې تاپمەدېم.

عشق ارا يۈز مىنگ ملامت اۋقىغە بۆلدۈم نشان،
بىر كمان ابرودە تۈزلۈكدىن نشانې تاپمەدېم.

كۈنگلۈم ايچرە سرو اۋق دور، غنچە پىكان، گل تىكن،
دەر باغى ايچرە مۇنداق گلستانې تاپمەدېم.

حسن ملكى ايچرە سېن دېك شاھ ظالم كۆرمەدېم،
عشق كۆيىدە اۋزۈم دېك ناتوانې تاپمەدېم.

كۆپ اۋقودۇم وامق و فرھاد و مجنون قصە سىن،
اۋز ايشىمىدىن بوالعجبراق داستانې تاپمەدېم.

اول امان ايچىندە بۆلسون، اى نوايى، گرچە مېن
بىر زمان عشقىدە محنتدىن امانې تاپمەدېم.

طبع گنجىدىن معانى خردە سىن يۈز قتله حيف
كىم نثار اېتمەككە شاھ خردە دانې تاپمەدېم.

۴۱۳

آقیزدى لىمويى بۆر كۈنگىنى كۆرگچ، آنچە قان كۈنگلۈم،
كە ضعف اېتتى سريغ گل غنچەسى دېك ناتوان كۈنگلۈم.

كۈنگۈلدە بس كە غنچەنگ فكريدين خردە معنی،
يیغیمېن غنچە كۈنگلی دېك، بۇلوپتور خردەدان كۈنگلوم.

صنوبر كۈنگلیگە كۈنگلومنی اؤخستمگ كە، اؤرتبدور
نھان هر تخم امیدغە بیر داغ نھان كۈنگلوم.

بدن ویرانیدە اول حسن گنجی هجریدين گاهی
گە اؤز یالغوزلوغیدین جغدېك تارتر فغان كۈنگلوم.

در عشقینگی تا تاپمیش، اگر چاك اؤلسە سرتاسر
گهر یوتقان بلیغ ینگلیغ دم اورمس ناتوان كۈنگلوم.

انینگ دېك تاپتی سیمین ساعدینگ یادی بیله الفت،
كە عشق ایچرە بېرور فرهاد و مجنوندين نشان كۈنگلوم.

مقامی گە بلا تاغی دورور، گاهی فنا دشتی،
كە عشق ایچرە بېرور فرهاد و مجنوندين نشان كۈنگلوم.

فلک زالی غم و دردین چېكردين اؤلدوم، ای ساقی،
كېتورگین رز قیزین بات کیم، تیلر بیر نو جوان كۈنگلوم.

نوایی دېر كە، كۈنگلونگی كېتورگیل عشق كۈییدین،
به غایت یخشی دور، گر بؤلسە راضی اول یمان كۈنگلوم.

۴۱۴

نې عیب، اگر می صافی غمیده دور كۈنگلوم،

كە چىڭ حلقە زلفى خىمىدە دور كۈنگلوم.

فلەك حەقىقەتتى فەكرىدە كۆيدى اېرسە نې تانگ،
كە اژدهاى دمانىڭ دىمىدە دور كۈنگلوم.

مەنئىا، كېل و توزگىل خراشلىق اونومە
حەزىن ترانە كە، رودونگ بىمىدە دور كۈنگلوم.

نشاطدىن دېمە سۆز، نوحە بىرلە باشلە سرود،
كە درد و غەمزەلىغ عالمىدە دور كۈنگلوم.

فراق اۋتىغە توشوب دىمىدە تۆكر قان ياش،
كە آخىر اۋلگوسى اۋز ماتىمىدە دور كۈنگلوم.

نې عىب و صىلىدىن ار مرهم اۋلسە كۈنگلومدە،
ھەمىشە چونكە انىڭ مرهمىدە دور كۈنگلوم.

مى ايچ، نوايى و اھل زماندىن ايلەمە ياد،
كە اوشبو خىلىدىن اسرو رمىدە دور كۈنگلوم.

۴۱۵

ویرانەیی دور مسکنیم، اندین منگە بسیار غم،
آھیم بیلە اېشیکتە اۋت، اشکیم بیلە دېوار نم.

نوشتیدین اېلگە گفت و گو، ای هجر، ایچرمېن مېن آغو،
كاش اۋلسم و كۈنگلومنى بو اندوھدىن قوتقارسم.

قىل عشق دىرىدە مقرر، سۇگانىغە سالغىل نظر،
كىم بار بو مجمع ايچرە هر دردى كش خمار جم.

هر يېر كه انده بير نفس، عشرتقه تاپسم دسترس،
يوز قتله ايلرمېن هوس كيم بۇلسه اېردى يار هم.

ساقى، بوگون مېنى اونوت، مېن دېك دمې خونابه يوت،
مطرب نوای نوحه توت، سازينگه باغله تار بم.

دېسم كه، اى بد مهر اوغول، يوزونگ كوروب آى توتتى يۇل،
دېر: يېر قوئى گر باردى اول، بير شېرو عيار كم.

مسكين نوایى بېرسه جان، اى ديدة، هر دم توكمه قان،
اول هر نېچه قىلسه فغان، سېن اسره غيل زنهار دم.

۴۱۶

آنچه كوكب توكتى شام غم خيالىنگدين كوزوم،
كىم يارودى عاقبت صبح وصالينگدين كوزوم.

خالدين كوز تيره بولماق رسم اېرور، بو طرفه كيم،
يارودى كوز مردمى دېك طرفه خالينگدين كوزوم.

قوى عقيقي مى سهيل جام ارا، اى مغېچه،
كىم يارور اول اختر فرخنده فالينگدين كوزوم.

وصلينگه يېتتيم بحمدالله كه، ضايع بولمه دى،
اول كه قان ييغلا اېدى هر دم خيالىنگدين كوزوم.

بو سېبىدىن كىم، نېدىن سېنسيز قالىپ كۆر اۋلەمە دىم،
باقە اَلمىدور يوزونىگە انفعالىنگىدىن كۆزوم.

يىنگى آى كۆرگىچ خلاق، كۆزنى توتماق رىسم اپرور،
لېكن آچىلدى كۆروب مشكىن ھاللىنگىدىن كۆزوم.

شكرلله كىم، نوایى دېك منور دور ینە
خاك پايىنگىدىن يوزوم، شمع جمالىنگىدىن كۆزوم.

۴۱۷

يېر يوزىنى توتتى اشكىم، كۆككە يېتتى نالېشىم،
يوقارى تېنگرى و قویى سېندىن اۋزگە يۇق كېشىم.

لاجرم دېوانە و رسواى عالم بۇلغەمېن،
چون توشوپتور، اى پرى پىكر، سېنىگ بىرلە ایشىم.

تیش قىدمېن لعلینگە اوزمىمېن اندىن بو طمع
انېر ھجران بىلە بىر-بىر سوغورسەلر تېشىم.

ھىر دم ايسىق اشك و ساووغ آھدىن درماندەمېن،
يوز و زلفونگ دورىدە مونداغ كېچىر ياز و قېشىم.

تېرەلىك دود و شفق دور شعلە و انجم شرار
گۇيا كىم سالىدى اۋت ھجران تونىگە قرغېشىم.

مھرى يۇقلوقدىن اپرور ھىر تون سنان آھ ایلە،

كۆك حصارى خىلى بىرلە تانگە تېگرو سىنچىشىم.

اى نوايى، گر سېنىڭ نالنگە يىغلر عندليب،
بىر كون اول گل كۆنگلىگە ھم كار قىلغەى نالىشىم.

۴۱۸

لعلىنگ غمىدىن دىدە گريان بىلە باردىم،
كۆرمەى سېنى يوز نالە و افغان بىلە باردىم.
وصلىنگە يېتەى دېدىم و ھجرىنگە يۇلوقتوم،
امىد ايلە كېلدىم، ولې ارمان بىلە باردىم.

وصلىنگە شتاب ايلب اۋكوش غم بىلە ياندىم،
اۋق دېك كېلىبان بىر نېچە پىكان بىلە باردىم.

عالمغە وداع اپتتىم اۋشول يوز ھوسىدىن،
يوز شكر كە، آخر دمې ايمان بىلە باردىم.

عمرې تىلب ايش سىرىنى كېتمك كېرەك آخر،
كىم شىمەىى اندىن مېن حيران بىلە باردىم.

عالمغە وداع اپتتىم، آچ اول يوزنى دمې كىم،
زاد ابد اپلتى چو بو بارغان بىلە باردىم.

دېدىم كە نوايى دېك اۋلەى مھرىنگ ايلن-اۋق،
يوز شكر كە، اول وعدە و پيمان بىلە باردىم.

وادی هجرینگده بیر دم قان یوتردین قانمه دیم،
اوشبو اوتلوغ وادی ایچره تینمه دیم تا یانمه دیم.

اؤلگنیمدین سؤنگره کبلدی سؤرغه لی دردیمنی یار،
اویقو کؤرکیم، باشیمه ییتیب قویاش اویغانمه دیم.

عارضیم سرغردی آلتون دپک ساچینگ سوداسیدین،
موندین اؤزگه نقد اول سودا ارا قازغانمه دیم.

کویگه آیلندورونگ نغشیم که، هجران ضعیفه
اؤلتوروب حسرت مہنی بیر اول طرف ابلانمه دیم.

نال ینگلیغ گرچه خطینگ شوقیدین بؤلدوم ضعیف،
لپک هجرینگ تیغی باشیمغه کپلیب تؤلغانمه دیم.

سلطنت کؤرکیم، نهال مہردین عرض ایتیلر،
جز فنا میخانه سی نینگ کیریپچین یاستانمه دیم.

عشق ارا اقرار کؤپ چپکمه مہنی اؤلتورگه لی،
ای نوایی، چونکه مہن هرگز بو ایشتن تانمه دیم.

آنچه ییغلتنی جفادین دؤست دور دپ سپوگنیم
کیم کولر احوالیمه هر قیده کؤرسه دشمنیم.

دؤست کیم قیلغه ی مہنی بېداد دشمن کولگوسی،

بۇيلە دشمن كامليغدين يخشىراق دور اۋلگنيم.

دۋست دشمندين منگە كۋپرەك چو يېتكوردى جفا،
نې عجب گر اېمدى دشمن دۋستليغ بۇلغەي فنيم.

اورسە دشمن زخم اېرور مرهم توقع دۋستدين،
ايگىسى زخم اورسە تانگ يۇق چاك-چاك اۋلماق تنيم.

طعنە بيرلە بوزمە، اى دشمن، كۋنگول اويين دغى،
اوشبو بس كيم، دۋست ظلميدىن بوزولميش مسكنيم.

دۋستقە جان بېرديم و دشمن دور اېمدى، وە، نې تانگ
اۋرتەسە هم دۋست، هم دشمننى آە و شيونيم.

اى نوايى، دۋست خود يۇق، وە، نې حالت دور كە بار
باشيم اوزرە دشمن ايگى ديدە تر دامنيم.

٤٢١

خزان رنگى يوزيگە بېرسە تانگ يۇق شعلە درديم،
كيم اېلگە شمع بزم اۋلميش بهار ناز پرورديم.

اينىگ وصىلى محال و هجريدە درديم فزون هر دم،
بيراونى همدمى گر كۋرسم، افزونراق بۇلور درديم.

صبا بيرلە بولوت توغراغيمېن، كويىگە گرديمنى
بىرى اېلتىب، بىرى قۇيمەسە اندين چىققەلى گرديم.

چو سورسنگ تیغ زهر آلود کۋنگلوم آچیلور، نېوچون
کیم اول دور سبزه و قان کیم، بغیردین آقیزور وردیم.

اگر هجران تونیده عمروم اۋتتی، ای کۋنگول، غم یوق،
تاېرمېن جان اگر بیر تون یۋلوقسه ماہ شبگردیم.

خزان بیرله بهارین دهرنینگ نیلهی، چو یاشوردی
بیریسین لاله اشکیم، بیریسین چهره زردیم.

فلک دېک، ای نوایی، بۋلمه سم بیر آی فراقیده،
نېدور پس چرخ دېک تون- کون جهان گردیده ناوردیم.

۴۲۲

عقل و جان قصدیده کۋردوم اول کۋز و مژگاننی هم،
چېکتیم اول مژگان و کۋز آلیده عقل و جاننی هم.

ناوکینگ یېتکچ قیزیق کۋنگلوم ییغاچین کویدوروب،
قطره سو ینگلیغ آشام ایله دی پیکاننی هم.

کۋز یاشیمنی قان قیلیب، بغریم سو اېتتینگ، ای فراق،
یۋق که یالغوز سونی قان قیلدینگ، سو قیلدینگ قاننی هم.

عشق دشتیده قویون دېک خاکسارینگمېن گھی،
ایسته سنگ عشاقنی، یاد اېت بو سرگرداننی هم.

گوی دېک باشیم نېچه رخشینگ ایاغی ضربیدین،
پویه قیلغهی، گه- گھی یېتکور انکه چوگاننی هم،

ای توانگر، نېچه کیم قصرینګنی قیلدینگ زرنګار،
اسرو خالی کۆرمه دروېش اۆلتورور ویراننی هم.

کۆنگلوم آلیب باردینگ و قالمیش منګه بیر خسته جان،
هر قچان کېلسنگ نوایی تاپشورور قالغاننی هم.

۴۲۳

عجایب تیره دور هجریم تونی، ای مهری یوق ماهیم،
مگر ساووردی عشقینگ اۆرتە گنلرینینگ کولین آهیم.

وجودیم اول قویاش هجریده انداق مرتفع بۆلدى،
که ممکن یوق انی ایستردە بۆلماق سایه همراهیم.
یوزوم نینگ عکسی کاهی قیلدی کویونګ نینگ اوشاق تاشین
کمال عشق کۆرکیم، کهربا ایجاد اېتر کاهیم.

کۆنگول هر غمزەسى اۆقین که، باردور، آرزو قیلدی،
بحمدالله که یېتکوردی نېکیم بار اېردی دلخواهیم.

یسەى درد اۆقلىرىدىن بیر آق اوی جان گلشنی ایچره،
که کۆنگلومده تاریقسە، اندە کیرگەى ماه خِرگاهیم.

کۆنگول افسانەسین گاهی دېسم، اېلنى توتر اویقو،
و لېکن هر زمان سېسکندورور افغان ناگاهیم.

قیلیب میخانه توفراغین وطن قان یوتماغین کۆرگیل،

که بو بیر بادۀ عیشیم دورور اول مسندِ جاهیم.

اېرور بیر مغېچه ایلگیدین ایچمک آرزوسیدین
فنا دیریده هر دم بیر اېشیکدین شےء للّھیم.

امید اول کیم قدم سر وقتیمه بیتکورگهی آگاهي،
نوايي گر طلب یؤلیده بؤلسه جانِ آگاهیم.

۴۲۴

تندین اؤقینگنی چېکسلر، آغیردین اېرمس شیونیم،
اندین قیلورمېن نوحه کیم، آيرو توشتر جاندين تنیم.

گلخن کولی ایچره نهان، جسمیم جنوندين دور نشان،
تا تېله لیک برقی عیان بؤلغچ کویوپتور خرمنیم.

تا عشق ارا افسانه مېن، اؤت ایچره که دېوانه مېن،
اول شمع اوچون پروانه مېن کیم بؤلمیش اؤرتنمک فنیم.

اول شوخ سېکریتتی سمند، اېرمس نصیحت سودمند،
هر دؤست بېرسه اېمدی پند، اول دور اولوغراق دشمنیم.

می ایچکه لی اول نوش لب ظاهر قیلور هر دم طرب،
بو نوع آچیلماق نی عجب، انداق سو ایچکن گلشنیم.

چون آدمیده یؤق وفا، کؤر اول پری عشقی ارا
جولانگهیم دشتِ فنا، ویرانه غم مسکنیم.

غم تیغیدین قاجماق، هوس قیلمه، نوایی، هر نفس،
اول تیغ نینگ دفعیغه بس، یوز پاره خرقه جوشنیم.

۴۲۵

قوروق تینمغه توگان کویدورورده بی باکیم،
فتیله اؤتی یېتیشگیچ توتشتی خاشاکیم.

تن ایچره تېله کؤنگول اضطراب اېتر اسرو،
تیکیب نې نوع اؤنگنسون بو سینئه چاکیم.

حزین کؤنگولنی مگر چاک قیلغه سین، ای گل،
که غنچه ینگلیغ آچیلغه دی دمې بو غمناکیم.

هوای عشقینگ ارا اؤزگه عالمیم باردور،
که اشکیم انجم اېرور، آه دودی افلاکیم.

دېدیم: باشیمنی چاپیب طعمه اېلت ایتلرینگگه،
دېدی: بو یوکدین اوزولمیش یقینده فتراکیم.

فغان که، عشق حدیثی دقیق اېرور انداق
که قاصر اؤلمیش انی انگله ماقدین ادراکیم.

دېدینگ: نوایی اېمیش هوشمند، بارې دېگیل،
جهانده کیم دورور انداق خراب و رسواکیم؟

۴۲۶

وصال ایچره اول آی نینگ فرقتین آسان گمان قیلدیم،
چو باردی، وای کیم، نې نوع دشوار اپکنین بیلدیم.

دېر اېردیم، هجریده شاید اوزومنی اسره‌ی آله‌یمین،
بو سوز حشو اېرکنین بیلدیم هم اول ساعت که ایریلدیم.

فغان کیم، درد و غم کیرمک که خوش-خوش رخنه‌لر بۆلدى،
کۆنگول کیم تۆش-تۆشیمدین درد و غم چیقسون دېان تیلدیم.

هم اول دم عشق دشتیده مېنى گم قیلدى بېخودلوق،
اگر هوش و خرد سعیی بيله بیر لحظه تاپیلدیم.

فنا یۇلیغه توشتم یېتکه‌لی فرهاد و مجنونه،
نېچوک یؤل بارمه‌یین کیم، یخشی همرهلر غه قاتیلدیم.

چو ایچتیم عشق جامین بېخود اۆلدوم ترک هوش ایلب،
انینگ دېک می ایچیب بو نوع اوسروکلوکدین آییلدیم.

فراقی مشکل اېرمیش، بيلمه‌یین مېن هم نوایی دېک
وصال ایچره اول آی نینگ فرقتین آسان گمان قیلدیم.

۴۲۷

هجر ایله کۆرمه روا جانیمغه بی پایان اۆلوم،
تیغ سور کیم، خوشترور آز آغریغ و آسان اۆلوم.

جان بېریب ایستر مېن اۆلمکنی، اۆلوم خوبراق که جان،
جانیم اۆلمک دور چو ایسته‌یدور منگه جانان اۆلوم.

خلق دشوار اۆلمه گيم حيراني دورلر، طرفه كۆر
كيم اپرور دشوار هجریم آليده حيران اۆلوم.

هجر قالمس ياشورون آه و فغان چېك، اي كۆنگول،
كيم ياشورماق بيرله هرگز قالمه دي پنهان اۆلوم.

درد هجران صعب و يپتمس شربت وصل، اي طيب،
گؤيا كيم اوشبو درديمغه اپرور درمان اۆلوم.

فاني اۆلمه ي قيلغان اظهار فنا، بيل كيم اپرور
اول گدا كيم رزق اوچون ظاهر قيلور يالغان اۆلوم.

اي نوايي، جهل ايله اۆلمك قتيق ايش دور، ولي
چون كمال معرفت كسب اۆلدي، ني نقصان اۆلوم.

۴۲۸

بۆلمه سون كۆنگلونگ قوشيغه دُر و گوهر وصلي كام،
كيم قضا اول دانه لرغه بحر موجين قيلدي دام.

گر ملك تسبيحي دانه، حور زلفي دام اپرور
كيم بو دام و دانه غه زيرك قوش اپرسنگ، بۆلمه رام.

دهر باغي نينگ هواسي دور سموم و سويي زهر،
انده بۆلمس بو هوا و سو بيله قيلماق مقام.

باغ كيم، نيلوفري گوگرد اؤتي دور انگله كيم،

نې معطر بۇلغەي اندىن تربىت تاپقن مشام.

مى اۋتى بىرلە دماغىنگى قىزىتمە كىم، بو اۋت
اېل دماغىدە پىشىرىدور بە جز سوداى خام.

تا اۋزونىكى خىسچە كۈرگونگ دور اېمىسېن آدمى،
گر هواىدە سىر قىل، گر سو اوزە كۈرگوز خرام.

كول قىل اول خىسنى فنا آتشگەيغە تشلەبان،
تا كۈنگول مراتى اول كۈلدىن جالا تاپقى تمام.

اىستىرەم، كۈزگودە كۈرسىم يار عكسىن بىر نىس،
ساقيا، مى كىم! اېرور عشق اھلى نىنگ كۈزگوسى جام.

۴۲۹

مېن كە، دوران ظلمى دور كۈنگولمگە، بلكىم جانغە ھەم،
نىلەي آلغەيمېن انگە كىم، ظلم اېتر دورانغە ھەم.

كۈر غمىم افزونلىغىن ھەر دم كە اشكىم خىلى نىنگ
قطرەسى بحر اۋلدى، اېمدى ايلنىپتور قانغە ھەم.

ياپىمىگىز فرھاد ايلە مجنوننى كىم محنت تۈزى
ستر اوچون بس دور مىنگە ھەم، اول ايكى عريانغە ھەم.

تا تاپىمېن عشقى اۋتى بىرلە تىغ زھرىنى،
عيسى انفاسىغە باقمان، چشمە حيوانغە ھەم.

گاه کۋنگلوم غنچه سين ايستر، گهي پيکاني،
کيم کۋنگول باردور مناسب غنچه غه، پيکانه هم.

نيلوفر نقش ايلب ايوانينگه مغرور اۋلمه غيل
يۋق، وفا نقشي چو بو نيلوفري ايوانغه هم.

مدعيلر چون نوايي عشقين انگلب، جانيغه
قصد قيلغانلر اېميش، بارې دېنگيز جاناغه هم.

۴۳۰

اول قوياش وصيلده اۋزني رشکدين گم ايلره،
سايه دين يانيمده تېرنگچ توهم ايلره.

اول پري کۋنگلومده دور کيم، سۋز لشورمېن دېمه کيم،
تېلبه ليکدين اۋز-اۋزوم بيرله تکلم ايلره.

شام هجریم تانگسيز اۋلميش ني عجب کيم، عجزدين
شام دېک ييغلمسينيب، تانگ دېک تبسم ايلره.

قتل حکمی ايله سه اۋلتورتوبان عشاقني
عشق ارا، چون کيم مېن اکملمېن، تقدم ايلره.

اېلگه رحم اېتمان، عقوبتلر بيله قتل ايله سنگ،
اۋز-اۋزومگه محض حرماندين ترحم ايلره.

پاکليک دأبي گر اېرمستور سلوک ايچره، ني سود،
بحر و برده گر طهارت، گر تيمم ايلره.

ای نوایی، تا مقرر قیلدیم آهنگ حجاز،
گه عراق و گه عجم ساری ترنم ایلرهم.

۴۳۱

سپنسز اشکیم یامغوری سیلینی طوفان ایله دیم،
کیم ایننگ طغیانیدین عالمنی ویران ایله دیم.

بؤیله طوفانغه کؤزومنی ابر ایتیب، نالمنی رعد،
آه اؤتی اوچقونلرین برق درخشان ایله دیم.

یؤق که، کؤنگلوم شعله سیدین دهر ارا سالدیم بیر اؤت
کیم تاموغنی اهل کؤزیگه باغ رضوان ایله دیم.

مونچه، بل یوز مونچه هم ابرمس اپکین مینگدین بیر،
اولچه مهن اول آیدین ایرو شام هجران ایله دیم.

صعب ابرور هجر اؤلمنگ، ای احباب، عاشق زینهار
کیم، بو ایش تحقیقینی مهن اولچه امکان ایله دیم.

سپوگنیم بو عهد ارا می دور، قنی پیمانه یی
کیم کیشی سپومکدین اېمدی عهد و پیمان ایله دیم.

ای نوایی، عشق ترکین کیم دېدیم، معذور توت
کیم مُحق دورمهن بو ایشده گرچه طغیان ایله دیم.

۴۳۲

حسنونگ گە حيرتدين اۋلدى برچە بې سامانليغيم،
مېن كيم و سامان، چو آرتر هر نفس حيرانليغيم.

كويىدە تون-كون كېزەي دېرمېن نھان قالمس، ولېك
آه اۋتى و عشق قانى رنگيدىن پىنھانليغيم.

غير خاشاكين اگر ساوورمس اپرسم پس نېدور،
كويى دوريدە قويون دېك مونچە سرگردانليغيم.

اول اپتك قانيم بيلە كۈرگۈزدى گلگون حاشيە،
نې عجب، توتسم آنى بو دم چو اول دور قانليغيم.

طفللر تاشى تېرىمنى اپلتىيان، قالدى سۈنگك،
اول پرى سوداسيدە باردور عجب عريانليغيم.

دين و دنيا نقدىنى ساجتيم، چو كيرديم دېرارا،
بو ابدى اول قدح ايچكنده دست افشانليغيم.

دېدى زاهد: اول پرىدىن هر اميدى بيرلە كېچ،
اي نوايى، بۆلمە غاي بو حدقچە نادانليغيم.

۴۳۳

جانيمە داغى قۇيوپتور لعلينگ اوزره خال كيم،
كۈنگلۈمە اۋت توشميش اندين يوزگە برقع سال كيم.

توشمە گەي اېل كۈنگليگە اۋت هم كە آنينگ رشكيدىن
بىم اپرور بۆلغەي مېن انداق عاجز و بېحال كيم.

اشك سىلى ايله گەي كويونگدين آواره مېنى،
بو صفت آواره ليغدين ايله فارغ بال كيم.

گرچه مجنونمېن سېنينگ كويونگى-اوق ايلب وطن،
انده-اوق بولسم بۇلەي بازىچە اطفال كيم.

ياغسه عريان جسميمه اؤت انده ايلرمېن قبول،
اؤزگه يېرده گر ياغر گل، ايلرهم اهمال كيم.

انده ياققن تاش ابرور جنت گليدين يىخشىراق،
بو جهتدين انده بولماق ايسترهم پامال كيم.

قتل قيلغه يىسېن مېنى بير كون ولې ايتور كؤنگول:
اي نوايى، كېچ بو سؤزددين، سېن كيم، اول اقبال كيم؟

۴۳۴

يوزونگ غميددين ابرور ابر نو بهار كؤزوم،
نې عيب، بير يوزىنى قيلسه لاله زار كؤزوم.

سواد و قانى بيله بير غريب لاله ابرور،
كه لاله زار بسې قيلدى آشكار كؤزوم.

نې قانى لاله ابرور، نې سوادى داغى انينگ
كه كويدى هجر اؤتيددين داغى انتظار كؤزوم.

اگرچه قيلدى مېنى خوار و زار كؤنگلوم و بس

ولېك ايله دى كۈنگلومنى خوار و زار كۈزوم.

نې كان و بحر اېكىن كيم، لب و تيشينگ غميدىن
گل و سمنگه قىلور لعل و دُر نثار كۈزوم.

بو كيم قارردى چو تر دامن اېردى و غماز
فراق شاميده دور تيره روزگار كۈزوم.

نوايى، ايله نظر تركينى دېمىنگ، چون كيم
مېن اختيار اېتيان، قيلمىس اختيار كۈزوم.

۴۳۵

سېندىن آيرو تا اسير درد هجران قالمىشم،
بو كه اولمەي قالمىشم، حاليمغه حيران قالمىشم.

خان و مانيمنى غمىنگ تاراجى برباد ايله دى،
خان و مان باريب الاخان و الامان قالمىشم.

عشق دشتى نىنگ سمومى حُلەسين ايله پناه،
خيل غم يغماسيدىن مونداق كه عريان قالمىشم.

درد و غمدين ياشونه آلان كمالِ ضعفدين،
خرده بينلرنيگ كۈزيدىن گرچه پنهان قالمىشم.

دشتدين فرهاد و مجنوننى ييغيب مشفقلىرى،
مېن غريب اول نوع كيم، غول بيابان قالمىشم.

وصل دورى جاميدىن احباب سرمست اۋلدىلر،
دیر ارا تېك بیر من-اۋق مخمور دوران قالمیشم.

ای نوایی، اوچتی بلبلر خزانده باغدىن،
مېن قناتسيز قوش مثللیک آیلب افغان قالمیشم.

۴۳۶

نې اول قولاققه یېتر، عرض حال ادا قیلسم،
نې اول کۈنگولگه یاقر، نقد جان فدا قیلسم.

کۈنگول شکافیغه اول کوی توفراغی قنى کیم،
بو خُشک دارو ایله زخمیمه دوا قیلسم.

کېرەك قویاش درمی تنگه بۈلسه بیعانه،
چو یوسفومنی ایکی دهرغه بها قیلسم.

فغان که، عشق چېکر باغلب آنی بۈینومغه
نېچه که زهد و ورع پردهسین ردا قیلسم.

کۈزومگه دهرنی هر لحظه تیرهراق آیلر،
سواد خالینگکه هر نېچه کۈز قرا قیلسم.

ایشیم چو صومعه شیخی بیله توزلمه دی، کاش
که اېمدی میکده پیریغه التجا قیلسم.

نواييا، چو صبا همنفس دور اول گلگه
نې بۈلدى، صرصر آهیمنی گر صبا قیلسم.

۴۳۷

كۈنگۈلنى بغير قانىدىن لاله قىلدىم،
قۇيۇب داغ پرگالە. پرگالە قىلدىم.

ساووغ آھدىن قطرە پىكانلرىنگى
يۈرەك غنچەسى جوفىدە ژالە قىلدىم.

كۈزۈمدە اول آى مردم اۋرىنى تۈتتى،
سۈادىن انىنگ دورىغە ھالە قىلدىم.

نې قوماغ كە، اويغانمەدى گرچە تۈنلر
تانگ آتقونچە ايتلر كېى نالە قىلدىم.

كۈروب آب حيوان يوزىندە حبابىن،
تصور لىنىگ اوزرە تبخالە قىلدىم.

فلك زالى نىنگ مكريدىن بۇلدوم اېمن،
نېدىن كىم، طلاق بو محتالە قىلدىم.

نوایى سريغ يوزىدە داغ ادبار
چو كۈردوم، گمان سريغ لاله قىلدىم.

«ن» حرفى نىنگ نازىنلرى نىنگ نازى «غرايب» دىن

۴۳۸

ايسترم يوز منزل اؤتكه يمين عدم صحراسيدين،
تا زمانى تينغه مېن عالم اېلى غوغاسيدين.

عمر نقدین صرف اپتی دېرمېن فنا بازاریده،
تا قوتولغهی خاطریم سود و زیان سوداسیدین.

خوشتورور ویرانه یی تسکین اوچون، لېکن بیراق
یوز مینگ ییللیق یؤل فلک نینگ گنبد میناسیدین.

چیقمه یین بو دیردین ممکن اېمس بولماق خلاص
هر کچه یوز مینگ بت سیمین بدن یغماسیدین.

هر سؤنگک یانیمده قصد عمر اپتر، وه، خوشه یی
بار مو امکان کیم، قوتولغهی مونچه محنت داسیدین.

زعفرانی یوزده گلگون اشک تۆکمک نې آسیغ،
عشوه کؤرگن دهر باغی نینگ گل رعناسیدین.

غرقه اېل دفی اوچون سردابه یی دور هر حباب،
عشق وادیسینده اشکیم سیلی نینگ دریاسیدین.

عشوه گرلر داغیدین جان پرده سین کؤر، آه کیم،
بو حریر اېسکیدى ظالم شاهلر تمغاسیدین،

ای نوایی، دهر باغیدین قوتولماق ایسته کیم،
بلبل اوچقن یخشیراق زاغ و زغن مأواسیدین.

كۈنگۈلنى آيله ديم يوز چاك عشقینگدين، مېن محزون،
كه حسنونگ وصفى يازگه يمېن كتابى كاغدى گلگون.

كۈنگۈل نینگ مزرعى كيم ناوكینگدين بۇلدى يوزخرمن،
باشاق تېرمك اوچون كېلگه ي مگر فرهاد ايله مجنون.

قېب هر تون چېكېب يوز مېنگ سنان انجم شعاعيدىن،
مگر صبريم سپاهيغه شېخون كېلتورور گردون.

لېنگ شوقيدە كۈنگۈلوم هر نې بارىن باشيدىن قۇيدى،
مى ايستب رند مفلس آيله دى دستارنى مرهون.

كۈنگۈلدە شوخلر نازيدىن آرتر هر نفس آھيم،
يانر اۋتقە چو اطفال ابوروشورلر، دود اۋلور افزون.

مى لعلينگ اوچون بېخودلوغوم انداق دور، اى ساقى،
كه قاتسنگ تانگ اېمس، جاميمغه كسب هوش اوچون افیون.

ايلېگ زلفونگه اېلتور آرزودىن ياوه ايتورمېن
بيراودېك كيم يىلان توتماق اوچون آغزیده دور افسون.

تۈكۈب فيروزه گون كۈك ماتمینگه گوهر انجم،
سېنى فيروزه و گوهر خيالى ايله بان مفتون.

نوايى، نظم لافین قۇي كه، كۈز بير كونلوگى اېرمس،
اگر يوز يىل ساچرسېن طبع بحريدن دُر مكنون.

بولوت حيوان زلالی بيرله تيرگوزدى هوا جانين،
سپوونمك اشكيدين شاداب قىلدى سبزه مژگانين.

اېمستور سبزه و لاله كه، ژاله تاشيدين گردون
كؤكرتيب يېر يوزين هر سارى ظاهر آيله دى قانين.

ايريك نهوچون دورور شاخ اوزره گلبن برگى سوهان دېك،
ايتيتمس بؤلسه بلبل جانى اوچون غنچه پيكانين.

چمن ليلاسيدين آيرو دېگه يسېن لاله مېخون دور
كه گردون ژاله تاشيدين قانتميش داغ هجرانين.

چمن بحر لطافت بؤلدى نيسان درلرى بيرله،
قىزىل تالدين مهيا قىلدى هر يان شاخ مرجانين.

بو فصل ايچره ملامت تاشيدين سالم بيراو قالغى
كه چېككى مى سومورمكده يوزيگه جام قلقانين.

مېي كيم آتшин، چيقغه ي سريغ گلر، اگر دهقان
تاميزسه قطره يى اندين سووارير چاغده بوستانين.

بيراو كيم دهر باغى نينگ فريين بيلدى، نرگس دېك
قدحدين باش كؤترمه ي سوردى عشرت بيرله دورانين.

گل مقصود اول قان دور، نوايى كيم، اياغينگدين

چىقىر چېكىندە مقصد كعبەسى خار مەيلىن.

۴۴۱

مەھبەت رىشتەسىن اوزدى كە، اۋلتورگەي بو غمناكىن،
مەر اول رىشتە بىرلە تىكىمىش اېردى كۆكرەگىم چاكىن.

اېمىس گريان كۆزوم كىرپىكلىرى كىم، صرصر اھىم
سالىب موج اول تېنگىزگە بىر قىراققە سالىدى خاشاكىن.

منجم كۆنگلوم اۋتى دىغىغە دېدى تاپەي ساعەت،
دىمىم دودى ارا نې انجمىن تاپتى، نې افلاكىن.

باشىم چاپقندە اول چابك ياشىنگى اسرەغىل، اى كۆز،
كىم اول سودىن يوغەيسېن، قان يوقردېك بۇلسە، فتراكىن.

نظر يۈلەن سرشكىم پاك يوب، كۆز پردەسىن آچتى
كە چىققىچ پردەدىن كۆرگەيمەن آنىنگ چەرە پاكىن.

كۆزىن اويقودە كۆرگىچ اۋلدوم، آيا اۋلمەيىن نېتكى
كىشى گلشندە بېخود كۆرسە تورك مست بې باكىن.

يوزونگ كۆپ آچمە، گاهى سۆز دېگىل كىم، عقل دىھقانى
نې گل اسرافىنى يىخى دېمىش، نې غىنچە امساكىن.

اۋگوب جنت گلەن واعظ تىلر كىم، ايلەسم سودا
نېچە اېسكى دىرمغە يوسفوم، وە، كۆرگىل ادراكىن.

دېسم اول آي، باريب چيقمس غمي كۈنگلومدين ايتور كيم:
نوايي، نې عجب، بۇلماق قمر ساير، حجر ساكن.

۴۴۲

بس كه قدى غنچه دېك اېل كۈنگلين آليب قىلدى قان،
گلبن ناز اۋلميش اېل كۈنگليدين اول سرو روان.

كۈزلرينگ خونخوارليغدين دايمما بېمار اېرور،
باده كۈپ اېچكندين انداق كيم، بۇلور اېل ناتوان.

ياشورون حسنونگده بير آن دورور كيم، جان ارا
هم الف، هم نون اوزه داغيم اېرور اندين نشان.

يوزيدين بينامېن ارچه يوز چيقرمس پرده دىن،
نوردن كۈرمك دور اما، نور اېرور كۈزدن نهان.

عشق كامل بۇلسه محنت اۋقلىرىدين باك اېمس،
نې ضرر بلبلغه كيم بۇلغەي تيكندين آشيان.

عشق باغى نينگ سويى قان دور، نې تانگ گر آه و اشك
انده ياخود آتشرين گل آچسەلر، يا ارغوان.

صبح نينگ هر تانگ اېرور اېل غفلتيدن كولگوسى،
مهر خوانيدن گمان قيلمە كه، يېدور زعفران.

تاپمەديم بو دير حاليدن خبر، اى مغېچه،
بې خبر قيل مېنى اۋز حاليمدين اېمدى بير زمان.

درد اگر بو دور، نوایی چیقسه عالمدين نې تانگ،
مست و عريان کؤكره گيگه تاش اوروب، تارتيب فغان.

۴۴۳

عشقيده يخشي يامان بېداديدين تايمان امان،
يخشي تا قيلسم نظر يۇقتور كيشي مېندين يامان.

لحظه-لحظه باش چېكر عشقيم شراري، اي رفيق،
الامان شوق و محبت شعله سېدين الامان.

يوز عدم ملكيگه قۇيدوم كېل كه ايسته يدور كۇنگول،
بو اوزون يۇل زادي كۇز تيككم يوزونگه بير زمان.

اۇرته بان عشاق جسمين، غافل اۇلمه آھيدين
كيم ضررليغ دود ظاهر ايلر اؤت توشگن سمان.

كويمگيمگه ناوكينگ پيكاني بس، هجرانني قۇي،
خسقه اؤت سالماق اوچون اوچقون همان، دوزخ همان.

سېن مگر توغقنده كون توغقندورور كيم ذرّهي
فرق فهم اۇلمس آرهنگيزده نېوچون كيم توأمان.

اول قوياش هجریده آھيم اؤقيدين وهم اېتمه سه،
كؤك تېمور ايچره نهان نېوچون بۇلوپتور آسمان.

وقتدين آل نقد عيشينگني كه، مونداق كيم اېرور

دېدم كؤزدين نهان بؤلْمس انگه بؤلْماق ضېمان.

ای نوایی، تېلېه كؤنگلوم دردینی انگلهی دېسم
آنچه آیتور یاوه کیم، بیر لفظ اندین انگلهمان.

۴۴۴

یوز و زلفونگنی ساغینیب کېلمیشم، ای مهجین،
کېچه نی کېچه دېمی، کوندوزنی کوندوز دېمه یین.

آه و افغان چېکمه دېب، آغزیمغه جان، مْهر قؤی،
چونکه لعلینگ خاتم و یاقوت نابینگ دور نگیں.

لعلی نینگ هر بیر حدیثی شهددېک شیرین ابرور،
آرې-آرې دایما گل برگیدین دور انگین.

لعل اوزه خط ایچره خالینگ دور نهان یا هندویی،
سبزه ده یاشوندی شکر قصدیغه ایلْب کمین.

ینگى آى خورشید ارا بؤلْماق عیان معهود اېمس،
وه، نېدور ایلْب غضب سالماق جبینینگ اوزره چین.

شمعنی پروانه کویدور مکدین، ای گل، قیلْمه عیب،
بلبل اېرمستور مو کول، یا سېن اېمسسېن آتشین.

ای نوایی، آچمه غای قانیمدین اؤزگه لاله یی،
هر گیه بو یؤلده کیم، قتلیْمغه چېکْمیش تیغ کین.

شکيب اويين بوزە دور بېنوا كۈنگول، نېتەيىن،
خرا بليغ قىلە دور مبتلا كۈنگول نېتەيىن.

دېدينگ كە، اسرە كۈنگولنى اۋزونگدە و صبر اېت،
چو مېندە تورمس و بارور سنگە كۈنگول، نېتەيىن.

كۈنگولنى قيد جنوندين چيقر دېدينگ، اى عقل،
كېتورسە باشينگ گە يوز مينگ بلا كۈنگول، نېتەيىن.

كۈنگولنى قيد جنوندين چيقار دېدينگ، اى عقل،
بلانى كۈز كېتورور جانغە، يا كۈنگول نېتەيىن.

مېن اول كۈزى قرا عشقين قۇيوب اېديم، بالە،
تحميل اېتمەدى، يوزى قرا كۈنگول، نېتەيىن.

تغافل اېتسم اېترسېن، اۋلرسېن اېتسم قيد،
سېنينگ بىلە، دېگىل، اى بېوفا كۈنگول، نېتەيىن.

نواييا، دېب اېدينگ: زهد طرحى بنياد اېت،
شكيب اويين بوزە دور بېنوا كۈنگول، نېتەيىن.

نې تانگ سريغ يوزومدە اشك رنگين
كە كييميش سبز تلخ اول سبز شيرين.

اۋزى گوهر، تۈنى دريائى آفت،

بۇلۇب موج بلا اول تۇن اوزە چين.

سنگه همرنىگ تۇنلوق شوخلىر بار،

نېچوك كيم سرو اياغينده رياحين.

اېرور جسمينگده اخضر خلعت اول نوع

كه گلبن برگيدىن تۇن قىلسە نسرين.

دېگەيلر سرو قد و خلعتينگى

ولېكن سرو كيم كۆرمىش گل آگىن.

خطينگ شوقيدە كۈنگلوم توتيا دور

كه يۇق ذكرينگدين اوزگە انگە تلقين.

نوايى، چرخ اخضر دور سيھكار،

طمع سرسبز بۇلماق قيلمە اندين.

۴۴۷

ارغواني تۇن مو دور كيم كييميش اول سرو روان،

يا مگر سرو روان قيلميش لباسين ارغوان.

سروينىگ هر برگى بغيريم قانيدين سپراب اېرور،

يۇقسە بۇلمس ارغواني برگليک سرو روان.

سرودين تا تاپتى زينت ارغوان يوز شوق ايله،

باشقه سنچر ارغوان هر زاد سرو نو جوان.

ارغوان و سرو ایسترمېن چمنده، تا مېنى
ارغواني تۇن بيله اول سرو قىلدى ناتوان.

كۆرگوزور قەد و لباسىنگ شوقىدىن قانلىغ مژە،
كۆزدە هر دم ارغوان و سرودىن بير كاروان.

ارغواني تۇن بيله قتل ايله مس اول سرو كيم،
قان ايله قىلميش لباسىن ارغواني بير اوان.

ارغوان و سرودىن تا دهر ياغى زېب دور،
بۇلسون اول كيم دهر ارا هم شاه اپرور، هم پهلوان.

۴۴۸

عشق ارا مېنمېن دمې بې محنت و غم بۇلمەغان،
جانىدىن محروم اۋلوب، جانانغه محرم بۇلمەغان.

يوز وفا ايلب، جفادين اۋزگه نفعې كۆرمەگن،
مىنگ جفا كۆروب، وفاسى ذرهى كم بۇلمەغان.

مىنگ قوياشچە كۆرگن اۋز يارين، ولې يار آليده
مىنگ اولوشىدىن بيرىچە ذرە نىنگ هم بۇلمەغان.

عالم اهلى عشق ارا رسوالىغيم طعن اېتمىگىز،
كيم دورور عاشق بۇلوب، رسواى عالم بۇلمەغان؟

انجم اپرمس تېر دور آھيم اۋتىدىن كۆك سقفيده،
وه كه، بو تېردىن بنايى قالمەدى نم بۇلمەغان.

دستگیری ایسته کیم غمدین خلاص امکان اېمس،
ایلکی بیر زرّین کمر بېلیگه محکم بؤلّمه غان.

ای نوایی، بیل که تاپمس لعلیدین قوتِ حیات،
جاننی تسلیم ایله مکلیکده مسلم بؤلّمه غان.

۴۴۹

خورشید طلوع اېتسه، قوباشینگ ساغینورمېن،
کۆرگچ ینگى آی میلینی قاشینگ ساغینورمېن.

هر گل که جهان گلشنیدین جسمیمه، ای شوخ،
یېتکچ، مېن سودازه تاشینگ ساغینورمېن.

ای کۆز، قورودونگ، لېک قیو سیل بلا کیم،
بیر اوینی خراب ایله دی یاشینگ ساغینورمېن.

ای جسم، اجل چابکی هر گوی کیم اؤینر،
میدان فنا ایچیده باشینگ ساغینورمېن.

نی شرحین اېشیتکچ قیلیب، ای ناله، سېنى یاد،
کۆز شرحه لرین کۆرسه، خراشینگ ساغینورمېن.

ای خسته کۆنگول، بؤلغه لی سېن عشقده مجنون،
کۆرگچ سېنى سرگشته، اداشینگ ساغینورمېن.

اؤلگن ایتین، ای خسته نوایی و رقیبین

چون كؤرسىم ايتى آليده لاشينىڭ ساغىنورمىن.

۴۵۰

هر خزان برىكى ابرور زارى كه دهر آزاريدىن
سرغريب مېن دېك توشر ابرو سهى قد ياريدىن.

هر قوروغان شاخ مجنون دور كه توفراغ اويىگه
تاپشورور هر دم ايليگ يوب نازنين بېماريدىن.

باغ ارا، دېمنىگ، خزان كيم عاشق اولميش مېن كېي،
بيلگورور ساووغ نفس بيرله سريغ رخساريدىن.

هر آقر سونى خزان تيغى قىليبدور زرفشان،
كېسكهلى مهر و وفا نخلين جهان گلزاريدىن.

بو سريغ يوز بيرله اولسم كوييده، تابوتيمه
شاخلىر باغلىنگ خزانى عشق پېچان تاريدىن.

كوييده كويميش كؤنگول بو كيم خزان دور باغ ارا
اېستى بير يىل، گؤيا كويىگن غريبىم ساريدىن.

كاهي يوز بيرله اولرمېن، عيسوي دم ساقيا،
باده توت خورشيد جام كهربا كرداريدىن.

باده يى كيم جرعه سى تامغاچ، خزان يفراغلىرى
تاك برىكى دېك قيزرغهى سر به سر اشجاريدىن.

شوقدین اشک ایچره غرق اؤلوب، دبی آلمسمین غمین
کیم تېنگیزده گوهر ایستر، اسره‌ماق کبره ک دمین.

عیش و صحبت خیلغیه توشکی نسیمیدین صبا،
قیده سالسم زخمی ایسلنغان یوره ک نینگ مرهمین.

پیکریم گردین ساوورغودېک اېسر هجران یېلی،
لطف اېتیب، ای گل، سحاب وصال نینگ یتکور نمین.

قالب اېتتی ینگ آینی طاق اوچون معمار صنع
قدرت ایلگین باغله‌غان ساعت قاشینگ طاقي خمین.

کؤنگلکی دور چاک و کیز بؤینیده فانوس، ای عجب،
توتتی اول هم شمع دېک، غم شامی کؤنگلوم ماتمین.

شمع چابکلوک ارا لیلی وشیمغه یتمه‌دی،
دودیدین هر نېچه کیم قیلدی مطرا پرچمین.

ماتم هجرانده سازې دور نوایی جسمی کیم،
نالہ‌سیدین زبرینی تاقمیش اؤکورمکدین بمین.

مېن بېدل سنگه جان اؤینه‌ماق بیرله یره‌یدورمېن،
ولې سېن طفلنی بو تحفه بیرله ارغه‌ده‌یدورمېن.

لېینگ کؤرگچ، ایلگیم تیشلره‌م هر دم تحیردین،

عجب حالت كه، بالنى توتمه يين برماغ يله يدورمېن.

دېديم: كۈنگلومگه هر ياندين خدنگينگ نېدورور ياره؟
محبت اۋتيغه، دېدى، اۋتون دور كيم، قله يدورمېن.

چو اهل درد اوچون پيوسته قاش ياسينى تارتىيان،
منگه اۋق ناوكينگنى خوش كشاد اېت كيم، قوله يدورمېن.

انگه يېتكور سۋزوم، اى آه كيم، اول حسن مرآتى
چو قىلدى جلوه، كۈزگو عكسى ينگليغ الدهره يدورمېن.

مگر اېلتور پريلر، اى فسونگر، تېلېه كۈنگلومنى
كه تورميدور نېچه كيم جسميم اويينده قله يدورمېن.

نوايى تېلېره ب تا اول پرى كوييگه يوزلنميش،
اېشيتورمېن فغان، لېكن حديثن انگله مه يدورمېن.

۴۵۳

تيكميشم مجروح كۈنگلوم زخمينى غم نيشيدىن،
چيقمه سون دېب خنجرينگ ذوقى كۈنگول نينگ رېشيدىن.

لعلدين محروور اېدى كۈنگلوم، چو فصّاد آچتى قان،
قطره قانلر يۋق كه، جانلر تامدى اول دم نيشيدىن.

قاشى ميلين آلمه سه قربان كۈنگولدين بس منگه،
يۋقسه نې غم چېكسه يا قتليمغه هر دم كيشيدىن.

كۈنگلوم انداغ كيم، ايتيب مجنون اتادين توتتى تاغ،
درد عشق ايستر قاچيب عقل صلاح انديشيدىن.

ساقيا، چون دور ايشى معلوم اېمس، بير مى بيله
فارغ اېت جانىمنى عقل خرده دان تشويشيدىن.

اول مىي كيم تۇلغۇچە پىمانە آزاد ايله گى
بو دني خمخانه دُرد و صافى نىنگ تفتيشيدىن.

اسره دى مونكلوغ نوایی رشته جالين چېكيب،
اسره غان دېك شاهلر سر رشته يى درويشيدىن.

۴۵۴

انگله مان سودېك يوزونگ مو دور كۈروننگن كۈز گودىن،
يا يوزونگدىن كۈز گو سو بۇلدى، يوزونگ ظاهر سودىن.

رو برو بۇلغچ يوزونگ غم شامى آلمىدىن كېتر،
سايه توشكن دېك كېين خورشيد بۇلغچ اۋترودىن.

يىغله ماق چون ايله دى دعوا كۈزوم بيرله بولوت،
برق گۇيا مونى فهم ايلب يىقىلدى كولگودىن.

توشته اول مهوش يوزيگه تا كۈز آچتيم هر كېچە،
ايسته مسمېن طرفة العيني كۈز آچماق اويقودىن.

خالى اول يوز وجهى تاپقن وجه دىن بير گوشه ده
زلفى ينگليغ تۇلغانىب باشيم قويى دور قيغودىن.

كام ساقى لبلريدين تاپتيم اما آلدى جان،
اى كه دوراندين قۇش ايچتىنگ، غافل اۇلمه قارودين.

بارغان اپرميشمېن اوزومدين جلوه قىلغان چاغده يار،
سۇرمه‌ى اۇتميش، اى نوايى، خودنماييم بېخودين.

۴۵۵

يانه نې قد جلوه قىلدى كيم، دېمكدين لالمېن،
يانه قيسى زلف آچيلدى كيم، پريشان حالمېن.

ضعفدين قديم الف بۇلدى، اول ايگى لام زلف
هر يانيمده فتنه گر، وه نې عجب گر لالمېن.

ايتلرينگ نينگ ايزيدين يوز گل كوزوم باغيده دور،
شكر اپرور بو هم كه، عشقینگ يۇليده پامالمېن.

جسميم اندوه ايچره درد آستيده قالميش، نې عجب
اېگمه قد بيرله اگر زلفونگ غميدين دالمېن.

ايتتى اول كۇنگلوم كه وصل اوچون تيلر ابردى حيات،
شكر اېمدى اۇلگه‌لى عشقینگده فارغ بالمېن.

عشق اۇتى بو نوع كيم عريان تنيمنى چوركه‌دى،
اهل درد اوچون فنا يوزيگه مشكين خالمېن.

اى نوايى، نې عجب يوزوم اوزه يوگورسه ياش،

چونکه مجنون بۇلغەلى بازىچە اطفالمېن.

۴۵۶

وہ کہ، مېندىن آيرو يوز جان، يۇقسە جانان مو اپکين؟
منگە آنسىز مينگ اؤلوم يا درد هجران مو اپکين؟

سۇرغەلى ضعيفمنى لعليدىن مو اپرکين بير حديث،
يا بوزوغ جسميمده مملو يوز تومن جان مو اپکين؟

روزنيمنى تا ياروتتونگ، کلېم ايچرە هر طرف،
دزەرلر سايير مو ياخود مهر رخشان مو اپکين؟

عالم اهليغە لېينگ ذکرى مو دور رطب اللسان،
يا بارى عالم لبالب آب حيوان مو اپکين؟

زلف ارا قدینگ خياليدين کوزوم ياروتقهلى
عنبرين يوز شمع ياخود خيل مژگان مو اپکين؟

کۇنگلومه اول يوز و لب يادى مو اپرکين غم تونى،
يا شېستانيم تۇلە گلبرگ خندان مو اپکين؟

غيريغە باقغان اوچون کؤز مردمين قتل ايلهديم،
اشک گلگون ياخود آنينگ زخميدىن قان مو اپکين؟

۴۵۷

يارهمنى تىککهلى باشينگ اوزه پېچک مو اپکين؟

پېچكده رسته جانيم مو يا ايپك مو اېكين؟

كوز اسرو تيكتم انينگ اوئماغه، بيلمان كيم،
كوزوم آقى مو اېكين انده، يا سونگك مو اېكين؟

تون اوزره آيدين و آيدينه صبح اېركين مو،
و يا ساچينگده بورونچك اوزه لچك مو اېكين؟

گل اوزره هر سارى تاب اوردي سنبلونگ، ياخود
يوزونگده زينت اوچون سنجقان كجك مو اېكين؟

لېنگدين ايسته دي جانيم حيات، بيلمسمېن
كه بير سوكونچ مو يا قصدي بير موچك مو اېكين؟

بير اوسروك اېلنى چيقيب قيرغان اېرميش، اى لطفى،
سپنينگ بېگينگ مو اېكين، يا بيزينگ ميرك مو اېكين؟

نوايى، اوشبو پريشان حديث ايله غرضينگ
عوام خاطرينى صيد ايله مك مو اېكين؟

يوزونگ اۋتىغە توتون زلفِ معنبر مو اپكىن؟
آتشين لعلينگ اول اۋت ايچىدە اخگر مو اپكىن؟

مهر سرچشمه سىدين قطره مو تامدى ياخود
عارضينگ بيرلە قولايىنگدە گى گوهر مو اپكىن؟

غم تونى هر طرف آھيم اۋقى اول آى غمىدە
چرخدين اۋتكى نينگ اۋرنى مو، اختر مو اپكىن؟

مضطرب كۈنگلوم اپكىن مو كويە دورگن تن ارا
يا بو آتشكده كنجيده سمندر مو اپكىن؟

قان اپكىن مو ينگى داغيم ارا، يا هجرينگدە
جام گلناري ايچيندە مى احمر مو اپكىن؟

زاهد اوچماغ تيله دى ياردىن و مېن هم اۋزىن،
يارب، اوشبو ايكي مطلوب برابر مو اپكىن؟

اى نوايى، دېمە فرھاد پريشانليغيدىن
اول بو مجنونچە بلا تاغيدە ابتر مو اپكىن؟

اول كە هر تون اويغانيب، يانيدە كۈرمىس ھەمدىن،
يۇق عجب گر سايەنى ھەمد قىليب ايتور غمىن.

قۇيىدە افعى، نې ممکن كۈزگە اويقو كيرمگى،

اول كه هر تون ياد اپتر بير زلف نينگ پيچ و خمين.

تكه نې امكان توشوب بستر ارا يوز مينگ تيكن،

اول كه بير مژگان خيالى تيره قيلميش عالمين.

كېچه افغان قيلمه سم تانگ يوق، بير او كيم كۈنگليگه

هجر اوقى تهورولدى، مشكل دور قتيق اورماق دمين.

نې ياروغ بولغهي حياتى شمعي اول كيم، عشق انگه

غم شېستانى ارا ياغدوردى هجران شېنمين.

زخمينگه سېپ، اى كۈنگول، نوميدليغ توفراغى كيم،

تاپمه دى كۈك حقه سیده كيمسه وصلت مرهمين.

چرخ انجم اشكىنى ساچيب، نېدين كييميش فرا،

هجر شامى توتمه غان بولسه نوایى ماتمين؟

٤٦٠

پارسا ياريم ساغينمس مسجد و سجاده دين،

نې اوچون كيم تا مى ايچميش باش كۈترمس باده دين.

باقمه سه تسبيح و مصحف خطيگه يوق عيب كيم،

فارغ اېرمس دانه نقلی و حريف ساده دين.

روزه سين سى روزه مى قيلسه نې تانگ كيم، صعب اېرور،

نسيه اميدىغه كېچمك عشرت آماده دين.

تا کیم اول گلسیز بولوت ینگلیغ هوایی بؤلیمیشم،
بزم عیشی یانیدین اشکیم قالینمس باده دین.

مَیغہ جانیم رهن اہتہی مخمور اہسم کیم، فرض اہرور
سرو آزادبغہ قوللوق عاشق آزاده دین.

کیم قیزیستی عشق اؤتی بیرلہ کؤنگول، مَیدین دماغ،
نہ غمی بار ناصح بی عقل و شیخ لاده دین.

ضعفدین مخمورلوق بیفتی نوایی جسمینی،
یار عیشی بزمیدہ یاد آیلنگ اول افتاده دین.

۴۶۱

چقیرغچ اول مہ محملنشین عارض نقابیدین،
جرس دہک نالہ آیلرمہن کؤنگول نینگ اضطرابیدین.

اہمس کؤکسومده اہسکی داغلر، بل تُقبہلر دور کیم،
سووہبمہن تا خیالینگ چیقمہ غای کؤنگلوم خرابیدین.

ہوای عشقینگ اسررغہ اہرور ہر یان کوموش گنبد،
کہ قیلیمیشمہن عمارت بحر اشکیم نینگ حبابیدین.

بغیردہ نیش غم اؤلتوردی و کؤنگلومده یوز غم کیم،
ایتینگ قوت اہتمہ گہی ناگہ کویوک بغریم کبابیدین.

تن و جان زورقین غرق اہتکہ لی گرداب آفت دور
قویونلر کیم، یوگورور عشق دشتی نینگ سراپیدین.

قاشی محرابیدین یوز قبله غه قۇی دېرسېن، ای ناصح،
موجّه دېر اپکنسېن، وه که، عاجزمېن جوابیدین.

خرد ملکینی صبریم کشوری دېک بوزدونگ، ای ساقی،
بو سیلې کیم روان قیلدینگ قدح پالا سحابیدین.

بو بزم اهلینی بات ییقمادین اؤزگه ساقی دوران
نې قیلدی قصد بو نیلین قدح دوری شتابیدین.

نواپی رشته فکری چېکر معنا سمن بویین،
خوش اول تاجر که، یوسف چهره کورگوزگهی طنابیدین.

۴۶۲

صبح یتکوردی صبا گلبرگ خندان مژده سین،
یا کونگول تاپتی مسیح انفاسیدین جان مژده سین.

یا فلک بېردی ییغی کور ایلگن یعقوب نینگ
کوزلری آچیلماق اوچون ماه کنعان مژده سین.

نې گل خندان، نې عیسی دور، نې یوسف مژده سی،
تاپتی بیر مهجور اولر حالتده جانان مژده سین.

غنچه اېردیم غم ییلیدین تونغه سیغمان غنچه دېک،
تا صبا یتکوردی اول سرو خرامان مژده سین.

هجر ارا، ای پیک، گر سېن نامه یتکورسنگ نې تانگ،

تانگ يېلى هر كون بېرور خورشيد تابان مژده سين.

نقد جان بېرديم، مسلمانلر، اويتليغمېن هنوز
تا اېشيتتيم پيكدن اول نا مسلمان مژده سين.

اي نوايي، شام هجران ييغلايم دفع اۋلدى كيم،
صبح يېتكوردى صبا گلبرگ خندان مژده سين.

۴۶۳

يانيده بولمه سم نفسي دردناكمېن
كورسم يانيده غيرنى اول دم هلاكمېن.

جانيمغه يوز غم ايگنه سيني تيكتى اول مسيح
تا بيلدى كيم، قوياش كېي عشقيده پاكېن.

وصلينگ تخيلى و مېن، انصافدين اېمس
كيم، روح پاكسېن سېن و مېن تيره خاكېن.

جز وصل شربتي منگه سود اېتمس، اي طبيب،
كيم مېن فراق محنتيدن دردناكمېن.

وهم آيله، اي سپهر، بو كون آھيم اۋقيدن
كيم مېن فراق محنتيدن دردناكمېن.

ذاتيمده چون مي ازلي چاشنيسي بار،
هر سارى مست قۇل ساليب انداق كه تاكمېن.

آهيم، نوايا، نېچوک اسره‌ی کونگول ارا،
چون مېن فراق تيغی بيله سينه چاکمېن.

۴۶۴

کونگلوم آچيلمس دمې بو بدن زاردین،
اؤيله که، محکم توگون اينیچکراک تاردین.

هجر ارا درديمغه رحم قيلمه‌سه اول کوز نې تانگ،
کيمسه مرضغه علاج تاپمه‌دی بېماردین.
عارضیده تابليغ زلفنی کورگیل که، بار
مصحفی شېرازه‌سی رشتۀ زُئاردین.

گر یاروتور اېل کوزین کویی ارا اول قویاش،
بس که مېنی سؤرمه‌سه سایۀ دېواردین.

صومعه‌غه بارمه‌سم عیب یوق، ای شیخ کیم،
هیچ گله‌م یوقتورور کلبۀ خمّاردین.

عالم ارا یارلیغ قالمه‌دی، گویا که بار
یارغه یوز نوع الم هر نفسی یاردین.

بس منگه ویران مقر، سېن قووان، ای چرخِ دون،
طاقِ مقرنس بيله شمسۀ زرکاردین.

نېچه جفا و ستم تارتقی اهلِ وفا،
دهرِ جفا پېشه‌دین، چرخِ ستمکاردین.

تن يلىنگ و باش آچوق، تېلبە نوايىغە باق
كىم نې بۇلۇبتور خلاص جېبە و دستاردىن.

۴۶۵

كۈنگلۈم اويىن ھر نېچە كىم، ايستەسنگ گم تاپقەسېن،
داغ ھجر و غصە بې صبرليغ ھم تاپقەسېن.

كم اېمس عاشق سىنگە، سالىسنگ مېنى كۈزدىن، ولې
عاشقې كىم، صادق اۋلغەي مېن كېيى كم تاپقەسېن.

نوش وصل، اى كىم، تىلرسېن، نيش ھجران كۈرمەيىن،
چون اېمس بغيرىنگ جراحتليغ نې مرھم تاپقەسېن.

نې غمىنگ يوز ذرە سرگردانليغيدىن، اى قوياش،
سېن كە رفعتدين مسيحا كېيى ھمدىم تاپقەسېن.

كولمە خم قديمغە كىم، يوكلىنسە عشقنىڭ قاف ارا،
عشق آستيدە يازىلغان قاف دېك ھم تاپقەسېن.

مونچە فرقت اشكى بىرلە بۇلسە دوزخ مسكىنم،
كۈزلەسنگ يوز قرن اۋتوب، خرقەم تېگىن نم تاپقەسېن.

اى نصيحتگو، نوایی يخشى دور دېب ايستەسنگ،
بيلمەدينىڭ كىم، بۇيلە بىر رسواى عالم تاپقەسېن.

۴۶۶

يوز بلا هجران تا پر هر دم بو محزون جان اوچون،
تېنگرى گۇيا كيم يره تميشور مېنى هجران اوچون.

هجر او يیده منع اشکیمگه ملامت تاشلری
فرش ابرور، گۇيا ييقيلغور کلبه ويران اوچون.

قامتينگ هجرينده کونگلوم سؤرغوچی ناصح تیلی
نيشتري دور کيم، يارر اؤق زخمينی پيکان اوچون.

هجر ارا حاليمنی يازديم ياد توت، ای نوحه گر،
کيم بسې لايق دورورسېن ساز ايتر داستان اوچون.

عشق غم بزميده اېگری قدیمه جان رشته سين
تار ايتيب، ساز ايله دی کونگلوم چېگر افغان اوچون.

اژدها آغزی بيل اؤتلوغ کيم، آچيپتور قصدينگه
مونچه کيم واله سېن، ای بلبل، گل خندان اوچون.

چون نوایی نامه شوقين يېتورسنگ، ای رسول،
تېنگرى حقّی رقعەیی بو زار سرگردان اوچون.

٤٦٧

فرقتينگدين کېچله لر اؤرتي مېنى بخت زبون،
گۇيا مېن بير يانر اؤتمېن، قرانغولوغ توتون.

اشک ايتيب غمازليغ کونگلوم بوزولسه ني عجب
کيم تا پر آزار ياشلردين مدام اهل جنون.

مېن تيلرمېن وصل و آنيڭ كۈنگلي هر اغيار ايله،
منگه ايگي تاش اراسينده كېرەك البتە اون.

قدّينگ و اپرنيڭ هواسى جانده دور، عيب اپتمە گيل،
بۇلسە افغانيم بييك، سيل سرشكيم لعلگون.

كيم كفنى ياد اپتر، اندين اۋلوگ آگاهراق،
گر لباسين بيلسە كيم، اپروركتان ياخود قۇن.

سيل اشكىمدين فلک غمخانهسى ويران اېدى،
قىلمەسە اپردى جفاسى دود آھيمدين ستون.

كۈرمەسم قاشينگ بۇلورمېن تورغانيم بيرلە فغان،
«وايى» اپرور، بس چو بۇلمەسە «نوايى» بيرلە «نون».

۴۶۸

سېنسيزين، اى عمر، بير ساعت منگە جان بۇلمەسون،
سېن بۇل و بس، طوبى و فردوس و رضوان بۇلمەسون.

دېپ اپميشسېن: كويدورەى بير داغ ايله كۈنگلين انينگ
هر نېچوك داغ اۋلسە اۋلسون، داغ ھجران بۇلمەسون.

قاشيغە قىلغچ سجود، اۋلتوردى اول كافر مېنى،
ھيچ مسلمان يارى، يارب، نا مسلمان بۇلمەسون.

عشقيده جانيم عقوبتلر بيله آل، اى اجل،

تا انینگ عاشقلىغى ھېچ كىمگە آسان بۇلمەسون.

اول پرى كۇنگلومدە مەھمان اۋلەمىش، اى جان واقف اۋل،
آه اۋتى دود اېتمەسون، زخم اىچرە پىكان بۇلمەسون.

اى كۇنگول، مستى چىقىپ شەر اىچرە سالمىش رىستخېز،
وہ، خبر توت كىم، بىزىنگ بې باك نادان بۇلمەسون.

دېدى كىم: جان بېر داغى اۋپگىل اياغىم توفراغىن،
اى نوایى، تېزراک بۇل كىم پىشیمان بۇلمەسون.

۴۶۹

وصلینگە يېتىبان ساغىنورمېن خيال اېكىن،
حالیمنى انگلەمان، منگە، يارب، نې حال اېكىن.

عشاق اشكىدىن سو اىچىپ بىر جفا بېرور،
يارب كە، قامتىنگ نې عجايب نھال اېكىن.

زلفونگدە خال «جىم» اراسىندەگى نقتە دېك،
يوزونگدە زلف وىرد يانيندەغى «دال» اېكىن.

ھەر نېچە كىم كۆيرمېن، انىنگ ذرە مېرى يۇق،
آيا كە طالعىم كۆنى كان زوال اېكىن.

دېرسېن كە: سېنى قىسى پرى تېلە ایلەمىش؟
اى بىرى تاش، بىلىپ ىنە بو نې سوال اېكىن.

زنبورنىڭ اېۋى كېۋى كۋىنگلوم تېشۋىك - تېشۋىك،
لەلىنىڭ خىيالى ھەر تېشۋىك اېچىندە بال اېكىن.

مىكىن نوۋى جانىغە كۋىونىڭدە قىلمە قىصد،
سىد اىلەمك حرم قوشىن آخىر وبال اېكىن.

۴۷۰

عشقىنىڭ اېتىگىن جان اىلىگى بىرلە توتوبمېن،
سېن كىرگەلى يادىمغە اۋزومنى اۋتوتوبمېن.

كۋىنگلومگە كېلور ھەر سارى اۋق اتسە نېدىن كىم،
جان شىرەسىدىن آغزىنى آنىڭ چۈچۈتوبمېن.

يارىنىڭ، دېدىلر، غىر بىلە بادە اېچىبدور،
تەحقىقىنى بىلگۈنچە نې قانلر كە يوتوبمېن.

گرم اۋلمىنگىز، احباب تىلب وصل چىراغىن،
مېن كىم، يۈرەگىم كۋىدى، نې چاغلىغ ياروتوبمېن.

ھىجرىنىڭ تۈنى آلىمغە نې مىھنت كە يېتوبدور،
وصلىنىڭ كۈنى يادىدىن اۋزومنى اۋتوتوبمېن.

خلوت اثرى عىب اېكىن انىڭلەدىم، اى شىخ،
عىب اېتمە، فنا دىرىدە گر كلبە توتوبمېن.

اشك اىلە نوۋى سو بېرور، صبر نىھالىن
بىلمىس كە، انى آھىم اۋتىدىن قوروتوبمېن.

٤٧١

اؤلگومدورور چو فرقت ایله اشتیاقدین،
کهل قوتقر، ای اجل، مهنی اوشبو فراقدین.

تانگ یوق قیزرسه لاله کبی کؤز، چو مردمی
هر دم غمینگده قان یوتادور اول ایاقدین.

سهن می ایچرسهن اهل بیله، اول غمزه قان قیلور،
مهن قان یوتوب نظاره قیلور مهن بیراقدین.

اطفال سنگ عربدهسی وهمیدین دمی،
دبوانه لر کبی چیقہ آلمان وثاقدین.

ایچتیم ایتینگ سفالیده می، وه، قچان یوغه ی،
حیوان زلالی ذوقینی آنینگ مذاقدین.

میدین حیات توت که، بېگنمس مسیحنی
هر شب پرې که اوچسه بو افسکی رواقدین.

مطرب بیله نی کؤنگلی آچیلسون نوایی نینگ
کیم مهن فراقدین دپسم، اول دهر عراقدین.

٤٧٢

ای کیم، تنیمگه جان بیرسهن هر طریقدین،
اؤلسم نی، ایرو توشقوچه سهن دېک رفیقدین.

بېلېنگ مو دور که انګه قيزيل فوطه باغله دېنگ،
يا رشته يی که اؤتکریليبدور عقيقدین.

سودا و رشته زحمتیغه اوچره دی کؤنگول،
زلف و بېلېنگ خیالیده فکر دقيقدین.

هر دم دېمه که کؤز یاشیدین سرگذشتی آیت،
دریا فسانه سین نې سؤرسېن غریقدين.

آهیم کؤنگولنی کویونګ ارا سالسه نې عجب،
گلزار ارا خليل توشر منجنیقدين.

زهد اهلی عجب تفرقه سیدین خلاص اېمېس
شرط فنا فراق دورور اول فریقدين.

تالپېنمه اشکینګ ایچره نوایی، که چیقمه دی
هیچ کیمسه غوطه بیرله بو بحر عمیقدين.

۴۷۳

غمینګده هر کېچه، ای گلعدار، ییغلمېن،
سحرغه تېگرو چېکېب انتظار ییغلمېن.

مېن و قرا کېچه، یؤق نسبتیم سنگه، ای صبح،
که سېن کولورسېن و مېن شمع وار ییغلمېن.

بورونگی مهر و وفا، سؤنگی جور و ظلمینګنی
بیرین-بیرین ساغینیب زار-زار ییغلمېن.

كولرلر اېل منگه بې اختيار كيم، هر دم
اېشيتسم آتيني بې اختيار ييغلمېن.

مونگه يدى كۈنگلوم انىنگ دېك كه، هزل نغمه سىدين
كه اېلگه كولگو اېتر آشكار، ييغلمېن.

كولر سپهر دني اضطرابيغه كۈنگلوم،
ولې اۋزومده كۈروب اضطراب ييغلمېن.

نوايى، اشكيم آقيزغەي غمىم تونين مونداق
كه چرخ دېك كېچە توتمەي قرار ييغلمېن.

۴۷۴

لاله نىنگ غنچەسى دېك كۈنگلوم اۋلۇپتور تۈلە قان،
وه كه، اېل غافل و كويدوردى مېنى داغ نھان.

زھر ھجر ايچكەلى دېرمېن كه، قىلەي عشقين ترك،
ايتقان دېك كيشى مھلك مرض ايچرە ھذيان.

روزگاريم كه قرا بۇلدى، ابرور عشق اثرى،
قىدە اۋت توشسە، قرالىغى قالور يېردە نشان.

عشقينگ اۋتين كه ياشوردوم، اېل ارا يايدي رقيب،
كيم ايسيتمەنى نھان توتسە قىلور مرگ عيان.

خطينگ ايچيندە لىينگ نىنگ ايكي خالى نې عجب

ايكى دور نقطه، يازيلور اېسه خط ايچينده جان.

هجر چون قانيم ايچر هر سارى قانليغ توگانيم
خوان اېرور آليده تا كۈنگلومه بۆلميش مهمان.

چرخدين مهر ايسى تاپقانغه تكبر نې عجب،
اېل دماغىغه چو گوگرد اۋتى آيلر نقصان.

خلق طعن اېتسه، نوايى اېگىلىپ ناله قىلور
ايگىرى ينگليغ كه، قىلور يېل اثرى بىرله فغان.

۴۷۵

صفحه حسنونگده جانبخش ايرينينگ، اى سيمين بدن،
اۋخششور كيم، آيله گهى عيسى قوياش ايچره وطن.

يۇق عجب، اى گل، كۈنگول زخمى ارا ناوكلرينگ،
رسم اېرور: چون رخنه بۆلگن يېرگه قۇيماغليغ تيكن.

حسرتينگدين، بيل كه، اۋلميشمېن، اگر كويونگ ارا
بىر گدا ناگه غريب اوچون تيلر بۆلسه كفن.

كۈزونگ و زلف و قاشينگدين اينجودېك بۆلدى ياشيم،
خلق اوشبو وجهدين دېرلر، آنى درِ عدن.

واقف اۋل، اى باغبان كيم، هر طرف گل شكليدين،
سېن دېك اېل نينگ قبرى دور كيم ظاهر اېتميش بو چمن.

كۈنگلەگى نىنگ عطرى جانسىز جىسمىمە بېردى حىيات،
گۇيا اېل جانىدىن مخلوق اۋلۇپتور اول بدن.

چون نوایى نظمى نىنگ هر حرفى دور شرح غمىنگ،
دېسە بۇلور كىم ابرور هر بيتى بير بيت الحزن.

۴۷۶

فلک ستیزه سیدین بۆلمە، ساقیا محزون،
قدح كېتور كە، ابرور بى ثبات عالم دون.

منگه طمع كرم اھلىدىن اۋلدى مى وجھى،
يۇق اېرسە بير قوئى اول گنجىم، يىغر قارون.

مرقع اوزره درم كېبى وصله لر نې آسىغ
كە بير درمگە چاغىر اوچون اۋلمە غای مرھون.

بو شكر اوچون گھى، اى شوخ، بير نظر كە، خدای
سېنى عزيز و شريف اېتتى، بىزنى خوار و زبون.

يېمە بو لُجَّه مينا رموزى حليغە غم،
مى ايچ كە تاپمەدى هيچ كىم بو صفحه غە مضمون.

خمار جانىمە قصد اېتتى، ساقيا، مى بير
كە جانغە سالسە بير اۋت كىم، باشىمغە چىقسە توتون.

نوایى نظمى دورور يخشى، گر قولاق سالسنگ،
ترنمې كە قىلور اۋزى بيرلە اھل جنون.

غم يېلىدىن، يارب، اول گلگه غبارې بۆلمەسون،
بلکە آنسىز دەر باغیدە بهارې بۆلمەسون.

قدى نینگ سرویغە کیم، باغ لطافت نخلی دور،
چشمه حیواندىن اؤزگە جویبارې بۆلمەسون.

عیش و عشرت جامیدین بۆلسون یوزى گل-گل ولېک
کۈنگلیگە غم گلبنیدین خار-خارې بۆلمەسون.

جلوه ساز اؤلغانده میدان ایچره چابک شوخلر
شاه و سر خیل اندین اؤزگە شەسوارې بۆلمەسون.

گر بویورسنگ صدقه باشیغە ابوورمک، ای رفیق،
بو دور امیدیم که، مېندین اؤزگە بارې بۆلمەسون.

دەر باغی نینگ نسیمی ساوورور گل خرمنین،
انگە اول گل گلشنی ساری گزارې بۆلمەسون.

ای نوایی، قیل دعا جانیغە و جهد ایله کیم،
میلینگ آنینگ قوللوغیدین اؤزگە ساری بۆلمەسون.

ای کیم نفسی غایب اېمسیسېن نظریمدین،
وہ کیم، غم هجرینگ آقیزور قان جگریمدین.

رسوالیغ اۋتی بیرله توتاشیب کېله دورمېن
ای اهل سلامت، قۇپونگیز رهگذریمدین.

سېن غافل و مېن وهم قیلورمېن کېچه- کوندوز،
بو ناله شېگیر ایله آه سحریمدین.

غم ییلیدین اول نوع اۋتوم اوردی الم کیم،
یوز برق یسر ابر بلا هر شرریمدین.

بېلینگ غمیدین مویه بيله ییغله دیم آنچه
کیم اشک دُر و گوهری اۋتی کمریمدین.

ای زهد، یؤلوم اورمه که، بو مرحله ایچره
مقصدغچه سېنسن بیر یوز مینگ خطریمدین.

ای عشق، فنا یولی ساری باشله که، تینمان
گر تاپسه نوایی خبر اوشبو سفریمدین.

۴۷۹

نې تیریگمېن، نې اۋلوگ، نې ساغ، نې بېمارمېن،
ایته آلمان کیم فراقینگدین نې ینگلیغ زارمېن.

نقطه آغزینگ غمیدین تارتیبان جدول دېک آه،
اشک سیلین آقیزیب سرگشته چون پرگارمېن.

دۋستلر، کۋنگلوم حدیثین دېمنگیز تېنگری اوچون،
کیم مېن اول دېوانه سرگشته دین بېزارمېن.

كۈنگلگىنگىدىن كىم تاپر جان دمبىم يوسىف ايسى،
اى عزيزىم، مېن ھەم اول كۈنگلگى ارا بىر تارمىن.

بىر قوياش ھجرىندە تون دېك روزگاريم تىرە دور،
تانگ اېمىس گر تون كېيى ماتم توتوب يىغلارمىن.

مىدە افىون اېزگىل، اى مغ كىم، بو اېسكى دىر ارا،
تېلبررمىن غصەدىن گر بىر نفس ھوشيارمىن.

نېوچون اېل دشنام و طعنيدىن بۆلەي آشفته حال،
اى نوايى، چون نې كىم دېرلر يوز آنچه بارمىن.

۴۸۰

سروى كە نالېشىم بىيىك اۋلدى ھواسىدىن،
يوز مىنگ فغان كە، آگە اېمىس مبتلاسىدىن.

كۈنگلومنى كۈزلرىدىن ايرىمىگ كە، چىقمەغاي
مىجنون نصيحت ايله كىيىكلر اراسىدىن.

مېن تىرە اويدە بېخود و يوز نوع گفت و گو
ھر كو باشىندە تېلېلېگىم ماجراسىدىن.

كۈنگلومدە تازە داغلىرىنگ شىكلين اىستەسنگ،
فھم ايله اۋتلوغ ايكى كۈزونىگ نىنگ قراسىدىن.

قوۋ توتر لىيىنگ غمىنى يېب حزين كۈنگول،

گۇيا كه قان تولد اپتر بو غذا سىدين.

دولت لباسى شهغه كه يۇقتور شكايىتىم،
مغ دىرى تېگره سىده گدا ليغ پلا سىدين.

غم شامىدين نوايىنى نېتكى خلاص اپتيب،
ياروتسنگ اويىنى شمع جمالينگ ضيا سىدين.

۴۸۱

دۇستلر، بير چاره مېن دېوانه شيدا اوچون،
كىم اۇلر مېن اول پرى پىكر ملك سىما اوچون.

آتشىن گل تېگره سىده لعل گون يوز برگ اپمس،
بلكه يوز نعل اۇتقه سالىمىش بلبل شيدا اوچون.

خام كۇنگلوم كىم، دوداغىنگى تىلب افغان قىلور،
بار دورور اول طفل دېك كىم، يىغله غەى حلوا اوچون.

اشك ايچىنده غرقه مېن، زلفونگى توتقه يمېن مو دېب،
اۋيله كىم تاجر تېنگيز رنجين چېكر سودا اوچون.

تورك مستې دور كۇزونگ اويقوده، كۇز كنجيده خال
اۋغرى كىم، قىلمىش كمين يانیده قۇيغان يا اوچون.

گلخنى دېك دور كه اىستر گلخن و آلاتىنى،
سفله كىم محنت چېكر دنيا و مافىها اوچون.

بو نوایی بنده‌نی، ای سرو آزاد، اسره کیم،
بؤیله بیر بلبل کپره ک سېن دېک گل رعنا اوچون.

۴۸۲

کۈنگول آلوده عجب دلربا اېمىشتوکسېن،
نې دلربا که بلای خدا اېمىشتوکسېن.

کۈنگول بېرورده سنگه بيلمىن اېرديم، ای بد مهر،
که خسته کۈنگلومه مونداق بلا اېمىشتوکسېن.

طبيب عاجز اؤلوب عاقبت دېدی بيلديم
که عشق دردی بيله مبتلا اېمىشتوکسېن.

گدالغ اېتتيم اېسه بوسه‌ی، اچيغلنيان
دېدی که: اسرو اويتسيز گدا اېمىشتوکسېن.

کۈنگولنی کويدوروبان جان آلورسېن، ای ینگى داغ،
فغان که، بیر یۈلی کۈنگلی قرا اېمىشتوکسېن.

چېريک وحوش و سنگه تخت قلّه، ای مجنون،
فنا ممالکیده پادشا اېمىشتوکسېن.

دېديم: کمينه ايتينگمېن، کولوب منگه ايتور:
نوایيا، نې بلا خود نما اېمىشتوکسېن.

۴۸۳

لعل و غمزەنگ بىرلە بس كىم نكتەدان استادسېن،
بىر نەفس بارسېن مەسەيحا، بىر زماڭ جالادسېن.

لەلى شوقىدىن كە غەم تاغىن قازرسېن، اى كۈڭگۈل،
نې بلا شىرىن ھوسلىك ناتوان فرھادسېن.

اھل دىلەر چەرەسى آلتون، سرشكى سىم اېرور،
تا كە سىم ناب ارا قىلدىڭ نھان پولادسېن.

نرگىسىڭدىن بىر نەظر قىلغىل كە اسرو بىر يۈلى
قوللىرىڭ حالىدىن، اى سرو روان، آزادسېن.

نەشكرەپك قەدىڭگە، ۋە، برگىنى تۈن دېمە كىم،
عشق پېچان برگىدە بۇلغان نھان شەمشادسېن.

خرم اۋلەمسېن سومورمەي بىر قەدح، اى كىم مدام
چەرخدىن كۈڭلۈڭ بۇلۇب يۈز لەخت قان ناشادسېن.

اى نوايى، جەسمىڭگە پىكانلرىدىن لىنگر اېت،
يۇقسە بو آھىڭگ يېلىدىن ناگھان بربادسېن.

۴۸۴

ياردىن ھېچ كىم مېنىڭ دېك زار و مەھجور اۋلەمسون،
جەملە عالمە رسوالىققە مشهور اۋلەمسون.

مېن بۇلەي آوارە تا عشقىمىدىن ايلب گەفت و گۈي،
آتى آنىڭ ھەر كىشى آغزىغە مذكور اۋلەمسون.

جانیمه بېداد و ظلمین، یارب، اول مقدار قیل،
کیم ایننگ عاشقلیغی هر کیمگه مقدور اؤلمه سون.

مېن خود اۆلدوم، لېک هر عاشق که، باردور پاکباز،
نوحه تارتيب ماتمېم توتماقده معذور اؤلمه سون.

پند ایله کؤنگلوم اویین قیلمه عمارت، ای رفیق،
بیزنی بوزدی هرگز اول، یارب که، معمور اؤلمه سون.

کېچهلر اول گل چېکر اېرمیش قدح، ای تانگ یېلی،
واقف اؤل حالیمنی ایتور چاغده مخمور اؤلمه سون.

یار وصلیغه قوواندیم، قاودی کوییدین مېنی،
ای نوایی، هیچ کیشی دولتقه مغرور اؤلمه سون.

۴۸۵

نا امیدى مېن کېبى بار مو اېکین جانانیدین،
جانگه یېتکن کؤنگلیدین، کؤنگلی توتولغان جانیدین.

فرد هوش و صبریدین، مهجور زهد و علمیدین،
ایرو شهر و ملکیدین، آواره خان و مانیدین.

تنغه محنت روزنین آچقان یقانیگ چاکیدین،
جانغه رحلت نوحه سین توزگن کؤنگول افغانیدین.

هم صلاح اویین قرا ایلب توگانلر دودیدین،

هم بلا يوزين قيزيل قيلغان الفلر قانيدين.

مېن دغى بير كون صلاح اهلى اېديم، اى پارسا،
بو عقوبتلر ارا قالدیم بيراو هجرانيدين.

جانيمه هر دور قوی، ساقی، هلاهل زهری کیم،
ته به ته قان دور ايچیم طاسی نگون دورانيدين.

ای مغانی، توز مقام نوحه کیم، چيقماقته دور
خسته جان جسم اویی آتليخ کلبه احزانيدين.

جان بېرور هر دم نوایی، نې عجب گر بېرسه جان،
قول که آيريلغه ی بېگيدين، بېک نې کیم سلطانيدين.

راستليغده سرو آزادي ييگيتليک باغيدين،
پاکليکده لعل رخشانې اېرنليک قانيدين.

۴۸۶

يار پيغامی نې آسيغ اوزگه لر تحريريدين،
جان قچان بېرگه ی مسيح الفاضی اېل تقريريدين.

رقعه سی گر برچه قتليم حکمی دور خوش دور که، بار
قتل حکمی حرز جان عیسی دمیم تحريريدين.

کیم که کؤرسه، وه که، مخفی عشقیم اؤتين فهم اېتر،
رقعه سین آچیب اؤقورده حالتیم تغييريدين.

نامەسىن آچقاندە يوز دېوانەلىغ قىلدىنگ دېمە،
كىم خبر يۇقتور منگە، باللە، الرنىنگ بىرىدىن.

نې فسون قىلمىش اېدى بىلمان كە، يۇقتور عقل و ھوش،
ناتوان كۈنگلوم ارا الفاظى نىنگ تائىرىدىن.

رقەبى دور چرخ چىرماشلىغ كە مضمون صورتىن
ھىچ كىم ھم اېتمەدى عنوانى نىنگ تصويىرىدىن.

ھەر نې يازمىش آلىنگ كە كلك فضا كۆرمك كېرەك،
اى نوایی، قاقماق اۋلمس تېنگرى نىنگ تقدىرىدىن.

۴۸۷

كېل كە وصلىنگدىن حزين جانىمنى خورسند ايله يىن،
سېن جگر پرگالەسىن بغيرىمغە پيوند ايله يىن.

چاك اېتىب كۈكسومنى محو ايله سېنى بغيرىم ارا،
نېچە بو اميد ايله كۈنگلومنى خورسند ايله يىن.

كۆزدە مردم بۇل، كۈنگۈلدە جان يېرىن توت، ۋە نېچە،
كۆزنى مشتاق و كۈنگۈلنى آرزومند ايله يىن.

يوز بلا سالدى كۈنگۈل باشىمغە آنى، اى رفيق،
قۇى كە، تيشلب- تيشلەبان، پرکند- پرکند ايله يىن.

نې اچىغلىنماق دور اندىن، نې چوچوك سۆز، اى كۈنگۈل،
خواه اچيغ يىغلىيىن، خواهى شكرخند ايله يىن.

گلشنِ وصلین تیلر جان، یېر قوی، جسمی ضعیف،
نېچە قدسی قوشقە مونداق تارنی بند ایله یین.

دېر نوایی، وامق و مجنون دېک اؤلغیل، وه نې نوع
کوچ بیلە هوش اهلایغە اؤزومنی مانند ایله یین.

۴۸۸

مسیحادین لبینگ افصح، قویاشتین عارضینگ احسن،
قویاشینگە فلک حیران، مسیحینگە قویاش مسکن.

کۆزومده گرد میدانینگ، تنیمده نقد پیکانینگ،
انگە کۆز مردمی خازن، مونگە جان کلبه سی مخزن.

یسرمېن یوز مقالت، وه، بؤلور کۆرگچ انی ناگه،
کۆزوم حیران، تنیم لرزان، اېسیم واله، تیلیم الکن.

شکیب و صبر اوین بوزدی که رخسارینده کۆرگوزدی،
خطیدین نور اوزه ظلمت، یوزیدین اؤت ارا گلشن.

تۆکرسېن قان کۆزونگ بیرله، بېرورسېن جان سۆزونگ بیرله،
عجایب ذوفنونې سېن که، هر فن ایچره سېن یک فن.

ملا مت تاشی داغیدین یارودی عشرتیم شمعی،
عجب گوگرد اؤتیدین ایله دیم بو شمعی روشن.

یسرده صنع معماری فلک غمخانه سین گویا

که قیلدی درد و غم کیرمک که هر کوکبنی بیر روزن.

سپن ایستب خضر عمری، طرفه بو کیم گنبد خضرا
یوزیگه تون قراسین سورتیان ایلر سنگه شپون.

نواپی، اسره بان تمکین، کیشیدین ایسته مه تحسین،
چو شه کؤرگوزدی استحسان، کؤروب نظمینگنی مستحسن.

۴۸۹

ازل نقاشی طرح آیلرده گل برگ نمودارین،
مگر پرگار قیلدی بلبل سرگشته منقارین.

قضا مشاطه سی پروانه لر جسمی کولی بیرله
همانا کیم، یاروتدی شمع نینگ مرآت رخسارین.

دېگین، مجنون قرا جانی نینگ اوزگن رشته سیدین دور،
که صنع ایلگی مطراً قیلدی لیلی زلفی زئارین.

مگر فرهاد جانیدین سیزیب قانیدین ایتتی رنگ
قدر صورتگری شیرین لب لعل شکر بارین.

ترازو برگ گل، ایپ رشته جان، تاش لعل ایتتی
چپکرده خازن همت لبینگ یاقوتی مقدارین.

قراغلاریم اېمستور، بلکه تاپقچ کؤزگه قاقمیشمین،
ایتردین وهم ایتیب، رخشینگ ستامین، بلکه مسمارین.

اياغينگ كيرپيگيمدين آغريغان بۇلسە، ياريب كۆكسوم
ايسيق قانيمگە قۇي كيم، اول حنا-اوق، چېكسون آزارين.

خرابات اهلى اور و داغ، دېر كيم، كويدورونگ، ساقى،
دوا يۇق سىرمەبان قاچماقدين اوزگە شيخ دستارين.

مگر بۇلدى قويون توفراغ ايله يېل مى سو بيرله اوت،
يسرده مست سرگردان نوايى خلقت زارين.

۴۹۰

رشكدين دېرمېن كه مهر ايتسون سپهر ايوانيدين،
بارى ايتكى سايه ايوان ايچره آينگ يانيدين.

كۆكسومه اورماققە آلغان تاشقە اوقى تېگدى، لېك
قىلدى كول جسمىمنى اوت كيم، سېكرىدى پىكانيدين.

آتشين آچيلدى ايچگچ باغ نينگ آق گللىرى،
اشك ايله هر قطره يى كيم، باردى بغريم قانيدين.

انجم اېرمس كيم، فلک مرآتى ايچره توشتى عكس،
بس كه در ساچيلدى يېر اوزره كوزوم عمانيدين.

دېمە نالنگدين يومولمس كۆزلىرىم كيم، تانگ اېمس،
كېلمەسە بېمارلرغە اويقو ايت افغانيدين.

مهر نينگ اېرمس شفق ايچره شعاعي خطلىرى،
هجر ظلمى قان تۆكر هر شام انينگ مژگانيدين.

جان آلور لعلیم حدیثی، دېب مېنى قۇرقوتمه غیل،
کیم بو بیر سۆز دور که، ایتورسېن نوایی جانیدین.

۴۹۱

کۆروبمېن کیرپيگینگ باشتين-اياغ تېشکن کۆنگول حالين،
قوشې دور کیم، تیریکله یولمیش اؤلغه یلر پر و بالين.

اېکيب تخمینی انداق کیم اچیلغهی بوستان افروز،
آچر خونابه کۆز باغیده اېکسم دانّه خالين.

جمالين وعد اگر دېمېن، کۆپ اېتمه، ای عرب، حیرت
یوزی عینین کۆروب هر یان نظر قیل زلفدین دالين.

تینمی کیم قورویپتور خامه دېک نال اؤقلىرینگدین دور،
قلم قیلسنگ قیل، اما تشلمه هر یان چېکيب نالين.

بو معجون قتلىن اول طفل پریوش ایسته مس بؤلسه،
نېدین تاشلر بیله قصدیمغه سالدی شهر اطفالين.

غمین کۆرمنگ بلا تاغیده لعلی شوقیدین جاننى،
که هر بیر تاشیدین ساتمس ابد عمریغه مثقالين.

چو بؤلمس شمعیسيز پروانه و گل بیرله دور بلبل،
فراق اؤرتت کۆنگولنى چون کۆرر وصل ایچره امثالين.

صباحي جام ایله خوشمېن، نېچوک خوش بؤلمه غای اول کیم،

مونونگ دېك اختر فرخنده قىلغەي صېح انىنگ فالين.

جواد ايلگىدە پىر دىرنىنگ مى زورقن كۆرسون،
بىراو كىم كۆرمەمىش دريا ايچىندە جۇنگ تىمالين.

شە اېگىدە مرصع توگمەلىگ خلىتقە بېرمىمېن،
يىغاچلر بىرلە آلين تېورەبان كىيگن فنا شالين.

نوايى، اىستەسنگ كويىن، ايتىگە آشنا بۇلغىل،
يلىنغان يىنگلىغ اول ايت آشناغە، سېن انگە يالين.

۴۹۲

شەيد اۋلىم لباسى لالە گون سرو روانىمدىن
يىسنگ قبرىم اوزە مىلې، بۇيىنگ گلرنگ قانىمىدىن.

كۆروب طوماردېك چىرمانماغىم ھىجرىدە رحم اېتمىس،
كە غافل دور ايچىمدە ھر طرف داغ نھانىمدىن.

قوروق تىدىن كە قىلدىنگ شرحە. شرحە نالە تارترمېن،
نې تانگ وجد اۋلىسە اېلگە دم بدم نى دېك فغانىمدىن.

الفىسيز جان كېبى يۇق اول پرىدىن اۋزگە موجودې،
حزىن جانىمدە تا ھىجران خدىنگى چىقتى جانىمدىن.

كۆرونوب زلفى نىنگ تارى، كۆرونمىس ضعفىدىن جىسمىم
نېدىن كىم اول تواناراق دورور بو ناتوانىمدىن.

كۈنگۈل كۈز اۋت و سيليدىن كېلىپ حالىم كۆرە آلمىس،
ملايك روزنيمدين، بل خلاق آستانيمدين.

اېرور قاتلدين اېتمك آرزو جانبخشلىق رسمى،
اميد مهربانلىغ باغله ماق نامهربانيمدين.

مېنى اويقوغه سالميش دهر باغى نىنگ نىسمى، وه،
نې گل تېرگه يمېن اوشبو توشته كۆرگن بوستانيمدين.

نوايى، بيل كه تاپميشمېن نشان مقصوددين بېشك،
اۋشل كون كيم، نشانې تاپمه سنگ ايستب نشانيمدين.

۴۹۳

ساغينمىنگ سايه غم شامى ملول اېرمىس فغانيمدين،
باسيب اۋلتورمه سم، يوز قتله قاققى اېردى يانيمدين.

اوچوق زخمى لىبنگده بيلگورور، بيلگورمه سون كۈرونىنگ
نشانه كيم كه ايستر جان ارا داغ نهانيمدين.

بليّت شاهدهى گلگونه قىلسه بس مناسب دور
ماموغلر كيم يرا آغزیده گلگون بۇلدى قانيمدين.

ايچيمده بس كه تۇلدى ناوكينىنگ هر يان الف اېرمىس،
كه رگلدېك اۋقونىنگ بيلگوردى جسم ناتوانيمدين.

كۈز ايچره اويقو خيلى گر كيره آلمىس، عجب اېرمىس
كه خالى طرفة العينى اېمىس اشك روانيمدين.

دېمە راوى اپرور فرهاد و مجنون قصه‌سى مېلىك
انى القصه بىر دال و الف بىل داستانىمىدىن.

يوزومنى، اى بهار حسن، قان ياش ايچره كۆرگول كىم،
يوزونگ شوقىده نې گللر ظهور اېتتى خزانىمىدىن.

اولوس تكليفىدىن كۆپ خسته قىلدىم جاننى، وه اېمدى،
يقىن دور اۆلگه مېن، بس كىم، خجلمېن خسته جانىمىدىن.

نوايى، وقتنى طاعتقه يا عشرتقه صرف اېت كىم،
ساغىنىسم اورتورمېن تيره اۆتكىرگن زمانىمىدىن.

۴۹۴

مهر كۆرسه هر كىشى اۆز دلبر زېباسىدىن،
اؤرتنور مونگولوغ كۆنگول بېمهرىم استغناسىدىن.

اى مسلمانلر، نېتىب سۇرماق تمناسىن قىلەي،
مېن كه بىر سۆكمك تىلب تايمان لب گۆياسىدىن.

قد رعناسىدىن اېلگه جلوۋە وصلين نېتاي،
چون مېنگه يۇق جز دور بۇلماق گل رعناسىدىن.

يېتكوروب اېلگه لب جانبخشىدىن قوت حيات،
جز اولوم حكىمى منگه يۇق لعل روح افزاسىدىن.

تانگ يېلى، تند اېسمه اول يان كىم، اويومه يدور كېچه

ایتلری فریادی و عشاقی نینگ غوغاسیدین.

قان یوترمپن دُرد ساغر شوقیدین، ای پیر دیر،
ساغری بېر، مغیچه، لعل قدح پیماسیدین.

ای نوایی، شکر قیل ظلم ایتسه اول سلطان حسن،
کیم قیو قول سېنچه تاپتی تربیت میرزاسیدین.

۴۹۵

تۆله قان دور کوزوم نینگ حلقه سی تا قالدی یاریمدین،
مگر توشمیش قراسی تازه داغ انتظاریمدین.

کواکب دېمه گیل، گردون کۆزی گویا یاشرمیشدور،
توتوندین کیم، چیقَر گردون سری شمع مزاریمدین.

یره مغه هیچ مرهمدین یېتیشمس آنچه راحت کیم،
چیقاریب تیل ایتینگ قانین یلر جسم فگاریمدین.

مېن اول آی رشکیدین کیم اېل کۆرر توفراغ اگر بۆلسم،
کۆرر اېل کۆزلرین کور ایلە، ای گردون، غباریمدین.

اېگرمس کۆک حصاری دوریغه تورک فلک کۆرگچ،
اېوورمک اشهبین بیر خشت اوزه چابک سواریمدین.

اېرور قانلیغ کۆنگولده کۆزلرینگ، وه، طرفه دور اسرو
که چیقمسالر دمې اول ایکی جیران لاله زاریمدین.

ايچيب گر توتمه سنگ ابردى قدح، اي نوش لب ساقى،
ني امکان ابردى قوتقرماق مېنى مهلك خماريمدين.

مېنى يازغور منگيز قيلسم صبحي كيم، ازل صبحي
چيقيپتور اختيار ايلگيمدين و عشق اختياريمدين.

عنایت يامغورى آليده دفعی سهل ابرور، گرچه
ياغر ادبار گردی، اي نوایی، روزگاريمدين.

۴۹۶

مېنِ ضعيفنى سرگشته ايله دی گردون،
شتاب و دور ايله خاشاكنى نېچوك كه قويون.

توتشتى تېلبه كؤنگول اول پرى عذاريدين،
بو اؤتنى گل ساغينيب، وه كه، كويدى اول مجنون.

حباب آنچه كه جيحون اوزه ابرور ممكن،
تصور ايله كؤزوم نينگ حبابيدين گردون.

يوزونگ شهيدلرى توفراغين ساوورميش يېل،
بو كيم بولوت كؤرونور كؤكته هر طرف گلگون.

ني عيب، شادليغ اشكيم كؤپ آقسه وصلينگده،
بهار فصلی بؤلور چشمه لر سویی افزون.

قدينگه سرو باش ايندورمه ميش اېمس عكسى
كه دهر ادب قيلور آنی ساليب سو ايچره نگون.

اوشاتىپ اۋقىنى محزون كۈنگۈلنى سىندورمىگ،
كە ابو شىكست تاپر ھەر قچان كە سىندى ستون.

يېر آستىدىن كپ ايله لعلنى چىقر، اى مغ،
كە باردى يېر قوئى چون سۆز اېشىتمەدى قارون.

غم اۋلتورور مېنى، قۋى پند و بېر قدح بېر كىم،
قىلور بو زھرنى تریاق دفع، يۇق افیون.

نوايى، اىستر اېسنگ سلطنت، فنا بۇل كىم،
جهان زبونىنگ اېرور، بۇلمەسنگ جهانغە زبون.

۴۹۷

يېرگە بېردى كويدوروب اول گل تنيم خاكستىن،
آتشىن گل ھجرى ساوورغان كېيى بلبل پرىن.

انگله مان بلبل قىزىق كۈنلوم دورور، يا عطر اوچون
غىچە سىدىن گل مرتب قىلدى اۋتلوغ مجمرىن.

برگ گل دور، يۇقسە بلبل نىنگ توتشمىش ھەر پرى،
بس كە ياروتدى صبا گل مجمرى نىنگ اخگرىن.

گل اېمستور، بلکہ بلبل آشیانین اۋرتە گن
عشق اۋتى بىل، كۈرسنگ آنىنگ دور و لون احمرىن.

قۋى گل و بلبلنى، گلگون مى تۈلە توت بلبلە،

تا اۋقۇى بلبىل مقلاتىن آچىب گل دفترىن.

دھر باغىدە گل و بلبىلغە يۇق برگ و نوا،
سالمدى بو غصەدىن نرگس اىلىگدىن ساغرىن.

ساقيا، حيوان سويىن ممزوج قىلىسنگ ايچمەگەى،
گر نوايى تاپمەسە مى ايچرە لعلينگ جوهرىن.

۴۹۸

نھان عشقىنگ كە كۈنگلوم ايچرە تۇشتى يوز شرار اندىن،
نھاني داغلر قالمىش ايچىمدە يادگار اندىن.

مقۇس قاشلىرىنگ نىنگ نقشىدىن گريان كۈزۈم بۇلمىش
بولوت دېك كىم، بۇلور قوس قزحلىر آشكار اندىن.

بۇلوپتور سرو نازىم حسن شمعى، باشىدە آنىنگ
بۇرك زر رشتەسى اول كىم، يانر بىر نېچە تار اندىن.

بوزوغ كۈنگلوم كە اطرافىدە اول يوز شوقىدىن قان دور،
اېرور ويرانەيى كىم، لالەلر بوتكى بهار اندىن.

نې كىرپىكلر اېكىن اول كىم، تخیل ایلەمك بىرلە
بۇلور جسم ايچرە هر دم جانىم اندامى فگار اندىن.

قدى نخلیدىن اۋلىسم، دۋستلر، بو دور وصیت كىم،
باشىم اوزرە اېكىب سروې قىلىنگ ميل مزار اندىن.

جفادين يومسه كۆز، تسكين تاپر كۈنگلوم اۋتى، گۇيا
قرارى يۇق كۆزى هر دم آلور صبر و قرار اندين.

جهان بحرى اېميش مهلك، تومن مينگ شكر كيم، گرچه
كۆپ اوردوم دست و پا، توتتوم ولېك آخر كنار اندين.

نوايى يىنگليغ اۋلميش خانقه اهلى سوروك مجنون،
مگر كيم سرخوش اۋتميش اول پرى دېوانه وار اندين.

۴۹۹

دېمه محنت تاغى نىنگ فرهاد سرگردانيمېن،
تازه يوز مينگ داغ ايله اول قلّه نىنگ قېلانيمېن.

لمعّه رخساريدىن پروانه دېك كويسم نې تانگ
مېن كه، يىللر اول ملاحت شمعى سرگردانيمېن.

حسنونگ كه حيران اېسم، كېلمس اولوس حيرانليغى،
كيم كه حيرانينگ اېمستور، مېن انينگ حيرانيمېن.

مېن اۋلر حالتده و جان قصدى ايلر اول پرى،
آدميلغ كۆرغوزور كيم، بير نفس مهمانيمېن.

گر كۈنگول بوزدى مېنى، يار اېردى باعث شكر كيم،
جغدنينگ يۇق بير ملاحت گنجى نىنگ ويرانيمېن.

دېر پىرى توتسه مى، نوش اېتسم اېرمس عيب كيم،
زهر اگر ايچ دېر كيم آنينگ بنده فرمانيمېن.

تېلېهليکدين عقل ساری ايسته ميش زاهد مېنى،
ای نوایی، مونچه نادان بيلمس اپرديم آنی مېن.

۵۰۰

صبح وصلين اېلگه کؤرگندين پريشانمېن بوگون،
شام هجرين اول که نفی اېتتيم، پشيمانمېن بوگون.

صبح وصل اول، شام هجران بو، مېن سرگشته، وه،
نيله گه يمېن دېب، اؤز احواليمغه حيرانمېن بوگون.

قیده بيلگه يمېن وصال اهلی نشاط و عيشيني،
مېن که زار و مبتلای درد هجرانمېن بوگون.

دايما مهمانيم اپردی یار کویی ایتلری،
جمع اؤلۆپتورلر که مېن باريغه مهمانمېن بوگون.

پرلر اؤرنیغه بلیت اؤقلری نینگ زخمی دور،
مېن که پرسيز قوش کېبی هجرینده عریانمېن بوگون.

ساقیا، بیر می بیله وهمیمنی کمراق ایله کیم،
شام هجر آسیدین بېحد هراسانمېن بوگون.

چون خیالی مهمانيم دور نوایی، نې عجب،
گر تخیل شخصی دېک کؤزلرگه پنهانمېن بوگون.

۵۰۱

فراقينگده كۆزومدىن يىغلهماق بۇلغەي مو كم بىر كون،
كولوب كىرگەي مو ويران كلبم ايچره اول صنم بىر كون؟

ملايك، ترقه شينگ كيم، اول قوياش هجرينده قۇرقمېن،
تېشىب اۋتگەي فلكنى آھيم اۋتيدىن الم بىر كون.

حریم وصلیغە محرملر آخر شکر اپتینگ، كولمنگ،
مېنى محروم دېب كيم، مېن هم اپردیم محترم بىر كون.

فسانم يازغوچى، بيل كيم، بيتيك اوزره ساچر كول دېك،
كويوب ساچيلغوسى كاغذگە ايلگىنگىلدىن قلم بىر كون.

اېمس غم شامى انجم، قطره لر آھيم تفيدىن بيل،
نې تانگ كون كۆزگوسىن گر تيره قيلسه اوشو نم بىر كون.

اېشيتتيم، تېلبه ايت كوييده قتل ايلر اېمىش، ايتینگ
كيم اول كوى ايتلريدن اپردى بو دېوانه هم بىر كون.

طلب دشتيده ييللر پويه آيلب، وه كه، تا يېتتيم
حریم وصلیغە دېر كيم، بۇلور طوف حرم بىر كون.

كۈنگولدين توبه قيدىن رفع قيلمس خانقه شيخي،
مگر كيم دیر پیری ظاهر اېتكەي بو كرم بىر كون.

نوايى، روح پرور نكته و مهلك تجرددين
عجب گر قۇيمه غاي كۆك كه مسيحادېك قدم بىر كون.

جمالینگ شوقیدین غم شامی کویمک ابتلا سیدین،
کوزوم شمعی کول ایلپتور عیان قانلیغ قراسیدین.

فراقینگده توگان اوزره توگان قۇیدوم نې حاصل کیم،
منگه اون بۇلمه دی حاصل، بو ایگی تاش اراسیدین.

قویاشنی یوسفوم بیعیغه بیرمک بار اېسه ممکن،
دېگه یمېن تنگه بیعانه دور، اېرمس بهاسیدین.

چېکی عشقینگ یوکین دېب، خسته کۈنگلوم قان یوتوب غم یېر،
نې قوت کسب اېته آغهی بو شربت، اول غذاسیدین.

جفاسی تیرگوزور اېلنی و مېن بو عیشدین محروم،
مسلمانلر بیلینگ کیم، اۋلگوم اول کافر جفاسیدین.

اېرور معنون کۈنگولده یوزگره کیم، نې سبیدین دور
مسلسل قصه لر اېل ایچره زلفونگ ماجراسیدین.

خمار هجر دین دور تیره کۈز و کۈنگلوم، ای ساقی،
یاروتقیل هم جمالینگ شمعی دین، هم می صفاسیدین.

گر اۋلسم، دیر پیری تانگ بېلیم زنار ایله محکم!
منگه تابوت پوش ایل ب فنا دیری پلاسیدین.

عدم فرشیده تا قۇیدی فنا تاشی اوزه باشین،
نویی عار اېتر یېر نطعی و کۈک متکاسیدین.

۵۰۳

منع قيلمس اشك لعلينگدين توتشقان جان اۋتين،
پست نې نوع ايله گەي دريا سويى مرجان اۋتين.

اول كه ايتور هجر تسكىنى اوچون داغ اۋرتە گيل،
كۈرمەميش باشتين-اياغيم اۋرتە گن هجران اۋتين.

عشق دشتى نينگ سمومىدين گمان اېتگەي قويون،
وادى هجران ارا كۈرگن بو سرگردان اۋتين.

بوالعجبلغ عشق ارا كۈرگيل كه، كۈنگلوم چېكسە آه
زخمى آغزىدين مشعبدېك ساچر هر يان اۋتين.

آتشين گلدين قيزرميش باغ يا خود عندليب،
اوردى گلبنلرغە گل هجرانيدىن افغان اۋتين.

چرخ اوزە اېرمس شفق كيم، اۋرتنورگە اهل درد
تېز اېتر هر تون قضا آتشگهى دوران اۋتين.

اي نوايى، هر نسيم اول گل حريمى طوفيدىن
كيم يېتر روشن قيلور كۈنگلومدە گي حرمان اۋتين.

۵۰۴

سرشك قانين اياغينگ اوچون حنا قيلهين،
قبول توشسە قراغيم اېزيب قرا قيلهين.

عقيقِ لعلينگ گه جان جوهرين نثار آيله‌ى،
سوادِ خالينگه كؤز مردمين فدا قيله‌يين.

قرا مېنگينگ بيله قدينگ خيالى كېلسه، وطن
مونگه كؤز ايچره يسه‌ى، انگه جان ارا قيله‌يين.

قدينگ كه سايه ساليپتور، اوله‌ى انگه، يعنى
كه عشق علمين الفبا دين ابتدا قيله‌يين.

لبنى قصديمه تيشلر، يوزيگه تېلمورسم،
باقيب توروب نېچه اؤز جانيمه جفا قيله‌يين.

كؤنگول قوشى كيم ابرور جلوه گاه گلشن قدس،
بو دامگاهده نېدين آنى مبتلا قيله‌يين.

نوايا، غميم اهلِ ورَعدين اولمه‌دى كم،
قؤى اېمدى ميكده پيريگه التجا قيله‌يين.

۵۰۵

چېككنده نقّاش قضا اول سرو گلرخ صورتين،
گؤيا بېگنمه‌ى تشله‌ميش طرح ايلب آى، كون هيئتّين.

تا جلوه قيلدى اول صنم، ليلى سؤزى بؤلدى عدم
سودا اؤتى چېككچ الم، پست اېتتى مجنون شهرتين.

رخسار آچيب اول سيمبر، قامتنى ايلب جلوه گر،
اوزدى و كېسدى سر به سر گل رغبتين، سرو الفتين.

كۈنگلوم يوزونگ بېچارەسى، جانيم لېينگ خونخوارەسى،
سۇر، اى جھان عيارەسى، گاھى الرنينگ حالتين.

تقوا اېوى هموار اېرور، سُبْحَم اېپى زَنار اېرور،
اوى كلبه خمار اېرور، تا كۆردوم اول چين لعبتين.

جنتقه قيلمسمېن نزول، اول كوى ارا تاپسم وصول،
دوزخنى ايلرمېن قبول، اما يۇق آنينگ فرقتين.

ايلب سلاسل آرزو، آرتر جنونيم موبه مو،
ناگه نسيم مشكيو بېتكورسه زلفونگ نكهتين.

ايش سَرين آيا كيم بيلور، كيمدين بو مشكل آچيلور،
وه كيم، بو غم مهلك قيلور، هر لحظه كۈنگلوم حالتين.

بۇلغيل، نوايى، رو به ره، قيلغيل فنا كويين پنه،
ترك آيله زهد و خانقه، قيل دير پيرى خدمتين.

«و» حرفى نينگ ولاهيت افزايلرى نينگ وقايعى «غرايب» دين

۵۰۶

وفا اھليغە دوراندين يېتر جور و جفا اسرو،
جفاسيدين انينگ آزرده دور اھل وفا اسرو.

بو كيم اھل وفا ناياب اېرورلر اندين اېركين كيم،
بو اېسكى طاق الرغە ياغدورور گرد بلا اسرو.

فلک دردی علاجی چیقمه‌ی اندین کیمسه تاپمه‌یدور،
مگر نایاب اپرور اول حقه ایچره بو دوا اسرو.

گران جانلیغنی قوی، جان بپر، تیلر بؤلسنگ دُر مقصد،
که عالمده آغیر دور اوشبو جوهرغه بها اسرو.

فدا جانیمنی ایلب، عالم اهلیدین طمع قیلدیم
وفا، استغفرالله، قیلغان اپرمیشمپن خطا اسرو.

رضا اهلین سیاست تیغیدین قورقوتمه‌غیل، ای شیخ،
که قتلینگدین سېنینگ قورقرغه اولمه‌یدور گدا اسرو.

طبیعت چاهیدین روحینگنی قوتقر کیم، خوش اپرمستور
قفس قیدی ارا بلبلغه بولماق مبتلا اسرو.

چو کوثر جامی ذکری قیلمه‌دی رفع اوزلوگوم قیدین،
بو رنجیمغه همانا نفع اپتر جام فنا اسرو.

هوای گلشن قدس اپت، نوایی کیم، خوش اپرمستور
زغنلر بیرله بو گلشنده بولماق بېنوا اسرو.

۵۰۷

یار مستغنی و مهلک غم هجران اسرو،
آه کیم، قالمیشم اوز حالیمه حیران اسرو،

رخنلر سالدی اوقونگ کثرتی کونگلوم اویگه،

اول ياغين ايله دی بو کلبه نی ویران اسرو.

ای رفیق، اؤقینی زخمیدین اگر چپکتینگ، لپک
یپته دور جانیمه کؤنگلومده گی پیکان اسرو.

شیخ تکلیفِ نماز ایتتی، ولې بیلمس کیم
عشق تیغی یاره سیدین باره دور قان اسرو.

ناز ایتیب غمزه اؤقین گر آتر، ای جان، اسره
کیم آتر غمزه اؤقین ناز ايله جانان اسرو.

غصه جامی که بو دور ایچره لبالب دور، آنی
وه که، بات. بات توته دور ساقی دوران اسرو.

ای نوایی، دېمه اقبال بقا مشکل ابرور،
فانی اؤلغانغه ابرور اوشبو ایش آسان اسرو.

۵۰۸

یوزونگده می گلی یا گل آچیلغان بوستان دور بو،
گلونگده قطره خوی بوستانده غی سودین نشان دور بو.

کؤزومده قطره قانلر باغله غان ابرمس همانا کیم،
نظر باغیده شوقینگدین آچیلغان ارغوان دور بو.

اېمس وصلینگ تیل اوچقان کؤزوم اطرافیده کیرپیک
کیم اول دریایی قوشلرغه قمیشدین آشیان دور بو.

كۈنگۈلدىن چىققن آھىم ايلر افزون خلق سوداسىن،
كە شىدالىغ ديارىدىن يېتىشگن كاروان دور بو.

قىزىل رگلر كۈزۈمدە كۈرگن انگلر اشك سىلپن كىم،
آقرغە كېلگن اول يۇللر بىلە ھەر سارى قان دور بو.

لېنىدىن خستە دور كۈنگۈل دم آچمە، اى مسىح، اۋت كىم،
علاجىن يوز سېنىگ دېك نىنگ بېگنمس ناتوان دور بو.

قويون دېك دشت ارا كۈرسنگ مېنى، كۈپ قاچمە كىم ھەر دم
باشىنگە اېورولور سرگشتە بې خان و مان دور بو.

كۈنگۈل مېخانە رامى، خاطرىم خوش مى بىتىدىن كىم،
مونگە روح الامىن دور اول، انگە دارالامان دور بو.

دېمە، ھجران تونى ھەر دم يېتر اول آيغە فرىادىم،
اول آى فرىادىنگە يېتمس، نوایى، نې فغان دور بو.

۵۰۹

ھجرىدە كۈنگۈلۈمگە بار اول لعل سېراب آرزو،
نې عجب مخمور قىلسە بادە ناب آرزو.

اول پرى مجنونى اۋلدوم بو سېبىدىن كىم، اېرور
زلفى نىنگ زنجىرىدىن بۇينومغە قلاب آرزو.

لعلىدىن بېھوش بۇلماغلىق ھوس دور جانىمە،
كىمگە، ۋە كىم، بۇلمەغای مونداق شکر خواب آرزو؟!

ايتتيم آغزىن ايسته بان مېن، يۇق تمنايغنى وای
کیم عدم يۇلیده گم قیلدی بو نایاب آرزو.

کۆردوم اول بت قاشلری، کافر مېن، ار اسلامى بار،
کعبه اهلى قيلمه سه بو نوع محراب آرزو.

فقر کویى نینگ قرا تاشى بيله گلخن کولین
تاپقه لی، بالله که، قیلماں کیش و سنجاب آرزو.

گر نوایی ترک عشق ایتتى هوس اۆلتورمه کیم،
چین اېمستور ايله مېش بو ایشنى اویاب آرزو.

۵۱۰

هر يان اول يوزده تېر آقیز دینگ مو،
يا آقر مهر چشمه سیدین سو؟

قالدی خالینگ تېر آستیده، يا خود
دمین اسرر سوغه چۆموب هندو.

تېردین اول يوزگه بۆلمیش اؤزگه صفا،
قطره دین گرچه تیره دور کؤزگو.

گلده شبنم عجب خود اېرمس، لېک
آیده انجم غریب اېرور اسرو.

سېنده تېر، مېنده اشک دور يوز اوزه،

يىغله سىم مېن، سىنگە كېلور كولگو.

اويالىب تېر آقيزدى انجم اېمس،

شام هجریده طارم مینو.

دېر نوایی که غیر اېمس موجود،

طرفه سۆز «لا إِلَهَ إِلَّا هُوَ».

۵۱۱

سیل اشکیم بیرله توتمیش جملۀ عالمی سو،

جملۀ عالم نې کیم، بو نیلگون طارمینی سو.

ایله گن دېک مردم آبی برون کۆز مردمین،

اېمدی اول نوع ایله میش خیل بنی آدمینی سو.

بحر اشکیم یېتکورور هر دم قویاشقه بیر حباب،

اؤیله کیم، یېتکوردی کیخسروغه جام جمینی سو.

زخمیم ایچره قالدی پیکانینگ، نې ینگلیغ بوتکی اول،

چونکه قؤیمس یاره غه یاپوشقه لی مرهمینی سو.

ایستگیز کؤنگلومنی کیم، صحراده اشکیم سیلیدین

قیده سالدی اېرکین اول بېمار دېوانه منی سو.

دوردین غمگینمېن، ای ساقی، قدح سیلینی قوی،

بؤغزومه تا اېلتکه لی کؤنگلوم اوییدین غمنی سو.

ای نوایی، اویله نظم ایتتینگ بو دُر آبدار،
کیم عجب یوق رشحه سیدین گر توتر عالمنی سو.

۵۱۲

بېلینگ و زلفونگ خیالین شرح اېترمېن مو به مو،
تشلنورمېن لعلینگه تا باردورور جانیمده سو.

آرزو ایلر لېینگ آئینده جان بېرمکنی خضر،
خضر سوییدین اولوگ عمر ایله گن دېک آرزو.

شربت لعلینگ قۇیوب نوش ایله گن حیوان سویی
بۇلغهی انداق کیم، قۇیوب حیوان سویین ایچکی آغو.

سنبلونگی قیلغهی آشفته یؤل تاپمس نسیم،
بس که اطرفیده دور شیدا کؤنگوللردین غلو.

تېرله گن یوز قطره سیدین کیم، یوزوم قانین یودونگ،
وه، نې دېی کیم، عشق ارا تاپتیم نې ینگلیغ آبرو.

کؤنگلکینگ لونیدین اولدوم، عطریدین تاپتیم حیات،
قیسی گل برگینده بار ابرکین بو ینگلیغ رنگ و بو.

ای نوایی، یار سر وقتینگه یېتمک ایسته سنگ،
آه و اشکینگدین سوپور وقتینگ حریمین، بلکه یو.

۵۱۳

اول آيغە نې غم، توشسە بو دېوانەدين ايرۇ،
بۇلمس ضررې شمعغە پروانەدين ايرۇ.

خالينگى تىلب روحوم اگر اوچسە اېمس عيب،
بو قوشقە تحمل قنى اول دانەدين ايرۇ.

محنت قوشى كۈنگلوم اوييدىن چىقمەسە تانگ يۇق،
كىم كۈرگى بار جغدىن ويرانەدين ايرۇ.

اندوھ و خرد قصديم اېتر، واھ كە، محنت
اۋزدىن منگە ايرۇ دور و بېگانەدين ايرۇ.

قصەمنى اېشيتگن اۋلەدور، عشق ارا، وھ كيم،
اېرمس اول آغىر اويقو بو افسانەدين ايرۇ.

توفراغ اگر بۇلسە تنيم دىردە قيلمە،
اى چرخ، آنى ساغر و پيمانەدين ايرۇ.

مسجددە نوايى گر اېمس، نكتە بو دوركىم،
نقصان قىلور اۋلماق انگە ميخانەدين ايرۇ.

۵۱۴

توتقەلى لمعە رخساريغە جانان كۈزگو،
سو دورور بس كە قالىپتور انگە حيران كۈزگو.

چرخ زالى سنگە مشاطە دورور كيم، بۇلميش
انگە گلگونه شفق، مھر درخشان كۈزگو.

نې قتيق كۈنگلى بار آيا كه اۋشول مېهوش نېنگ،
رو بروييغه كېلور هر نفس آسان كۈزگو.

جان اېوى ايچره خيالىنگنى بېز بۇلسه كۈنگول،
پرى اۋلور تراغ اۋقونگ نېنگ و پېكان كۈزگو.

اول پرى يوزيگه دېوانه گر اېرمس، نې اوچون
بۇلدى بازارده سرگشته و عريان كۈزگو.

صاف قيل صفحه خاطرني تيلر بۇلسنگ فيض،
عكس تاپماق، گر اېرور تيره نې امكان كۈزگو.

كۈزگودېك بارسه نوايى اۋزىدين نې تانگ كيم،
ايلهدى مى قوياشين ساقى دوران كۈزگو.

۵۱۵

ساچتى تېردين گل اوزه اول سرو گلرخسار سو،
كويمگيم دفعيغه قىلدى اۋت اوزه اظهار سو.

يوزده خوى طغيانيدين گر كولسه اغزى يۇق عجب،
غنچه غه بۇلمس آچيلماق، ايچمه يين گلزار سو.

تيغى بات-بات زخم اورردين زار جسميم قىلدى دفع،
زمزم اۋلسون كيم، كۈپ ايچسه يېتكورور آزار سو.

يار اياغى توفراغيدين اۋزگه كۈرمان دارويى،

ای معالج، کۈزلریمدین کیم کپلور بسیار سو.

مهر کیم، اول چهره عکسی دور نېدور گر بؤلمه میش
اۋتلوغ آهیم شعله سیدین گنبد دوار سو.

غم اۋتیدین، ای حکیم، اۋلمک تیلرمېن، جامیمه
زهر قۋشسنگ قۋش و لېکن قاتمە غیل زنهار سو.

خسته کۋنگلوم آغزی زخمی پخته لیغ پیکانیدین،
بار انینگ دېک کیم، ماموق بیرله ایچر بېمار سو.

شرعیدین ایرو ریاضتدین صفا کسب ایله گن،
اۋیله دور کیم صاف اۋلور تسکین بیله مەدار سو.

تۋرت یانددین اۋقی یۋل قیلیمیش نوایی کۋنگلینی،
عشق سوداسی اوچون گۋیا یسپتور چارسو.

۵۱۶

سالسه زهدونگ تونیکه جام هلالی پرتو،
سُبْحه انجملرین اېت باده قویاشیغه گرو.

تیره خلوتنی نېتهی، خلوت آنی بیل که سالور،
انده ساقی یوزی و باده قویاشی پرتو.

اول پری عشقیده قاچماقدور اۋزومدین غرضیم
بو که غم دشتیده مجنون دېک اېترمېن تک و دو.

زلفى ھجرىدە دىمىم دودى جھاننى توتتى،
مېن سوداىى اۋشول ظلمت ارامېن شېرو.

دەر خسرولىغىن اول كىم تىلەدى، چىرخ انىنگ
باشىغە قۇيدى توگان كىم، دېر اولوس كىخسرو.

فىض كۇز توتمە رىياستدە تېشىلمەى يورەگىنگ،
آچمەيىن روزنە اوى ايچرە قوياش سالمەدى ضو.

اي نوايى، خوش اپرور خلوت، اگر بۇلسە كىشى
دلبرى بىرلە اىكاو، بۇلمەسە لېك اندە بىرو.

۵۱۷

جانە جان پرور سۇزى دور مو لب خندانى مو،
روحوم آرامى دېين مو آنى جانىم جاني مو؟

كۇنگلوم ايچرە نېشلىر كىم، سىنچىلىبدور انگلەمان،
نىشتىر مژگانى دور مو ناوك پىكانى مو؟

اي كۇنگول، عالم بوزردە قى بىرى آرتوق اپكىن
نوح طوفانى مو اشكىم سىلى نىنگ طغيانى مو؟

جان آلورده قىسى نىنگ صعب اپركىن شرح ايلهين،
عشقى نىنگ بېدادى مو، يا شدت ھجرانى مو؟

نېسى اول گل نىنگ ارم گلزاريدىن آرتوق اپمس،
جلوه ايلر سروى مو، يا غنچە خندانى مو؟

ای که بېردینگ دهر شوخینغه کۈنگول، قتلینگ اوچون
عشوۋە پیداسی مو یۇق آفت پنهانی مو؟

قتل قیلدیلر نوایینی ولېکن بيلمەدیم،
کۈنگلین آلدورماق مو اېردی، یا کۈنگول آغانی مو؟

۵۱۸

شام هجر اۋلتوردی بو ناشادنی، سېن شاد اویو،
قیغوم اېتتی قصد جان، سېن قیغودین آزاد اویو!

کېچە گر تا صبح مانع اېردی نالم اویقونگه،
چونکه بۇلدى رفع اول افغان بيله فریاد، اویو.

بیزنی هجرانینگده سۈنگی اویقو باستی، باری سېن
کۈز آچیب ناز اویقوسیدین بیزنی قیلینگ یاد، اویو.

سېن بغایت مست و اوسروک، نرگسینگ اویقو تۈله،
چونکه غنچنگ داغی قیلدی اېسنه مک بنیاد، اویو.

تون اېرور کېچ تانگله تاپقونگ اویقوسیزلیغیدین خمار،
بیر زمان باشینگ قۇیوب، ای سرو حوری زاد، اویو.

اۋتتی یاریم کېچە و یخشی اېمس مست خراب،
کۈز یوموب آچقونچه صحبتنی قیلیب برباد اویو.

ای نوایی، مست بیر تون کۈز ایاغیغه قۇیوب،

اويغانورغه حشر صبحين ايله بان ميعاد اويو.

۵۱۹

غميمنى مو دپين يا بې غم ابل نينگ ماجراسين مو؟
كۈنگول حالين مو ياخود كۈنگلوم آغان نينگ جفاسين مو؟

قتيق عشقيم بلا و شدتين مو ايله يين تقرير،
يۇق ابرسه بې نهايت اشتياقيم ابتلاسين مو؟

عددسيز درد و رنجيم صعب اېكننى مو قيله يين شرح،
صفتقه راست كېلمس شوقيم آشوب بلاسين مو؟

كۈنگولده وصل باغى آرزوسين مو بيان ايله ي،
بغيرده خار هجران نوكى نينگ مهلك يراسين مو؟

وفاسيز يار بې پرواليغى نينگ مو سۈزين آيته ي،
منگه جور و جفا تيغين اوروب، اېلگه وفاسين مو؟

فلك ظلمى، اولوس بېدادى يا بير سرو رعنانينگ
مېنينگ حاليمنى ايلب بې هوا هر يان هوا سين مو؟

نوايى، التفات آغاز قىلدى يار، بيلمن كيم،
فراقيدىن شكاييت مو قىلى، وصل التماسين مو؟

۵۲۰

نظرغه كېلگه لى اول ايگى نرگس جادو،

كۈنگۈلدە يۇقتورور آرام و كۈزدە ھەم اويقو.

كۈنگۈل كە قىغو سىپاھى بىلە نىزاع اېتتى،
نې شاد اۋلەي كە، كۈنگۈلنى باسىپتورور قىغو.

كۈزۈنگ ختن كىيگى دور، يوز اوزرە خاللىرىنگ
مگر كە نافەسىدىن مشك ساچتى اول آھو.

كۈنگۈلنى توز، تىلەسنگ فائز اۋلسە توز معنا،
نېدىن كە، اېگرى اېسە اېگرى كۈرگۈزۈر كۈزگۈ.

خوش اول كە، دېرغە بارغچ قدحنى مېغىچە مست
يوكونوب ايلگىمە بېردى چىقىپ كېلىپ اوترو.

چو كافر اوردى بو يىنگلىغ يۇلومنى، دىن لفظىن
ينە تىلىمگە كېچورسم اويت اېرور اسرو.

نوايى، اۋىنەدى جان خلقىدىن بورون، رحم اېت،
چو قىلدى جلدلىق، اېمدى كېرەك انگە جلدو.

«۵» حرفى نىنگ ھمايونوشلىرى نىنگ ھلاک انگىزلىغلىرى «غرايب» دىن

۵۲۱

يوز و كۈزۈنگدە معین کمالِ صنعِ اِله،
نې يوز دورور بو، نې كۈز لا اِله اِله.

جمالینگ آيينه وَالشَّمْسِ كۈزگۈسى نازل،

كۆزونىڭ قاراسىغە مازاغ سورمەسى ھىمراھ.

تېلىنىڭ ھىمىشە لىدۇنى ئىلومىغە ئاڭ،
مىدام كۆنىڭلۇنىڭ ئىلى رىموزىدىن آڭاھ.

قىمر ھىر آى باشى مىعجىز نىماى اىلىڭىنىڭدىن،
قاچىب باشىنى اۋغورلر كە، بۇلور اۋىلە دوتاه.

چو سېن سېھىردىن اۋتۇنىڭ شىھاب و حلقە بدر،
اېمىس كە چىرخ چىكر كىچە خىسرىنىڭدىن آھ.

سېنىڭ شىفاعىتىنىڭ امىدى چون اېرور مىمكن،
گىناھكار بىراو دور كە يۇقتور انڭە گىناھ.

نواىى گلىشنى نىنىڭ نىرگىسى نىجوم اۋلغەى،
كۆز اوچىدىن انڭە قىلىسنىڭ حساب وقتى نڭاھ.

۵۲۲

آتشىن گل گرچە زىنىت دور جىھان بوستانىغە،
برىق اېرور ھىر يېل اوچورغان برگى بىلبىل جانىغە.

گرچە شىمع اۋلدى شىبىستان زېبى، كۆر كىم، شىعلەدىن
تېل چىقىرمىشتور سوسىب پروانەلرنىنىڭ قانىغە.

مى كە قوئىغەى ساقى گلرخ اېرور حىوان سوبى،
وھ كە، آفت سىلى دور عشق اھلى خان و مانىغە.

نَی یېلین عیسی دمی توتقیل که، اول باردور سموم
هر نفس اهلِ محبت خاطر ویرانیغه.

بیر قدح می ایچمه دی بو دیر اهلی بی خُمار،
تا تحرک بُولدی بو طاسِ نگون دورانیغه.

باده بی رنج خمار اهرمیش فنا جامیده، لېک
ایچمک آنی کېلمه میس هر بوالهوس نینگ شانیغه.

حسرت اؤلتوردی مېنی، ای مغ، کپتور جام فنا
کیم چیده ی آلمان بوگون دین سؤنگ آنینگ هجرانیغه.

بؤلْمه یین فانی، محبت جامین ایچمک دور محال،
ثبِت اېتینگ بو نکته نی دیر فنا ایوانیغه.

کام تاپْمه ی کیم که حرمان دردیغه بؤلْمیش اسیر،
ایسته سه همدرد اؤلتورتونگ نوایی یانیغه.

۵۲۳

کؤنگول کیم، وصلین ایستر هر طرف داغ ستم بیرله،
اېرور یوسف خریداری نېچه اېسکی درم بیرله.

فغانلیغ کؤنگلوم و اؤتلوغ دمیمنی سهل توتمنگ کیم،
آلبمېن عشق اقلیمینی بو طبل و عَلم بیرله.

ایتوردوم آه ایله اغیار اول یوز هوا سیدین،
انینگ دېک کیم، کیشی سودین کپترگه ی خسنی دم بیرله.

قوروغ جسميىمده قانليغ زخم اېمستور قطع اوچون هر يان
كه پيوند ايله مېشسېن اول سۇنگكلرنى بقم بيرله.

توگان بيرله الفدين، اى منجم، حالتيم كۇرگيل،
كه كۇكسوم تخته رمل اۇلدى هر يان بو رقم بيرله.

كۇنگول مشهوديغه چون بۇلدى واصل بۇلسه بۇلسون تيل
اگر قايل صمد بيرله وگر ذاكر صنم بيرله.

تَعَيِّن خرمين كويدورگه اى امارق رفتاري
كه كۇكدين يېرچه منزل قطع قيلغه يېر قدم بيرله.

دېمه كۇكسومده اېسكيىرگه توگانلر كيم، كۇزوم هر يان
چو چۇكتى قطره داغ اۇلدى بو سريغ صفحه نم بيرله.

قد و زلفونگ بيله آغزينگ تيلب كۇز يومدى عالمدين،
نوايىغه ترحم ايله كيم، باردى الم بيرله.

۵۲۴

كويدى كۇنگلوم كيم، نېدين منزل اېمس جانانه غه
توشتى اؤت گنج آرزوسيدىن بيزينگ ويرانه غه.

اول پرى اوسروك كۇزين ايستب بيابان توتميشم
كيم كيىك بيرله مدام الفت بۇلور دېوانه غه.

كېلديم و كوردوم يوزين قيتورمېن اېمدى اؤرتەبيب،

شمعنى كۆرگن نفس يانماق كېرەك پروانە غە.

تا منگە بېگانە بۆلدونگ كۈنگلوم اۋلدى شاد كيم،
آشنادين الفتینگ كۆپرەك دورور بېگانە غە.

چرخدين يىغلىرىسېن، اى كۆز، بيل كە بۆلميش يېتكو دېك
سېل اشكىنگدين خلل بو اېرتە گى غمخانه غە.

اى كە، ايسترسېن بېرىب جان، وصل تاپقنلر سۆزىن،
صفحه غە اۋت سال قىچان يېتىسنگ بېزىنگ افسانه غە.

اى نوايى، نېچە بغرىنگ سو بۆلۈب تۆكۈنگ سرشك،
طاير دولت چو باقمس بۆيلە آب و دانە غە.

۵۲۵

يانيدە اېل كۆرسىم اۋق سىنچىلمە سون مو جانيمە،
مېن كە غىرتدين روا كۆرمان انى اۋز يانيمە.

زخمليغ جانيم كە، عشقى اۋتيدىن خورسند اېرور،
اۋت اېمس اول مرهمې دور كيم، ياقىپتور جانيمە.

وصلیغە كۆز محرم اېرمستور، نېتىب محرم بۆلور،
ايگى تر دامن كە، تانوغلوغ بېرورلر قانيمە.

چون يېتر اول آيغە افغانيم، اېرور بو دمېدم
كيم چىقىب جان داغى ھمرە بۆلغوسى افغانيمە.

عقل و جاندين عشقيده بېگانه بۇلدونگ، اى كۇنگول،
كېت خدای اوچون، بوكوندين سۇنگ مېنى هم تانيمه.

تن اويين درد اوقى كۇپ زخم اېتى، اما شكر كيم،
كيرمه دى ناشكرلۇغ سيلا بى بو ويرانيمه.

اى نوایی، كولى اول گل اشكيمة، بۇلمه ی خلاص
يیغله ماقدین، كام اگر بو دور گل خندانیمه.

۵۲۶

عنبر تر ایسته مان یوز اوزره خالینگ باریده،
کم کورونور ینگى آى مشکین هلالینگ باریده.

سیم اشکیم ایتلرینگ نینگ یولیده صرف ایلرهم،
چون دېمیشورلر که قازغان دؤست مالینگ باریده!

چشمه حیواندین، اى جانیم، سو ایچمه یدور کۇنگول،
خضروش خطینگ ارا شیرین زلالینگ باریده.

چون وفا قيلمس کيشيگه عاقبت دوران حسن،
پس غنیمت بیل وفا قيلماق جمالینگ باریده.

دېگه سېن، مسکین نوایی ناله سین بلبل کپی
اى صبا، اول گل حریمیغه مجالینگ باریده.

۵۲۷

غمىدىن گرچه جان يۇق اېردى تىندە،
تيرىلدىم لىلىدىن اۋلدىم دېگىندە.

نېچە باغ ايچرە بارىم بويى تاپمان،
قىدىنگىدىن سىرو بىرلە ناروندە.

يشورون نېچە كۈز سالىم عدم نىنگ
وجودى يۇقتور آغزىنگ بار اېكىندە.

تىلر كىرپىكلرىنگى زار كۈنگلۈم،
بۇلور بلبل يېرى دايم تىكىندە.

دېمە گل عمرىن آز، اى باغبان كىم،
سېنىنگ دېك كۈپنى كۈرمىش بو چىمىندە.

نوايى گرچه اۋلدى لالە يىنگلىغ
اېرور داغىنگ بىلە قانلىغ كىندە.

نېچە كىم شاه بې پروالىغ اېتسە،
كېرەك اۋكسوتىمەسە قوللوغنى بىندە.

۵۲۸

كۈنگلۈم نىنگ آھى قىطرە خون جگر بىلە،
دودې دورور كە، آيرىلور اۋتدىن شرر بىلە.

لعل اوزرە خال و خط كە، يوزونگ كۈزگۈسىدە دور،
طوطىغە ھىندو اۋرگىتە دور سۇز شىكر بىلە.

اول شوخ كۆنگلوم آلدی سالیب جسمیمه شكست
بیر طفل دېك كه، شاخین اوشتقی ثمر بيله.

نازكلوگیدین اپرکین، یا مېن حسودمېن،
بو کیم آنینگ بېلین كۆره آلمان كمر بيله.

دردا كه، عالم اهلیده بیر یار تاپمه دیم،
تون- کون نیازِ شام و دعای سحر بيله.

بو غصه دین دېدیم كه، بۆله ی عمر و م آخری
شاه سپهر قدر محمد عمر بيله.

اېل مانع اؤلسه، توشتی نوایی کپی ایشیم،
مجنون بۆلوب عدم یۆلی ساری سفر بيله.

۵۲۹

زه ی حیوان سویی دېك لبلرینگ نینگ حسرتی جانده،
خطینگ خضری كه، پنهان دور و لېكن آب حیوانده.

یوزونگ حق نوری، جسمینگ روح پاک، ای روح دېك غایب،
سپهینگ دېك بیر ملک سیما پریش یؤقتور انسانده.

ایکی کۆز کیم اراسیندین چیقیب یاش اؤتتی باشیمدین،
بعینه غرق بؤلغان کپمه لر دور بحر عُمّانده.

دېگه یسپن بحر دوریده قمیشلیغ ایچره اؤت توشمیش،

كۆزۈم گىردىدە قان ياش كىم يۈگۈرۈر خار مژگانىدە.

اېمىس پىكانى نىنگ روشنىلىغىدىن بو كۈنگۈل عكسى
ھەر اۋق كىم اول اتر كۈنگۈلۈم اېرور البتە پىكانىدە.

اۋتوب يىللر، اول آي بىر كۈن كە كلىم سارى يۇل آزغەي،
يامان طالەدىن اول كۈن بۇلمەغەيمىن بيتالاحزانىدە.

نوايى قان ياش ايچرە غرق و يارى مى ايچىب دايم،
دېر اېرمىش: زرق ايلەيدۇر، كۈرۈنگ مېن قندە، اول قاندە؟

۵۳۰

پىردەغە كىرگن كېيى خورشىد رخشان ھەر كېچە،
عزم خلوت ايلر اول شمع شېستان ھەر كېچە.

اول كولوب احباب بىرلە صبح دېك، مېن شمعوار
اۋرتىب كۈنگۈلۈم تۈكرمېن در غلتان ھەر كېچە.

بىر قوياش ھىجرانىدە عريان تنىم گردون كېيى
مېر اۋتىدىن كۈرگۈزۈر مىنگ داغ پىنھان ھەر كېچە.

گە-گە، اى مخمور خواب آلود، سۇر اول خستەنى
كىم يېتر آغزىغە لىلىنگ يادىدىن جان ھەر كېچە.

ناصر، نې نوع پىنھان طاعت ايلەي كىم، آلور
دىن و دانش نقدىنى بىر نامىلمان ھەر كېچە.

بیر کپچه سؤرغیل مېنى اندين بورون کیم، سؤرغه سېن،
قنى اول بېدل که، ایلر اېردى افغان هر کپچه.

چېک، نوایی، ناله، کؤز می بېرسون و بغریم کباب،
چون بؤلور اول آی خیالی بیزگه مهمان هر کپچه.

۵۳۱

اول مسافر کیم، اېرور برچه سپاه اهلېغه شاه،
جسم و روح خاکساریم دور انکه گرد سپاه.

دېدیلر، اول شه قیلور یؤل عزمی، بو امید ایلر
کؤکسومه تیرناغلر بیرله چېکیمېن شاهراه.

رخشی نینگ جولانی کؤرگچ بیر اؤپسم مېن ضعیف،
یؤق عجب، چون خم بؤلور اېرمیش ایتیک یېلدين گياه.

ناوکی بیرله تۆشوک بؤلغان کؤنگول احوالینی
نېچه شرح ایلر دېسم، آغزیمغه کېلمس غیر آه.

کؤزده اشکیمدين قاچیب، کیردی خیالی کؤنگلومه،
کؤپ یاغیندين یۆلدله اېل ویرانه قیلغان دېک پناه.

بو که هجرینگدين اولوبمېن بۆلمه سه باور سنگه،
جان و کؤنگلوم کیم سېننگ بیرله دورور، بس دور گواه.

کېلسه یاروتقى سپه گردی نوایی کؤزله رین،
اول مسافر کیم اېرور برچه سپاه اهلېغه شاه.

۵۳۲

جان آلسە نىلەي اول بت پىمان گىيل بىلە،
چون بېرمىش كۈنگۈلنى انگە عشق دل بىلە.

كېلدى منگە چو بېلىنى چېكىتىم، مثل دورور
كىم تارتسە بۇلور، كېلورى بۇلسە قىل بىلە.

اشكىم كە قان بۇلوب يوزوم اوزرە توشر ابرور
ياشې كە ميل بار انگە سارىغ قىزىل بىلە.

قدى ھواسىدە لىيدين راحت اىسترم،
ايچسم كېرەك مدام چاغير معتدل بىلە.

ظلم اھلى خلق قانى اوچون تىل اوزتماغى
بار اۋىلە كىم، سىباع ايچر سۈنى تىل بىلە.

كوثر مېنى شھد اوزە صنع ايلگى تامىزىب،
لعلينگ مۇخمّر ايلەدى اول آب و گل بىلە.

دايم قاشىنگدە بۇلسە نوایی عجب اېمس،
گل بىرلە بلبل اۋلسە نې تانگ متصل بىلە.

۵۳۳

آه كىم، جان بۇيىغە زلفونگ طناب اۋلدى يىنە،
كېچە تانگ آتقونچە ايشىم پېچ و تاب اۋلدى يىنە.

عشق اسير اپتگن جنونلوغ كۈنگلوم ايشى هر زمان،
اۋتقە توشكن تېلە يىنگلىغ اضطراب اۋلدى يىنە.

گىج علم اپتتىم كۈنگول كىنجىن، يېتىشكىچ سىل اشك،
هر عمارت كىم، قىلىپ اپردىم خراب اۋلدى يىنە.

بىر اۋق اوردى غمزهنگ و ايتتى كۈنگول مجنون بۇلوب،
اول بلا اورغانغە بىلمان، نې بلا اۋلدى يىنە.

گل شىبستان بزمىدە اۋت ياقىتى، وه كىم غىچەدىن
برچە بلبل كۈنگلى اول اۋتقە كباب اۋلدى يىنە.

دېدىلر، اول شوخ هر دم آشوقوب اويدىن چىقىر،
جان ايشى چىقماق اوچون، وه كىم، شتاب اۋلدى يىنە.

اي نوايى، بىر سارى بۇلدى بو غملر چون سنگە،
عزم درگاه شە عاليجناب اۋلدى يىنە.

۵۳۴

عارضى يانيغە گل سنچر جمال اظهاريغە،
انگلتور حسنين انى يانداشتوروب رخساريغە.

اپورولور باشيغە جانلر، وه كه، هر جان رشتهسى
چيرمىشپيتور گرد يزدى معجبرى هر تاريغە.

ساچباغ اپرمستور كه، اول كافر غلاف ايلبدورور
عالم ايچره كفر تعظيمنى اوچون زناريغە.

كۆز دعاسى چون بېتىرسىز صدقەسى ايلب مېنى،
تار جانيم رشته سىدين تارتىنگىز طومارىغە.

يېنگ بىلە نېوچون ياپر آغزىن تكلّم حاليدە،
لېلريدىن شھد آليب يۇل آچمەسە گفتارىغە.

برگ اپوورمەى لون، گل سۇلمى، تۇكر اپرمىش خزان،
باغلمە كۇنگلونگىنى، اى بلبل، جهان گلزارىغە.

كعبە كويىنگ نوايى اپورولورگە ضەففى بار،
بس مدد دور يېتسە ايلگى قصرى ئىيگ دېوارىغە.

۵۳۵

نصيحت اهلى منگە دېر كە، مېنى ترك اپت، وە،
ايلىگ آليب كېلور، آغيز ايچر، منگە نې گنە؟

منگە مى ايچمك اپمس اۋزلوگومدين، اى ناصح،
بو ايشگە چنگ قدى دال و شاهد اۋلدى گوہ.

قىلور جنون و قدح منعيني منگە زاهد،
دېگەى مو تېلبەگە بو سۋزنى بۇلمەسە ابلە.

قدح چراغىنى آليمغە توتقىل، اى ساقى،
كە زهد ظلمتيدە اسرو بۇلمىشم گمرە.

بو شمع بيرلە خرابات سارى باشلە مېنى،

كە تيرە زەھد تونى ايچرە اۋلەمەيىن ناگە.

باشىمنى پىر خرابات درگەيدە قۇيەي،
كە بار اېشىگىدە شاھ و گدا، گدا بىلە شە.

نوايى ايتور اېمىش دىر ارا صنم ذكرين،
بو اسم ذكريگە كىم قىلسە ميل بسم الله.

۵۳۶

قىل اوچى كۈرمەي آغزىنگىدىن نشانە،
انگە عاشق بۇلوبمېن غايابانە.

خطىنگ باش چېككەلى خالىنگ كۈرونمىس،
كۈكردى چون اېكىن، گم بۇلدى دانە.

بەھانە قىلمەي اېل قانين تۈكرسېن،
مىنگە يېتكىچ قىلورسېن بىر بەھانە.

بولوت اېرمىس كە، گردون يوز ياشورمىش،
كە تارتىر شعلە آھىم زبەنە.

بو جولان كىم قىلورسېن، وە، زمانې،
عنەن چېككىل، كە قۇزغىلدى زمانە.

فنا اھلى سۈزىن كۆپ ايلە مذكور،
كە اويقو دفع اېتر اوشبو فسانە.

اۋتر يارینگ، نوایی، عرض قیل کیم،
قدم قۇیسنگ یقین دور بنده خانه.

۵۳۷

تا کۋروبان یوزین قویاش قالغەلی اشتیاقیغە،
گاه باشیغە اپورولور، گاه توشر ایاقیغە.

قاشیده خالِ هندویی کافر اپرور که اهلِ دین
قتلی اوچون چیقیدورور کۋز ساله دیر طاقیغە.
درد و بلا و غصه‌نی کۋنگلوم ارا کپتوردی عشق،
دۋستلرین بیرو کبی کیم تیلە گە ی وئاقیغە.

وصل مېنى چون اۋلتورور، بار سنگه اۋلمگیم غرض،
رحم اپتیب، ای اجل مېنى سالمه انینگ فراقیغە.

پویه قیلورده چابکوم اوچتی رکابیده پری
نقش ساغینمه زېب اوچون سیزغان انینگ جُناقیغە.

طالب فقر بار اپسنگ، برچه بیله موافق اۋل،
سېن کیم و اعتراض کیم اهلِ زمان نفاقیغە.

نوشِ لبینگ زلالیدین خسته نوایی ایچکەلی
چپکسه حیات شربتین، زهر کپلور مذاقیغە.

۵۳۸

توشتى اۋت كۈنگلوم اويىگە آھ درد آلود ايله،
كۈزدە كىرپىك دېمە بو روزن، قارمىش دود ايله.

تېلبە ايت دېب ھەر طرف يۇلدىن قاچرلر اھل ھوش،
اۋت ساجىب آغزىم، يوگورسم جسم گرد آلود ايله.

چرخ سىر اېتمس، نېچوك صبح ايسته گەيمېن غم تونى،
جوفى چون مدروس اېرور بو شام قىر اندود ايله.

يوسفوم ھجرىدە يعقوب غم اېچرە، مطربا،
اۋىلەمېن كىم، خوشلوغوم يۇق نغمە داود ايله.

دېمە ھەر دردىنگە ايلهى بىر دوا، قۇى كىم اۋلەى،
كىم ملول اۋلغونگ دورور بو درد نامعدود ايله.

شە تىلر دولت بقاسىن، مېن گدا يار آغزىنى،
رنجە دور شاه و گدا بىر كام ناموجود ايله.

اى نوايى، قىلدىلر دنيانى رد اھل قبول،
گر دېسنگ مقبول اۋلەى، يار اۋلەمە بو مردود ايله.

۵۳۹

لبلىرىنگ كىم، حىف اېرور تېنگ توتماق آنى قند ايله،
سىندورور يوز قند بازارىنى شگرخند ايله.

تا كە حيرانمېن سنگە ناموس ايله ايتمىش كۈنگول
تېلبە يىنگلىغ كىم، قاچر اېل غافل اۋلغچ بند ايله.

آدم اول ساعت كه جنت ايچره اولادين كؤرر،
نې قوونغه، دمبدم سېن نازنين فرزند ايله.

قؤى نصيحت، زاهد و اؤتلوغ ديميدين وهم قيل،
تېلبه ايت امكانى يۇقتور كيم ساغلغه ي پند ايله.

حاجتينگنى اېلگه عرض اېتمك كه حاجت بؤلمه سون،
خوش چيقيشسنگ لحظه يى بو زار حاجتمند ايله.

لېلرينگ هجرينده يوز پر كند كيم بؤلميش كؤنگول،
لعل اېرور محلول قان اؤرنىغه هر پر كند ايله.

چون نوايى كؤنگلى سيندى اېمدى لطفونگ نې آسيغ،
كيم اوشتسه شيشه نى بوتمس ينه پيوند ايله.

www.zgu.org

مهردين دېرمېن كه، بولسم دايم اول آييم بيله،
نيله يين كيم، چرخ اېورولمس مېنينگ راييم بيله.

هجر ارا مېن دورمېن و پُر آه و پُر خم قامتيم،
غم چېريگي خصم و مېن بو نوع اوق-ياييم بيله.

اهل مجلس كويدورور تيلين كېسيب، باشين اوزوب،
شمع دعوا قيلسه ماه مجلس آراييم بيله.

كوه درد و تشنه هجرانني سؤره هاددين،
انگله مس خسرو كه شيرين بيرله دور دايم بيله.

حسنيغه هر لحظه حيرانراقمېن آخر يخشي دور،
اولمه سم ناگه بو عشق حيرت افزاييم بيله.

بولمه يين دير فنا خمّاري گر قيلسم بدل
زاهد خودبين رداسين باده پالايم بيله.

دمبدم مسكين نوايي نينگ دېگيل قان يوتماغين،
اي قدح، گر همدم اولسنگ باده پيماييم بيله.

گر صبادېك همدم اېرمان سرو آزاديڼگ بيله،
بارمېن، اى گل، قیده کیم بولسم، سېنيڼگ ياديڼگ بيله.

رنگې يوقتور چون قيزيل گلدين سنگه، اى عندليب،
اېل قولاغين اسرو کؤپ يالقېتمه فرياديڼگ بيله.

اى که دېرسېن، کؤزلريم کؤنگلونگنى نې نوع اېتتى صيد،
بیر کبوتر نېتسون آخر ايگي صياديڼگ بيله.

مسجد ايچره بت پرست اولماق نېچه، اى پير عشق،
دين اوچون کيرديم فنا ديریغه ارشاديڼگ بيله.

سحر اېرور، اى عشق کیم، کؤنگول بيله پيکانيدين
خرقه جسم ايچره اؤت و سونی اسراديڼگ بيله.

گر عتابي ظاهر اېتسنگ اؤزگه لرنينگ کؤنگلين آل،
نېگه کیم مېن خوی اېتيمېن ظلم و بېداديڼگ بيله.

اى نوایي، تېلبه ليک ترک اېتکه سېن کؤرگچ وصال
حور سیرتليک، ملک خولوق پريزاديڼگ بيله.

وہ کہ، اول شوخ باریب، جانیمہ اؤت سالدی ینہ،
تہلموروب ایکی کوزوم یؤلغہ باقیب قالدی ینہ.

نہچوک اؤلیمہی مہن بیمار کہ، عیسی نفسیم
کوردی حالیمنی و کورمسگہ اوزین سالدی ینہ.

یغلنگ، ای شمع و صراحی کہ، اؤلریمنی بیلیب،
مطرب نغمہ سرا نوحہ کوکین چالدی ینہ.

زخمی ایستر ابدی کونگوم قیلیجیدین، گویا
ایلگیگہ تیغ مہنینگ کونگوم اوچون آلدی ینہ.

عقل و دین نقدی فنا دیری ارا کیرمس اہگچ،
می بیلہ مغبچہلر یؤلیدہ سیفالدی ینہ.

صبر اہلین ییغمیش اہدیم چیقمس اہگچ اول خورشید
وای کیم، ذرہ کبی ہر ساری قوزغالدی ینہ.

قؤلده، ای خضر رھیم، خستہ نوایی قؤلینی،
کیم بو یؤل پویہسیدین بغری انینگ تالدی ینہ.

كۈنگلوم آغزىنىڭ نىڭ خىالىدىن كە تۈلمىش غم بىلە،
نقد اوزه آمىدې دور كىم، نقش اپرور خاتم بىلە.

غم تونى انجمنى آھىم اوقلىرى زخمىگە چرخ
اول ماموقلر بىل كە، قۇيموشدور يسب مرهم بىلە.

يىغلمە، اى كۈز كە، بارمس ظلم نقشى كۈنگلىدىن،
تاشدە قازغان خط نې امكان كىم بوزولغەى نم بىلە.

اول الف دور كىم عيان دور بىر طرفدىن شمرەسى،
قدى بىر ياندىن آسىلغان مشكبو پرچم بىلە.

شيخ غافل كۈنگلىن اېتتى زرق آھىدىن قرا
طفل دېك كىم، كۈزگونى قىلغەى مكدر دم بىلە.

آه كىم، آوارە بۇلدوم ایتە آلمەى شمەى،
ياشورون كۈنگلومدە گى دردىمنى بىر همدم بىلە.

اى نوایى، گر دېسنگ كىم بېنوالىغ كۈرمەيىن،
آشنالىغ قىلمە غىل جنس بنى آدم بىلە.

ينە نې اۋت اېدى كيم توشتى خان و مانىمغە،
 ينە نې شعلە اېدى كيم توتشتى جانىمغە.

ينە نې برق اېدى كيم، توشكىچ اۋرتەدى خس دېك،
 بىر اۋت شرارەسىدىن جىسم ناتوانىمغە.

ينە نې ناوك مژگان اېدى كە، قتلىم اوچون
 تىكىلدى كۈنگلۈمە، يعنى كە كىردى قانىمغە.

ينە ايچىمگە مگر عشق سالىدى اۋت، كە چىقر
 شررلى قاتىلىب آه ايله فغانىمغە.

بلا اۋتى يانەدور تۈش-تۈشىمدىن، اى ناصىح،
 اپشيت نصيحت و زىنھار كېلمە يانىمغە.

سرىغ يوزومنى قىزىل قىلمەدى وصال مىي،
 بو گلشن ايچرە بهار اۋلمەدى خزانىمغە.

نوايى ايتتى قۇيۇب يادگار خستە كۈنگۈل،
 دېدى كە، يېتكۈرىنگ البتە دلستانىمغە.

مېن گدای قچان يېتتيم اېرسه شاهيمغه،
يوزومنى يېرگه قۇيوب شکر دېي الهيمغه.

کۈروشمگيمگه اگر بۇلسه ملتفت بۇلغەي
وصال طوبىي جنت بيله گياهمغه.

گنه ييراقلېغيم اېردى چو لطف محضريسېن،
عنایت ايله گيل و باقمه غېل گناهمغه.

دېدى سفرده ستون بيرله بارگاهيم دور
کيشى که، باقتى فلک بيرله دود آھيمغه.

بها توگانلريم اۆلميش وصال اوچون، هيھات،
کيشى بو تحفه نى ساتقى مو اول دراهيمغه.

بوزولدى کۈز و کۈنگولدين ايشيم، مگر توشقى
بیر اهل دل کۈزى بو حالت تباھيمغه.

نواييا، ينه گر يار يوزينى کۈرسم،
مطیع و قول بۇلەيین بخت نېک خواهيمغه.

كۈنگلۈمدە اندوھ يېلىدىن غباي دور يىنە،
گويى آنى قۇزغاغان چابك سوارې دور يىنە.

تا نې گلر آچقى آخر عشق ايلب چاك-چاك،
غىچە دېك كۈنگلۈمدە بو كيم خار خارې دور يىنە.

آه دودين سھل توتتيم، آه كيم اول دود ارا
صبر اويين كويدورگه لى ھر يان شرارې دور يىنە.

تا لېنگ عشاقدين جان آلماق اېتى اختيار،
جان بېرورگه ھر طرف بې اختيارې دور يىنە.

تانگ يېلىدىن بۇلدى گۇيا سىنلېنگ آشفته كيم،
ھر قە يان باقسم پريشان روزگارې دور يىنە.

يېرگه ساچقان تېر فنا دشتيدە سالك جېھەسى،
گوھر مقصوديدىن ھر دم نثارې دور يىنە.

رفع اۋلوب اېردى نوايى نېنگ جنونى، اى پرى،
تا سنگه توشمىش كۈزى مېنون شعارې دور يىنە.

كۆرەدورمېن كە بارور يار و قالورمېن مېن گمەرە،
بارە آلمان، تورە آلمان، نې قتيق حالت ابرور، وه.

هجریدین جانیمە یوز بیم قالەیین دېسە اندین،
خویدین كۈنگلومە یوز وھم بۆلەیین دېسە ھمرە.

كویونگ امیدی، یوزونگ حسرتی بیرلە، اگر اۆلسم
یاوومە ی روضە غە واللہ، تیلەمە ی حورنی باللہ.

مېغە مشغول اۆلوبان ھجرنی عمدأ اونوتورمېن،
بوزولور زار كۈنگول، كیردی اېسە یادیمە ناگە.

عقل تکلېف قیلور كۈنگلومە کیم، ترک جنون قیل،
تېلەدین کیم بو طمع توتقی، اگر بۆلمەسە ابلە.

شاه و سائلگە نصیب ار كۆپ و آز دور، نې تفاوت،
تېنگ نصیب اۆلدی، چو توفراققە اگر سائل، اگر شه.

يار غافللیغیدین زلفیدە جان بېردی نوایی،
صید اۆلر دامدە، صیاد اگر بۆلمەسە اگە.

وہ کہ، بیر بد مهر اوقی جانیمغہ پیران دور ینہ،
تیرہ کۈنگلوم کلبہسی نینگ شمعی پیکان دور ینہ.

بیر پری عشقیدہ جان نینگ نقطہ بیرلہ نونی دپک،
ناتوان جانیمدہ نعل و داغ پنہان دور ینہ.

بس کہ پیکانینگ ییغیلدی، بیقتی تن کاشانہسین،
بو بنا سو کثرتیدین، وہ کہ، ویران دور ینہ.

تنگہ جزو اۋلدی اۋقونگ اول نوع کیم، آندین آنی
آلماق انبرلر بیلہ تارتیب نی امکان دور ینہ.

ای کہ، کۈنگلومنی دپدینگ مجروح اہمستور عشقدین،
کۈرمہدینگ آیا کہ مژگانیم ارا قان دور ینہ.

چیقمیشم مغ کویدین سرخوش، یاشون، ای چرخ کیم،
بیر بیلہ تپنگ قیلماغینگ آلیمدہ آسان دور ینہ.

دشت ارا مجنوننی کۈرگنلر نوایینی کۈروب،
قیلدیلر حیرت کہ، نی غول بیابان دور ینہ.

تнімده ضعف دورور تا ایسیتمیش اول دلخواه،
قویاش حرارتیدین نې عجب قوروسه گياه.

انینگ نهال قدی تیره بان تېرک ینگلیغ،
مېن اهورولوب باشیغه تارتیان صبادېک آه.

تیمنی غنچه کېبی تۇنغه چیرمه بان قت-قت،
ولېک تلوسه دین گل دېک آچیلېب گه-گاه.

گلابخانه ده غی گل کېبی سۇلوب جسمی،
قیلیب گلاب کېبی تېرنینگ اؤرتە سیده شناه.

یاتیب کؤزی کېبی گلگون حریر اوزه بېمار،
ولېک مېن دېک اېتیب صحت اهلینی گمراه.

دېمان که، شربت اوچون یخشی دور چوچوک جانیم،
یره سه صدقه اوچون قیلغه سیز مېنی آگاه.

نواييا، دېمه نهوچون تینگ ضعیف اؤلمیش،
تнімده ضعف دورور تا ایسیتمیش اول دلخواه.

هیهات کیم بیرو غمیدین زارمېن ینه،
فریاد کیم، بلاغه گرفتارمېن ینه.

ای مدعی، که عاریم اېدی طعن و سؤکمگینگ،
فارغ دېگیل، که هر نې دېسنگ بارمېن ینه.

دفع اولمیش اېردی نوش لبینگدین ملامتیم،
لطف ایل، ای طبیب، که بیمارمېن ینه.

هر کچه بیر قویاش غمیده غصه تاشیدین،
باشدین-ایاغ سپهر دېک افگارمېن ینه.

صوفي عقل صومعه سین شکر کیم بوزوب،
دارالفنای عشقه خمّارمېن ینه.

آغزیم قوروب، دمیم توتولوب، سېکریدیم، نې تانگ
کیم تېلبه چابکومگه جلو دارمېن ینه.

عقل ایتتی، هوش کھتتی، کؤنگول کوییدی، چیقتی جان،
شکر اېت، نواییا، که سبک بارمېن ینه.

ينە ھەر دم ايشيم ساچماق دورور كۆز باغيدىن لالە،
كە بۆلمىش لالە دېك قانلىغ كۈنگۈل پرگالە-پرگالە.

كۆزۈنگ دور فتنە و افسون سواديدىن قرا نرگس،
يوزوم دور محنت و ادبار داغيدىن سريغ لالە.

اميدىم مزرعين، دېدىم كۆكرتەي اشكىدىن، لېكن
ساووغ آھىمدىن اۋلدى اول اېكىنگە بو ياغىن ژالە.

شفق ايچرە اېمس انجم كە گردون جوفيدە آھىم
حرارت آنچه كۆرگۈزدى كە، اېرنى بۆلدى تېخالە.

مرضليق زخمى كۆپ تىدىن بياني كۈنگلوم افغانى،
بوزوغدىن اۋىلە دور كيم، جغد قىلغەي دمېدم نالە.

دېب اېردىنگ جان بېرەي اۋلسنگ يېتىشتى اول محل، وە كيم،
گدا سلطانغە نېتكى جز گدالىغ اۋتسە ھە ھالە.

نوايى دھرنىنگ كون يوزى، تون ساچىغە مېل اېتمە،
كە آخر عمر نقدىن مختل ايلر اوشبو مۇحتالە.

نیلدین هر بیر الف اول مه جیین رخساریده،
بیر نهالِ سرو ابرور گؤیا ارم گلزاریده.

عشق سلطانی سیاست ایله دی عشاقنی،
خلق جسمی دور، سمان ابرمس بلا دپواریده.

تازه داغی دور فغانیم اؤتیدین بؤینومده غی
هر مدور شکل شنگرفی جنون طوماریده.

طوقلر بؤلیمیش جلی تارترغه ایمان اهلینی
حلقه لر زنجیر زلفونگ رشته سی زناریده.

تېله لیک تاغی تنیم دور، باش اوزه ژولیده ساچ
هر بیرى بیر ناتوان معجون جنون کهساریده.

توشه یوز دستار باشدین، باش اېگیندین، وه، نې تانگ
کیم ابرور گلرنگ می باشیده، گل دستاریده.

ای نوایی، زار جسمینگ ناله قیلمس ضعفدین
اؤیله کیم، سست اؤلسه، اون بؤلمس مغنی تاریده.

كۈنگۈل قوشى دور آنىڭ زلفِ تابدارى بىلە،
چىيىن كە باغلىغ ابرور عنكبوت تارى بىلە.

سپند آفت اېمس، لالە زار آفت ابرور،
يوزىندە هر سرى خال آتشىن عذارى بىلە.

مگر كە زلفىدە عشق اھلى نىڭ كۈنگۈللىرى دور،
نې دود كىم، نفسىمدىن چىقر شرارى بىلە.
نھال وصل انىڭ دېك قورۇپتورۇر كە انى،
كۈكرتە آلمەدى كۈز ايگى جويبارى بىلە.

سپھر اېمن اېمس منجنىق آھىمدىن،
اۋن ايگى برجلوغ اوشبو بىيك حصارى بىلە.

موفق اۋلمەسە توفىق ايلە، اېمس ممكن
اۋز اختيارىنى قۇيماق اۋز اختيارى بىلە.

چوروك سۈنگىلرېم اۋلمىش قويون ارا خاشاك،
باشىنگىغە ابرورلە دورگن تىم غبارى بىلە.

دردینی جسمیم ارا اسره‌ی دیبان تدبیر ایله،
تازه داغ اهرمس اؤقی زخمین توتوبمهن قیر ایله.

تا که شمع انجمن دور ماهِ شبگردیم مهنینگ،
کؤک شېستانیدین آی هر تون قاچر شېگیر ایله.

زلفی ایچره زار جسمیم حالتین قیلسنگ رقم،
ای محرر، زرحل اېتکه یسین قرا تحریر ایله.

حدینگ اهرمستور دیبان عشقیم مهنی یازغورمه کیم،
مهن هم انگلرمهن، ولې نې چاره دور تقدیر ایله.

اول پری زلفی سوادین یازغله‌لی بؤلْمیش دوات،
اؤیله سودایی که اسررلرانی زنجیر ایله.

قیر ایله آیلنگ یوزومنی چوم قرا کیم، عمر اؤتوب،
دؤست کویی عزمی قیلدیم یوز تومن تقصیر ایله.

عشق شرعیده نوایی قتل ایله تاپسنگ خلاص،
بیل که، اؤلمکدین قوتولغان دېک دورور تعزیر ایله.

ایلگین اول گلرنگ ایتوبدور لاله یفراغی بیلە،
کفلرین برگى بیلە، تیرناغلرین داغى بیلە.

رشتە زلفى خیالیدین هوا قیلغان کۆنگول،
بیر قوشى دور کیم، قاچیپتور گویا باغى بیلە.

رېشلر کۆکسومده کۆر، فرهاد بحشین قوی کیم، اول
قازمەدى مېن دېک بلا تاغینی تیرناغى بیلە.

شمع ھمدردیم دورور ھجران تونی کیم مېن کېی
ھجر اؤتیدە قاورولور، اول داغى اؤز یاغى بیلە.

آتشین لعلینگ شھیدی قبریدين گلگون غبار،
کیم قۇپار، اؤت دور، اېمس قان رنگ توفراغى بیلە.

بې محل گلبانگ ایلە یالقیتە بلبل اېلنى کیم،
دھر باغى گللىرى خوشتور، ولې چاغى بیلە.

لالە اېرمس، اوردی اؤت گلشنغە بیر گل ھجریدين،
اؤرتنیب هر دم نوایی نالە قیلماغى بیلە.

اېرور كۈنگۈلدە صفا عشق تازە داغى بىلە،
نېچۈك كە، كۈزدە ياروغلوغ اېرور قراغى بىلە.

فراق شامى يىگىلمس اۋقونگ كۈنگۈل يۈلىنى،
كە بارور اول سارى پىكانىدىن چراغى بىلە.

اېرور سكوت و فنا، عشق لازمى بلبل،
نې واقف آنچه فغان و اولوغ دماغى بىلە.

اول اۋت كە اۋرتەدى پروانەنى، هم اول اۋتدىن
كۈرونك كە قورولەدور شمع داغى ياغى بىلە.

شە و اولوس غمى و جام جم، خوشا اول كىم،
سىنوق سفال ايلە دۇرد ايچگەى اۋز فراغى بىلە.

خمار ارا تىلەدىم ساقى و قدح يوز شكر،
كە اول كە مېن تىلەدىم كېلدى اۋز اياغى بىلە.

قوچرغە سرو نهالى بىرى قدىنگ دېك اېمس،
اگر كېتورسە انى باغبان قوچاغى بىلە.

مېن مست غرقِ باده مېن، عكسيم اېمس مى ايچره، وه،
ساقیغه باور بؤلمه سه بېخودلوغوم بس دور گوه.

تقوا رداسی بیرله کیم مسجدغه باردیم دیردین،
ای مغیچه، اینک ردا بؤینومده گر قیلدیم گنه.

کېلدیم قاجیب غم خیلیدین میخانه غه، ای پیر دیر،
تېنگری پناهینگ گر منگه خم کپنیده بېرسنگ پنه.

دیر ایچره سرخوش مغیچه دینیمنى تاراج ایله دی،
عیب اېتمنگیز، گر کېلمه سه یادیمگه شیخ و خانقه.

نظاره دین هوش اهلی نینگ دستاری توشمک فی عجب،
مونداغ که سرخوش سېکریتور هر یان سمند اول کج کله.

تسیبحنى مى رهنی قیل، هر دانه غه میل اېتمه گیل،
گر ایسته سنگ کونگلونگ قوشین صید اېتمه گه ی بو دامگه.

مى تولغى نینگ هر پشه سی پیلې دورور خرطوملوق،
دفع اېتکله لی دیر اهلېغه گر چېکسه درد و غم سپه.

یوز بیرله گر دیر فنا یولین سوپورسم وجهی بار،
کیم دیر پیری آلیده بو نوع اؤلوبمېن رو بره.

گلخن ارا آستینگده کول، عریان باشینگده عشق اؤتی،
بو نوع تخت و تاج ایله سېنسېن نوایی پادشه.

خوش اول كيم، بار اېدى ايلگيمده پېچان سنبلونگ گە،
توتونلر چيرمشور باشيمغە آنى چون ساغينسم، وه.

يوزونگ دور پاكليک مهري، كوزوم دور راستليق عيني،
انينگ دېك يوزگە مونداق كوزدين اوزگە كوز معاذالله.

كونگول پرگالەسى دور هر طرف عشقینگدين اورتنگن
شررلر كيم، چيقار آھيم اۆتى دودى بيله همره.

توشومده لعل و رخسارى دور اويغاتمگ مېنى گر خود،
مسيحا بيرلە يوسف باشيم اوزره يېتسەلر ناگە.

اوچوب روحوم قوشى هر دم هوا ايلر زنخدانين،
انينگ دېك قوش مثلليک كيم نشيمن قيلميش اؤلغەي چه.

محبت كوييده بو كيم، گدا شەنى قيلور عاشق،
بعينه بار انينگ دېك كيم، گداني عاشق اېتگەي شه.

قضاى مامضا چون فوتِ حال ايلر زهې حسرت،
موفق اول كه اولدين بولور اوز وقتيدين آگە.

قلم يازغان بلادين محترز بولغان زهې نادان،
مقرر بولمەغان روزى طلب قيلغان زهې ابلە.

نوايى دفترِ هجرينگ يازيب كوز تۆكتى خونابين،
چو آچسنگ صفحه - صفحه كؤرگەسېن قان اۆتكينين ته - ته.

ساقيا، تلخ اۋلدى عيشيم هجر بېدادى بيله،
توت اچيغ مى كيم، ايچهى ميرزا چوچوك يادى بيله.

سيقريب جام سپهر اقداحين ايلهى رېز-رېز،
نېچه چېككه يمين زبونلوغ چرخ بېدادى بيله.

زهد كۈنگلوم كۈزگوسين قيلميش مكدر، اى حريف،
سيندورورمين توبه پير عشق ارشادى بيله.

بېفاليغ گر بو دور كيم، قىلدى اول شوخ، اى كۈنگول،
صرفه قيلمس آشناليغ آدم اولادى بيله.

وه كه، سىندى نخل اميديم، خوشا، اول باغبان
كيم ابرور خوشحال بير نو رسته شمشادى بيله.

چون حدا لىلى قولاغين يالقيتور مجنون، نې سود،
تاغنى گر كهلتورور افغانغه فريادى بيله.

اى نوايى، عشق صحراسيده خود قۇيدونگ قدم،
تا نېچوك لشكه يسين اول پايانى يۇق وادى بيله.

ساچىب سرشك يوكورسم قاشىنگ خيالى بيله،
سپهر مېنچه اېمس كوكب و هلالى بيله.

كوزونگ كه مردم ايله جان آلور ابرور شوخې،
كه صيد ايله گه ي اېلدين كۈنگولنى خالى بيله.

كۈنگولده قد و عذارىنگ خيالىن اېتتىم نقش،
بو باغنى بېزه ديم سرو و گل نهالى بيله.

اولوسنى جور ايله حسن اهلى اۋلتورور، لېكن
هلاك اېتر مېنى اول سرو اعتدالى بيله.

اېمس يسنگه لى گر سالمس ايلگيدىن كۈزگو،
كه بۇلدى كۈرگه لى درمانده اۋز جمالى بيله.

خرد كۈنگول سپهين تۇقتته ي دېدى، وه كيم
بوزولدى كيرپىكى خيلىن كۈروب يسالى بيله.

قوياش سېنى كۈروب انداق اويلدى اۋز يوزيدىن،
كه بېرگه كيردى توره آلمه ي انفعالى بيله.

خزان كمينده دور، اى بلبل، اۋلمه غيل غافل،
دمې كه دست بېرور عيش گل وصالى بيله.

مكدر اېتسه كۈنگول شيشه سىنى زهد، نې غم،
نواييا، كېل و يوغىل قدح زلالى بيله.

عشق ارا دشوار دور بولماق کیشی همدرد شاه،
چون دې آلمس دردینی بیر ییل یوگورسه دادخواه.

شاه دادیمغه نپتیب یپتسون که ملک عشق ارا،
قدری عالی شاه ایله تنگ دور گدای خاک راه.

شاه مپندین عشق ارا عاجزراق اولسه تانگ اپمس
کیم بلاکشلیک مپنینگ خوییم دور، آنینگ عز و جاه.

شاهلیق نینگ دخلی یوق عشق و محبت کوییده،
کیم کبره ک انده سریغ یوز، لعل گون اشک، اوتلوغ آه.

شاه کیم مطلوبیغه قوللوق بویورغهی عشق اپمس،
کیم که عاشق دور انکه زار و زبونلوغ دور گواه.

سرو ایله خاشاک اگر گل عاشقی دور فرقی بار،
سروغه تا اوت توتشقی، کول بولور یوز مینگ گیاه.

ای نوایی، صدق ایله بولغیل گدا عشق ایچره کیم،
تخت و تاجین بپرسه، بو دولتنی تاپمس پادشاه.

قېو يارې كه بير يارى بيله جام وفا چېكسه،
وفاسينده انينگ ييللر بولور، درد و بلا چېكسه.

مسلم يارليغ اول يارغه كيم، قويمه غاي منت،
گر اوز يارى اوچون اغياردين مينگ ماجرا چېكسه.

وفا اهلى تانگ ابرمس كوزلريگه توتيا قيلماق،
وجودوم توفراغين گرد ايله بان باد فنا چېكسه.

قه يان كيم اول سريغ تونلوق بارور مين زار ابريشكاننى
ساغينغه يلر قچان كه برگنى بير كهربا چېكسه.

مصور كيم قاشينگ چېكتى، اوشتتى خامه نقش اهلى،
كىشى دعوا نې نوع ايتگه ي بيرو بو نوع يا چېكسه.

يېتيشكى بې گمان عين اليقين اسراريغه هر كيم
اياغينگ توفراغيدىن كوزلريگه توتيا چېكسه.

بارور كويونگ كه غم يېب اولگه لى كونگلوم نې امكان منع،
كىشىنى بير طرف هم رزق چېكسه، هم قضا چېكسه.

زمانه اهليدين كوز توتمه سون مهر و وفا پاداش،
كىشى يوز ييل الرغه گر وفا ايلب، جفا چېكسه.

بو گلشن قوشلريغه بېنوالىغ كهلتورور لحنى،
نوايى هر قچان اوز گلرخين ايستب نوا چېكسه.

نې اېدى، اى عشق، يوز تيغ بلا بير زارغە،
ھجردين مينگ زھر قاتل بير حزين بېمارغە.

يارليغدين اېرمس اېردى قتل قيلماق يارنى،
اول غضبىنى خاصە كيم قيلماق رجوع اغيارغە.

كۈنگلوم آلدى گر كۈنگولسىزليكدىن اۋلسە يوز غمىم،
اۋيله بېدلەپن كە دەپى آلمان آنى دلدارغە.

آنچه پيكانىنگ تنىمدىن چېكىتى ھەريان باش كيم،
صعب دور مرهم دغى ياقماق تن افگارغە.

كۈزلى قانىم تۈكرلر، اى مسلمانلر، نې تانگ،
كېچسە جانيدىن اسير اۋلغان كيشى كفارغە.

ناصرھا، گر پند اېشىتمان بىلەسېن معذورمېن،
مېن كېبى دېوانە بۇلسىنگ بير پرى رخسارغە.

عجب ايله تقوادىن آرتوق عذر ايله قيلماق گناھ،
مى قنى كيم، اۋت سالەى بو پردە پندارغە.

رحم قيل، يارب كە، عصيان كىرتيدىن يۇقتورور،
آنچه فرصت كيم تىلیم اېورولغەى استغفارغە.

اى نوایى، ھەم زماندىن، ھەم زمانە اھلىدىن،
ھەر زمان غم بېتسە يوزلن كلبە خمارغە.

کويیده يیغلر اېدیم مېن زار هر بېمارغە،
اېمدی يیغلرلر بری بېمارلر مېن زارغە.

هجر بې پایان یولین قطع ایله مک دشوار اېرور،
ضعفدین مېن کیم یورور مېن قۇل تەیب دېوارغە.

تېلبه کۇنگلوم نینگ قوشیدین قان و یوزدین زعفران،
قیلسه لر دفع جنونوم بس دورور طومارغە.

عشق پیدا و نهان اؤلتوردی، لېکن یۇقتورور
زهره بو حالیمنی هم اخفاغە، هم اظهارغە.

زلفیده مېن فانی و تسبیح ایله مغرور شیخ،
سبحه تارین پس نې ینگلیغ اؤخشته ی زئارغە.

یۇق عجب اؤلسم دغی کوثر سویی بۇلغە ی نصیب
نزع وقتی سالسم اؤزنی کلبه خمّارغە.

زار اؤلوب مسکین نوایی نېچه کیم چېکتی فغان،
قیلمه دی اول آی ترحم بو فغان و زارغە.

چون كوير پروانه اول شمع شېستان اۋتيغه،
انگله غەي كويمكنى بير تون كويسە ھجران اۋتيغه.

ھر دم اۋرتلر مېنى اۋتلوغ ايكي كافر كۈزونگ،
نېچە كويگە يېمېن اول ايكي نامسلمان اۋتيغه.

كۈنگلوم اۋتيدىن نې تانگ گر تاپسە رخسارينگ فروغ،
شوخ ترسا مصحف اۋرتلر شېخ صنعان اۋتيغه.

آتشين لعلينگ گر اشكىمدىن كولر اېرمىس عجب،
كىم كدورت بحريدىن فھم اېتتى مرجان اۋتيغه؟

گر كۈنگول نينگ آشكار اۋتيغه تسكين بېرسە اشك،
كىم قىلە آغەي علاج آنينگ بو پنھان اۋتيغه؟!

شعلە اول ينگليغ كە اۋرتلر شاخنى ايلب نھان،
ستر كېلدى ايش بو جسم زارِ عريان اۋتيغه.

غم تونى اېرمىس شفقدين شعلە كيم محروملر،
كويدورولر آھدين گردونى حرمان اۋتيغه.

لعلى كۈنگلوم ايچرە دور قىلمە توتون، اى تيرە آھ،
رسم اېمس چون اويده دود اېتمك عيان كان اۋتيغه.

اي نوايى، دور اياغين سالمە قۇلدين لحظەيى،
گر دېسنگ تسكين بېرەي ھر لحظە دوران اۋتيغه.

بۆلمە غاي ابردى فلک نینگ كينهسى دورانيده،
بۆلمە سە يىلدا تونى عاشقلىغيم طغيانيده.

تون بلاسيدين قتيقراق يۇقتورور عاشققة حال،
خاصه كيم بېمار هم بۇلغەي محبت آنيده.

تيره شام هجر يۇق كيم، دوزخ اۋتى دودى دور،
نې قيامت زارمېن اول حوروش هجرانيده.

بېم ابرور كيم شعلهسى جنتنى داغى اۋرتە گەي،
بۇلسە بير اخگر اۋتوم دېك دوزخ آتشدانيده.

گرچه اول آي كويى ايچره ايتلىرى نینگ سانى يۇق،
مېن دورورمېن كيم، اېمىن كوييده ايتلىر سانيده.

سائل انداق كيم درم اوزره درم قۇيغەي، ابرور
داغ اوزه داغى گدايىنگ نىنگ تن عريانيده.

مى بيله معشوقدين اۋزگە جهانده هر نې بار،
تاپمە سنگ خوشراق نېچە كيم، زار اېسنگ ارمانيده.

بۆلمە بوستان و سرا قيديده عالم ايچره كيم،
يۇق وفا قيلسنگ نظر عالم سرا بوستانيده.

شمعسيز تون بۇلسە، يعنى سايە داغى بۆلمە سە،
گر نوايى بۇلسە بير دم دلستانى يانيده.

عشق ارا ایشلر توشر ابرمیش کیشی نینگ باشیغە،
کیم قوشر ابرمیش بغیر پرگالەسین قان یاشیغە.

قان لیبی هجرینگده کیم یوقتی سراسر، قیلدی لعل
عشق باشیم اوزره یاغدورغان ملامت تاشیغە.

قاشیدین نقدین اؤغورلرغە همانا بۆلدى خم،
اول یاشونسون دهب، تېرى بۆرکین چېکیپتور قاشیغە.

بۆلدى رنگامیزلیق آق و قیزیل گلدىن مگر
عارضینگ رنگین اېزده صورتینگ نقاشیغە.

اسره سیمینگ، ای غنى، می بیر که یوق توفراقچه،
بېرسه عالم نقدیدین دیر فنا قلاشیغە.

آستانی زبېغە تانگ یوق یېتورسم اشک و آه،
گە بولوت سقاسیغە، گاهې صبا فراشیغە.

ای نوایی، طعن اگر قیلیمیش سېنینگ عشقینگنی شیخ،
اؤز ایشینگ مشغولی بؤل، باقمە اینگ قیلماشیغە.

یۇق علاجیم گر مېنى بیر جور ایله یاد اېتمهسه،
 وه، نې بۇلغهی اېلنی هم یو زلطف ایله شاد اېتمهسه.

عشق ارا، ای کیم، دېدینگ، هر لحظه فریاد اېتمه، وای،
 اؤت توتشغن چاغ بۇلور مو کیمسه فریاد اېتمهسه؟!

ناصحا، یازغورمه کیم زار اؤلمه غای کؤنگلوم قوشی،
 تېنگری اول عارضنی گل، اول قدنی شمشاد اېتمهسه.

خوبلرغه چون وفا یۇق، اولی اول دور کیم، کؤنگول
 اؤزنی اول قتیق کؤنگوللوکلرگه معتاد اېتمهسه.

یخشی آچیلیمیش بهارینگ گللی، ای باغبان،
 غم خزانى خوشتور اوراقینی برباد اېتمهسه.

وعدۀ وصل اېتتی، آلیب جان خویيغه یۇق اعتماد،
 یخشیراق دور گر بو سودا ایچره میعاد اېتمهسه.

مېن وفاده اؤلدوم، اما اول جفاده خوب اېرور،
 بېوفالیغ شېوه سین بو جانب اسناد اېتمهسه.

باشنی قوتقرغهی پریلر تاشیدین هر تېلبه کیم،
 یارلیغ رسمیده میل آدمیزاد اېتمهسه.

دلبری بېدادیدین آیلر نوایی شکوه، لېک
 جانغه بېداد آیلر اول بیر لحظه بېداد اېتمهسه.

عشق جرمیدین نېتیب انکار اېته ی خلق ایچره، وه
کیم ابرورمېن بو گنه ایچره بغایت بې گنه.

بۇلسه رهبرلر نینگ ارشادی گنه دین اجتناب،
پیر عشق اېتمیش گنه ایلرگه بیزنی رو بره.

عشق اگر بۇلسه گنه مېنمېن گنهکار، ای کۇنگول،
تانماغیم ناحق دورور بو ایشده چون حق دور گوه.

گر گنه دور عشق کاش اۇلسه خلایق بې گنه،
مېن گنهگه قایل اۇلسم کاش و کویی قتلگه.

مېن گدالیققه نې لایق آلیده، نهوچون که بار
ناز حسن ایلرده اول آی حسن و ناز اهلایغه شه.

وه که، بغریمنی لبی هجریده تیغ فرقتی
یوپقه-یوپقه کهستی و توز سېپتی انده ته به ته.

گر نوایی ینگلیغ اؤرتنسه نې تانگ پروانه هم
کیم انینگ یاری دورور بیر سرو قد کج کله.

لعلیدین بیر سۆز سینوق کۆنگلومنی ایلر تاغچه،
نقد جان بېرسم، یۇق آنینگ آلیده توفراغچه.

روضه دین دوزخقه توشکان نینگ اۆتی نینگ شدتی،
یۇقتورور کویمکته هجرانینگده قۇیغان داغچه.

برگ گل دېک عارضینگ نینگ شوقیدین تیرناق ایله
یوز طرف کۆکسومنی سۆیدوم، هر بیر تیرناغچه.

جسمیم اۆلدى گلبن اول گلسیز ولیکن تازه داغ
اندە گلچه کثرت گلبن ارا یفراغچه.

نې کۆروندى قامتینگچه نیشکر شیرین و توز،
نې آنینگ بندى بېلینگکه باغلهغان بېلباغچه.

ساقیا، کۆنگلومنی روشن ایسته سنگ توت باده کیم،
یاروته آلمس نیمه اول شعله نی بو یاغچه.

ای نوایی، سېن کۆنگول باغین عمارت قیل که بار
سېکیز اوچماغ جنبیده آنینگ محقر باغچه.

يار هر بزم ايچره، مېن خارج مشوشليغ بيله،
وه كه داخل هم بوله آلمان سبو كشيغ بيله.

كيرمه يين بزميده تاپسم ايتلري خيليغه يول،
شاد اوله ي نيله ي ايش آچيلمس مشوشليغ بيله.

جانني خوشلوع بيرله اول كا فرغه بېرديم، مېنگه كيم،
اول خود آلور، قالسه ايش آماققه ناخوشليغ بيله.

اي فسونگر، قۇپ، مگر اول وصلدين قيليغه ي علاج،
كيم مېني دېوانه ايلپتور پريوشليغ بيله.

كيم فلک نينگ ششدر يدين اېمن اولغهي بۇيله كيم،
اېلته دور جان نقديني، لېكن باري غشليغ بيله.

دېر اېسنگ كيم سايه ينگليغ بۇلمه يين توفراققه پست،
اول قوياشقه باقمه غيل، اي سرو، سر كشيغ بيله.

اي نوايي، شيخقه شيطان گر افسار اورمه دي،
پس نېگه دايم قيلور هزل اول اوزون فشليغ بيله.

بهارنی نېټه يين، اوت مېنينگ بهاريمغه،
که توشمه گه ی نظريم سرو گلعداريمغه.

يوزی اوتیغه که تېر شېنمی قویر یوز خال،
خزاندين اولمه سون آفت بو لاله زاريمغه.

دېدينگ که، ديرغه کيرسنگ می اختيار اېتمه،
قویر مو مغېچۀ مست اوز اختياريمغه.

اول آی جفا تاشی ياغدورماغی بيله اولسم،
بارين ييغيب توكونگوز، دؤستلر، مزاريمغه.

ياپيشتی كؤنگلکیمه ياره قانيدین خرقه م،
نېچوک که اول ياپيشيدور تن فگاريمغه.

می اوتی چون گل رخسارين آتшин قیلدی،
انینگ شراريدین اوت توشتی روزگاريمغه.

می انتظاریده قويدوم توگانلر، ای ساقی،
کېليب قدح سويين اور دغی انتظاريمغه.

قويوب بهشتنی ميخانه ساری باردیم کیم،
علاج اېمس اېدی کوثر میي خماريمغه.

نوايي ايله سه بلبل کېبی فغان نې آسيغ،
چو رحم قيلمه دی اول گل فغان و زاريمغه.

«لا» نینگ لاله رخسارلری نینگ لابه‌سی «غرایب» دین

۵۷۳

اول جگر پرگاله‌سی اشکیمنی گلگون قیلدیلا،
شاد اېته‌ی دېب ناتوان کۈنگلومنی محزون قیلدیلا.

وعده ایلج جله‌سین باغ ایچره انداق کیم پری،
دشت اوزه آواره قیلماغلیققه مجنون قیلدیلا.

دېدی، وصلیم بیرله کۈپتین - کۈپ غمینگنی کم قیلە‌ی،
آنی کوندین - کونگه اۋکسوتمکتین افزون قیلدیلا.

قوتقرە‌ی دېب چرخ جوریدین مېن سرگشته‌نی،
انجم پیکان بيله جسمیمنی گردون قیلدیلا.

زلفیغه وحشی کۈنگول صیدین گرفتار اېتکە‌لی،
یۋق آغیزدین بار اېکنچە حدی افسون قیلدیلا.

مفلس اېردیم می قیلیب سینغان سفالیم جام جم،
خاطریم ویرانه‌سین خود گنج قارون قیلدیلا.

کیم نواییدین صلاح ایستر، اېرور غافل بسی،
خرقه و سجّاده‌سین اول میغه مرهون قیلدیلا.

وفا وعدە ايلب جفا ايله دينگلا،
جفا وعدەسيغە وفا ايله دينگلا.

مېنىڭ بىرلە يوز تيرەلىك ظاهر ايلب،
اۋكوش تيرەلرگە صفا ايله دينگلا.

دېدىڭ كىم خطاسىز آتەي كۈنگلونگ گە اۋق،
دېب اۋق آتمەغان نې خطا ايله دينگلا.
وصالينگە بېگانە ايلب كۈنگولنى،
فراقىڭ بىلە آشنا ايله دينگلا.

دېدىڭ، اى كۈنگول، عشقدين اورمەيىن دم،
بو معنادە كۈپ ماجرا ايله دينگلا.

بورون، اى فلک، كۈرگوزوب مەر، سۈنگرە
مىڭە قىسم درد و بلا ايله دينگلا.

نوايى، كۈنگولگە سياستلر ايله،
دېبان بارىن آخر مىڭا ايله دينگلا.

«ی» حرفی نینگ یغمايیلری نینگ یوز کۆرگوزمکلىرى «غرايب» دین.

۵۷۵

زهی هر لحنِ بلبلِ صوتی نینگ ذاتینگه اثباتی،
جهان باغیده هر گل یفراغی حسنونگه مرآتی.

وجودی ذره نینگ ممکن اېمس تا ثابت اؤلمس مهر،
نې حاجت ذره خیلیدین قویاش ذاتیغه اثباتی.

بؤلوب ذاتینگه عاجز هر صفت ایچینده موصوفی،
انینگ دېک کیم، قیله آلمه ی صفاتینگ شرحینی ذاتی.

خرد ذاتینگه تشبیه اېتکه لی هر فکر کیم ایلې،
تکلم انده یؤل تاپمه ی مگر هیهات - هیهاتی.

نې قهرینگ زهریدین اېمن بؤلوب هر ساکن مسجد،
نې لطفونگ باره سیدین نا امید اهل خراباتی.

نې ذره بؤلسه مقبولونگ قویاشدین ذره قیلغان دېک،
قویاش اول ذره دین ایلې شرف بیرله مباحاتی.

نواپی ذکری آتینگ دور، امیدى اول که قوتقارسنگ،
انى تا ایسته مکدین، بلکه اندین کیم، بؤلور آتی.

جلوه مو ایلر قیزیل تۇن بیرله هر یان اول پری،
یا مگر کیم لاله زار ایچره کپز کبک دری.

تېلبه لر قتلی قیزیل قیلیمیش لباسین، آه کیم،
بیر یولی دېوانه لر قانیغه کیرمیش اول پری.

حله سین خونابلیغ جان رشته سیدین قیلدی چرخ،
بۇلدی جانلر جانی، وه-وه، اول پریوش پیکری.

عارضینگ نقشی مو دور قانلیغ کؤنگولده جلوه گر،
یا شفقدین بۇلدی طالع آفتاب خاوری.

ایچ شفق گون می که، گردون قاتلی دور کیم، ابرور
ینگى آى بیرله شفق تیغ و لباس احمری.

قان ارا کؤنگلوم یوزونگ شوقیدین انداق خسته دور،
کیم ابرور گلگون حریر آلتینده آنینگ بسترى.

اول پری لعلیده جانینگ، ای نوایی، بۇلدی محو،
لعل گون کسوتده محو اېتگن دېک اوزین اول پری.

سۆز ھجرىنگ ايچرە يۇق بريان كۈنگول نىنگ طاقتى،
بۆلمس ابرمىش كويگن اېل نىنگ اۋت بىلە كۆپ الفتى.

اشك تىم- تىم قانىدىن كلبەم بېزىنسە نې عجب،
كىم ابرور گل برگىدىن بلبل ابوى نىنگ زىنتى.

تالپىنور كول ايچرە مېن دېك شعلە تارتىب گۇيا
كىم قوياش نىنگ جىسمىغە اۋت ياقتى اول يوز حسرتى.

لعل سېرايىدىن ار خط ظاهر اۋلمس، عيب اېمس،
خىزىنىنگ حيوان سويى ايچكىندىن اۋلمىش غىبىتى.

ھەر سارى مخفي توگانلىگ جىسم ايلە مونگلوغ كۈنگول،
سائلى دور كىم، ابرور مملو درمىدىن كسوتى.

اى مصور، چېكمە ناظر مېندىن اۋزگە زىنھار،
دفتر عشقىم ارا يازىلسە اول آى صورتى.

مۇدېرى تاپتوق نوايىنى سلامتدىن يىراق،
كۆر كىم، اول نې نوع و نې يىنگلىغ جھانده شھرتى.

توسننگ نعلیدین ایسترمین باشیمغه افسری،
هندودپک کیم باشیغه طاووسدین سنچر پری.

عارضینگده می، می ایچره عارضینگ ظاهر قیلور،
گاهی اختردین شفق، گاهی شفقدین اخترې.

بزم عیشیم کؤک که نیوچون چېکمه گهی اول کیم، انکه
توتسه روح الله دمی هر دم قویاش دپک ساغری.

مسندیم کؤرگیل که، هر تون قصری تاش و فرشیدین،
باشقه خارا متکا دور، تنغه کاشی بسترې.

وه، نې لولی وش دور اول قاتل که عمداً خلق نینگ
قانینی تۆکمک که هر بیر کیرپیگی دور نشترې.

عارضینگ وصفی توگنمس کاتب صنع ایله سه،
دهر بوستانیده گل یفراغلریدین دفترې.

ای نوایی، سرودپک آزاد بؤل گر ایسته سنگ،
گل مثللیگ شاهدې، بلبل کپی خنیاگری.

دولت تانگی یوزی و ساچی تانگ قرانغوسی،
مست صبح کۈزلرین اېلتیب تانگ اویقوسی.

بلبل پری اېمس، گل اېرور بېرگه لی جلا،
هر برگ گل که، یېلدىن اېرور تیره کۈزگوسی.

گلزار دهر شعبده سین گویی انگله میش،
ایچینده زعفراندىن اېمس غنچه کولگوسی.

باشیمنى یوقاری قیله آلمان بنفشه دېک،
کۈنگلومگه چونکه چیرمشور اول طره قیغوسی.

کۈز بحری ایچره شیشه کییب مردم اېتتى غوص،
یاییلدى اوشبو وجه ایله یوز ساری اینجوسی.

حالیمغه هجر بزمی ارا تارتسم سرود،
بار نوحه مدّی تېلبه کۈنگول نینگ ایالغوسی.

قتلیمغه مژده بېردى و اۋلتوردى انتظار،
بیر عمردىن سۈنگ اېلگه بیگیت وعده بېرگوسی.

ظاهر ایلر اشک ایله آهیمنی هجرینگ آغوسی،
گویی مونداق اېسنه تور آخر نفس نینگ اویقوسی.

هجری بی پایان، تونی مهلك، جنونوم بوالعجب،
صبح گویا ماتیم توتیش که، کھلمس کولگوسی.

کویدوروب جسمیمنی، بېرگه یسین کولوم بیرله جلا،
تیره بۆلسه قان ایله قتلیمده تیغینگ کۆزگوسی.

مېنی مجنون دېک توتوپتور دشت دېمنگ کیم، بو دشت
تاغلر اېردی که، هامون قیلدی کۆنگلوم قیغوسی.

ای کۆنگول، آه اؤقترین اول غمزه نینگ آلیغه چېک،
کیم اؤق آتماغلیغده سېندین توز دور آنینگ قابوسی.

دېمنگیز عاشق کۆزیگه نی یاروغلوغ دور مفید،
غم کونی دلبر یوزی، هجران تونی تانگ یاغدوسی.

هجر ارا توزدی نوایی وصل ملکین بېردی یار،
انداق ایش قیلغانغه موندین کم کېره کمس جولدوسی.

اؤت سالور اېل جانېغه هر دم ساووغلوغ بيرله دى،
ساقيا، سينمس هوا زهرى كېتور ترياك مى.

توز شېستان ايچره صحبت كيم، اشارت ميغه دور
شمع كافورى كه، آستى شوشه موزلر بيرله دى.

آتشين مى بيرله، اى ساقى، قيزيتقىل بزمى،
مطربا، اول اؤتنى تېز اېتمك كه ال آغزىنگه نى.

دهر مشكين چون هوا كافورى پنهان ايله دى،
بادۀ مشكين كافورى مزاج ايچمه ي نېتە ي.

ايچكه لى اخفا اوچون تون مشكىنى ايستر حكيم،
شكر بو كافور ارا هم ظاهر اېرمس هېچ شى.

اول قوياش قار اوزره چيققچ يوزوم اوزره انگله مان،
اشك يا كؤز آقى سو بۇلوب آقر مو، يۇقسه خوى.

ايلگيده ميلېگ سفال، اوسروك نوايى قار اوزه،
اى فلک، قيل جام جم بيرله تماشا تخت كى.

شكر لله، ای كۆنگول كيم، رفع اۋلوب هجران تونى،
اول قوياش يوزين كۆررمېن تېنگرى نىنگ قوتلوق كونى.

آتشىن لىلىنگ انىنگ دېك اۋرتەدى عالمى كيم،
هر طرف بير اۋت توتشقىن جان دور آنىنگ اوچقونى.

مهردين رخساره سرغرغان سايى سرگشته مېن،
ذره سرگردانلىغىن افزون قىلور مهر آلتونى.

بادەدىن تىم-تىم قىزرمىش عارضى، وه-وه كۆرونك،
كىم عجب گللىر آچىپتور اول ملاحىت گلىنى.

شام هجران محنتىن شرح ايله آلمان ضعفدىن،
اول قرا باسقان كىشى دېك كيم، آنىنگ چىقمىس اونى.

اخترې دور نحس عشاق بد اختر جانيغه،
اول كه هر يان ايلتيرر هجران تونى نىنگ شودرونى.

اي نوايى، دېمه كيم اويقونى توش كۆرگەى كۆزونك،
يىغلهماق بو اېرسە توش كۆرگەى مگر كۆز اويقونى.

غمینگدین چون اجل گور آغزیده جسمیم نهان اېتکه‌ی،
مزاریم لوحی دردینگ شرحینی تیل دېک بیان اېتکه‌ی.

قناتلیغ موردېک جسمیمنی اوی قیلیمیش اجل خیلی،
مگر اول نوع قوشلر بو بوزوغنی آشیان اېتکه‌ی.

یوز آچقاچ اېگمه قدیم ضعف قیلدی، وه، نې بیلدیم کیم
قویاش وصلی ینگی آییمنی مونداق ناتوان اېتکه‌ی.

آغیز بۆلدی کۆنگولگه چاکى و تیل انده پیکانینگ،
نې تانگ بو تیل آغیز بیرله اگر مهلك فغان اېتکه‌ی.

قیلیچینگ سویینی ایستر قوروغان نخل دېک قدیم،
عجب اهرمس قضا آنینگ گلین گر ارغوان اېتکه‌ی.

دېر اېردیم کویینی یوی اشک ایله اېل زخمی قانیدین،
نې بیلدیم کیم، هم اول اېل رشکی-اؤق اشکیمنی قان اېتکه‌ی.

نتیجه کویمگ و اشکیمدین اؤزگه تاپمه‌غای، اول کیم،
بو گلشن شعله و دودین گل و سنبل گمان اېتکه‌ی.

تیلر یوز لخت قان اېتکه‌ی نصیبین دهر دهقانی
قیو بلبلی کیم، گل خوانی اوزره مهمان اېتکه‌ی.

جگرگون دور نوایی جسمی قان یاشدین محل دور کیم،
قضا بو نوع لعل اوچون فنا تاغینی کان اېتکه‌ی.

صحتیم آزرده جانانیمده بۇلغەی کاشکی،
دردی آنینگ تینمغور جانیمده بۇلغەی کاشکی.

ناتوان کۆرگۈنچە بسترده سنان دېک قامتین،
یوز سنان بو چشم گریانیمده بۇلغەی کاشکی.

بۇلغۈچە اشکِ روانیم سیلی هر یان جلوه گر،
جلوه اول سرو خرامانیمده بۇلغەی کاشکی.

کۆزومه گر کیرپیگیم آسیبیدین سونمیس ایاق،
برقِ آفت بو نیستانیمده بۇلغەی کاشکی.

اول ایاق آزرده بۇلغۈنچە بۇلوب باشیم فدا،
زحمتی باشتین - ایاق جانیمده بۇلغەی کاشکی.

نالم اول آیغە یېتیب جان وصلیدین محروم اپرور،
جان دغی پیوسته افغانیمده بۇلغەی کاشکی.

ای نوایی، دېمه راضیسېن مو عمرونگ ایسته سه،
یوز مېنینگ عمرومچە سلطانیمده بۇلغەی کاشکی.

نېچە كىم، اول آيغە مېندىن مېربانراق يۇق كىشى،
يىخشى تا قىلىسم نظر مېندىن يامانراق يۇق كىشى.

خستەلر جانىغە اول بېمار كۆزدىن ناوگې
گر آترسېن بىل كە مېندىن ناتوانراق يۇق كىشى.

آه و خونايىمنى لحن و بادە قىلمىشسېن گمان،
دلربالر ايچرە سېندىن بد گمانراق يۇق كىشى.

اهل عشق آزار جانين ايستەبان تىشلر لىين،
مېندىن اوشبو قصەدە، آزرده جانراق يۇق كىشى.

يار اېتر اېرمىش وطن بې خان و مانلر كۈنگىلىنى،
شكر مېندىن كويىدە بې خان و مانراق يۇق كىشى.

خاصلر وصل ايستەگەيلر، وه كە، مېن دېوانەدىن
اول پرى كويىدە بې نام و نشانراق يۇق كىشى.

اي نوايى، خردە نظمىنگە اصلاح ايستەسنگ،
شاھ غازيدىن جهانده خردەدانراق يۇق كىشى.

سېنسيزين بزم ايچره قت-قت قان، كۈنگول بېتاب اېدى،
دمبدم جام لبالب چېككنيم خوناب اېدى.

هر مُقنَد پسته كيم، بزم ايچره اېردى جلوه گر،
لعلينگ و آغزینگ خيالىدين كۈنگول بېتاب اېدى.

بزم اېدى جانبخش، مى بيرله ياروغ، وه كيم، منگه
ظلمت اېردى كيم، حياتيم چشمه سى ناياب اېدى.

حلقه بزم اېلگه قيد و بير مسلسل طره دين،
چېككه لى اول بزمدين جانيمده يوز قلاب اېدى.

يېتى كۈك جوفى تۈله غمنى ازلدن گۈيا
عشق جمع ايلب مېنينگ جانيم اوچون اسراب اېدى.

سيمگون غلتان سرشكيم دوركه، حالا بۇلدى قان،
بو كه اېل شنگرف دېدورلر، بورون سيماب اېدى.

نوش وصل ار يېتمه سه غم يۇق نوایی كيم، مدام
هجردين اهل وفا جاميده زهر ناب اېدى.

تیلرمېن مضطر اېتسه آفتی آزرده جانیمنی،
ساوورسه عافیت بیرله توزولگن خان و مانیمنی.

چیقیب سرخوش، چاپیب ابرش، قیلیب جولان، آلیب میدان،
وجود اقلیمیدین محو ایلهسه نام و نشانیمنی.

اوروب جانیمغه نیش غم، توزوب قتلیم اوچون مرهم
حنا قیلسه بلا شاهدلری ایلگیکه قانیمنی.

فراق ایچره الفدېک قدیمه غم تاغینی یوکلپ،
أحد آستیده غی دال اېتسه جسم ناتوانیمنی.

جنون کوییده اوسروک سودره تیپ رطب اللسان قیلسه
فنا اوباشیغه دیر ایچره بو راز نهانیمنی.

یوزین ایلپ قراکېینیچه سالیب عشق اطفالین،
باری مست و ملنگ اؤینتسه عقل خرده دانیمنی.

نوایی، نې می اپردی کیم، ایچیب عالمغه فاش اېتتیم،
اولوستین یاشورون ییللر کؤنگولده اسره غانیمنی.

ساقیا، توت بادە کیم، بیر لحظه اؤزومدین باره‌ی،
شرط بو کیم، هر نېچه توتسنگ لبالب سیپقاره‌ی.

بؤغزومه جامی قویوب، قوتقر گدالیغدین مېنی،
وه، نېچه بؤغزوم چېکب بیر جرعه اوچون یالباره‌ی.

بیر قدح می بېرسه‌لر، وه، غایت افلاسدین،
نېچه لعل قیمتی تاپقان گدادېگ آلداره‌ی.

تارته‌ی اؤزومنی عوض، کیم قیلسه احسان بیر قدح،
بو بهانه بیرله اؤزلوکدین اؤزومنی قوتقاره‌ی.

وجه می جان نقدی و تن داغی دور، ای مغیچه،
خلقتیم گنجینه‌سین یوز قتله گر خود اختاره‌ی.

جانغه یېتیم عقل وسواسی بيله، تنگری اوچون،
ساقیا، جامیمده افیون اېز که باتراق تېلباره‌ی.

ای که، دېسېن غیردین ایرو کېل و چېک جام وصل،
گر بو خلوتده نوایی محرم اېرمس قیتاره‌ی.

بۇلغەي اېردى يوز تومن، مېنگ رىنج و محنت كاشكى،
بۇلمەغاي اېردى بلا و دردِ فرقت كاشكى.

يېل دېك ايلردە هوا سىر اېتكەلى جىسمىم خىسین
اۋرتەگەي اېردى اوروب بىر برقِ آفت كاشكى.

خاصیت چون تېلېرَب صحراغە يوزلنمك اېمیش،
توتەمەغاي اېردىم پریلر بیرلە الفت كاشكى.

عافیت كنجین، دېدیم، ایستەي بوزولدوم بىر یۇلى،
كۇنگلوم ایچرە كېچمەگەي اېردى بو ئیت كاشكى.

یوز غریب احوال بېكسلیكدە هر دم بار اېمیش،
اۋتمەگەي اېردى تیلیمگە لفظِ غربت كاشكى.

جلوه قیلغونچە تیلب طاووس ینگلیغ گنج زېب،
جغد ینگلیغ توتقی اېردیم گنج عزلت كاشكى.

یاردین اېل رشکیدین بۇلدوم جدا، بۇلغەي اېدی
التفاتین غیر ایله كۇرمك كه طاقت كاشكى.

دېمە کیم، جان اېت فدا احباب ایله تاپقېچ وصال،
ای نوایی، عمر بېرگەي آنچه مهلت كاشكى.

خوشتورور گلگون قدح دورینده گلبرگِ تری،
خاصه بیرهم اوّلی بؤلغه‌ی داغی گل آخری.

هر ورق بیر نامهٔ عشرت دورور فهم ایله‌گیل،
تانگ ییلیدین ابتر اؤلمستین بورون گل دفتری.

غنچه خودی بیرله گل قلقانیغه بیبتی شکست،
بؤلغه‌لی پیدا سریغ سوسن نینگ آلتون شش پری.

گل عدم شامیغه یوزلنگن اوچون زنبق گلی
بار کوموش مشعل داغی و خرده‌لر دور اخگری.

لاله قان اوزره بؤیالیب، اؤت اوزه عنبر قؤیوب
بار پری خان چیقمه‌غان غایب چپچکلر دور پری.

نیلوفر توتمیش سپهرِ لاجوردی هیئتین،
ژاله‌لر یوزینده انداق کیم نجوم و اختری.

اؤکسه لعلینگنی نوایی سنگه خوش کپلمس، ولې
خوشتورور گلگون قدح دورینده گلبرگِ تری.

سېۋونگىل، اى كۈنگۈل، آخىر كە جىسمىنىڭ اىچىرە جان كېلدى،
قوۋان، اى جان محزون كىم، حىيات جاۋدان كېلدى.

سفردين اول پىرى يېتتى، مېن محزوننى شاد اېتتى،
كۈنگۈلدىن اېسكى غم كېتتى، تن اىچىرە يىنگى جان كېلدى.

خرد، يىغ بو مصافىنگى، تحمل، قۇى گزافىنگى،
ورع، ترك ايله لافىنگى، كە آشوب جهان كېلدى.

دېمە كىم اندىن ايرىلدىم، كۈنگۈلنى ھىمرھى قىلدىم،
بوگون كېلدى كۈنگۈل بىلدىم، كىم اول نامېربان كېلدى.

كېلىپتور ياشورون اول شە، مېن مجنون اېمىس آگە،
پىرى اېرمىس اېسە بس ۋە، نېچون كۈزدىن نھان كېلدى.

فلك باقتى فغانىمغە، اجل رحم اېتتى جانىمغە،
خزانلىغ بوستانىمغە گل باغ جنان كېلدى.

مغنى بىر نوايىي توز، نوايىي نغمەيى كۈرگۈز،
اياقچى، تامسە توت تۇقۇز، كە داراي جهان كېلدى.

ایکي همدم کیم ابرور می بزم ارا همدملری،
تاپمه سون بیزدین ملالت خاطر خرملری.

آی و کون کیم بزم توزگه یلر فلک خرگاهیده،
ذره سرگشته دین نی بؤلغوسی دور غملری.

گل بيله نسرين که چپککه ی باده نرگس جامیدین،
ظلم ابرور واقع که بلبل بؤلمه غای محرملری.

جغددین رم ایله سه نی عیب دُرّاج و تذرو،
خاصه بؤلسه مستلیغدین اؤزگچه عالملری.

ای طبیب، اؤلگومدورور گؤیا که اوشبو کپچه دین،
زخملیق کؤنگلومگه اؤق دپک سنچیلور مرهملری.

ای مغنی، بؤلمه غافل کیم، زبان حال ایله،
نوحه ایله یدور مپنینگ حالیمغه سازینگ بملری.

کپچه لر افلاک نهوچون یاش تۆکر کییب قرا،
بؤلمه سه مسکین نوایی حالیمغه ماتملری.

یوز اورمه هر طرف، ای شوخ و، زار قیلمه مېنى،
قرار توت نفسې، بېقرار قیلمه مېنى.

کۆزومنى شمع جمالینگ فروغى بیرله یاروت،
تانگ آتگوچه کپچه لر اشکبار قیلمه مېنى.

خدای اوچون ینه هر ساری پیخبر بارمه،
فغان و ناله ده بی اختیار قیلمه مېنى.

ترحم ایله گیل، ای اختیارسيز ناله،
دما- دم اېل ایچیده شرمسار قیلمه مېنى.

حیات رنجی، اولوم یادی صعب اېمیش، ساقی،
بو دیر ایچینده دمې هوشیار قیلمه مېنى.

مېن اؤزگه، وامق و فرهاد اؤزگه دور، ای عشق،
تَنَّم اهلې ارا اعتبار قیلمه مېنى.

قه یان که بارسنگ اولر مېن نوایی ینگلیغ زار،
یوز اورمه هر طرف، ای شوخ و، زار قیلمه مېنى.

ای دوداغینگ شربتیده آب حیوان لذتی،
لذتی بؤلغه‌ی، نصییم بؤلسه لعلینگ شرتی.

کپچه‌لر هجرینگده بیخودمین، مہنینگ حالیمغه دور
شمع نینگ گه کویمگی، گه ناله‌سی، گه رقتی.

محنت هجرینگده ایشیم آه ایله فریاد ابرور،
آه اگر فریادیمه بیتمس وصالینگ دولتی.

لبلرینگ نینگ حسرتی کؤنگلومده بؤلسه نی عجب،
شیشه بیرله باده نینگ بیر- بیرگه کؤپتور نسبتی.

عارضینگغه، ای پری، معنون کؤنگول نینگ میلی بار
تہلبه ینگلیغ کیم، انینگ اؤت بیرله بؤلغه‌ی الفتی.

عمر ابرور عشق اہلیغه پیک نسیم، ای باغبان،
بس دورور بو مدعاغه شاهد آنینگ سرعتی.

یوز و خالینگدین نوایی نینگ کؤزی دورقان ارا
لاله‌دپک کیم، داغی بؤلمیش کؤز قراسی ہیئت.

نرگسین گل اوزره کیم، بیمار اېتر ناز اویقوسی،
مثل شوخې دور که، سست اېتکه ی انی یاز اویقوسی.

کۆز آچیب بېخودلو غومنی کۆرمه سه یۇقتور عجب،
کیم منگه بخت اویقوسی بؤلْمیش، انگه ناز اویقوسی.

چرخ سائر گؤیا عاشق دورور کیم، کېچه لر
بار انینگ هم مېن کېبی کۆپ اشکی و آز اویقوسی.

بیزنی دفع اؤلسون دېبان سالْمیش اؤزینی اویقوغه،
زرقدين خالی اېمستور اول فسونساز اویقوسی.

هر تون ایلر استماع اېل قصه سین، وه کیم کبلور،
مېن که اؤز حالیم دېسم، اول قصه پرداز اویقوسی.

ایسته کامل خدمتین غفلتنی رفع ایلهی دېسنگ،
باردور اؤزدین غایب اؤلماق زمره راز اویقوسی.

ای نوایی، آچمه غمدین کۆز که سریم قیلدی فاش،
یخشیراق بېدارلیغیدین بؤیله غماز اویقوسی.

تنورې دور ايچيم گؤيا قيزيتقن عشق اؤتى آنى،
ياپيشتورغان كباب اؤرنى انگه هر داغ پنهانى.

قيزيل رگلر اېمس كؤز ايچره كيم، كؤز مردمين غمزهنگ
ايننگ دېك نيشلر اوردى كه قالميش هر طرف قانى.

اېرور قدينگ خيالى كه كؤنگول، كه كؤزده گؤيا كيم،
بو دور اول جويبار و باغ نينگ سرو خرامانى.

طريق عشق ارا كؤنگلومده دور هر دم غمې اول اوى
عجب يؤل اوزره دور كيم، اؤكسومس بير لحظه مهمانى.

غميم شامين ياروتتى قدينگ اول يوز شعله سى بيرله،
نېتر كوندوزنى اول كيم، بؤيله دور شمع شېستانى.

يانر اؤتلوغ كؤنگولده آتشرين لعلينگ فراقيدىن،
قيزيق هر لعلگون پيكان اېرور بير لعل پيكانى.

خطى ريحانى ايچره باده لعلين خيال ايلب،
اوچر هر لحظه روحوم، ساقيا، توت راح ريحانى.

مونونگ دېك كيم، ييراق دور كعبه مقصد همانا كيم،
اېرور منزلغه يېتمسدين جرس نينگ تينمى افغانى.

نوايى دولت باقى تيلر بؤلسنگ يقين بيل كيم،
اېرور سالك كه مشكل تاپماق آنى بؤلمه بين فانى.

ای کؤنگول، بیردینگ ایلگدین وصلی نینگ دورانی،
بیلمه دینگ بو نوع تلخ ابرمیش غم هجرانی.

گؤیا فرهاد اېمیش تاغ ایچره کیم، چېکسم فغان،
اول دغی همدردلیغدین تېنگ چېکر افغانینی.

توتیای کؤز تۆکرمن کیم، کیتورسنگ، ای نسیم،
کؤرسنگ اول بد مهر چابک تورک نینگ جولانی.

قالدی کؤنگلوم سېنده، لېکن اسره دیم، ای قاشی یا،
خسته کؤنگلوم اؤرنیده خاکیلرینگ پیکانی.

نې اوچون کییمیش قیزیل تۆن دهر بوستانیده گل،
گر آقیزماق ایسته مس آشفته بلبل قانی.

تیر باران غمینگ جسمیمنی قیلدی یېرگه پست،
وه که، یامغور کثرتی ییقتی غمینگ ویرانی.

ای اجل، تېنگری اوچون کېت کیم بهل قیلماں سنگه
قؤیمه سنگ کیم، دزدی. اؤق آلهی نوایی جانی.

اول آی که، مهر ایله عالمی محترم قیلدی،
بو تېله گه نېدین آیا نظر نی کم قیلدی.

کۆزوم ایزیگه یقین دور مونگه داغی یوز شکر،
اگرچه یؤلیده گردون قدیمی خم قیلدی.

نصیحت اېتسه اولوس تېزک بؤلور عشقیم،
ولې، ایتیکرک اېتر اؤتنی اول که دم قیلدی.

فراق شرحینی هر کیرپیکیم یازر، گویا
فلک مژه منی تېنگیز ایچره گی قلم قیلدی.

اول آی عزیمت اېتیب یوز غم و بلا نقدین
نصیبیم اېتتی، یامان بارمه دی، کرم قیلدی.

سپهر عشقده مجنونغه یازدی کؤپ تعریف،
مقابلیده زمانه مېنی رقم قیلدی.

کۆزوم که قان ارا بؤلدی نهان عجب ابرمس،
که «عین» غه چو دم اؤلدی قرین عدم قیلدی.

شگوفه سیم چیقراچ بو گلشن ایچره خزان،
هواغه برگینی ساچماق بیله ستم قیلدی.

نواپی جسمین اؤقونگ زخمی اېتتی دامِ بلا،
وصال قوشلری اندین مگر که رم قیلدی.

مەھوشى كىم مەرىدىن بۇلدوم جەھان آوارەسى،
رحم اېتىب بىر چارە قىلمس اۋلسە ھم بېچارەسى.

زخمىلر قىلدىنگ يىنە غم نىشىدىن، اى بېوفا،
بوتمىش اېردى وصل نوشى بىرلە بغيرىم يارەسى.

بېوفالر كۇنگلى تانگ يۇق لىلرىنگگە بۇلسە صىد،
قىدە كىم لعل اۋلسە، اطرافىدە بۇلور خارەسى.

يوزىگە باققىچ، عجب يۇق كۇزلىمگە تۇلسە اشك،
اېل كۇزىگە ياش تۇلر قىلسە قوياش نظارەسى.

درد ھجرىنگدىن نوايى كۇنگلى، كۇكسى، بغيرى دور،
ھر بىرى يوز پارە و مىنگ يارە ھر بىر پارەسى.

قىلدىم اول آي آليده عاشقلىغيم اظهارىنى،
مېن انگە سىرىم دېدىم، بىلمان انىنگ اسرارىنى.

كۆز قراسىن حل قىلىپ اول آيغە يازغوم نامەيى،
بارى بو تزوير ايله كۆرگەي كۆزوم رخسارىنى.

كۆزىدىن تا جانغە يېتمان لىلىدىن بېرمىس حيات،
اول مىسىح اۆلدوم دېگندە تىرگىزور بېمارىنى.

حيف دور كىم، رشتە تسىيح قىلغەي اهل زهد،
كفر زلفى ايچرە اۆلگن خلق نىنگ زئارىنى.

عارضىنىگ دورىن چېكرده گۇيا نقاش صنع،
مهر دورى بيرلە تېنگ آچمىش اېدى پرگارنىنى.

تۆكمە جامىن كىم، بلا سىلى جهاننى بوزمە سون،
مست كۆرسىنگ، زهدا، دىر فنا خمارىنى.

اي نوايى، شوقىدىن اۆلسم عمارت قىلغە سېن،
توفراغىم بيرلە محبت كويى نىنگ دېوارىنى.

آه کیم، اول گنج یاد اېتمس بیزینگ ویرانه‌نی،
اول قویاش بیر ذره یاروتمس بوزوغ کاشانه‌نی.

اېگمه قاشین کؤرگوزوب ایلر منگه منع جنون،
ینگى آی بیرله کبره ک ساغ اېتسه بو دېوانه‌نی.

کؤزومه اول وجهدین دېرمېن یوزونگ افسانه‌سین،
کیم سېورلر اویقوسیزلر دایما افسانه‌نی.

اؤزگه‌لر حسنی‌دین اؤرتنمان، که گردون هر کېچه
یاروتور مینگ شمع و کوی‌دورمس بیری پروانه‌نی.

چیقتی جانیم باده لعلین کؤروب، ای مغبچه،
وه، توله ایلر نېترسېن قصدیمه پیمان‌ه‌نی.

بیلمه‌دی کیم، اول ایلر نفی رنجیدین خلاص،
نفی قیلغان شیخ مغ کوییده‌گی میخانه‌نی.

اشک یؤلین توت، نوایی، خاک پایی بیرله کیم،
غصه بر بېرور قه یان کیم، ساچسم اوشبو دانه‌نی.

هر تيكن بو غنچه دېك كۈنگلومده پيكان باغله دي،
اي جگر پرگاله سي، سپنيز ايچيم قان باغله دي.

سپندين ايريلماق كۈنگولگه ممكن ابرمس تا ابد،
چون سپننگ بيرله ازلدن عهد و پيمان باغله دي.

لبلرنگ نينگ شوقيدن هر قطره قان كيم، تۈكتي كۈز،
ساووغ آهيمندين هم اول دم لعل و مرجان باغله دي.

دېدى عقل و فهم آنى كۈرگچ، شكيبي كۈزلالي،
وه كه، تون باغين ينه اول شوخ چسپان باغله دي.

قاندين اۋلدى درد باغى نينگ گلى هر پخته كيم،
داغيمه صبر ايلگى مرهم بيرله هر يان باغله دي.

ساووروب طفل خزان توفراغ ايله تېنگ قيلمه غان
قيسى بير گلدسته بو باغ ايچره دهقان باغله دي.

اشتياقينگدين نوايى اۋلدى و يېتمس سنگه،
گۈيا بو نوع اياغين بند هجران باغله دي.

ای کۆنگول، کهل کیم، ایکاو بۆلوب نگارې کۆزلالی،
سرو قدې ایسته بان سیمین عذارې کۆزلالی.

یارلیغ کۆز توتقانیمیز کۆزلهدی چون اؤزگه یار،
بیزده هم کۆز بار، باریب بیر ییرده یارې کۆزلالی.

چون غبار مرکبیدین روشن ایلر اهل کۆزین،
تېرموروب تورغونچه باریب، شھسوارې کۆزلالی.

سیر باغ و دشت ایتربیز هم ینه بیر یار اوچون،
باغ ساری کۆز سالالی، دشت ساری کۆزلالی.

گر انینگ دېک شوخ شھر آشوب آفت تاپمه سک،
بیر فقیر مهربانی، غمگسارې کۆزلالی.

گرچه ناپیدا ابرور مقصود، ارمان قالمه سون
خاص و عام ایچره قیله آغونچه بارې کۆزلالی.

ای نوایی، بؤلماغونگ اندین بولر بیرله خلاص،
کهل که، هم وصلین تیلب صبر و قرارې کۆزلالی.

غنچه دېك قان باغلنىبدور كۈنگلوم، اى گل خرمنى،
بارغالى كۈز جويباريدين جمالينگ گلشنى.

كۈز قراسيدين يازەى دېرمېن بيتىگ، هيھات كىم،
كوي دورور غيرت كە، مېن محروم و اول كۈرگەى سېنى.

عقل قاچتى كۈنگلوم ايچرە ساكن اۋلغچ درد عشق،
مور منزلگاھى اېرمس ازدهالر مسكنى.

كۈنگلوم اويىدە غمى تاريقمەسون ھەرزخميدين،
مرھمىن تشلنگ كە، ھەرياندين آچىلسون روزنى،

ارغواني اشك ارا سوسن مثللىك لالمېن،
تا تۈنينگ دور ارغواني، كۈنگلكينگ دور سوسنى.

ھەر گل اوشبو باغ ارا كۈرسنگ تيكن آسييدين،
غرقة خوناب اۋلوب يوز چاك اېرور پىراھنى.

اشك قانيدە نوايى دور سۈنگك جسمى بىلە
اول مبارز كىم قىزىل جنس ايچرە بۇلغەى جوشنى.

غریبلیغ ینه کۋنگلومنی دردناک اېتتی،
شکسته لیغ ینه کۋکسومنی چاک-چاک اېتتی.

بو برچه بیر سری و یار حالتیمنی بیلیب،
تغافل اېتمگی مېن خسته نی هلاک اېتتی.

دمینگی اسره، مسیحا که، چیقمه غای گردیم،
بو دم که کوییده جسمیمنی دهر خاک اېتتی.

یوزونگ که اول که قویاش تابی بېردی یوز مینگ شکر،
قویاش کببی مېنی هم عشقینگ ایچره پاک اېتتی.

خوش اول دمې که، دېگه یلر فنا اۋتیغه فلان
قدم قۋیرده نې وهم ایله دی، نې باک اېتتی.

نې می، نې جام، مېن اوسروک همیشه، گۋیا عشق
تنیم حدیقه سیده رگلریمنی تاک اېتتی.

نوایینی تیلہ اندین بورون که دېگه یلر:
«عدم یۋلین توتوب اول زار بېنوا ایتتی».

لعلینگ گە باغلندی جانیم هجر ایلیندین آل انی،
زلفونگ گە چیرمشتی کۆنگلوم قیلمه غیل پامال انی.

باغله دی کۆنگلوم منگه عاشقلیغی نینگ تهمتین،
شرط قیلدیم کۆرگچ-اؤق رسوا قیله ی فی الحال انی.

سپندین ایرو خوبلردین آچیلور کۆنگلوم، ولی
غنچه ینگلیغ کیم، آچرلر کوچ بیله اطفال انی.

ای صبا، بغریمغه سنچیلغان تیکن کیم انگله دینگ،
بۆلسنگ اول گل بیرله همدم قیلغه سپن ارسال انی.

اول الف کیم، نیل ایله چبکتینگ عذارینگ یانیده،
حسن ایچینده بیرگه اؤن قیلیمیش یانیده خال انی.

بو چمن کیفیتین آزاده یی کیم قیلدی فهم،
اؤن تیلی سوسن دپک اؤلسه حیرت ایلر لال انی.

ای نوایی، دپب ابدینگ کۆرگچ انی جان تاپشوره ی،
بۆلسه بو دولت میسر قیلمه غیل اهمال انی.

قنى وصالينگ گه بير مېن دېك آرزومندې،
وصال اميدى بيله محنتينگه خورسندې.

فنا ميين ايچيب آواره ليغ يولين توتوم،
نصيحت اهلى منگه اېمدى بېر منگيز پندې.

اېرور تنيمده غى يوز داغ بيرله مونگلوغ جان،
گدا که، تۇنيگه هر سارى سالسه پيوندې.

سبب بو اېردى اېکين خلقتيدىن آدم نيگ،
که بۇلغهى انگه سېنينگ دېک خجسته فرزندې.

کۇنگولنى شوخلر انداق تلشتيلر کېسيشيب،
که قالمدهى مېن بېدل نصيبى پرکندې.

چاغيرنى عاقل اېسنگ لعل دېب قيزيتمه دماغ،
که اۋتنى ايسله مه دى گل دېبان خردمندې.

اجل، نوايينى قوتقز بلاى حرماندين،
که اول ضعيف بو درد ايچره اسرو اېمگندى.

اۋتوم خود اېتمه‌دى اول تاش بغيرغه تائيرې،
بو يانه اۋت كه، تاپيلمس بو ايشكه تدبيرې.

نې طرفه صورتى باردور كه، هيچ صورت ايله،
قضا مصورى قيلمه‌دى بۇيله تصويرې.

شكايتيم كۆپ و قالمس سېنى قچان كۆرسم،
تېمگه تاب و تېلمگه محال تقررې.

توشومده آب حيات ايچتيم آه كيم، كېلمس
كۈنگولگه لعلينى اۋپمكدن اۋزگه تعبيري.

مېنى مقيد ابتر بۇلسنگ آچمه حلقه زلف،
كه پشه قيديغه يۇق احتياج زنجيري.

گل ايچره شېنم ايله خرده دور سو و دانه،
مگر كه قيديغه بلبل نينگ ابتي تزويرې.

نوايي ياردين ار ظلم ابرور كه، لطيفچه بار،
سېن اېتمه‌سنگ كېره ك اۋز قوللوغونگده تقصيري.

جانیم چیقە دور ھجر ایله جانان کبرەک ابردی،
کۈنگول کویە دور درد ایله درمان کبرەک ابردی.

غم شامیده پروانه صفت کیم، کویە دورمېن،
باشیم اوزە اول شمع شبستان کبرەک ابردی.

کۈز باغیده یوز گل آچە دور عشق، ولېکن
یوز و خطیدین لاله و ریحان کبرەک ابردی.

خوش کېلدى حزين کۈنگلوم ارا غمزه لرینگ کیم،
آه اۋقلىغە بیر نېچە پیکان کبرەک ابردی.

قبریمغە خرام اېتتینگ و یۇق تحفه یی، وه کیم،
بو خس کېبی جان ایچره بوگون جان کبرەک ابردی.

خوش زینتی کۈپ نامه دورور عمر، ولېکن
توقیع وفادین انگه عنوان کبرەک ابردی.

بیلمه ی سېنی اول گل قاور، ای زار نوایی،
سېن دېک انگه بیر بلبل نالان کبرەک ابردی.

بۇلدى عيد اول تورک چابک عزم میدان قیلغوسی،
وه که، اهل بېخودلوغی جانیمنی قربان قیلغوسی.

برق آفت بۇلغوسی هر شعلهیی کیم ایریلور،
مرکبی تویناغیدین اول دم که جولان قیلغوسی.

اوق هونیلب اؤت یالین دېک هر طرف کیم قۇیسه یوز،
یوز کۇنگولنی کویدوروب، یوز جاننی ویران قیلغوسی.

آشکارا جان آلیب هر یان قیلور مشغول اؤزین،
اهلنی بیلمس دېب ییگیت اؤزینی نادان قیلغوسی.

شمع اېمس کؤز آچتیلر نظاره غه اهل قبور،
کیم اول آی عيد آقشامی سیر خیابان قیلغوسی.

صبح میدان عزمی قیلغچ، وه که، یوق یالغوز مېنی
عالم اهلین عید رخساریغه حیران قیلغوسی.

عیدگاه اهلی هجومی بیرله، ای شه، قیلمه کبر،
کیم فلک بو جمعنی حالی پریشان قیلغوسی.

ای نوایی، رشکدین اؤلدوم که، اول قاتل بوگون
هر طرف بو شکل ایله یوزلنسه یوز قان قیلغوسی.

يار ايله بير خلوت ايستمېن كه اغيار اۆلمه غاي،
بلكه اول خلوت نينگ اطرافيده ديار اۆلمه غاي.

كۆزگه كۆنگلوم درديدن ييغلرغه امكان قالمه غاي
تيلگه درديم شرحيني ايلرگه گفتار اۆلمه غاي.

اېلدين انداق ياشورون ايستمېن اول خلوتنى كيم،
كۆنگلوم اندين واقف و جانيم خبردار اۆلمه غاي.

يار بودى ايچره نابود اۆلگه مېن كيم، اۆرتهدده
اۆزگه ليكدين دېمه كيم، اۆزلوكدين اسرار اۆلمه غاي.

بو كه دېرلر باردورور دېوار كېنيدده قولاق،
اول فضا دوريده كۆز يېتگونچه دېوار اۆلمه غاي.

مخفى اسراريمغه بۆلغهى يار لفظيدين ادا،
ياردین ايرى و لېكن صاحب اسرار اۆلمه غاي.

اي نوایی، قيلمه هر يار آليده سړينگنى فاش،
بار مو دور امكانى كيم، اول يارغه يار اۆلمه غاي.

ينە بلا چاقينين عشق تېلە جانيمە اوردى،
فنا قويونى ايتيان كولومنى كۆك كە ساووردى.

مگر كە مېن كېيى اېلدين قاچرنى ايله دى ورزش،
كېيكلر ايچرە كە مجنون تمام عمر يوگوردى.

مېن ار چە كوييدە اۆلدوم قاوونگ كە، تېلەلر آخر،
چوروك سۆنگىنى تىمىدىن اوزوب، نې ايت كە كۆموردى.

غمىنگ قۇيوب توگان اوزرە توگان بو مگر ايله كۆركىم،
تىمىدە هر توگان ايچرە نېچە توگاننى ياشوردى.

كۆنگولده گر اۆقونگ ايتمىش يەنە بير اۆق دغى ات كىم،
بو نوع تاپسە بۆلور هر كىشى كە، بير اۆق ايتوردى.

دم اورمە و قدح ايچكىل كە، تېلە بۆلمەسە واعظ،
نېدىن اېدى اورونوب، قىچقىرىب كە آغزى كۆپوردى.

فراق داغىغە مشعل فتىلەسى كېتورونگ كىم،
نوايى آغزىنى چون كۆكە قۇيدى، پاك سوموردى.

لېښک تکلېم اېتېب، سؤزده لال قیلدی مېنې،
آچیلدی زلفونگ و آشفته حال قیلدی مېنې.

یوزی کؤرونندی، آچینگ اېمدی زلفی سلسله سین،
که اول پری ینه مجنون مثال قیلدی مېنې.

ایاغین اؤپکه لی باشیم یؤلېغه بیتکوردوم،
فغان که زلفی کېبی پایمال قیلدی مېنې.

قاشی خیالیده پیوسته بس که چېکتیم رنج،
فلک بو غمده نېچوک کیم، هلال قیلدی مېنې.

بېلی غمیده خیال اؤلدوم آه و افغاندین،
بو پویه موی اېتېب، اول ناله نال قیلدی مېنې.

کُپ آغزیمه قوی و قؤی عدل جامین، ای مغ کیم،
قضا بو شېوه ده بې اعتدال قیلدی مېنې.

نوايي، انگله که، جرموچه یوز امیدیم بار،
فقیر زاهد اؤزی دېک خیال قیلدی مېنې.

خړاب ايله دينگ، اى شيخ، خان و مانيمنى،
تصور ايله كه، اؤلدوم، بغيشله جانيمنى.

مگر كه عشق ملامت اؤتين يارو تماق اوچون
قوروتتى اؤيله كه خس جسم ناتوانيمنى.

بو طرفه كؤر كه، فزون بؤلدى لعلگون اشكيم،
اگرچه شعله عشقينگ قوروتتى قانيمنى.

فغان كه اؤلدوم و كويده خلق غوغاسى
انينگ قولاغيغه يېتكورمه دى فغانيمنى.

بوگون تنيمغه نشان اول حياتدين كېليان،
كه تانگله تاپمه غه سېن ايسته بان نشانيمنى.

چو عشق آيتيده صوت و حرف يؤل تاپمس،
كمال عشق ايتورميش مگر بيانيمنى.

دېدېم كه، كؤزگه چېكه ي گرد رهنوردېنگنى،
فغان كه، تاپمه دى كؤز توتياغه گردېنگنى.

مگر زمانه كؤزى سورمه ايستر اېرکندور
كه گرد قالمه دى سورگنده رهنوردېنگنى.

فراق و آرزو و شوق هر بيرى بير درد،
دېسم كه، دردېنگ اېته ي شرح قيسى دردېنگنى،

سفرده يامغور و پيل بولمه سون مزاحم انگه،
كؤز، اسره اشك و كؤنگول، چېكمه آه سردېنگنى.

تؤشب سمنديغه فرش، اى زمانه، اؤتكردېنگ
سپهر و اخترېدين سبزه بيرله وردېنگنى.

كؤك ابلقېنگ اېگريب، اى قوياش، سنان تارتيب،
مگر بو ذره غه قىلدېنگ عيان نبردېنگنى.

نوايى، اېمدى نشاط اوجى توت كه، گردش چرخ
كېتوردى ماه فلک سیر تیز گردېنگنى.

قۇزغەدى آھىم سۇنگىك بىرلە تىن غمناكى،
يىل ساووردى بىر آوۈچ توفراغ ايله خاشاكى.

دېمە گىل صحت سۇزىن كىم، كۇكسوم اوزره تيغ عشق
ايلر ايگى چاك، تىكمسدىن بورون بىر چاكى.

بو كه عالمغه حوادث توشتى، گۇيا قۇزغەمىش
اول قوياش ھجرىدە آھىم انجم و افلاكى.

مېن خود اپتتىم عزم مسجد، اى مسلمانلر، ولېك
باك اپمس گر كۇرمەسم اول كافر بېياكى.

قىلدى چون ھجران مېنى نابود توتمە جام وصل،
زھر چون اۇلتوردى ضايع قىلمە غىل ترىاكى.

قدىدىن آغزىمدە حىرت برماغى دور، زاهدا،
اۋتقە سال اپمدى عصا، باشىنگ گە اور مسواكى.

غىر لاف اپرمس نوايى پاك رولىقدىن حديث،
تاپمەيىن بىر غىر نقشىدىن ضمير پاكى.

عشقىنىڭ ايچرە كۆكسومە آنچه جنون تاشين اورەى،
كىم خردىنىڭ شوكتىن، تقوا شكوهين سىندورەى.

قىلسە توسىلىغ كۈنگۈل تارتىپ جنون زنجيريغە،
ھجر زندانىدە عشقىنىڭ شىھنەسىغە تاپشورەى.

اول پرى كۈزدىن چو مخفى دور ھمىشە، ۋە، نېچە
اىستىب انى تاپمەسە، مىچون كۈنگۈلنى يازغورەى.

غم تونى انجم كۈزى يىڭلىغ يۈمۈلمىس كۈز بىلە،
ۋە، نېچە گاھى يورەى، گاھى تورەى، گاھ اۋلتورەى.

چون نې تىقدىر اۋلسە تىغىر اۋلمىس اېرمىش سىغى ايلە،
قىغۇ قىسمىم بۇلدى دېب، آرتوقسى نېچون قىغورەى.

اول قوياشقى ذرەيى تاثير اوچون يۇقتور، نې سود
گر تۇقوز افلاكىنى آھىم اۋتىدىن كويدورەى.

اى نوايى، اىستەسم اۋلمىك نې غم اېل طعنيدىن،
بارې مېن ھر نوع اېتىب، جانانغە جاننى يېتكورەى.

ای کۈنگۈل، كېل كېم، بلا بزمیدە جام غم توتەى،
اۋز قىتىق حالىمغە اۋلەمسىدىن بورون ماتم توتەى.

يىغلەبان باشىمغە آھىم دودىدىن چىرمب قرا،
ماتىمىم اېل سۈنگرە توتقونچە، اۋزوم بو دم توتەى.

عالم اھلىغە نېچە قىلدىم وفا، كۈردوم جفا،
اي كۈنگۈل، كېل - كېل كە ترك جملە عالم توتەى.

اېمدى كېم، عشرت سرودىدىن آچىلمىگ، اي كۈنگۈل،
نوحە آھنگىن توزوب، بىر دم سېنى خرم توتەى.

مستلىغىدىن اۋزگە يۇق دردىم علاجى، ساقيا،
مى كېتور كېم، ھم ايچەى، بىر لحظە آنى ھم توتەى.

قۇيغىل، اي ناصح، كە مغ دىرىدە اۋز احوالىمە،
مست لايىقل يقم يىرتىب، سرود غم توتەى.

چون جھان بىرلە جھان اھلىغە يۇق اېرمىش وفا،
اي نوايى، مېن فنا سررشتەسىن محكم توتەى.

آلسە جانىمنى لىنىڭ دوران تۆكۈپ قان ياشىنى،
تانىڭ اېمىس اول ياش ايله لعل اېتسە قېرىم تاشىنى.

فتنە تەلىم اېتمەسە قاشىنىڭ سىنگە بېداد اوچون،
خىم بۇلوب نېوچون قولايىنىڭ كېتورمىش باشىنى.

كۆز توتر اېردىم قىلم كىرىپكىلرېمدىن باغله دېب،
گر ازلدە كۆرسىم اېردى سورتىنىڭ نقاشىنى.

مىل اېتر كۆنگلوم قوشى جان پردەسېن قىلغەى قنات،
كۆرگەلى ھر كېچە محرم كويى نىنىڭ خىفاشىنى.

عاشق اۋلدوم، چونكە مى بېردىنىڭ، مگر اى مېغېچە،
عشق اۋتى بىرلە پېشورمىشلر پىلانگ داشىنى.

شىخ و اھل خانقە، تېنگرى توتە بېرسون مىنگە
حق يۇلىن كۆرگوزگەلى دىر فنا اوباشىنى.

جان قوشى قىلدىغە ساغىنىغەى گروھە بىرلە ياي،
اى نوايى، كىم كە كۆرسە خالى بىرلە قاشىنى.

ای کۆنگول، قۆیغیل که، موندین سۆنگ گدالیغ فن قیلهی،
کوییده بو فن بیله بیر یۆل باشین مسکن قیلهی.

که بو عشرتدین که اول کوی ایچره دورمېن شاد اۆلهی،
که بو محنتدین که اندین ایرو مېن شیون قیلهی.

آیله مکدین تنغه اندوه و بلا تاشین حصار،
جانیمه خیر و سلامت خیلینی دشمن قیلهی.

اول یوز و قامت کپره ک، وه، اۆزنی کوچ بیرله نېچه،
مایل گل ایله یین یا واله سوسن قیلهی.

یاشورون غم سالدی روزنلر کۆنگولکه، ای رفیق،
قۆی که، مېن هم آه ایله گردوننی یوز روزن قیلهی.

ساقیا، کۆز بیرله کۆنگلومنی قرا قیلیمیش خمار،
کېل که، بو اویلرنی می خورشیدیدین روشن قیلهی.

گر نوایی مست اگر مخمور اۆتر بو دیردین،
باده پالادین کفن، مغ دیریدین مدفن قیلهی.

كۈنگلۈمگە شور سالدى بىرونىنگ ملاحتى،
وہ كيم، عجب توز اۋلدى يەنە زخمىم آفتى.

تېر قىطرەسىن يۈزىدە كۈرۈپ عشقىم اۋلدى تېز،
افزون بو سودىن اۋلدى اۋتوم نىنگ حرارتى.

اۋىنتتى قاش و آہ كيم، اول داس نو كىدىن،
بغرىم نىنگ اۋلدى تازە اۋنگلغان جراحىتى.

سېكرىتىدى رخش و كويدى كۈنگۈل نىنگ اول اۋت بىلە
جان مزرعىدە خرمن آرام و طاقتى.

كۈنگلۈم سۈررغە كېلدى، ولې آلدى جاننى ھەم،
مونداق بۈلۈرمۈ دلشەلرنىنگ عىادتى.

شربت وصال يا مى اېمىش قىسى خستە نىنگ
كىم عشق اندوھىدىن اۋلۇپتور ملالتى.

مىغە نوايى اېتتى كۈنگۈل شىشەسىنى ظرف،
بو بۈلدى رندلىق ارا آنىنگ ظرافتى.

قىلسە كول جىسمىمنى اۋرتىپ آتشتىن عارض گلى،
 ھەر آۋوچ كول دەر بوستانىدە بۇلغەي بىلبى.

خۇت و رخسارىن تىلب غم شامى چېكىم اۋتلق آھ،
 ھەر شىردىن كۆك شىستانىدە آچىلغەي گلى.

زلفى سوداسىدە اۋلىم تارتقى قبرىمدە باش،
 ھەر گىھدىن خوشەيى، ھەر خوشە بۇلغەي سىنبى.

تۈشتە عىشىم سىبىغە كىردى بلا شامى مگر،
 قىدىمە شوخى عىزارى اوزرە آچمىش كاكلى.

لعل روح افزاسىنى كۆرسون بىرو كىم، كۆرمەمىش،
 روح آشام اىلەبان سىرمىست بۇلغۇدېك ملى.

مى نھان اىچىم كېرەك آغزىم قۇيۇب كپ آغزىغە
 كىم تۈگىتمە چىقمە غاى اندىن صدای قلقلې.

اى نوایى، اىستە سىنگ بۇلماق ضمىرىنگ لوحى پاك،
 مى سۈيىن كېلتۈر كىم، آنى غىر نقشىدىن يولى.

عارضینگ زر حُقه لردین، ای ملاحه مشعلی،
مصحفی دور لاجورد و آلتون آنینگ جدولی.

طرفه آیی دور عذارینگ، کؤک انکه ماوی لباس
انجم آنینگ تنگه-تنگه باسمه قیلغان زرحلی.

هر نفس آرتر جمالینگ نینگ صفاسی کؤزگودین،
کؤزگونینگ انداق که کولدین بؤلغهی افزون صیقلی.

بیر پری دور لاله زار ایچره سریغ گللر ارا،
یا اول آی اېگنیده دور زربفت گلگون مخملی.

حسنی اطرافیده، ای مشاطه، هر یان قؤیمه خال
کیم ختن ملکیده هندولرنینگ اولمس مدخلی.

نو عروس دهر عقدین ایسته مه کؤپ کیم عروس
آخری عفریت اولور، گرچه پری دور اولی.

ای نوایی، وسمه بیرله کپسمه دین تاپقان فریب،
گر ملک دور کیم، بؤلور شیطان صفتلر مهزلی.

کمند اوچیغه بیتکورمس غم و اندیشه عیاری،
بییک چپکمیش مگر میخانه تامین صنع معماری.

خماریم ضعفیده کهگل ایسی تا ییتتی مست اۆلدوم،
سوولمیشدور مگر می لاییدین میخانه دہواری.

تۆله کُپ آغزی می خورشیدی دور، گۆیا تینگ آچیلیمیش
چپکرده بو ایکی خورشید دورین صنع پرگاری.

می ایچمیش خانقه شیخی، خرابات اهلی، عیش ایلنگ
که چیقمیش بخیه اورغان خرقه سیدین مبلغ کاری.

کۆرونکن ماسوا بودی اہمس بلکیم نمودی دور
می اوستیده حباب و موج شکلی نینگ نموداری.

حباب و موج می تحریکیدین ظاهر بۆلور، لپکن
سکون تاپقچ وجود میدین اۆزگه قیده دور باری.

قویاش عکس مو دور حیوان سوییده یا کۆرونمیشدور
روان آسا می ایچره ساقی گلچهره رخساری.

فنا دیرین کۆنگول ایستر که، بیر-بیر پیر دیر اہلگه
توترده باده شاید جرعه یی سونغه یی بیزینگ ساری.

نواسیدین فنا چون حاصل اۆلدی قیلغه سہن، ای عشق،
نویی رشتہ جانین مغنی عودی نینگ تاری.

اېمس باغ ايچره سريغ لاله زنبق بيل كه هر ساري
ينگي داغ اورتب اول گل عشقيدين سرغردى رخسارى.

بو حرمت بيرله اېرمس آتشرين گل، آق گل اېردى كيم،
يوزونگ برقيدين اؤت توشتي انگه كيم، بؤلدى گلنارى.

قدينگ آليده بؤلغان جلوه گر آق سوسن انگله كيم،
كؤك اېتتى برچه اعضاسين صبا كاجى نينگ آزارى.

شجر يفراغلى اؤق دېك قدينگ نينگ هجریده باردور
باشاغلىر كيم، چمن اشكى نميدىن بؤلدى زنگارى.

دېمه كوندوز، قرانغو تون اېدى، چون پرده دېن چيقتينگ،
جهاننى قىلدى كوندوزدېك يوزونگ مهرى نينگ انوارى.

دېسم كيم، يۇقتورور موجود و اشيا هر نېدور نابود،
حباب و موج بحر اوزره اېرور آنينگ نمودارى.

نوايى نينگ عقيق اشكى آل اېردى كه، توتميش رنگ،
سهيل عارضينگ گؤيا كه قيلميش لمعه اظهارى.

دانه خالی اوزره كۆر سبزه خط نشانهسى،

دانه خال اېمس اېرور مهر گياه دانهسى.

اۋرتنورومنى عشقیده بيلمه گن، اېت نظاره كيم،

تيل دور آنيگ بيانیغه كۈنگلوم اۋتى زبانهسى.

قتلیمه بس بهانه كيم قیلدی بهانه قالمه میش،

اېمدى بهانه عذرینی قۇلماق اېرور بهانهسى.

تیره فراق تونلری شرحینی ایت دېمه كيم،

مینگ كېچه دېب توگنمه گهی بیر كېچه نینگ فسانهسى.

ایسته مه عشق بحری نینگ ساحلین ای که غرقه سین

بیر- بیرگه یېتیشتی چون تۈش- تۈشیدین کرانهسى.

توسن اېدى كۈنگول می عشقینی تارتقان زمان،

كۈر که نې رام اېتیدورور اېمدى آنی زمانهسى.

باشی مو دیر پیری نینگ درگهی چون توشوپتورور

وهم، تعقل ایله مس وضع ایله کارخانهسى.

فکری بو کارخانهنى قیلغهی اېدى هلاک اگر

بۈلمه سه عقل زایل جام می مغانهسى.

بس که نوایی ایله دی درد سرودیده نوا،

اهل طربنی ییغله تور مجلسی نینگ ترانهسى.

عشق اھلى گورستانىدە قېرىم چو زاھر بۇلغوسى،
فرھاد انىنگ تاشىن يۇنوب، مېنون مېاور بۇلغوسى.

دېرسېن، يوزوم سارى كۈزونىڭ كۆپ باقمەسون گر يوز بو دور،
اول مھر تابىدىن اېرىب، آققونچە ناظر بۇلغوسى.

غمزەنگىدىن اۋلتورمىك ايشىن تېلىم آلە كېلمىش اجل،
بو نوع استاد اۋلسە، اول از چاغدە ماھر بۇلغوسى.

خط غبارىن دېمە كىم، بۇلغوسى اول يوز مانى،
تون پردەسى آى نوريغە نې نوع ساتر بۇلغوسى.

اول غمزە كىرىدىن كۈنگول نوعى كېلوراسلامغە،
كىم ترك اسلام ايلەبان گۇيا كە كافر بۇلغوسى.

بۇلغوسى مطلق شعلەلر ايچرە سمندر سىرى دېك،
سېنسيز كۈنگول گلزار ارا اول دم كە ساير بۇلغوسى.

كۈنگلومدە گى ھر نىشدىن گر بۇلسە بىر تىل، ھر بىرى
يوز تىل بىلە اۋز ھالى نىنگ شرحىدە قاصر بۇلغوسى.

خاطرنى جمع اىستر اېسنىڭ اول خواطر دىفېن اېت،
كىمدە خواطر بۇلمەسە آسودە خاطر بۇلغوسى.

قىلدى نوايى قىدىنگ كە سرو سھى تشىبھىنى،
بو طبع ناموزون بىلە بېچارە شاعر بۇلغوسى.

بوتمەدى گلشن طوافى بىرلە بغيريم يارهسى،
بېرمەدى اۋتومغە تسكين سرو و گل نظارهسى.

بىر زمانى سرو و بىر دم گلگە كۆپ قىلدى نظر،
بۆلمەدى اول سرو گلرخ فرقتى نىنگ چارهسى.

گل بىلە سرو ايستەبان گلشن سىرى ميل ايله مس
دشتدين اول سرو گلرخساره نىنگ آوارهسى.

قدى هجریده هر آھيم دودى سروې دور بلند،
يوزيدىن اىرو گلې دور كۆكره گيم هر پارهسى.

سرو و گل مفتونى بۆلمە كيم، نگار و زېب اوچون،
سیندوروب هر دم اوزر آنى فلک مکارهسى.

سرو اۋق دور، گل تيكن، باغ ايچره تا كۆز آليدين
بارغەلى اول سرو گلرخ نىنگ قد و رخسارهسى.

اى نوايى، سرو و گلدين كېچ كە، قد و يوزيدىن
بار اېمىش يوز يىلچىليغ يۇل سرو ايله گل آرهسى.

غم چېگر جسم و کونگولنی کلبه احزان ساری،
خسقه اوت سالیب گدا اېلتور کېبی ویران ساری.

حرز قلقلانی، دعا درعی نېدور ای پارسا،
چون بلا تاشی یاغر مېن تېلبه عریان ساری.

یار ایستر هجر و عین وصل اېرور کیم، کونگومه
بؤلدی میل آنینگ رضاسین ایسته بان هجران ساری.

سبزه نیشتر، برگ پیکان، گل اوت اېردی جانیمه
هر قچان کیم، سېنسیزین عزم ایله دیم بوستان ساری.

نې فتور اسلام ارا توشکی که، اول کافرینه
مست اؤلوب، کونگلکچه چیقتی سېکریتیب میدان ساری.

گر خرابات ایچره ممکن دور سومورمک بیر قدح،
خضر اگر اؤلتورسه بارمان چشمه حیوان ساری.

ساقیا، تیزگیندورور هر لحظه باشیمنی خمار،
دور اېوورسنگ جرعه یی سونغیل بو سرگردان ساری.

یوز خضر عمریدین آرتوقراق دورور مینگ جان بېریب
بیر قدم قویماق، میسر گر بؤلور، جانان ساری.

ای نوایی، گر دېسنگ کیم فتنه کورمی، سالمه غیل،
بیر نظر هر طرفه العین اول کؤزی فتن ساری.

گردِ یزدي مجمر آستیده قاشینگ، ای کۆرکه بای،
بار انینگ دېک کیم کۆرونکه ی گرد ایچینده ینگى آى.

وسمه دور اول قاش اوزه یاخود ظرافتدين کۆزونگ،
آلدى بو قربان کۆنگول قصديغه مينا رنگ يای.

گر نهان ساچینگ ترر مشاطه کېلسون کیم، اپرور
کیرپیگیمدين شانه، اشکیمدين سو، کۆز خلوتسرای.

دلر بالر ایچره هر دم کۆزگوکه باقماق نېدور،
وه که، بیلمان، ای پری، خودبین موسېن یا خودنمای.

آتشین گل برگیدین کۆنگلک کییدورسېن، ولېک،
دېسنگ اؤت سالمه ی جهانغه چيقمه غیل کۆنگلکچه، وای.

گه توتولسه، گه آچیلسه کۆنگلوم اپرمس عیب کیم،
سنبلونگ دلېند، خندان غنچهنگ اؤلمیش دلکشای.

ای نوایی، دهر شوخی عاشقی بۆلدونگ، ولېک
بیل که، کابین نقدی جان دور گر بۆلورسېن کدخدای.

باده بو مقبوللوق ذاتيمده موجود ايله دي
كيم مېنى زهد و ريا اهليغه مردود ايله دي.

مى اؤتى نينگ لمعه سى اؤرتب وجوديم خرمنين،
كوللرين نى نغمه سى بير دمه نابود ايله دي.

باده دين خوشنود اولوبمېن تا مېنى جام فنا
دور اېلى نينگ صافى و دُرديغه خوشنود ايله دي.

ميغه رهن اېتگيل ريا سجاده سين، اى شيخ كيم،
هر كيشى بو نوع سودا ايله دي، سود ايله دي.

ميغه اشكيم لعليدين آلوده ليغ گر ايسته مس،
نې اوچون ساقى لب لعلين مى آلود ايله دي.

آدميليغ كؤرگوزوب قيلدينگ پريوشلرنى قول،
آدم اول دور كيم، ملايك آنى مسجود ايله دي.

اېل تيلر مغ كويين و ايستر نوايى مغېچه،
عزم مقصد ايلب اېل، اول قصد مقصود ايله دي.

آهيمه يار آغزی بير دم کولمگين کم قيلمه دی،
چون صبادين غنچه آچيلدی ينه ياپيلمه دی.

نيشتر آهيم عجب يوق کؤنگلونگ گه کار اېتمه سه،
تېزليکدين ايگنه هرگز خاره غه سنچيلمه دی.

قطره يی تاميزمه بيزگه توتقان اصفير باده دين،
شمع اؤتيدين، ساقيا، هرگز شرار ايريلمه دی.

عشق کيم، هر بير ايشيده يازدی يوز مينگ طرفه خلق،
طرفه راق بو دور که، يوز مينگدين بيری يازيلمه دی.

کويده آهيم يېلی رفع اېتتی اول يوز برقعين،
هيچ گلشنده صبادين بؤيله گل آچيلمه دی.

قيسی جاهلغه ندامت بؤلغهی اول عالمچه کيم،
هر نې بيلدی، قيلمه دی، هر نې که قيلدی، بيلمه دی.

ای نوایی، يار وصيلين ايسته بان اول تاپتی کيم،
اهل هجران زمره سيده ايسته بان تاپيلمه دی.

كۈنگلۈم آھىدىن تبسم لعلىنگگە فن بۆلمەدى،
 اۆيلە كىم، لعل اخگرى يىل بىرلە روشن بۆلمەدى.

اىستەدى جىسم اويى بىر روزن اۆقونگدىن، وای كىم،
 قالمەدى روزن يېرى كىم، نېچە روزن بۆلمەدى.

دېدى، بىر دشنام اوچون جانىنگنى آغومدور بها
 اۆلتورور سودا كە، ميعادى معين بۆلمەدى.

ای چمنده اول پرى بىرلە كېزىب مېن تېلبەگە
 وه كە، عشرت جلوه گاهى غير گلخن بۆلمەدى.

آه اۆتيدىن خرقەنى پاك اۆرتە كىم، هر بوالهوس
 زرق اشكىدىن اېتك يوب پاكدامن بۆلمەدى.

لاف عشق اورغان كۈنگول غم دوزخيدىن قاچمەسون
 كىم سمندرغە يالىندىن اۈزگە مسكن بۆلمەدى.

ای نوایی، کیمنی سېوسنگ قیلمه ظاهر کیم، سنگه
 کیم دورور کیم، دۋستلوغ فهم اېتتى، دشمن بۆلمەدى.

می خلاص اہتی ریایی پارسالیغدین مہنی،
شکر کیم، قوتقردی زہد و خونمالیغدین مہنی.

بۆلدی نابود اؤزلوگوم، یوز شکر کیم، قیلدی خلاص
ہر زمان بو کارگہدہ بی خیالیغدین مہنی.

دہر زالین تۆرت مذهب بیرلہ قیلدیم اوچ طلاق،
فرد قیلدی باری مونداق کدخدالیغدین مہنی.

بۆلدیلر بیگانہ اہل زہد خوش دولت بو کیم،
قیلدی منع اول قوم بیرلہ آشنالیغدین مہنی.

عارضیمدین غصہ کاجی نینگ سوادین قیلدی آل،
شکر کیم، قوتقردی مونداق یوزقرالیغدین مہنی.

بندہ مہن ساقیغہ کیم، بیر جام مالامال ایلہ
ایلہدی آزاد یوز مینگ مبتلالیغدین مہنی.

توبہ اہلی یارومنگ مونداغ کہ محروم اہتینگیز
دیر ایچیندہ مست و لایعقل گدالیغدین مہنی.

دشمنیمسیز دؤستلر کیم، قاودینگیز ایلہ ہجوم،
بہنوالیغ کشوریدہ پادشالیغدین مہنی.

ای نوایی، ہم مگر، یا مغبچہ، یا پیر دیر
سیندوروب توبم چیقرغہی بہنوالیغدین مہنی.

يوزيدىن اۆلمەسە، يارب، روا كۆزوم تىلەگى،
تظلموم ايليگى دور عدالتىنگ اېتگى.

كۆنگۈلدە فرقت اۇقى بىركىشىدور انداق كىم
كىشى چېكرده گمان ايله گەي انىنگ سۇنگى.

چمندە غنچە اېمس كىم، بۆلۈپتور اول گل اوچون
فغانىم آنچه كە، قان باغله نىپتورور يوره گى.

چېچك نېچوك كە، ياپر كۆزنى تېرە ايلپتور،
كۆزوم بهارىنى گلگون سرشك نىنگ چېچكى

لبى خيالىدە بغرىم شكافىنى تىكسم،
الفدىن ايگنە قىلور، جان و رشتەدىن اىپكى.

خزان چمنغە شىبخون كېلور گە بۆلدى دليل،
صنوبر اوشبو چمندىن كناره ايله مگى.

نې كۆنگلىنى بوزە دور درد و غم نوایی نىنگ،
چو اول پرى دور و بس اوشبو تېلبە كۆنگلىدە گى.

کېچه هجرینګده تیریکلیکدین ملالیم بار اېدی،
تانگه تېگرو ایته آلمان کیم، نې حالیم بار اېدی.

فرقتینگ بېدادیدین یوق اېردی بیر ساعت مجال،
بؤلسه داغی ییغلر اېردیم تا مجالیم بار اېدی.

تاش اوروب کؤکسومگه، توفراغلر باشیمغه ساووروب،
لېک بو وقتې اېدی کیم، اعتدالیم بار اېدی.

کېلسم اؤز حالیمغه ناگه بو ملامتلارا،
گاه اؤزومدین، گه اولوسدین انفعالیم بار اېدی.

وصل امیدى کیرمه سه جانیم اراسیغه گهی،
قیده جان اېلتورغه بارې احتمالیم بار اېدی.

وصل ترکیدین اگرچه مجرم اؤلدوم، وه، قچان،
هجرنی بو نوع صعب اېرکان خیالیم بار اېدی.

ای نوایی، فرقتیم ایامی مونداق قالمه غای،
قالمه دی چون اول که، دوران وصالیم بار اېدی.

ای صبا، کۆزدین اوچور مازندران نینگ وردینی
کیم قیلیمېن سورمه مرو شاه جهان نینگ گردینی.

اول که احبابین قیلور پرورده عیش و ناز ایله،
غم اېمس یاد ایله سه گاهی بو غم پروردینی.

چېکمه زحمت، ای طبیب، اېرمس چو ممکن ایله مک،
شربت وصل اؤلمه غونچه دفع فرقت دردینی.

انگله غهی دوزخده بار ایسیغ. ساووغ بیرله عذاب،
هجر ارا کیم کؤرسه اؤتلوغ کؤنگلوم آه سردینی.

انجم اشکین تۆکر تانگ آتقوچه مېن دېک سپهر،
یؤقله میش اول هم مگر بیر مهر عالم گردینی.

ای کؤنگول، وصل ایسته سنگ بېخود بؤلوب غم یېمه کیم،
کام تاپمس کیمسه قیلمه ی ترک خواب و خوردینی.

یار اگر هجران ارا سالدی نوایینی بیراق،
باک اېمستور وصل ایله گر قیلسه باز آوردینی.

جنون واديسیغە مایل کۆررمین جان زاریمنی،
تیلرمین بیر یۆلی بوزماق بوزولغان روزگاریمنی.

فلک بېدادیدین گرچه مېن خاکی غبار اۆلدوم.
تیلرمین تاپمەغەیلر توتیالیغقە غباریمنی.

شک اېرمس پرتوې توشکچ اوئی هم رختی هم کویمک،
چو گورستان گدایی سېرمەگە ی شمع مزاریمنی.

دېمەنگ قی ساری عزم اېتونگ، مەنگە یوق اختیار، آخر
قضا ایلگیگە بېرمیشمېن عنان اختیاریمنی.

توگندی اشک گلگون، اېمدی قالمیش زعفرانی یوز،
فلک ظلمی بدل قیلدی خزان بیرلە بهاریمنی.

دیاریم اهلی بیرلە یاردین باشیمغە یوز محنت،
نې تانگ باشیم آلیب کېتسم قۇیوب یار و دیاریمنی.

یامان حالیمغە بغری آغریغە ی هر کیمسە کیم، کۆرگە ی
بغیر پرگالە سیدین قانغە بولغانغان عذاریمنی.

حیاتیم بادە سیدین سرگرانمېن اسرو، ای ساقی،
قدحقە زهر قاتل قوی، دغی دفع اېت خماریمنی.

جهان ترکینی قیلمی، چونکە تینماق ممکن اېرمستور،
نواپی، قیل مېنی آزاد اؤرتب یوق و باریمنی.

کۆزی هجری مهنی بېمار اېتتی،
قرا آغریققه گرفتار اېتتی.

جزو- جزویمغه تیکیب، مژگانینگ
روحوم اجزاسینی افکار اېتتی.

صبح گل صفحه لریدین بلبل
عارضینگ وصفینی تکرار اېتتی.

لبینگ انفاسیدین ابردی که، مسیح
اؤلۆگ احیاسیده اظهار اېتتی.

ذرّه مهر جمالینگ یوسف
تاپیبان عالم ایلین زار اېتتی.

ایله دی زهد و ریاغه اقرار
کیشی کیم، عشقدین انکار اېتتی.

دهردین تاپتی نوایی چو ملال،
مسکنین کلبه خمّار اېتتی.

ای عذارینک آئیده شرمندە مهرِ خاوری،
یوٲقسە نەوچون یاشونور هر کەچە انداق کیم پری.

قامتینگدین عزم صحرا قیلدی گلشندین تدرۆ،
تاغ ساری اۆیلە کیم فریاد ایتیب کبک دری.

گلشنِ حسنونگە زینت بېردی تېردین قطرەلر
کیم کۆروپتور بۆیلە گلبرگ اوزرە شبنم گوهری.

هجر سوزی ضعفلیغ جسمیم ارا بۆلمیش نھان،
بس عجب دور بیر آوچ خس ایچرە دوزخ اخگری.

صفحە حسنونگە حق سَرین کۆرر کۆنگلوم عیان،
تانگ اېمس بلبلغە مصحف اؤرنیدە گل دفتری.

یار بزمیدە وصال اھلی چېکر جام مراد،
دۆر چون هجر اھلیغە قسم اېتتی محنت ساغری.

ای نوایی، یار ظلمیغە نې چارە، غیر صبر،
کیمسە نېتکی صبر قیلمە ی ظالم اؤلسە دلبری.

چو عشق ایلگی زبون ایلر دلاور پادشالرنی،
تعقل ایله گیل کیم، نیله گهی بیدل گدالرنی.

دلیل ایتهی ابرورلر دهب پریزاد و ملک سیما،
دېسم کیم، آدمی سانیده ابرمس بېوفالرنی.

وفانی، ای وفاسیز، اېلگه کؤرگوزسنگ کرم ایلب،
جفاکش جانیمه بارې مسلّم توت جفالرنی.

انینگ دېک هوشدین بېگانه مېن کیم، تانیی آلمسلر
مېنی هم آشنالر اؤیله کیم، مېن آشنالرنی.

قیلورغه ظلم عشق اهلینی ایلر جمع اول ظالم،
نېچوک کیم، شاه احسان قیلغه لی ییغقی گدالرنی.

اگر یوز چاک قیلدیم کؤنگلکیمنی هم یامان ابرمس،
فراقینگ تیغیدین جسمیمده باغلرغه یرالرنی.

ابرور مهلک جهان شغلی می ایچ کیم، قوتقرور هر دم
اؤکوش وابسته لیغلردین بیزینگ دېک مبتالرنی.

قیامت دشتی بؤلغه ی تیره دوزخ ساری یوزلنسم،
ختا خانی سپه چېککن کببی باشلب ختالرنی.

اگر عشاقینگ گه بزم ایچره یؤل بېرسنگ نوایی دېک،
بیرر ساغر بیله هم یاد قیل بیز بېنوالرنی.

نو بهار اۋلدى و عيشيم گلبنى آچيلمەدى،
كام ايله بير غنچهسى بلکيم تبسم قيلمەدى.

وصل جاميدىن اولوس مست اۋلدیلر، يوز وای کیم،
بیر قدح بیرلە خمار فرقتیم یازيلمەدى.

اېل کۈزین یاروتتى برق وصل، هجران کاجيدىن
قيسى اۋتلر کیم، کۈزومگە برق دېک چاقيلمەدى.

وصل گلزاری ارا اېل مست و هجران دشتیده،
قالمەدى اېرکین تیکن کیم، بغريمە سانچيلمەدى.

لالەلر کۈنگلومگە قانلیغ داغلر دور نو بهار
کیم وطنغە لالە رخساریم عزیمت قيلمەدى.

فرقتیم صعب اېرکین عشق اهلی ایچره بيلمەگەى،
یارىغە اول کیم، قۋشولماقدین بورون ایريلمەدى.

قیده بغريم چاکى مهلک اېرکین فهم ايله گەى،
اول که هجران تیغ زهر آلودى بغرين تيلمەدى.

چون اۋلرمېن سر عشقیم مخفی اۋلغان یخشیراق،
بيلمەسون اېل هم چو هجرى جانیم آغان بيلمەدى.

بیر جنون اۋتى ارا توشمیش نوایی تېلبه کیم،
بۋلدى کویمکدین خلاص اول کیم، انگه قاتيلمەدى.

كۆزوم تارتىر ھمانا يار كېلگەي،
سالور كۈنگلۈم مگر دلداز كېلگەي،

قوچۇشتۇم سىرو بىرلە تۇشتە، گۇيا
بو يان اول قەد خوشرفتار كېلگەي.

چو سېن باردىنگ، كۈنگول ھم كېتمىش اپردى،
چو كېلدىنگ، اول دغى ناچار كېلگەي.

قېچان كىم اول پىرى پىكرنى كۆرسە،
كۈنگول اول سارى مەجنون وار كېلگەي.

مېنى اول كويدىن قاومىنگ كە بىلبل
گلستان جانىبى بىسار كېلگەي.

كۈنگول بو قتله بارسە خانقەدىن،
مقىم كلبە خمار كېلگەي.

كۈنگولنى بىر كۆز آلدى، ۋە، نې بىلدىم
كىم اول ساغ بارغى و بېمار كېلگەي.

كۈنگول جان آلدورۇب كېلدى قاشىنگىدىن،
نې بىلدىم بۇيلە مىنتدار كېلگەي.

نوايى بارسە اول يان شاد بارغى،
ولې كېلسە، تاپىب آزار كېلگەي.

اېورولەى باشينگه و بېهوش و حيرانينگ بۇلەى،
بىر زمان صدقنگ بۇلەى، بىر لحظه قربانينگ بۇلەى.

خان وصالينگدين اگر قاوسه رقيبينگ، رغميغه
كۈنگلوم ايستردېك تخیل بىرله مهمانينگ بۇلەى.

نېتتى جان تاپسم وصالينگدين لينگ نينگ خالى دېك،
كۈز و زلفونگدين نېچه مست و پريشانينگ بۇلەى.

خوشتورور وصالينگ ميدين هر طرف خرقيه مده داغ.
نېچه، جانا، مبتلاى داغ هجرانينگ بۇلەى.

گرچه بنده نغمېن، مېنى آزاد قيلمه لطفدين،
كيم قويون دېك صدقه سرو خرامانينگ بۇلەى.

تننى جلوهنگ وقتى توفراغ ايلهى، اى چابكسوار،
تا باشينگه اېورولورگه گرد ميدانينگ بۇلەى.

اى نوايى، گنگ و لال ايستر اېسم تانگ يۇق سېنى،
تابكى آزرده فرياد و افغانينگ بۇلەى.

سورگنده جفا تیغین قؤل اسرهمه دینگ بارې،
قانیمنی تۆکر چاغده رحم ایله مه دینگ بارې.

یوز لافِ وفا اوردونگ، مینگ تیغ جفا سوردونگ،
هر نپچه که یالباردیم، هیچ افسله مه دینگ بارې.

احبابنی خاص ایتتینگ جان بپرگه لی لطفونگدین،
قتل ایتکه لی هم بیزنی بیر ایسته مه دینگ بارې.

قتلیمنی بورون وعده قیلدینگ چو غضب سوردونگ
بعضینی بورون، سؤنگره دېب تالغامه دینگ بارې.

دردینگ که قولاق سالغوم دېب، مست چیقیب کلدینگ،
حالیم نپچه شرح ایتتیم سؤز تینگله مه دینگ بارې

ای زاهد دین آیین دیر ایچره توتوب تسکین،
زنار ایپینی تارتیب، خرقة نگ یمه دینگ بارې.

دورانغه وفا چون یوق، شکر آيله که کؤنگلونگنی
اول ساری نوایی دېک کؤپ باغله مه دینگ بارې.

ای فلک، بیر آی غمیدین اسرو زار اېتتینگ مېنى،
پویه دین تون- کون اؤزونگ دېک بېقرار اېتتینگ مېنى.

تا که قیلدیم بیر پریوش دردِ عشقین اختیار،
تېله لیک افغانیده بی اختیار اېتتینگ مېنى.

گؤیا هر کوکبینگ نینگ لمعه سین بیر نیش اېتیب،
دردِ هجران شامی سرتاسر فگار اېتتینگ مېنى.

گر اولوس آنی کؤرردین منع اېتر هم خوش دورور،
گرچه محنت خیلی یؤلینده غبار اېتتینگ مېنى.

یار زلفیدین مېنى ایلب پریشان روزگار،
تار زلفی دېک پریشان روزگار اېتتینگ مېنى.

نیلہی آنی کیم، یاشیم در بؤلدى باری حالیمه،
یغله ماققه اؤيله کیم ابر بهار اېتتینگ مېنى.

ای نوایی، عشق تاراجیغه تا بؤلدونگ اسیر،
در بدرلردېک جهانده خوار و زار اېتتینگ مېنى.

منگه كه كۆرمىكى اول شوخ نىنگ محال اۇلغەي،
بۇلە آلوركه، بو كۆرمىك دغى خيال اۇلغەي.

قوياش يوزيدين اېمستور مثال حسن ايچره،
مگر كه، آغزى آنىنگ ذرەدين مثال اۇلغەي.

قدىم نهالى، دېدينگ حد اعتدالده دور،
خرامى اۇلتورور اېلنى، نې اعتدال اۇلغەي.

فلك نىنگ آيى يوزونگكه مشابه اۇلغەي اگر،
آغيز سها و زحلدين يوزينده خال اۇلغەي.

اۇلوككه روح وصالينگده محتمل دور، لېك
حيات كيمسه گه سېنسيز نې احتمال اۇلغەي.

ملالتيمنى فراق ايچره انگلغەي اول كيم،
مېنىنگ دېك انگه بيرو هجريدن ملال اۇلغەي.

چو ماضى اوتتى و مستقبل اۇرتەده اېرمىس،
سېنگه كه حال اېمىس مغتم نې حال اۇلغەي.

بو دمنى عارف اېسنگ يىخشى توت كه، جاهل ايشى
يېتىشمه گنگه و اۇتگنگه قيل و قال اۇلغەي.

نوايى آيلهسه عشقينگده كفر و دين تركى،
قېچان بو واقعه شوق اھليدين محال اۇلغەي.

وفا كۆز توتقن اندىن ھوشدىن بېگانەيى بۇلغەي،
پرىدىن آدمىلىغ ايسىتەبان دېوانەيى بۇلغەي.

انىنگ دېك بزم ارا روھوم قوشى كىرمككە يۇل تاپتى
مگر اول حسن شمعى گردىگە پروانەيى بۇلغەي.

فراغت قىرىدىن كۈنگلوم اگر اوركوب بوزوغ ايسىتر،
عجب يۇق جغدىنىنگ مىزلىگىي ويرانەيى بۇلغەي.

يانىمنى سۈكتى چۈن تىغىنگ سۈنگىكلر شىكلىدىن كۆردۈم،
بوزوغ كۈنگلوم اويى نىنگ فرشىغە دىلانەيى بۇلغەي.

دېمە، مېندىن اوزوب كۈنگۈل يەنە بىر يار تۇتمىشىمېن،
گمان قىلمەكە، عالم ايچرە سېن دېك يانەيى بۇلغەي.

دېدىنگ، بۇلىسم سىنگە مېھمان نې يېرنى بزمگە قىلغونىگ؟
گداي خىستەغە مىزل بوزوغ كاشانەيى بۇلغەي.

فنا دېرىن تىلرېمېن بۇلمەغاي ھىچ كىمسە اۋزىلۈك ھم،
اولوغ بىرلە كىچىكىدىن بىر كۇپ و پىمانەيى بۇلغەي.

جھان مكارەسى شوخى دورور بس دلفرىب آخر،
نې اېركىم، باشىدىن كېچىگەي انىنگ مردانەيى بۇلغەي.

نوايى غمغە خوى ايلبدورور كىم، آفرىنىشده
فلك نىنگ جوفى دېك مىشكىل اگر غمخانەيى بۇلغەي.

وہ، نہچہ اول شوخ بېدادین مېن شيدا كۆرەى،
عشقيدىن يىغما چېكەى، حسنىدىن استىغنا كۆرەى.

كېچە اول در گرامى شوقيدە ھىجران تونى،
كۆز يېتوشگونچە سرشكىم سىلىدىن دريا كۆرەى.

نېچە اول رشك غزال چىننى اىستب دشت ارا،
ايت كېبى دېوانە كۆنگلومنى جھان پىما كۆرەى.

نېچە بىر كافر خيالى نىنگ سپاه ظلمىدىن
كشور جان ايچرە دىنىم نقدىغە يىغما كۆرەى.

نېچە زھد و عافيت ايچرە كۆروب تقوا اېلىن،
اۋزنى عشق آشوبىدىن عالم ارا رسوا كۆرەى.

نېچە كۆز قانى حبابىدىن بلىت دشتيدە
بىر يوزى گلگون غمىدىن لالە حمرا كۆرەى.

ساقيا، اول نوع غرق اېتكىل مېنى مى ايچرە كىم،
گر دم اورسم مى يوتەى، گر كۆز آچەى صھبا كۆرەى.

اېلدە چون يۇقتور وفا صحراغە قىلدىم عزم كىم،
خلق ايله كۆرگونچە كشور وحش ايله صحرا كۆرەى.

جان بىلە عزم اېتتىم اول قاتل سارى كىم، سعى اېتىب،
يا نوایی دېك قىلەى جاننى فداسى، يا كۆرەى.

ای قویاشقه کۆز قمشتورغان جمالینگ پرتوی،
سرو رعنا لیکده خوش رفتار قدینگ پیروی.

قاف تاغین گر پریلر مسکن اېتمیشلر نې تانگ،
قریلر دور نو جوانیم خجلتیدین منزوي.

اؤیله کیم مانی ایشیدین ضایع اؤلدی نقش چین،
اول بت چین صورتیدین بؤلدی نقش مانوي.

عشق ایلگی قوتی مېن خسته نی قیلیمیش زبون،
ای کؤنگول، نې چاره ایله ی مېن ضعیف و اول قوي.

بلبل ار گلبانگ اورر گل صورتیدین مېن خموش
کیم تکلم تحتیغه کیرمس ادا ی معنوي.

عشق سرین رندِ دِردی کش بیلور، یوق اهلِ درس،
اولچه اوراق اوزره ثبت اؤلمس نې بیلگه ی مولوي.

دېمنگیز بلبل نوایینی سمندردېک که، بار
نظمی ایچره شعله جامی و سوزِ خسروي.

ای حسنونگه ذراتِ جهان ایچره تجلا،
 محضر سنگه اشیا،
 سپن لطف بيله کون و مکان ایچیده مولا،
 عالم سنگه مولا.
 هر یان کهرم تېله صفت تا که یاشوندونگ
 کؤزدین پری ینگلیغ،
 مجنوندین اؤزین تا که نهان قيلمه دی لیا،
 اول بؤلمه دی شیدا.
 عریان بدنیم زخملی ایچره اېمس قان،
 یوز پاره کؤنگول دور.
 بو روزنه لر دین قیله دور هر بیر یی،
 حسنونگه تماشا.
 هر یان نظریم توشسه سپن آلمده توررسپن،
 کؤرمس ولی اغیار.
 روشن دورور اوشبو که، اېمس قابلِ اعما،
 نظاره بیضا.
 اول نادره دین کیم، لقبین حور دېمیشلر،
 حسنونگ ابرور احسن.
 اول منظره دین کیم، آتی دور جنتِ اعلا،
 کویونگ ابرور اعلا.
 زهد ایچیده تاپمه دی نوایی چو مقامی،
 اېمدی قیلور آهنگ
 کیم بؤلغه ی اول و باده و بیر طرفه مغنی،

مغ کلبه‌سی مأوا.
هر گوهری توفراغ اوزه بیر قطره سو ینگلیغ
توشکچ عدم اؤلغه‌ی.
گر قیلمه‌سه اشفاق ایتیان خسرو غازی
نظمی سری پروا.

www.ezgu.org

حلقه زلفونگده كۈنگلوم بۇلغالى غم محرمى،
 اول قرا قىغو بىلن سودا اوچون آرتر غمى،
 دېر سنگه دېوانه و شىدالىغىدىن هر دمې،
 اى ساچىنگ شىدا كۈنگوللر نىنگ سواد اعظمى،
 حلقه - حلقه روح نىنگ سىمىزلى دور هر خمې.

اى گل سوري جمالينگ دىتريدىن بىر ورق،
 سبزه و ريحان سېنىنگ خطىنگدىن اېلتورلر سبق،
 چىن زلفونگى آچىيان ايلگىنگ گه آلسىنگ ترق،
 سىبلونگى تاراغانده گل اوزه تانگ دور عرق،
 كىم بولوتلۇغ كېچە نىنگ البتە بۇلمىس شىنمى.

رشكىدىن هر دم يقين دور بغريم اېرىب آققەلى،
 يوزونگ گە مشاطه و كۈزگوسى مونداق ياققەلى،
 زلفونگ گە مشغول اېرور مشاطه زېور تاققەلى،
 مېن بىراقدىن جان بېرور مېن طاقتىم يۇق باققەلى،
 يوزى قىتق كۈزگو كىم، بۇلمىش جمالينگ همدمى.

آغزى نىنگ رمزىنى مشكل دور فراوان سقله ماق،
 كىم عدم بۇلسە بىلور اول راز پنهان سقله ماق.
 برچە دلبرلردىن اۇلور جاننى آسان سقله ماق،
 سېن پريوش حوردىن مشكل دورور جان سقله ماق
 كىم ملك حيران دور اول صورتقه نېتسون آدمى.

زلفى وصلين ايسته سم رخسارِ مهر افزونيدين،
يۇق عجب چون يىل كېلىشى بىلگورور نوروزيدين،
كۈزلريم اويى بوزولدى اشك سيل اندوزيدين،
مېن بو كۈز بيرلە اوياتليغمېن جمالينگ يوزيدين،
كىم كېلور هر لحظه و اول گوشه نينگ باردور نمى.

اطلسِ گردونغه يېتتى راستى عشاق اوني،
كىم قبا نېوچون قوچر نازك تنين وصلت توني،
بو عجب سر رشته دور كۈرگيل ارا يېرده موني،
اول بدن نينگ دولتيدين توغدى كۈنگلك نينگ كوني،
حسنِ طالع كۈر كيم، اول دور حالى ايچكى محرمى.

اي لېينگ عيسى دمي دېك خسته جانغه چاره رس،
وه، نېچه غمزهنگ نوايى قتلين اپتگه ي ملتمس،
اول مبارك كۈنگلونگه بۇلغه ي مىسر بو هوس،
لطفيني باشتين ينه تيرگوزسنگ اي عيسى نفس،
كىم يېتيدور، وه، انى اۋلتورگه لى هجران غمى.

آه کیم، ترکِ محبت قیلدی جانان عاقبت،
 بۆلدوم اوشبو غصه دین رسوای دوران عاقبت.
 قالمه دی مخفی غمیم اهل ایچره پنهان عاقبت،
 یاشورون دردیمنی ظاهر قیلدی افغان عاقبت،
 اسره غان سریمنی یایدی سیلِ مژگان عاقبت.

تا که چپکتی اؤق و یا قصدیمغه اول مژگان و قاش،
 ایله دی پیکانلری هر ساری بغیریمنی خراش،
 پرده صبر و سلامت یاییبان، ای بغری تاش،
 یاشوروب ابردیم بغیر چاکینی، وه کیم قیلدی فاش،
 هر طرف کؤزدین ترشح ایله گن قان عاقبت.

کۆپ یوگوردوم عشق یؤلیده مهنِ گمراه کیم،
 بیلگه سهن حالیمنی، لپکن بۆلمه دینگ آگاه کیم،
 عشق ارا اؤلگومدورور بیل اېمدی، ای دلخواه کیم،
 تیغ هجرینگدین نهان کؤکسوم شکافین، آه کیم،
 اېلگه روشن ایله دی چاکِ گریبان عاقبت.

تیر بارانِ غمینگ یاغدورغه لی کؤنگلومگه سهم،
 یوز تومن داغِ نهان قؤیمیش اېدی اول خوف و سهم،
 خلق انی فهم اېتمه سون دېب، بار اېدی کؤنگلومده وهم،
 وای کیم، کؤکسوم شکافیدین اولوسقه بۆلدی فهم،
 عشق اؤتی بغیریمده قؤیغان داغِ پنهان عاقبت.

اول پری کیم، تېلېلرگه عشقیدین مانند اېدیم،
زلفی زنجیریده مجنون دېک اسیر بند اېدیم،
جوریغه قانع بؤلوب وصلیغه حاجتمند اېدیم،
شوقیدین دم اورمه یین بېدادیغه خورسند اېدیم،
وه که، بؤلدوم هجریدین رسوای دوران عاقبت.

عارضی قاشیده گل یوز وجه ایله باردور کریه،
مینگ جهتدین نطقی آئنده اېرور بلبل سفیه،
کؤزی و زلفیغه اېرمس برگس و سنبل شبیه،
گر بو دور کافر کؤز و زئار زلفی، ای فقیه،
بؤلغو دېکمېن دیر ارا مست و پریشان عاقبت.

جاننی مجنون اول پری رخساره یادی ایله دی،
کؤزنی گریان عشق ظلمی می فسادی ایله دی،
تنی عریان، عقل و دانش خیر بادی ایله دی.
عشق کوییده جنونیمنی منادی ایله دی،
هجر تاشیدین منقش جسم عریان عاقبت.

باده ایچ کیم دور ایشیده اعتدالی کورمه دوک،
نو بهار حسن ارا صاحب جمالی کورمه دوک،
کیم خزانِ عمر دین انده زوالی کورمه دوک،
دهر بوستانی ارا سرکش نهالی کورمه دوک،
سایه ینگلیغ بؤلماغان پیر بیرله یکسان عاقبت.

شهلیغ اېتکندین نی حاصل فقر سرین بیلمه یین،
هیچ کیم ملک بقا سلطانی بؤلغان مو اېکین،

فانى محض اولمه يين سلطان ابوالغازى بېكىن،
اي نوايى، دولت باقى تيلرسېن وصليدىن،
آنى كسب اېتمك فنا بولمەي نې امكان عاقبت.

www.ezgu.org

عشق اۋتيدىن جىسىم زار ناتوانىم اۋرتەدىنگ،
 قىسى جىسىم زار كىم، روح و روانىم اۋرتەدىنگ،
 پرده عارضدىن آلىب، جان و جهانىم اۋرتەدىنگ،
 وه كه، اۋتلوغ چهره آچىب، خان و مانىم اۋرتەدىنگ.
 آتشىن لعلىنگدىن آيتىب نكتە جانىم اۋرتەدىنگ.

سېن چو تىغ كىن چېكىب صىرىم سپاھى قۇزغالىب،
 كۈنگلوم آلىب، عزم ايتىب، زار و حزين جىسىم قالىب،
 اېمدى كىم، كۈنگلوم آلىب، ھجران اۋتى ايچرە سالىب،
 دېمە، نې قىلدىم، نې قىلدىم ناتوان كۈنگلۈنگ آلىب،
 اۋرتەدىنگ، اى قاتل نامهربانىم اۋرتەدىنگ.

فرقت ايچرە يۇق كه جانىم كويدى يالغوز شوقيدىن،
 كىم كوير محزون كۈنگۈل ھم كېچە - كوندوز شوقيدىن،
 نېچە، اى گردون، دېدىم كىم، رحم كۈرگۈز شوقيدىن،
 اۋتدە قىل دېك تۇلغانىب، كويگندە اول يوز شوقيدىن،
 نېچە كىم تاب اوردى جىسىم ناتوانىم، اۋرتەدىنگ.

اۋت توتشمىش دھر ارا ھر يان اېمستور لالە زار،
 دود اېرور بوستان ايچىندە سنبىل اېرمىس مشكبار،
 تاغ ارا ياقوتدىن اخگرلر اۋلمىش آشكار،
 كۈكتە ظاهر دور شفقدىن شعلە، كوكبىدىن شرار،
 كىم آنى، اى شعلەلىق آه و فغانىم اۋرتەدىنگ.

آتلىنىپ چىققندە كىم عالمى قىلغەيسېن خراب،
عارضىنىڭ خورشىدىن سالدېنىڭ بىرى عالمغە تاب،
تىغ تارتىپ چۈن كۈنگۈل صىد اېتكەلى قىلدېنىڭ شتاب،
بىسىم اېتكىچ صىدىنى انداق كە، قىلغەيلەر كىباب،
زخم اېتىپ كۈنگۈلۈمنى چۈن كىم آقتى قانىم اۋرتەدېنىڭ.

اول قوياش تا كىم كۈرۈندى دىدە گىرانيىمە،
قالمەدى اۋزىلۇك خىيالى خاطر وىرانيىمە،
ھەر طرفدىن توشتى آفت برقى خان و مانىمە،
اورغەلى، اى عشقِ ظالم، برقِ آفت جانيىمە،
ھەر نې اۋزىلۇكتىن كە بار اېردى گمانىم اۋرتەدېنىڭ.

تا بېلى نىڭ، اى كۈنگۈل، عزمِ وصالى ايلەدېنىڭ
تا كە آغزى نۇقطةسى نىڭ قىل و قالى ايلەدېنىڭ،
عشق اۋتىدە بىزنى بىر اخگر مىثالى ايلەدېنىڭ،
اى نوايى، تا بېل و آغزى خىيالى ايلەدېنىڭ،
بار و يۇق، يعنى كە پىدا و نھانىم اۋرتەدېنىڭ.

صبح دم مخمورلوقتین تارتیبان دردِ سرې،
عزم دیر ایتتیم که، ایچگه یمین صبحی ساغرې،
چیقتی ساغر تۆلدوروب کافر وش مه پیکرې،
نقد دین آلیب ایچیمگه سالدی میدین آذرې،
وه که، دینیم کشورین تاراج قیلدی کافرې،
کفر اېلیگه حامی و دین اھلیغه یغماگرې.

دېمه کیم، نېوچون حیاتینگدین سنگه یوق حاصلې،
عشقدین آلینگده هر دم مشکل اوزره مشکلی،
چون بیلورسېن نېوچون آیلېسېن اؤزونگنی غافلې،
بؤیله بؤلغه کیمگه یاری بؤلسه سېن دېک قاتلې،
چابکې، رعنا قدې، نوشین لېی، خارا دلې،
مهوشې، نسرین عذارې، گلرخې، سیمین برې.

دؤستلر، گر خلق ارا یوق مېن کبېی دېوانه یی،
ایله منگ کؤپ عیب کیم، یانیمده دور میخانیه یی،
انده شوخې کیم توتر هر دم تۆله پیمانیه یی،
قیسی شوخې باده نوشې کؤزلری مستانه یی،
جان بېرورده لعلیدین عیسی صفت جانانه یی،
کؤنگول آلوده یوزیدین یوسف آیین دلبرې.

اول قویاش عشقیده کیم کؤنگلومگه یوقتور طاقتې،
شام زلفیدین اگر جانیمغه یېتسه محنتې،
عارضی مهریغه قیلسم میل اېرمس حیرتې،

کیم ابرور هر کیمسه کیم، نظاره قیلسه ساعتی،
زلفی کۆزلرنی قرا قیلماقده شام فرقتی،
شام فرقت دفعیغه رخساری مهر انوری.

میل قیلمان باغ ارا گر بۆلسه گل یا سنبلې،
یا که گل دېک یوزده سنبل دېک آچیلغان کاکلی،
اول که، اندین هر دم ایلرمن فغان و غلغلی،
گلعداری دور ولې، صوتی نیچوک کیم بلبلې،
هم گلستان بزمی ایچره سرو قامتلیغ گلی،
هم شبستان بزمی احیاسیده شمع انوری.

رحم قیلمس ناتوان کۆنگلوم انینگ زاری بۆلوب،
چهره آچمس کۆزلریم نینگ اشکی گلناری بۆلوب،
التفات ایتمس تنیم هجر ایچره بیماری بۆلوب،
وصلیدین مرهم بیتورمس بغریم افکاری بۆلوب،
الله-الله، بۆیله آفت نینگ گرفتاری بۆلوب،
نیله گهی بیر مېن کبې زار ضعیف ایتري.

کوه دردینگ ضعفلیق تن بیرله چېکتیم مدتی،
کیم وصال امیدیدین کۆنگلومده ابردی قوتی،
اېمدی رحم اېتکیل که، یوزلنمیش عجایب حالتی،
نې کۆنگولده قوتی قالمیش، نې تنده صحتی،
نې قرار و صبر و نې تاب و توان، نې طاقتی،
نې کۆنگول، نې جان و نې روح و روان، نې پیکری.

اول زمان کیم، بۆلدوم اول آی مهریغه مایل بو نوع،

بیلمه دیم کیم، بؤلگوسیدور جانیمه قاتل بو نوع،
کېلگوسیدور عشقیده آیمغه یوز مشکل بو نوع،
ایله گومدور هجریدین میخانه نی منزل بو نوع،
ساقیا، دلداریم اول ینگلیغ مېن بېدل بو نوع،
رحم اېتیب، ایلب منگه توتقیل لبالب ساغری.

آشنالغ ترک اېتیب، چون یار اېتر بېگانه لیغ،
مېن قیله آلمان سلامت قیدیده فرزانه لیغ،
ایله یین دیر فنا اهلی بیله همخانه لیغ،
کیم ملامت جامیدین حاصل اېته ی مستانه لیغ،
تا بؤلوب بېخود نوایی دېک قیله ی دیوانه لیغ،
کیم ترحم قیلمه سه، قیلغه ی تماشا اول پری.

www.ezgu.org

ترجیع بند

كېتور ساقى، اول مى كه، صېح الست
انىنگ نشئه سىدين كۈنگول اېردى مست.

مىي كيم قىلور، قۋيسه لر جام ارا،
اۋزى مست و كىفیتی مى پرست.

اېمىش سرگذشتي كه، بىر كۈن منگه
نېچه مى پرست اۋلدیلر هم نشست.

مى الماققه پير مغان جذبه سى
مېنى چېكتى انداق كه، ماهىنى شصت.

قىليب خرقه مى رهنى و ظرفى نىنگ
اېتىب آغزىنى موم ايله سنگ بست.

كېلور اېردىم اېگنيمده مىلىك سبو،
بۇلوب تۇقوز افلاك آليمده پست.

كه آگاه اۋلوب تۇش. تۇشىمدىن قىب
منگه تاپتىلر احتساب اهلى دست.

شكستىم مېنىنگ آنچه اېرمىس اېدى،
كه مى ظرفى تاپتى اراده شكست.

چو سىندى سبو، چاره يى تاپمه دىم،

مہنِ مفلس و اور و گریانِ مست.

خرابات ارا کیردیم آشفته حال،
می ایسترگہ ایلگیمده سینغان سفال.

www.ezgu.org

كېتور، ساقيا، مژده يى جامدين،
كه پژمرده بولميشمېن انجامدين.

بو گلشن گليگه چو يوقتور وفا،
نې پرهېز اېته ي جام گلفامدين؟

چو يوق شام هجران خماريغه صبح،
ايچيب انگله مه ي صبحنى شامدين.

خلاص ايله ي اوزنى مى و نقل نينگ
سو و دانه سى بيرله بو دامدين.

بۇله ي دير پيريغه انداق مريد،
كه ياد اېتمه يين شيخ الاسلامدين.

كيره ي دير ارا اويله مجنون و مست
كه چيقسون فغان اهل ايامدين.

خراباتي اولماغليغيم، زاهدا،
سوال اېتمه مېن زار بدنامدين.

گرو قيلغه لى ميگه چون قالمه دى
نې تسبيح و نې خرقه، ناكامدين.

خرابات ارا كيرديم آشفته حال،
مى ايسترگه ايلگيمده سينغان سفال.

سفال ایچره بیر جرعه لایی منگه،
اېرور جام گیتی نمایی منگه.

کېترمکه خودبیلغیم رنجینی،
قنی باده ینگلیغ دوایی منگه.

چو مېن دیر پیری وفاسیده مېن،
فلکدین یېتیشمس جفایی منگه.

فلکدین جفا ییتسه، ای مغیچه،
نې غم سېندین اولسه وفایی منگه.

طریقت سلوکی نی کسب اېتکه لی،
هم اول کون که بؤلدی هوایی منگه.

بورون زهد و تقوانی ایلب شعار،
دېدیم کیم، یېتیشگهی صفایی منگه.

باریب خانقه ایچره قیلدیم مقام،
بو معنی خود اولدی بلایی منگه.

باقیب خلوت و ذکر و سجاده نی،
ظهور اېتتی هر دم ریایی منگه.

بولردین اؤزومنی خلاص ایلهدیم،
که تا حاصل اولغهی فنایی منگه.

خرابات ارا کیردیم آشفته حال،

می ایسترگه ایلگیمده سینغان سفال.

www.ezgu.org

تيلرمېن بو دیر ايچره کاشانه یی،
که بؤلغه ی جواریده خمخانه یی.

بو خمخانه صحنیده گی میفروش
سَخا شېوه لیک پیرِ فرزانه یی.

انینگ قرّة العینی کُپ آلیده
ایلیگینده پیمانه جانانه یی.

سمن برلر ايچره پری چهره یی،
پری چهره لر ايچره دېوانه یی.

منگه گاهی اول بېر سه می بیرله جان،
بو قیلسه گهی قتلِ مستانه یی.

اېرور تېلبه لیکدین ایشیم تون و کون
خیال ایله مک اؤیله افسانه یی.

نېچه مفلس ایستب دېدیم می اوچون
قیلالی ایچین آرا دنگانه یی.

اېشیتیم که، قیلیمیش ینه پیرِ دیر
خرابات اهلّیغه میخانه یی.

بوگون آچیب اول میکده اېشیگین،
بېرور هر گدا یېتسه پیمانه یی.

خرابات ارا کیردیم آشفته حال،

می ایسترگه ایلگیمده سینغان سفال.

www.ezgu.org

ينه بۆلميشم عاشق و زار هم،
خراباتي و رند و خمار هم.

مباهات اپتیب دُردکشلیک بيله،
قیلیب تقوا و زهددین عار هم.

صراحینی بت ایله بان آغزیده،
قیلیدین اپشیب بېلگه زار هم.

بۆلوب میغه سجاده و خرقة رهن،
باریب نُقل اوچون کفش و دستار هم.

فنا دیری ایچره قلندر صفت
کیزیب بلکه دېوانه کردار هم.

پری چهره اطفال نینگ تاشیدین
بۆلوب سر به سر جسمیم افکار هم.

مېنی عشقدین اؤرتنه گن مغیچه
که دېوانه وش دور، پریوار هم.

چو بیلدیم که، بو نوع بیرله ابرور
خرابات کوییده میخوار هم.

ابرور چونکه یکرنگلیک شرط عشق،
بو تقریب بیرله مېن زار هم.

خرابات ارا کیردیم آشفته حال،

می ایسترگه ایلگیمده سینغان سفال.

www.ezgu.org

قنى ساقى گلەلدارىم مېنىڭ
كە جان قەلدى اېتمىش خمارىم مېنىڭ.

فراق ايچرە كۆپ محنت و درد و رنج،
چېكىپتور تىن خاكسارىم مېنىڭ.

خمار اېمگى دېك ولى كۆرمەمىش
تىن غمكش و جان زارىم مېنىڭ.

بو خىل بلا دفعىغە اولى اول،
كە مىخانه بۇلغەي حصارىم مېنىڭ.

كۆپ و آزدين توتسە مى پىر دىر،
فداسى انىڭ يۇق و بارىم مېنىڭ.

يېتورسە قدم باشىمە مغىچە،
اېرور جوهر جان نثارىم مېنىڭ.

خرابات ارا كىرگىم، اى رفيق،
دېيىن، بۇل دېمى رازدارىم مېنىڭ.

كېچە خانقە ايچرە سرمست اېدىم،
بوگون ميسيز ايتتى قارارىم مېنىڭ.

خمار ايلب اول نوع آشفته كىم،
ايلگىدىن بارىب اختيارىم مېنىڭ.

خرابات ارا كىردىم آشفته حال،

می ایسترگه ایلگیمده سینغان سفال.

www.ezgu.org

مېنى مى بس آشفته حال ايله دى،
بو وادیده مجنون مثال ايله دى.

باشیمنى گپ اطرافیده میفروش
اوزوم جسمی دېک پایمال ايله دى.

چاگیر کثرتی می بطی دېک منگه
خرد بلبیلین گنگ و لال ايله دى.

سبوکشلیگیم عین ادبار دین
قدیمنى یوک آستیده «دال» ايله دى.

می لعل آلتون قزح شکلی دېک،
یوزوم سریغ، اشکیمنى آل ايله دى.

قدیمدین فلک عافیت خرقة سین
چېکیب رهن جام زلال ايله دى.

سپهر اطلسی دیر کویی ارا
مېنینگ کسوتیم اېسکی شال ايله دى.

می ایسترده ادبار و آشفته لیغ
منگه جام سینغان سفال ايله دى.

خرابات پیری چو بیر جام اوچون
مېنى مونداق آشفته حال ايله دى.

خرابات ارا کیردیم آشفته حال،

می ایسترغه ایلگیمده سینغان سفال.

www.ezgu.org

ينه دُرد كشمېن مباحات اوچون،
بېريپ جان هواي خرابات اوچون.

كېتور، ساقيا، باده آغزيمغه قوي
دېديم كيم، اۋلوبمېن بو مرآت اوچون.

نې مرآت، بلكيم قوياشې كه، فيض
انگه عام اېرور برچه ذرآت اوچون.

منگه زاهد اېتې بسې سرزېش
مې ايچمك كه صرف اۋلغان اوقات اوچون.

دېديم: يخشيراك باده اول زهددين،
كه قيلگه ي كيشي شهرت و آت اوچون.

منگه باده دين بۋلدى نفى وجود،
سنگه زهد انى قيلماق اثبات اوچون.

بۋلوب تند مسجد سارى قيلديم عزم،
مېنى قرغه يين دېب مناجات اوچون.

مناجات اېتېب كيردى خلوت ارا
يسلغان ريايى كرامات اوچون.

كرامات مېن قيلديم اول لحظه كيم،
ريا بيميدىن دفع آفات اوچون.

خرابات ارا كيرديم آشفته حال،

می ایسترغه ایلگیمده سینغان سفال.

www.ezgu.org

يئە باشلەمىش بادە ايچمەك حېيىب،
مىنگە ايچمەي اۋلغەي مو صبر و شكيىب.

ايچرمين ولى قان، نېدىن كيم ايچر
حېيىم بىلە بادە هر دم رقيب.

نصيبى رقيبىم نىنگ ار مى بۇلوب،
نصيبىم مېنىنگ بۇلسە قان يا نصيب!

نې ظلمې كە، گلشندە گل محرمى
بۇلوب زاغ و محروم اېرور عندليب.

نې تانگ باغله ماق، كافر عشق اۋلوب،
كىشى بېلگە زئار و آسماق صليب.

ياقم چاك اېتىب كۆكسومە تاش اوروب
ساليب رستخيز اېل ارا مېن غريب.

بولر نفع اوچون قيلمەدى كۆنگلومە،
لبالب قدح بيرلە بېردىم فريب.

چو بيلدىم كە، بېخودلوغوم دور علاج،
خرابات يۇلیدە بۇلدوم نشيب.

نېچوك كيم، يېتىپ رستمې كويىغە
كىرر اېردى سرمست محمود حېيىب.

خرابات ارا كىردىم آشفته حال.

می ایسترگه ایلگیمده سینغان سفال.

www.ezgu.org

نېچوک می بيله بؤلمه سون الفتيم،
که جان قصدی آيلر غم و محنتيم.

نظر ايله بو کارگه وضعيغه،
که آرتر تماشاسيده حيرتيم.

قوياش يۇق که، بير ذره ماهيتين
تاپه آلمه دی سعی ايله فکرتيم.

نې کېلمک عيان بۇلدى، نې کېتمگيم
نې مبدأ يقين بۇلدى، نې رجعتيم.

نې کسب علوم اېتتى حل مشکليم،
نې توتتى ايليگ تقوا و طاعتيم.

تاپه ی دېب خبر اوشبو مقصوددين،
توتشتى بسې قوم ايله صحبتيم.

نې قيلدى بو درديم علاجين حکيم،
نې شيخ ايله دی دفع بو علتيم.

نې قيلماققه بير امردين حاصلیم،
نې چېکمک که بو فکردين جرأتيم.

مېنينگ باشيمه بس قاتيق توستى ايش،
چو طاق اۇلدى بو درد ايله طاقتيم.

خرابات ارا کيرديم آشفته حال،

می ایسترگه ایلگیمده سینغان سفال.

www.ezgu.org

مثنوی

ثنا حَقَقَه کیم، کاشفِ حال ابرور،
خرد مشکلاتیغہ حلال ابرور.

علیمی کیم یوقتور بدایت انگہ،
عظیمی کہ یوقتور نہایت انگہ؛

حذر ایچرہ بیچارہلر یاوری،
سفر ایچرہ آوارہلر رھبری.

نہ سالک کہ کیم دشت اہتیب جلوہ گاہ،
توکلنی ایلب انگہ زادِ راہ.

مسافرنی یولدین کبچہ گم قیلیب،
یانیغہ انینگ قومنی قاقم قیلیب؛

انی کیم قیلیب عشق دین یارہ لیغ،
نصیب آیلہ بان انگہ آوارہ لیغ؛

بیراوگہ نہچہ غربت اظہار اہتیب،
چو بیر بیردہ کؤپ تورغوزوب خوار اہتیب؛

بیراونی کیم ایلب بیر اہل ایچرہ خوار،
انگہ چارہ آیلب اول اہل دین فرار؛

سفرنی تموغ دین نشان آیلہ بان،
تموغ رنجین اندین عیان آیلہ بان؛

كۈنگۈلسىزگە مشفق، كىشىسىزگە يار،
امىدى يۇق ابل اندىن امىدوار.

انىنگ حمىدىدىن سۈنگرە يوز مىنگ درود،
برى فرخ آيىن همايون وروود.

نبى روضهسىغە عليه السلام،
هم آل و هم اصحابىغە بردوام.

ادا بۇلدى چون حمد و نعت و ثنا،
بو آوارەدىن يوز تومن مىنگ دعا.

انگە كىم اپرور فضل اوجىدە مهر،
نې مهرې كە بىر ذرە انگە سپهر.

صفا صبى نىنگ مهر فرخندەسى،
فنا شامى نىنگ شمع رخشندهسى.

كرم بارگاهىدە مسند نشىن،
عدم خانقاهىدە خلوت گزىن.

تىكىب خرقلر اپگنىگە اهل راز،
انىنگ قاپتى وصلهسىدىن طراز.

تۈنى چرخ و اندە اۋزى بىر جهان،
جهاننى قىلىب بىر تۈن ايچرە نهان.

اۋتوك اولتانگى تخته نعلين انگە،

بۆلۈب ھەر قەدەم ئۆزىنى كۆنىنىڭ.

فلەككەن سىپاھى فەنا ئاشۇرۇپ،
سىپاھىلىق ئىچىرە ئۆزىنى ياشۇرۇپ.

جەمال ئىچىرە تەنگە باشى ناھىدە دېگەن،
كەمال ئىچىرە توشۇش ۋەقتى خورشىد دېگەن.

ۋەفا ئىگە پېشە، سەخا ئىگە فەن،
ۋەفا ۋە سەخا كەلىنى سەيدە ھەسەن.

زەھى رۇھەدەن خۇلقۇنگە ئارتۇق بېسىپ،
كەلىپ باغ قەدرىنگە تەبىئى خەسەپ.

چەسەن سەسەن بۈگۈن ئەلەم ئىلەدە فەرد،
كە ھالەن دە ئىلغەي سەنگە ئىلە درد.

مەنگە كەم ۋەدە ئىلگە خەسەندەمەن،
جەنابىلگە شاگەرد ۋە فەرزەندەمەن.

غەمەي يەتتە چەرخ جەفا پېشەدەن،
ھەم ئۇل ئىجەم خەرج ئىدەشەدەن،

كە بۇلماق ۋەتەن ئىچىرە دىشۋار ئىدە،
كۈنگۈلگە جەلا دەق ئازار ئىدە.

سەفر توشۇش ئىلەمگە بېي ئىختىيار،
قەضا ئىرىدە ئىلگە نەي ئىختىيار؟!

بيلورمېن سېنى ھم سڦردىن قضا،
اگر قىترورغە قىلىپ اقتضا.

قىلىپ عود، ميل وطن ايله سنگ،
ايچىپ باده عزم چمن ايله سنگ.

اۋز اېلگىنگ گە جام مى نابنى
آلىپ، ايستە سنگ بىر-بىر احبابنى.

الرنى چو مى بىرلە شاد ايله گونگ،
مېنى داغى، البتە، ياد ايله گونگ.

بو عزمىمنى شايد كە تفتيش اېتىپ،
فراقىم ضميرىنگە تشويش اېتىپ،

مېنى يۇقلە بان بارچە احباب ارا،
تېلب تاپمە يىن خيل اصحاب ارا،

دېگەيسېن كيم، اول زار آواره وش
كە ھجران مېيدىن بۇلوب جرە كەش،

نې قىلدى اېكىن چرخ نابختيار
كە سرگشتە ليك ايله دى اختيار؟

خيالىغە حادث نې بۇلدى اېكىن؟
بو عزمىغە باعث نې بۇلدى اېكىن؟

چو حالیمدین احباب آگاه اېمس،
دېگه یلر حدیثی که دلخواه اېمس.

عیان بۇلغەی آلینگده هنگامه یی،
بیتیمک منگه فرض اېدی نامه یی،

سنگه حالتیمنی عیان ایله مک،
بو عزمیم وجوهین بیان ایله مک.

منگه نېچه نوع اۋلدى بېچاره لیغ،
که آلیمغه توشتی بو آواره لیغ.

بیر اول کیم، چو سۆزدین دور انسان شریف،
چو حیوانغه سۆز یۇقتور اول دور کثیف.

کۈنگول دُر جی ایچره گهر سۆز دورور،
بشر گلشنیده ثمر سۆز دورور.

اېرور سۆز فلک جسمی نینگ جانی هم،
بو ظلمات نینگ آب حیوانی هم،

اگر جان اېمس، پس نېدور کیم، مسیح
اۋلک تیرگوزور، دېب کلام فصیح؟

اگر آب حیوان اېمس پس نېچوک،
تاير جان زلالیدین آنینگ اۋلک.

نې بۇلغەی انینگ وصفیده اېل سۆزی،

که هر نې که دېرلر اېرور چون اؤزی.

بو سؤز کافرینشدین اشرف دورور،

انینگ داغی موزونی الطف دورور.

جواهر نیچه خوب و دلکش دورور،

ولې نظم سلکی ارا خوش دورور.

سؤز ایچره که، یالغان اېرور ناپسند،

چو نظم اېتیلر، قیلدی دانا پسند.

مېن اول مېن که، تا تورک بېدادی دور،

بو تیل بیرله تا نظم بنیادی دور،

فلک کؤرمه دی مېن کبې نادری،

نظامی کبې نظم ارا قادری.

نې نظمې دېر اېرسم مېن دردناک،

که هر حرفی بؤلغه ی انینگ در پاک.

یېتر تېنگریدین آنچه قوت منگه،

که بؤلسم بیتیریگه فرصت منگه.

بو میدانده فردوسی اول گرد اېرور،

که گر کپلسه رستم جوابین بېرور.

رقم قیلدی فرخنده شهنامه یی،

که سیندی جوابیده هر خامه یی.

مسلّم دورور ظاهرّاً بو ایشی،
که معرضغه کپلمیدورور هر کیشی.

دېدی اؤز تیلی بیرله اول کان گنج،
«که سی سال بردم به شهنامه رنج».

آنی دېرگه بؤلسه قچان رغبتیم،
اېرور آنچه حق لطیفیدین قوتیم.
که هر نېچه نطق اؤلسه کاهلسرای،
بیتيگه یمېن اؤتوز ییلین اؤتوز آی.

اگر خاصه معناگر ایهام اېرور،
آنینگ کونده یوز بیتى حلوام اېرور.

ولی آیت دېب، کیم مېنگه توتتى یوز،
که مېن یوز اوچون دېمه دیم ایکی یوز؟

نې یوز، نې ایکی یوز که بو کلک تېز،
عطارد بیله قیلسه ظاهر ستېز،

انینگ سیری بیر دور آخر بؤله،
فلکنی لطایفدین اېتگهی تؤله.

بېرو بؤلسه بیر ایشده بو نوع فرد،
ولی کؤرمه سه بهره جز رنج و درد.

بؤلوب قاف وجهی معاشیغه کان،
مریسی عنقاغه هم آشیان،

اوی ناتوان کونگلی ینگلیغ بوزوق،
بو اوی ایچره اندوه و غم بیر آزوق،

می بزمی برچه یوره ک قانیدین،
سرودی حزین کونگلی افغانیدین،

دپسه کیم، تاپهی اېسکی پولدین فراغ،
تاپیلیمهی جز اعضاسیده ینگی داغ.

معیشت اوچون آرزو قیلسه سیم،
انی تاپقی، اما اېسرده نسیم،

کیشی جنسی ملکیده مردم گیا
درم صنفی اوضاعیده کیمیا.

کیشی بؤلسه انداغ که اؤتتی مقال،
بو ینگلیغ کیشیگه بو نوع اؤلسه حال،

نېچوک میل آواره لیغ اېتمه گهی،
باشین آلیان بیر طرف کېتمه گی؟!

ینه بیر بو کیم، ظاهر اؤلمیش منگا
که چیقمیش خراسان ایلیدین وفا.

وفا عزم ایلرده بؤلیمیش مگر

سَخا و مروّت انگه هم سفر.

بو اوچ فعل چيققاچ ارادين تمام،
ينه بؤلُميش اوچ فعل قايم مقام.

وفا يپريده ظاهر اؤلُميش نفاق،
سَخا اورنیده بخل توتُميش وثاق.

مروّتقه بؤلُميش حسد جايگير،
زهى خوش ابل و مُلکت دليدير.

نې ملک و نې ابل ايمدی تحریر ايتتهی،
الر حالتين وصف بير-بير ايتتهی.

دېمه ملک کيم، وحشت آباد زشت،
تموغ بيلگوروب غايب اؤلغچ بهشت.

تماشاسینی کيم که بنياد ايتيب،
سپاهان و ری ملکيدین ياد ايتيب.

حصاری عنا و تعب محبسی،
سیه چالدين تیره روراق بسی.

عماراتیده گنجدين يۇق اثر،
خزانہ خرابه بؤلوب سر به سر.

مساجدده طاعت بيله نور يۇق،
خوانيقده نان رسمی دستور يۇق.

هم اوقافنى صدر املاک اېتىب،
ولې كۆپرگىن مى اوچون تاك اېتىب،

هم اېل منزلىن شه كتك دېك بوزوب،
تاووغ اۋرنىگه جغد اۋلتورغوزوب.

مدارسده علم و صلاح و يقين
انىنگ دېك كه، دېر ايچره اسلام و دين.

كۈنگۈل جمع اهل مناجات ارا،
انىنگ دېك كه تقوا خرابات ارا.

اېلىده كيشىلىكدين آثار يۇق،
شرارتدين اۋزگه پديدار يۇق.

نې اېل، نې كيشى، بلكه شيطان و دېو،
كېلىپ برچه غه دأب بېداد و رېو.

بۇلوب لامكان سطحيدىن خوانلرى،
عدم ملكى بوغداييدىن نانلرى.

قرا پول اوچون ايله بان قتل فن،
اۋلوكتين طمع ايلب اما كفن.

نې ويرانده اېسكى طنابى بىلىپ،
يىلان ساغىنىب گنج دعوا قىلىپ.

قىزىل آلتون ايستب قرا تاشتىن،
فلک گويى بير دانه خشخاشتىن

توتولسه بيرو اؤغرى دور دېب کوچون
توتوبان ايليگ، لېک کېسمک اوچون.

اؤلوم كېلسه بير زار بېدل سىرى،
مدد ايله بان لېک قاتل سىرى.

هرات اهلين اېلتىب حوادث يېلى،
اېسىب دى يېلى دېک سمرقند اېلى.

بو ملك اهلى اول اېلگه زار و اسير،
بؤلوب نېب و يغما قىلىل و كشير.

منگه بو اېل ايچره نې بير همدمې،
كه بير دم ايكاولان دېشسك غمې،

نې شاهې كه تاپسه ايشيم اختلال،
مديحيگه كؤرگوزگه مېن اشتغال.

نې بير اهل دولتىن آنچه اميد،
كه اندين نوا تاپسه بير نا اميد.

نې وجه معاشې مقرر منگه،
كه بؤلغه ي فراغى مىسر منگه.

نې بير حجره كيم، كام تاپقى كؤنگول،

دمې انده آرام تاپقى كۈنگول.

نې بىر شوخ وىلىغە اول ماىە دست،
كە عزمىم اياغىغە بېرگەى شكست.

نې يارې كە رنجىمنى قىلغەى قبول،
نې زارې كە ھجرىمدىن اۋلغەى ملول.

يېتىشسە اۋلوم رنج بېمارلىغ،
سو بېرگونچە قىلمەى بېرو يارلىغ.

سو بېرمك نې كىم، ظاهر ايلر غلو،
آلورغە اگر بۇلسە جانىمندە سو.

سېن اېردىنگ كە، ھر ايشدە يارىم اېدىنگ،
نې غم كىم، يېتر، غمگسارىم اېدىنگ.

سېنى ھم سېھر مخالف مذاق،
اۋكوش رېو ايلە سالدى مېندىن يىراق.

بېروگە كە يوز قۇيسە مونچە بلا،
نې بۇلغەى آنىنگ چارەسى جز جلا؟!

ضرورت كە يسب سفر برگىنى،
توشوب يۇلغە قىلغەى وطن تركىنى.

اوچونچ اول كە، چون خالق ذوالجلال،
كە ھم لم يزل كېلدى، ھم لايزال.

چو لوح وجود اوزره تارتیب قلم،
ایکی کون طرحیغه اوردی رقم.

بورون چپکتی مونداغ سپهر رفیع،
ینه یایدی بو نوع ارض وسیع.

نې کیم جلوه گر قیلدی افلاک ارا،
نې قیلدی عیان عرصه خاک ارا.

دېمه ی یېتی آبا و تورت امهات،
که خلقت تونی کییدی چون کائنات.

اېمس اپردی مقصود جز آدمی،
که حق سرّی نینگ بؤلغه ی اول محرمی.

بریدین غرض گرچه انسان ابدی،
انگه داغی مقصود عرفان ابدی.

بو سؤز صدقیغه داغی بی طعن و طنز،
دلالت قیلور آیت «کُنْتُ کُنْز».

خیالیمده انداغ مُصَوَّر بؤلور،
که اول ایکی ایشدین مُیَسَّر بؤلور.

بیری بو که، بیر جذبه حقدین یېتیب،
کؤنگولنی یقین جامیدین مست اېتیب،

حقيقت سارى توركتاز ايله گهى،
جهان شغلیدین بې نیاز ايله گهى.

انگه قالمه غای هم اؤزیدین خبر،
اؤزیدین نې کیم، اؤزلوکیدین اثر.

بؤلوب رفع امکان موجودلوغ،
تاپیب حق وجودیده نابودلوغ.

چو حق تاپتی بو نسبتیدین آئینگ،
که مقصود اېدی خلقتیدین آئینگ.

مشرف قیلیب آنی اؤز رازیدین،
ینه هم اؤز انجام و آغازیدین.

بووردی که، اېل بؤلغه لی بهره ور،
سلوک و مراتبغه قیلغه ی گذر.

ینه بیر بو دور کیم، گداگر ملوک
طلب یؤلیده قیلغه ی آنچه سلوک.

بورون مرشد کامل ایسته ی یوروب،
انی تاپقچ اؤزین انگه تاپشوروب.

سلوک امریده اورمه یین بېش و کم،
انینگ امریدین آیرو دم یا قدم،

فنا دشتیده سیری بؤلغچ تمام،

حق اندین سۋنگ اېتکەى عطا اول مقام.

کە بېر جذب ايله آشنا بۇلغەى اول،
مقيم حريم صفا بۇلغەى اول.

الر کيم نشان مسالک دېبان،
بورونغيى مجذوب سالک دېبان.

بو بېرنينگ کە هر امرى مرغوب دور،
آتین سالکې دېب کە، مجذوب دور.
چو اولغى ايش بۇلمەدى دستگير،
ايکينچيسيدین خوب اېمستور گزير.

مېنى کيم بو سودا نزار ايلهدى،
هوس ايلگيده بېقرار ايلهدى.

نې امکان کە تايقى قرار و سکون،
بيروکيم بو فکر اېتتى آنى زبون.

اوررمېن قدم تا کە بارغونچه گام،
کە بۇلغەى ميسر منگە اوشبو کام.

اگر بۇلسە بو يۇلده عمروم تلف،
چو بو يۇلده دور اول هم اېرور شرف.

و گر بۇلسم اوز کاميمه بهرەمند،
زھى ملک جاويد و بخت بلند.

خوشا اول که عالمده گر چپکتی رنج،
ینه عالم اسبابیغه تاپتی گنج.

خوش اول کیم، اگر چپکسه مینگ خارِ درد،
سؤنگهی توشسه ایلگیگه بیر تازه ورد.

نې فرُخ دور اول هجر آوارهسی
که وصل اپتگهی آخر انینگ چارهسی.

اېمس بؤلسه دوران مرادی بیله،
فنا بؤلسه مطلوب یادی بیله.

جنابینگدین اول دور منگه مُلتمَس،
که مېن بېنوانی ساغینگن نفس.

سؤزوم آیت فانلیغ آهی بیله،
مدد آيله همت سپاهی بیله.

بو اپردی سؤزوم کیم دېدیم مېن غریب،
ینه تېنگری دیدار قیلغهی نصیب!

قطعه‌لر

«غرایب الصغر» مقطعاتی نینگ سرسخنلری

۱

تېنگری ذاتی حقیقتیده کیم، خرد مبھوت و نادن دور و اهلِ خرد فرتوت و حیران

حق ذاتیغه بیروکه، خرد بیرله فکر اېتر،
آتین اېل ایچره عاقل و فرزانه ایله بان.
مقدارینی تېنگسیز سویینی ایستر انگله ماق،
لېکن حباب جامینی پیمانہ ایله بان.

۲

رسولِ اعظم شأنیده کیم قویاشدین عالم آرایراق دور و نفی قیلغان خفاشدین تیره رایراق

محمد عربی شأنی اندین اعظم اېرور،
که نقص بؤلغه‌ی اولوس بؤلسه نفیغه قایل،
قویاش اشعه‌سیغه لمعه اندین آرتوق اېرور
که ذره کثرتی بؤلغه‌ی ضیاسیغه حایل.

۳

فنا شربتیی بابیده کیم، طعمی زهرِ قاتل دور و بقای ابد نوشی اول زهردین حاصل

فانی مطلق اولمه‌یین سالک،
انگه یؤقتور امیدِ مقصدِ کل،

قرا توفراقغه سینگمه گن قطره،
اندين امكانى يۇق آچيلماق گل.

۴

فنا مقامیغه ییتگن سالک و صفیده کیم، مالدين انگه زیان یۇقتور و جاهدين نقصان

سالک آزادهنى کؤرسنگ غنى قیلغەى دېبان
مال انینگ منع سلوکی قیلمه غیل انکار انگه.
کېمه تیر مال ارا بؤلْمیش مقید دېمه گیل،
کؤرکه، آنچه مال اؤلور مو مانع رفتار انگه.

۵

اؤزلوکدين قوتولماق صعوبتیده و انانیت ترکی شدتیده

ای کؤنگول، تن تخته سین بو قعرى یۇق گردابدین
ایسته سنگ ساحلغه چپکمک، بیل که، بو آسان اېمس،
پیر و استعداد و توفیق اؤلْمه سه بؤلْمس بو ایش،
کیم دورور کیم، بغری بو حسرتدين آنینگ قان اېمس.

۶

عقل نینگ برچه طریقیده معاشنی دشوار بیلْمگ و جنونغه قرار بېرمک

وجه معاش اوچون کیشی کیم دېسه فکر اېتهى،
قسمت رضاسیدین انگه بېگانه لیک کېره ک.

کنج قناعت ارچه ابرور سلطنت و لپک
 ابلدین طمعنی اوزگه‌لی مردانه‌لیق کپره‌ک.
 کیم عشق اسیری اؤلسه‌که، ممکن اېمس وصال
 درد و بلاغه همدم و همخانه‌لیق کپره‌ک.
 لذاتِ نفس ترکی ثمر عافیت بېرور،
 لپک اول شجرنی اېککه‌لی فرزانه‌لیق کپره‌ک.
 تجرید نوریدین کیشی کؤز یاروته‌ی دېسه،
 احباب هجری شمعینه پروانه‌لیق کپره‌ک.
 گر انجمنی دېسه مرید و مطیع اېته‌ی،
 کؤپ نکته و فسانه‌ده افسانه‌لیق کپره‌ک.
 باطن حریمیده تیله‌سه مخزنِ حضور،
 ظاهر اویی اساسیغه ویرانه‌لیق کپره‌ک.
 ظاهر یوزیدین ار تیله‌سه تاج و عزّ و جاه،
 درد و بلا محیطیغه دردانه‌لیق کپره‌ک.
 دېسنگ خلاص اؤله‌ی باریسیدین نوایی دېک،
 بېخودلوغ و می ایچمگ و دېوانه‌لیق کپره‌ک.

۷

قناعت نقشی نینگ افشاسی و نقشبنديه طریقی نینگ اداسی

قناعت طریقیغه کیر، ای کؤنگول،
 که ختم اؤلغه‌ی آیینِ عزت سنگه.
 دېسنگ شاه اؤله‌ی یېر و کؤک بس دورور،
 بو بیر تخت و اول چترِ رفعت سنگه.
 فنا شعله‌سیده یاشور جسمنی،

كېرەك بۇلسە زربەت خلعت سىنگە.
 يېتەر لالە بوتكن قيا قىلەسى،
 مراد اۋلسە گلگون حشمت سىنگە.
 ابرور بس اريغ نكتە و قان ياشينگ،
 در و لعلدين زېب و زينت سىنگە.
 دېسنگ خلوتيم انجمن بۇلمە سون،
 كېرەك انجمن ايچرە خلوت سىنگە.
 وطن ايچرە ساكن بۇلوب ساير اۋل،
 سفردين اگر بۇلسە محنت سىنگە.
 نظرنى قىلدىن ييراق سالمە غيل،
 بو يۇل عزمى گر بۇلسە رغبەت سىنگە.
 دىنگىلدىن ييراق توتمە غيل هوشنى،
 كە يوزلنمە گەي هر دم آفت سىنگە.
 بو تۇرت ايش بيلە ربع مسكون ارا،
 چلنماق نې تانگ كوس دولت سىنگە.
 بو آھنگ ايلە بۇلغەسپن نقشبند،
 نوايى، اگر يېتسە نوبت سىنگە.

۸

توكل صفتى و بې توكللر مذمتى

توكلنى اول كيم قۇيوب، خاطريغە
 توشر شاھ آلىندە قوللوق ھواسى،
 نصيبي انىنگ بىر اياق آش ابرور بس،
 اگر گنج قارون ابرور مدعاسى.

بیرو کیم بؤلور بیر ایاق آش اوچون قول،
یوزیگه کپره کتور قزان نینگ قراسی.

۹

مخلوق ملازمتیدین تنفیر و غیر حق ملازمتیدین تحذیر

کیم که مخلوق خدمتیغه کمر
چست اېتر، یخشیراق اوشلسه بېلی.
قؤل قاووش تورغوچه بو اولی دور
که انینگ چیقسه اېگنی، سینسه اېلی.
چون خوش آمد دېمکنی باشلسه کاش
کیم توتولسه دمی، کپسیلسه تیلی.

۱۰

کمال کسبیگه دلالت و نقصانیدین اظهارِ ملالت

کمال اېت کسب کیم، عالم اوییدین
سنگه فرض اولمه غای غمناک چیقماق.
جهانیدین ناتمام اؤتمک بعینه،
اېرور حمامدین ناپاک چیقماق.

۱۱

جبهه چینی نینگ منعی که عارض گلی نینگ خاری دور و مراد یوزی نینگ غباری

بيرو كيم جبهه سیده چين ابرور توتە آلمس
مراد شاهدی نینگ ساعدینی کامی بیلە
اگرچه فنیده صاحب کمال ابرور صیاد،
قچان بلیغ توتە آغەى سو موجی دامی بیلە.

۱۲

سۆزگە قولاق سالماق و آغیز آچمه ماق، گوهرنى تېرىب، اۆز گوهرين ساچمه ماق

قولاقده ابرسه گرانمايه سۆزنى و فکر ايت
كه دُرسيز اؤلسه، نې بۇلغوسى دور صدف حالى.
سۆزونگنى داغى كۆنگول ايچره اسره غيل كيم، حيف
كيم اؤيله درجنى گوهردين ايتكه سېن خالى.
بو درج و ايكي صدف نى تۆله دُر ايتكنگە،
زھى عُلو گوهر، بلكه گوهرِ عالي.

۱۳

هدايت اھليغە حوادث آسيب يېتكوره آلمسده و نوائب ضرر يېتكوره آلمسده

نې رھروې كه تاج هدايت باشيده دور،
يۇق باك انگه حوادثِ افلاك تاشيدين،
هدهد كه قۇيديلر ازلي تاج باشيغە،
توشكى مو ژاله ياغقن ايله تاجى باشيدين.

۱۴

زاهدِ ریاىی کۈنگلیدین ملامت اهللى کینی رشتەسین اوزمگ و سلامت یۈلین کۈرگوزمک

کۈرسنگ، ای زاهد، مُقامِ روش قلندر پېشەیی،
بۈلمە کۈپ مشغول و دنیا شغلیدین قیل اجتناب.
دانه اۋینب و جهین ایثار اېتسنگ اندین یخشی کیم،
ابورروب تسبیح و یارماق سودین اېتکەیسپن حساب.

۱۵

بد اصل اېلگە ملایمتدین احتراز کوسین اورماق و ادبار اهللى صحبتیدین اجتناب قیلماق

یوزیگە اصلی یامان نینگ کۈپ آچمە گلشنِ خُلق،
سیه گلیمگە البتّه مهر آیلەمە فاش
که قیلەدی گل ایسی بیرلە تازە روح جُعَل،
قویاش چراغیغە پروانە بۈلمەدی خفاش.

۱۶

دشمندین تحذیر قیلماق کیم، بیمی بۈلغەی، خصوصاً کیم اول دشمنِ قدیمی بۈلغەی

چو دشمن اۋلدى قدیمی زیانیدین حذر اېت،
اگرچه نطقِ روانبخشی جانغە راحت اېرور.
سو بیرلە اۋت ارا ضدیت اۋلدى چون ازلي،
اگر حیات سویی دور که، اۋتقە آفت اېرور.

۱۷

وقار ترغىيىدە كىم، قافى قىر قافىدىن نىشانە دور و اول قاف دولت عنقاسىغە آشيانە

وقار گوهرى و حلم معدنى بۇلە كۆر،
دېسنگ كە، قىلغەى اطاعت سىنگە گدا بىلە شاه.
بو شېوہ تاغده ظاهر دورور كە، دوراندىن
قچان كە تفرقه يېتتى، اولوسقه بۇلدى پناہ.

۱۸

توزلوك ارتكايىدە و اپگرىلىك اجتنايىدە

بىيك مقامىغە اول كىم تىلر ثبات، كېرەك
كە اپگرىلىكنى قۇيۇب، توزلوك ايلەسە قانون.
توز اۇلسە سايەسىدە ابل تىنىب منار كېبى،
سېھر اويىدە تورر قرنلر نېچوك كە ستون.
گر اپگرى دور ياغىيان اؤق و باغله نىنب بۇينى،
بۇلر قبق يىغاچى دېك بېش - اۋنچە كنده نگون.

۱۹

راستلىق صفتى و راسترولر كرامتى

خرامان سوده سايىر بۇلماق و اوچماق هوا اوزره
عجب اېرمس، قچان كىم راستروليق قىلسە آزاده.
شعار ايلب بو ايشنى كېمە تىرى، كۆر كە سو اوزره
خرام ايلب هواغە بادباندىن سالدى سجادە.

۲۰

تزوير اشكى شقاوت دانهسى و نادان ياهوسى ادبار نشانهسى دور

پاكلر جانى بۇلور آزرده تزوير اشكيدىن،
كۆز و رخسارى نېچوك كيم، زنگ توتقهى نم بيله.
راستلر كۈنگلىنى ايلر تيره نادان ياهودىن،
شمعننى اول نوع كيم، جاهل اوچورگهى دم بيله.

۲۱

نهاني سخاوتده كوشش آثارى و انينگ جلوه سيدة نكوهش اظهارى

سخى اول دوركه، نوعى بذل قيلغهى،
اگر خود سفره ايچره بۇلسه نانى.
كيم اول چادر كۈمكچى دېك يېتيشكهى
گدا اوييگه كۈزلردىن نهاني.
فلك دېك يۇق كه، اول جلوه بېرگهى
قوياش نينگ قرصى دېك عالمغه آنى.

۲۲

تكلف اهلى نينگ دنياغه شېفته ليغيده و دنياليك كه فريفته ليغيده

تۈننى زربفت ايله بان خفتدين اوچقان هر طرف،
يۇق عجب گر بار اېسه دنيا متاعى كام انگه.

اول چيپين كيم، كۆزگە آلتون يىنگليغ اېشنر خلعتى،
كۆپرەگى بىل كيم، نجاست اوزره دور آرام انگه.

۲۳

آز سۆز دېمك نىنگ منفعيتده و كۆپ سۆزنىنگ مضرتيده

نوايى، تىلنىنگ اسره غيل زىنهار،
دېسنگ كيم، يېمەي دهر ايشيدىن فسوس.
نظر قيل كه، اوق آغزى تىلسيز اوچون،
قيلور تاجورلر بيله دست بوس.
نېچە تاجور دور كېسرلر باشين،
چو هنگامسيز نغمه تارتر خروس.

۲۴

هندو تربيتيده كيم حديث مضمونى بيله بې تخلف دور و خلاف قيلغانغه بهرەيى تأسف

ايسىغ نفس بيلن هندوغه تربيت قيلسنگ،
خصالى هريان اولور جهل توسنين سورمك.
كؤميرنى اؤتقە ساليب لعل آتشرين اېتسنگ،
نتيجه بؤلغەي انگه قیده توشسه كويدورمك.

۲۵

لئيمغه تعظيم اؤز- اؤزىگه رنج عظيم دور، بلكه عذاب اليم

لئيم فرقيغه اقبال تاجيني قويماق
يقين كه، بولغوسيدور موجب عذابى انينگ.
نطقچى باشيغه شونقار توماغهسى تانگ اېمس
كه بولغوسى سبب رنج و اضطرابى انينگ.

۲۶

عالي شأن اېل كيچيك ياشليغ اېكنده هم عالم آراى دور و آى بير كېچه ليكده انگشت نماى

بيك مقامليغ اېل طفل اېكنده هم بولمس
كه تيره قيلغهى انى جهل و ظلمت اهلى تىلى.
قمر چراغى اگر بولسه برچه بير كېچه ليك،
نې نوع اوچورگهى انى شب پرک قناتى يېلى.

۲۷

سखा و بخل بابيده نكته سورمك و ارالريده ايكي واسطه كېلتورمك

دېبان بېرگن كيشى اېر دور و لېكن
دېمهى بېرگنگه اېرليک بيل مسلم.
نې دېب، نې بېرسه بيلگيل آنى خاتون،
دېبان بېرمسنى خاتوندين دغى كم.

۲۸

عوام روزه سين بيان قيلماق و دهان بوسلر آچليغين عيان قيلماق

نې روزه بۇلغەي انگه كيم، آچوق بۇلوب آغزى،
 دمې كم اۆلمه غاي اندين كلام و هرزه كلام.
 غريراق بو كه، قيلغەي بهانە سنت
 كه شربت ايله گەي آشام ظاهر اۆلمه ي شام.
 نماز قيلمه غاي و قيلسه هم نماز ايچره
 تخيل ايله مه گەي غير لون- لون طعام.
 چيقيب نمازدين اۆلغەي طعام ايله مملو
 بو شرط بيرله كه بۇلغەي طعامي برچه حرام.
 دماغ تاپسه رطوبت بو نوع اطعمه دين
 گونس باش اورغوچه اويغانمه غاي كيشي ناكام.
 كۆزين چو آچتى ينه روزه ايله گەي نيت،
 اگرچه فاسد اپرور معدە و ثقييل اندام.
 بو طرفه كيم، تيله گەي بو قدر قباحت ايله
 كه روزه توتمغيني انگله غەي خواص و عوام.
 بو صوم ايله كه ملك آنى يازمه غاي جز فسق،
 زهى ملك وش صايم، زهى خجسته مقام.
 نوايا اپرور آرتوق بو ييمك- ايچمكدن
 ييلان اپتيني ييبان، زهرين ايله مك آشام.

۲۹

اچيغ سو كثرتيدن تنبيه و درياده چوچوك سوني انگه تشبيه قيلماق

اؤيله غرق مي دورورلر خلق بو دور ايچره كيم،
 شرع نينگ عين الحياتيدن اثر مفهوم اېمس.
 اول صفت كيم، بحر نينگ اچيق سويده بعضى اېل

تاپيلور دېرلر چوچوك سو هم ولې معلوم اېمس.

۳۰

پادشاه مقربى كيشيگه اېل حسد يېمك بو ايش نينگ دلپذير جهتين دېمك

شهغه مقرب اولسه بيرو برچه خيلدين،
اېل برچه دشمن اولسه انينگ بيرله وجهى بار.
كيم خيل و شاه عاشق و معشوق اېرور يقين
گلچهره يى كه عاشق انگه بولسه بېشمار.
اول برچه سيدين اولسه بيريسيگه ملتفت،
دشمن بولورده اوزگه لريگه نې اختيار.

۳۱

ايله نينگ هرزه سى انتباهيده و اېشك نينگ فريادى اكراهيمده

عمرين ايله كېچوروب غفلت ايله،
نكته اورنيغه كه تارتر خراس.
بیر اېشك دور كه تغافل يوزيدين
قيلغەى اظهار پياپى ارّاس.

۳۲

خوبلر وصلیغه مغرور بولماق و الرنينگ التفاتیغه مسرور

زمانه خوبلری نينگ وصالی شربتيدين،

نواييا، تيله بان كام كۆپ چوچوتمه مذاق.
كه هر پيالەسى ضمنیده كامینگ اېتكەى تلخ،
سېهر توتقوسیدور یوز تغارە زهر فراق.

۳۳

«النَّاسُ عَلَى دِينِ مُلُوكِهِمْ» حدیثی نینگ تفسیری

شه نینگ افعالی اېتر خیل و سپاهیغه اثر،
چون نبی دېدی كه: «النَّاسُ عَلَى دِينِ الْمُلُوكِ»
حكما هم دېدیلر شه نی تېنگیز، خیلی اریق،
اول اچیغ دور، بو اچیغ، اول چوچوك بۆلسه بو چوچوك.

۳۴

جواهر سېور سلاطین انکاریده و انینگ تاشقه مشابھتی اظهائیده

شها، اېل جوهر جانین چیقاردینگ،
جواهر حرصیدین بېداد اېتیب فاش.
چو اؤلگونگدور نی آسیغ تۆکمک آنی
مزارینگ اوزره انداق کیم، اوشاق تاش.

۳۵

اطفالنی قریلر خدمتیغه یۆلدهماق و چوچوك سۆز بیله الدهماق

قریلر خاطری نازک دور، ای طفل،

شكستيدىن قىلىپ وھم، اۋلەمە گستاخ.
اونوتتۇنگ مو كە، اطفال اۋىناغاندە،
سىنر آز ميل كۈرگندىن قوروق شاخ.

۳۶

اۋز طايغەدىن شكايەت و اېلگە يىخشىلىق قىلىپ يىمانلىق كۈرگن حكايەت

نې طالع دوركە، ھەر كىمنى دېسىم يار،
مىنگە اول عاقىبت بۇلور بد اندېش.
بيرو دورگرانى دېسىم كۈزۈمىسېن،
چېكر مژگان كېبى قىلىمغە يۈز نېش.

۳۷

اول بابدە كىم حسن قوشى اشك دانەسى بىلە صيد بۇلمىس و جان رشتەسى بىلە گرفتار قىد

اول طرفە قوش ھواسىدە كۈز تۈكتى دۇر اشك،
جان يايىدى رشتەسىن انگە ايلب ھواى قىد.
لېكن گر اينجو ساچسە كىشى دانە اۋرنىغە،
طاووسنى قچان قىلور اۋرگمچى دامى صيد.

۳۸

اول مضموندى كىم تكلفلوق تۇن موجب كلفت دور و بې تكلفلوق عدم الفت

كىيب سمور ايله كىش قىلمە اسرو رعنائىق،

ايپك لباس ايله توتمه غرور جامى تۇلا.
تيين نىنگ اۋز توكى-اۋق بۇلدى جانىغە آفت،
فريسه نىنگ پريدين كېلدى اۋز باشىغە بلا.

۳۹

لاجورددين رنگى كۆرمەگن كۆكىن توزمگ و اول كۆكتە رنگى كۆرگوزمك

شاھ سپەر قدر ابوبكر اول شېھى،
كىم، كۆك رواقى درگە قدرىغە طاق اپرور.
بو چرخ لاجورد اوزە خورشيد گۇيا،
كۆك بۇز تكاوريغە مذهب جناق اپرور.
بىر پارە لاجورد سىرى گويى انگلەدى
كىم بو ضعيف خستەغە كۆپ اشتياق اپرور.
حكم ايتتى بىر قولىغە كە تسليم ايله سون،
گۇيا وصولى اول كيشى آلىندە شاق اپرور.
يېردىن دېسە قازىب چىقرەي، يېر اپرور قتيق،
كۆك كانىدىن دېسە كە آلەي، كۆك يىراق اپرور.

۴۰

كوچ بىلە كولگودىن يىراق ساووقلوققە ياووغراق، ولې كوچ بىلە يىغلەماق اپرور اندىن
ساووغراق

حكمت اهلى آليده ساووق صفت يۇق كيمسەدە
صبح كاذب دېك مجلسيز ايله گان كولگو كېبى.

لېك موندين كڅپ ساووقدور اشك تۆكمك زور ايله
دى يېلیده قطره-قطره موز تامیزغان سو كېی.

۴۱

انانیت اویین بوزماق بابیده کیم فنا زاویه سین توزمک دور و اوزین کم قیلماقده اوزین
کؤزگوزمک

کیم که، اوزلوك عمارتین بوزدی،
بۆلدى نقدِ فنا ایننگ موزدی.
اول عمارتنی بوزمه یین سالک
بۆله آلمس بو نقدغه مالک.

۴۲

قناع وصفیده کیم «الْقَنَاعَةُ كَنْزٌ لَا يَفْنَى» مضمونی بیله عمل قیلور و هر نیچه نفع تاپسه
قناعت قیلمس

قناعت گوشه سین توتقیل که، چون عنقا بو دأب ایتتی،
انگه قوشلر ایچینده قرب قافیده نشیمن دور.
چو پرواری تاووغ نینگ آغزی تینمس طعمه دین گرچه،
اولر آخر انگه اول کتک زندانی مسکن دور.

۴۳

یوروشده آتلی ضعیفی تعریفیده کیم، معما ایچیده گی آت دېک پیدا اېمس اېردیلر

بو يوروشده ايكي اولاغيم بار،
لېك بارمېن سپاهيليقده يياق.
ايكي شطرنج آتى دېك بيريسى
كۆتره آلمه ي اؤز يېرىدىن اياق.
چاپسه شطرنج خانه سى خطيدىن،
سېكرىمكليك الرغه بېحد شاق.
بيرى رنگى قرا دورور، بيرى بؤز،
قرا يېر دور دغى و بؤز توفراق.

۴۴

اول امام باييده كيم، نماز قىلماقدين مقصودى جماعتدين اؤزنى ممتاز قىلماق اېردى

طرفه ايش كؤركيم، فلان هر وقت كيم، قىلغەي نماز،
انده بير ايش، غير نامشروع، ظاهر بؤلمه غاي.
گر قيام و گر قرأت، گر ركوع و گر سجود،
هر نې قىلغەي بيرى اؤز يېرىنده صادر بؤلمه غاي.
بؤلمه غاي حاضر جماعتقه ولى يالغوز دغى،
قىلمه غاي تا بير جماعت انده حاضر بؤلمه غاي.
با وجودى كيم، جماعت ايله گەيلر برچه هزل،
تا امامت قىلمه غاي آسوده خاطر بؤلمه غاي.

۴۵

طوس مزارلری بابیده کیم ویرانده گنج مدفونغه بلکه صدف ایچره در مکنونغه مشابه
دورلر

اولیاؤلله مزاری طوس ویرانی ارا
کۆپتورور، یوق باک اگر طوفیده کؤرسه کیمسه رنج.
مونچه کیم ویرانه کبزدیم گنج بیر هم یوق ابدی،
بؤیله ویران کیم کؤروپتور انده مدفون مونچه گنج.

۴۶

غلط بیتیر کاتب بابیده قلم سورمگ و قراسی نینگ غلطین یوزیگه کپلتورمک

فلان کاتب ار خطنی مونداق یازر،
بو منصبدین آنی قۇپارماق کپرهک.
یوزین نامهسی دپک قرا ایله بان،
قلم دپک باشین داغی یارماق کپرهک.
قرادین قراغه بېریان اولاق،
قلمرودین آنی چیقارماق کپرهک.

۴۷

کامل قلمزن سؤزیده کیم، تعریفی لازم کپلگهی که، قلم تیلین بیلور کیشی انی بیلگی

قبلة الکُتّاب کیم، دېرلر انی سلطان علی،
کیم قضا کلکی مثللیک خامهسی یازمس غلط.
قیسی قطعه منی که یازدی باردی اندین شعرلیک،

اېل سالورلر جزودانغه كيم، اېرور بير قطعه خط.

۴۸

همت بابيده كيم سرونينگ سرافرازليغيغه سبب دور و اريغ نينگ خاكسارليغيغه باعث

همت اهلي كه اېرور توزلوك ارا سرو كيبي،

دهر بوستانيده سرسبز دور و آزاده.

اول كه، سو ينگليغ اېرور پست نهاد و كجرو،

چېكيب افغان انكه تينمسليغ اېرور آماده.

۴۹

دلېسته ليغ منعیده کیم وصل نفعی جان تارتماق دور و هجر صرصری جان بېرمک

ای نوایی، کیشیگه بېرمه کؤنگول،

اگر اول حور دورور، یؤقسه پری،

وصلی نفعی بو كه، چېككه یسېن جان،

اؤلتورور، لېك فراقی ضرری.

۵۰

قلمی نينگ سيهكارليغی نينگ بېراھليغی و اؤزی نينگ سيهروليغی نينگ عذرخواھليغی

الهي، اول رقمي کيم، چېکيب دورور قلميم،

مِنْ الشَّرَارَةِ أَوْ غَيْرِهَا فَرَرْتُ لَدَيْكَ.

اگر خود اؤلسه مليح اجري رحمتينگ دور انينگ،

وَلَوْ يَكُونُ قَبِيحًا فَمِنْهُ تَوْبَتُ إِلَيْكَ.

www.ezgu.org

۱

صبحان الله خالق ذوالمجد و علا
كيم اندين ابرور توله خلا بيرله ملا.
گر مهر انينگ مثلى دېگه يلر عقلا،
مهر آليده ذره ينگليغ اولغهي مثلا.

۲

كوك پويه و سير ايله طلبگار سنگه،
كون سارغاريان عشقده بيمار سنگه.
آي داغ ايله قولوق ايلب اظهار سنگه،
تون انجمي نقديدين خريدار سنگه.

۳

يارب كه، عنايتينگني يار آيله منگه،
يؤقلوققه هدايتينگني بار آيله منگه.
هم كهف كفايتينگني دار آيله منگه.
هم دُرّ عنايتينگ نثار آيله منگه.

۴

شاهي كه فلک ساري چو ميل اولدي انگه،
كوز ظرفي ساچرغه نور كيل اولدي انگه.
افلاك شهى تابع و خيل اولدي انگه،
بلكيم، يبر و كوك خيل طفيل اولدي انگه.

۵

جانیمده غی جیم ایکی دالینگه فدا،
اندين سؤنگ الف تازه نهالینگه فدا،
نونی دغی عنبرین هلالینگه فدا،
قالغان ایکی نقطه ایکی خالینگه فدا.

۶

بو قاصد ایشیم آه و فغان ایله دیلا،
بو رقعہ تنیمنی ناتوان ایله دیلا،
بو صعب خبر ایچیمنی قان ایله دیلا،
بو قانلیغ ایچیم هلاک جان ایله دیلا.

۷

اویلنسه بیرو تاری اؤلوب نکبت انگه،
مکاره که، قلتبان سورر شهوت انگه.
زشت ابرسه گر ابلدین یاشورور رحمت انگه،
خوب ابرسه گر ابلگه کؤرگوزور لعنت انگه.

۸

کیم بؤلسه بو ماتمکده دېک عالم ارا،
سیر ایله سه غم سرشتلیک آدم ارا،
گر آدم ابرور بؤلسه کپره ک تور غم ارا،
عالمده اېسه، بؤلسه کپره ک ماتم ارا.

۹

عشقینگدە نېچە زار بۆلەي فرقت ارا،
يېتسم خوش ابرور بزمينگه بير عشرت ارا.
كۆز ايگي يوزونگدين آلمه سم صحبت ارا،
ايگي تبانينگدين اويله كيم خلوت ارا.

۱۰

نوش ايلر اېميش قدحني جانانه تۆله،
ساقى، منگه توت جام عارفانه تۆله.
قوى، گر خود ابرور سپهر پيمانه تۆله،
هر نېچه كه خالى اېتسم، اېت يانه تۆله.

۱۱

نامه نگ كه تيريكليگيمدين اول دور مطلوب
آچيب اوقوغچ بير نېچه لفظ مرغوب،
كۆپ تۇلغانيب اشك ايچره اوزومدين باردېم،
اول نوع كه، سو ايچيگه توشكى مکتوب.

۱۲

نامه نگ كه ابرور باعث اقبال و طرب،
يېتكورسه طرب مېن حزينغه نې عجب.
يالغوز مېندين كېترمه دى رنج و تعب،
كيم بۆلدى بسې خلق حياتيغه سبب.

۱۳

بیر عیبغه گرچه خلق قیلغه ی منسوب،
فقر اهلیدین اضطراب اہمستور محسوب،
صدق اہرسہ خود اہتمک کبرہک اؤز فعلینی خوب،
کذب اہرسہ، ملامت دغی بار دور مطلوب.

۱۴

سو کؤزگوسینی باغ ارا ایلردہ شتاب،
سیماب قیلور اہردی تحرک بیلہ تاب.
دی قیلدی بو سیمابنی انداق کؤزگو
کیم کؤزگو انینگ قاشیدہ بؤلغہ ی سیماب.

۱۵

وصلینگ بؤلوبان جانغہ میسر، یارب،
چہرہنگ قیلیان کؤزنی منور، یارب،
نطقونگ ساجییان بزمده گوہر، یارب،
یارب کہ، اجابت ایلہ گیل ہر «یارب».

۱۶

محبوب دورور گل و وصالی مطلوب،
کؤرمک انی گلبن اوزرہ بیلگیل محسوب،
بزم ایچرہ اوزوب کبتورگن اہرمس مرغوب،
اول نوع کہ مجلس ایچرہ اؤلگن محبوب.

۱۷

ای اول که سؤزونگ توشتی حبیب آلیده خوب،
مېندین یولیغە باشینگ قۇیوب، توفراغین اۇپ.
احبابغە ھم بیرین-بیرین خدمت اېتیب،
عرض ایله، نیاز ایله دعا کۇپتین-کۇپ.

۱۸

گردون اوزە بزم اوچون مقام ایله دی توت،
اول بزمده خورشیدنی جام ایله دی توت.
اول جام ایله عشرتنی مدام ایله دی توت،
آخر دمی یبر قویی خرام ایله دی توت.

۱۹

گر عاشق اېسنگ زېب و تکلّفنی اونوت،
یخشی و یامان ایشده تکلّفنی اونوت.
اؤتکن گر ابرور یامان تأسّفنی اونوت،
کېلگن گر ابرور یخشی تصرفنی اونوت.

۲۰

ای عشق، انینگ کوییده طوفِ حرم اېت،
بیزنی دغی اول طوفغه باشله، کرم اېت،
بیر دایره کویی تېگره سیده رقم اېت،
گر چیقسه ایاغیم رقمینگدین، قلم اېت.

۲۱

چون خنجر هجرینگ منگه قطع اېتتی حیات،
باری غم و دردینگ اوقینی تینمه یین آت
کیم آنچه قاوورسون پر اولوب بوتسه قنات،
طایر بولوبان یېتکه مېن آخر سنگه بات.

۲۲

بۇلدى مېنینگ اؤلگیمگه سودا باعث،
سوداغه هوای جام صهبا باعث.
صهباغه دغی دیر و چلیپا باعث،
بو برچه غه اول دلبر ترسا باعث.

۲۳

کؤنگلومنی آلیبدور اول شه سبز دواج،
کیم غمزه بیله آلور ممالکدین باج.
باشی اوزه مملکت خراجی بیر تاج،
تاجی اوزه گوهر ممالککه خراج.

۲۴

کوندوز کؤرسنگ اؤزونگنی محزون، قدح ایچ،
انداق که قویاش روشن و موزون قدح ایچ.
اول دم که، قویاش باتتی، شفق گون قدح ایچ،
جامینگنی قیلیب نېچوک که گردون، قدح ایچ.

۲۵

گل وقتی میسر اؤلسه گلفام قدح،
اندين سؤنگ توتسه بیر گل اندام قدح.
منع ایله سه برچه اهل اسلام قدح،
کافر مین اگر قیلمه سم آشام قدح.

۲۶

روحومغه که میدین اپردی هر لحظه فتوح،
ناصرح تیلی نیشی قیلدی آنی مجروح.
می لایینی مرهم قیله یین شام و صبح،
اول وقتقچه که تازه بؤلغه ی منگه روح.

۲۷

قؤرقوتمه مہنی تموغدین، ای زاهد یخ،
جنت منگه بؤلغوسی دیبان اورمه زنج
کیم دوزخ انینگ یادی بیله جنت ابرور،
جنت باری سپینگ بیله دور دوزخ.

۲۸

رخساری اوزه خالترین اول دلبند،
آچتی چو مہنی کؤردی بسی حاجتمند.
عیشیمغه یامان کؤز اہتمه گہی اہمدی گزند،
خاصه که اول اؤق بؤلوبتور اؤت اوزره سپند.

ياشيمغه بغير قانى چو اپردى مانند،
 كؤز اسره دى ياش دېك بؤلوب اندين خورسند.
 تورمه دى كؤزومده يېتكچ اول سرو بلند،
 بؤلمس كيشى فرزندى كيشيگه فرزند.

كؤنگلوم صيدى اوزوب اولوستين پيوند،
 سرگشته صفتليغ بيله اپردى خورسند.
 قلاب محبتينگ ينه سالدى كمند،
 صيدى كه اوزوب ابدى رسن، آيله دى بند.

اي شربت لعلينگ آب حيواندين الذ،
 حيوان سويىنى قؤى كه، چوچوك جاندين الذ.
 نې جاندين الذ، نې آب حيواندين الذ
 كيم هر نې كه يۇق، آندين الذ، آندين الذ.

بو دور تيله گيم كه اول كه، معبودونگ ابرور،
 توتقى سېنى اول يان كه، سېنينگ سودونگ ابرور.
 كؤنگلونگ كه يېتورگه ي اولچه بهبودونگ ابرور،
 ايلگينگ كه كېتورگه ي اولچه مقصودونگ ابرور.

۳۳

گل ذکرین اېشیتورمېن و یوق گلدین اثر،
 بو باغ اېشیگیدین ایسترم بهره نظر
 کیم تاپمه سه گل جمالیدین بهره نظر،
 بارې ایسیدین یېتسه دماغیمغه خبر.

۳۴

ساقی، بدنیمی ناتوان اېتتی خمار،
 کونگلو منی قدح دېک توله فان اېتتی خمار.
 هر عضوومه یوز رنج عیان اېتتی خمار،
 توتقیل قدحې که، قصد جان اېتتی خمار.

۳۵

ملک آچقه لی هر سرو عالی مقدار،
 انصاف و عدالت و صلاح اېتسه شعار.
 فتح اولغهی آنینگ عنایتی آخر کار،
 المِنَّةُ لِلَّهِ که، سنگه برچه سی بار.

۳۶

کوزوم اوچه دور، مگر که یاریم کپله دور،
 اېس هر دم آزر، مگر نگاریم کپله دور.
 یا بادیۀ فراق سیریده قیلیب،
 یوز مرحله قطع شهسواریم کپله دور.

۳۷

آشوب که اول کۆز طرفی ایلنه دور،
باغلبسپن و جان بو درددين اؤرتنه دور.
يا غایت اوسروكلوغيدین بولغنه دور،
اول مست کيبي که، بولغنور باغلنه دور.

۳۸

اغيار ايله جفت بېرمه فردیم بار
کیم فرقتی ضعفیده رخ زردیم بار.
گر دردیدین آه غصه پروردیم بار،
منع آيله مه، ای رفیق کیم، دردیم بار.

۳۹

هر لحظه کۆنگول غمینگده محزون بۆله دور،
محزونلیغی لحظه. لحظه افزون بۆله دور.
سودا انگه یوز آنچه که، مجنون بۆله دور،
یوز مونچه دېسم هم نې عجب چون بۆله دور.

۴۰

ای باد صبا، آيله سنگ اول ساری گزار،
جان بیرله کۆنگولنی تاپشورهی آغچ بار.
کۆنگولمنی ایتیگه طعمه قیلغیل زنهار،
جانیمنی دغی ایاغیغه آيله نثار.

۴۱

ای جسم، انینگ کویینی پیدا قیله کۆر،
ای کۆنگول، اوشول کویینی ماوا قیله کۆر.
ای کۆز، سېن آنینگ یوزین تماشا قیله کۆر،
ای اشک، آنینگ کویی ساری آقیله کۆر.

۴۲

اېلدين قاجيب اول كه، توتسه تاغ ايچره قرار،
ساووغده يېرى بو تاغ نینگ جوفيده غار.
ايسیغده مكانى انده كيم، ياتمیش قار،
عالم اېلى نینگ شھليغيدین بار انگه غار.

۴۳

اندين بېرى كيم، قاشيمده ياريم يۇقتور،
ھجرانیده جز ناله زاريم يۇقتور.
دشت اوزره قويون كېيى قراريم يۇقتور،
سرگشته ليگيمده اختياريم يۇقتور.

۴۴

هر گرم روى كه بۇلغھى اول كاشف راز،
مقصود حريمى سارى قيلغچ پرواز.
تانگ يۇق فلک اوزره ايله بان جلوۋ ناز،
نعلینی ملک كه بۇلسه محراب نماز.

٤٥

عالم بار اېمېش، نوایا، شور انگیز،
عالمده غی اېل باشتین-ایاغ رنگامیز.
عشق ایستر اېمېش سېنی عدم مصری سری،
بارغیل که، اېرور اېل تیله گن بیرده عزیز.

٤٦

احباب دېنگیز که، خان و ماندين طمع اوز،
نې خان و نې مان، کون و مکاندين طمع اوز.
نې کون و مکان، جان و جهاندين طمع اوز،
لېکن دېمگیز مونی که، آندین طمع اوز.

٤٧

جاندين سېنی کۆپ سپورمېن، ای عمر عزیز،
ساندين سېنی کۆپ سپورمېن، ای عمر عزیز.
هر نېنی که، سپومک اندین آرتوق بؤلْمس،
آندین سېنی کۆپ سپورمېن، ای عمر عزیز.

٤٨

لعلینگنی قیلیب نکته سرا، ای قاره کۆز،
عشق اهلی حیاتیغه یرا، ای قاره کۆز.
چېکمه ینه سورمه کۆز ارا، ای قاره کۆز،
اېل قانیغه قیلْمه کۆز قرا، ای قاره کۆز.

اول کۆز که دمې بۆلمه دی ساغ، ای قرا کۆز،
قانیمدین ایچر مدام ایاغ، ای قرا کۆز.
بیلمان که ابرور انکه قراغ، ای قرا کۆز،
یا مست ابدی قویدی تازه داغ، ای قرا کۆز.

جانبخش لبینگ چشمه حیوان مو اېمس؟!
هجریده آنینگ ایچیم تۆله قان مو اېمس؟!
هر قطره قان لعل بدخشان مو اېمس؟!
هر پاره لعلی جوهر جان مو اېمس?!

گر عاشق اېسنگ، مهر و وفا قیلمه هوس،
درد ایسته و دفعیغه دوا قیلمه هوس،
هجران و وصال مطلقا قیلمه هوس،
دلدارینگدین غیر رضا قیلمه هوس.

محبوبقه اعتماد قیلماق بۆلمس،
اندىن طلب مراد قیلماق بۆلمس.
کۆزنینگ قراسین مداد قیلماق بۆلمس،
گر بۆلسه بیتيگ سواد قیلماق بۆلمس.

۵۳

هم صومعه کنجی شیخ طرارغه بس،
هم شیخ یوزی زاهد هوشیارغه بس.
هم دیرده مستلیغ مهن زارغه بس،
هم مغبچه وصلی جان بیمارغه بس.

۵۴

تا صبح خروسی اویغانیب اوردی نفس،
خفاش قنات آچقوچه می فیلمه هوس،
چون ولوله چپکتی کوی ارا طبل عسس،
می ایچ انکه تېگرو کیم، ییتر صوت جرس.

۵۵

غربتده غریب شادمان بؤلمس اېمیش،
اېل انکه شفیق و مهربان بؤلمس اېمیش،
آلتون قفس ایچره گر قیزیل گل بوتسه،
بلبلغه تیکن دېک آشیان بؤلمس اېمیش.

۵۶

اول دُرّ ثمین که، بار اېدی کؤزومه یاش،
آیلرده اجل انکه جفا رسمینی فاش.
غم تیرناغیدین قیلیب قراغیمنی خراش،
یاشورغی اېدیم آنی کؤزوم اوئیده کاش.

۵۷

یۇق بادە وصل، آب حیوان اول اېمیش،
احباب ملاقاتی دېمه، جان اول اېمیش،
گردون غم و رنج صورتین نقش اېتسه،
جان چهرهسی اطرافیه هجران اول اېمیش.

۵۸

ییلر اؤتوبان شیخ مقالاتیغه گوش،
نې کؤنگلومه ذوق اېتتی، نې جانیمه حوش.
جانیمه نوا سالدی و کؤنگلومگه خروش،
بیر جرعە بیلە مغبچە بادە فروش.

۵۹

شریت منگه خوناب و غذا غم بؤلیمیش،
بستر توفراغ و آه همدم بؤلیمیش.
حالیمغه خلائق ایشی ماتم بؤلیمیش،
سېنسيز اؤلریم صعب اېدی، اول هم بؤلیمیش.

۶۰

ساقی، مېنی خار خار دین ایله خلاص،
گل-گل یوزونگ آچ، بهار دین ایله خلاص.
یا می بیر و انتظار دین ایله خلاص،
یا اؤلتوروبان خماردین ایله خلاص.

٦١

بېر جام و آل، ای مغبیچه، جانیمنی عوض،
قوش توتقیل و آل ایکی جهانیمنی عوض.
آنی سومورورده قطرهیی تامسه اگر،
سېن هم تۆک آنینگ اؤرنیده قانیمنی عوض.

٦٢

کیم ایستهسه سلطنت، سخا دور انکه شرط،
هر وعده که ایلهسه وفا دور انکه شرط.
کیم فقر طلب قیلسه، فنا دور انکه شرط،
آلیغه نې کیم کېلسه، رضا دور انکه شرط.

٦٣

بو دۆرده یوق سېن کېبی خوش خوان حافظ،
حُفاظ ارا سر حلقه دوران حافظ.
قرآغه سېن اؤلغان کېبی یکسان حافظ،
بؤلسون سنگه برچه ایشده قرآن حافظ.

٦٤

کیم ایلهسه ساقی گل اندام طمع،
ایلگیدین انینگ ساغر گلفام طمع.
اندین سؤنگ اگر تقوا و اسلام طمع،
ایلر ایسه، گل مردک ابرور خام طمع.

٦٥

اول دم كه قوياش ايله دى مغرب قه رجوع،
گر صحبت اوشول قوياش بيله تاپسه وقوع،
خوشتور قيلماق جام قوياشيغه شروع،
اول دمغه كيم، قيلور قوياش جامى طلوع.

٦٦

مغ ديريده دست بېرسه بير لحظه فراغ،
كيم مغبچه عشقيدين قيزيغ بولسه دماغ.
اول توتسه مغانه لحن ايله هر دم اياغ،
باش آلسم اياغيدين كېره ك باشيمه داغ.

٦٧

بير گل غميدين دېديم قوئيه بغريمه داغ،
بارگه ي مو دېبان عطري دماغيمه فراغ.
بارگين چو ملوث ايله دى بوم ايله زاغ،
اېمدي انى ايسله مك كه يوز حيف دماغ.

٦٨

بېردينگ منگه دير ارا اقامت، اى مغ،
توتونگ قدح مي ملامت، اى مغ.
بو ايشنى خود ايله دينگ كرامت، اى مغ،
يارب كه، هميشه بول سلامت، اى مغ.

٦٩

نامه‌نگ يېتېيان تاپتي كۈنگول عز و شرف،
هر لفظي بولوب مراد دريغه صدف.
هر سطري الم چيريگي نينگ دفعي اوچون،
اقبال سپاهيدين چېكيان بير صف.

٧٠

ساقى، بدنيمنى قىلدى غم تيجي شكاف،
قانىم بارى آقتى، توتمه اوزونگنى معاف.
توتقىل بدل مائتَحَلَل مى صاف،
تا مست قيله ي غم چيريگي بيرله مصاف.

٧١

يوز محنت و غم كۈنگلومه يېتكوردى فراق،
جانيمغه بلا و درد اوقين اوردى فراق.
جسميمنى فنا اوتيغه كويدوردى فراق،
چون كويدى، كوليني كوك كه ساووردى فراق.

٧٢

كۈنگلومنى غم و درد ايله قان ايلهدى عشق،
كۈز يوليدىن اول قاننى روان ايلهدى عشق.
هر قطره نى بيلمه ديم قه يان ايلهدى عشق،
بېدل اپكنيم بۇيله عيان ايلهدى عشق.

۷۳

اول دم كه قوياش باتتى و سرغردى شفق،
بزمينگه شفق گون مى ايله بير رونق.
نې حقنى اونوت، نې مېنى قۇيغىل مطلق
كىم تانگله ابرور تېنگرى كريم و بر حق.

۷۴

آلېمده طبيب چاره سازيم هم يۇق،
يانيمده رفيق دلنوازيم هم يۇق.
تېگره مده انيس جانگدازيم هم يۇق،
باشيمده شه بنده نوازيم هم يۇق.

۷۵

كىم كۆردى اپكين جهانده آيا خوشلوق،
تا بير كيشى ايله گهى تمنا خوشلوق.
يوز ييلده اگر بير اؤلسه پيدا خوشلوق،
آماده دورور ياننده يوز نا خوشلوق.

۷۶

هجرينگده مېنينگ صبريمه جز نقصان يۇق،
كۈنگلوم ارا غير ناله و افغان يۇق.
جانيمغه حيات اميدى خود امكان يۇق،
يۇق، يۇق، صبر يۇق، كۈنگول يۇق، جان يۇق.

۷۷

يۇق دھردە بىر بې سر و سامان مېن دېك،
اۋز حالىغە سرگىشتە و حيران مېن دېك.
غم كويىدە خان و مانى ويران مېن دېك،
يعنى كە، الاخان و الامان مېن دېك.

۷۸

بېرحم دورور عالم و ظالم افلاك،
بېرحم دورور انجم و دوران بېياك.
قى سرو چمن كە، جلوه قىلدى چالاك،
كىم بېرگە تۈكۈلمەدى نېچۈك كىم خاشاك.

۷۹

زاھد، سنگە حور، منگە جانانە كېرەك،
جنت سنگە بۇلسون، منگە ميخانە كېرەك.
ميخانە ارا ساقى و پيمانە كېرەك،
پيمانە نېچە بۇلسە تۇلە، يانە كېرەك.

۸۰

اي جان و كۈنگول، بىر-بىرىنگىزگە قارىشىنگ،
اول كوى سىرى رخىش تمنا يارىشىنگ.
حال اوستىدە اېركانىم سۈزىن اۋتكازىشىنگ،
حاليمنى سۈررغە كېلمەسە يالبارىشىنگ.

۸۱

اۋلسم يسه مەنگ موندە مزارىمنى مېنىڭ،
يوكلب اېلىتىڭ جىسم فگارىمنى مېنىڭ.
اۋترو چىقىرىپ اھل دىارىمنى مېنىڭ،
كويىدە قۇيۇڭ تەن نزارىمنى مېنىڭ.

۸۲

اى اول كە، زمانە اھلىدىن ايرىلدىڭ،
عشق اھلى طرىقى خۇب اېكانى بىلدىڭ.
خوش قىلدىڭ الر طورىنى و قاتىلدىڭ،
رحمت سىڭە، يىخى ايله دىڭ، خوش قىلدىڭ.

۸۳

كۈكسۈمنى جفا تىغى بىلە يارە قىلىڭ،
كۈنگلۈمنى چىقارىڭ داغى يۈز پارە قىلىڭ.
ھەر پارەسىنى بىر سارى آوارە قىلىڭ،
عشقىم اۋتىغە بو نوع ايله چارە قىلىڭ.

۸۴

گر دلبر اېمىس ملك وش و حور خصال،
اندىن سۇڭ اولوس نىڭ كۈزى كۈر و تىلى لال.
نې حسنىغە رۇيت و نې عشقىمغە مقال،
باللە مېن و عاشقلىق اېرور امر محال.

۸۵

بیر ساری سریغ پرلا و مېن توتساغ یؤل،
نې تاغ و نې توز، دېسنگ نې آباد و نې چؤل.
ییرتوق کپینکدین چیقریب یلنگ قؤل،
اول قاچسه و مېن قاوسم و مېن قاچسم و اول.

۸۶

تورمه ی مېن زار و ناتوان بیرله کؤنگول،
الفت توتمیش اول آستان بیرله کؤنگول.
یارې که منگه جان اېدی هم عزم اېتتی،
مېن موندە و خدمتینگده جان بیرله کؤنگول.

۸۷

عمرینگ قویاشیغه بېرمه سون چرخ زوال،
جانینگ قمرینی قیلمه سون دور هلال.
تون کون بؤلغیل مه روش و مهر خصال،
دهر اهلیغه نور بخش و فرخنده جمال.

۸۸

ای جانی حبیب و کؤنگلی احبابقه لال،
مېن هم قیلدیم جان و کؤنگولنی ارسال.
کؤنگلومگه بېر احباب بیلە جام وصال،
جانیم حبیب ایاغی توفراغیغه سال.

صد برگ، بنفشه، یوقسە نرگس، یا گل،
ایچمک بۆلمس بولر هواسی بیله مل.
تا هجر ییله‌دین اۆلدی آشفته دماغ،
یوز ناخنه کۆز ایچره و یوز پاره کۆنگول.

تاغ ایچره عجب شاه دور اول شیفته حال،
کیم تاپسه بولاغی سویی انداق که زلال.
باشی اوزه چتر سلطنت هر ینگى تال،
سو ایچکه‌لی جام عیشی بیر اېسکی سقال.

تا دهر دورور، دهر اوزه سلطان بۇلغیل،
تا عالم اېرور، عالم اوزه خان بۇلغیل.
دوران اېلی نینگ جسمیده هم جان بۇلغیل،
هم جانلریغه مایه درمان بۇلغیل.

مغ دیری سری بوگون تمنا قیلدیم،
اول مغېچه حسنینی تماشا قیلدیم.
دین نقدینی کفری بیرله سودا قیلدیم،
کیم قیلدی بو ایش کیم، مېن رسوا قیلدیم.

۹۳

ياشونغان اپميش قرا بولوتقه ماهيم،
گردوننى ساوورماغلىق اپرور دلخواهيم.
كيرميش قرا توفراققه قوياش دېك شاهيم،
نېوچون قرا قيلمه سون قوياشنى آهيم.

۹۴

جاهل كه حسد بۇلغەي اننگ جھليغە ضم،
نور ابل كۆزىدين انگلەسە اۆز كۆزىدە كم.
كۆزلرنى آليشماققە چېكىب تيغ ستم،
ابل كۆزىنى هم اويغەي و اۆز كۆزىنى هم.

۹۵

بحر و كېمەدين كۆنگولده كۆپتور الميم
كيم سېكرىمەين قدام، يوگورمەي قلميم.
مقصوددين آنچه سالدی بير دمده ييراق
كيم يوز ييل انى طى قيله آلمس قديم.

۹۶

غربت قە توشوب ضعيف و بېمار اۆلدوم،
درد و غم محنت ايلگيده زار اۆلدوم.
سرتاسر اجل تاشيدىن افگار اۆلدوم،
سېن سىز نې بلالرغە گرفتار اۆلدوم.

۹۷

عشق اهلې كه، منظوردين ايسترلر كام،
اول كام كېره ك كه، بير نظر بولسه تمام.
گر بولسه نظاره سیده اندیشه خام،
كوزلرغه نظر داغی حرام اولدی حرام.

۹۸

مسجدقه نهچه اهل ریادیک یېته یین،
یا رند کبې عزیمت دیر اېته یین.
مقصود تاپیلسه یخشی، یوقسه نېته یین،
باشیمنی آلیب قی ساری اېمدی کېته یین.

۹۹

جانیم ارا اؤت لعل سخندانینگ اوچون،
یوزوم اوزه کوكب مه تابانینگ اوچون.
كؤكسومده الف سرو خرامانینگ اوچون،
سؤزلب، یوز آچیب کهل بو طرف جانینگ اوچون.

۱۰۰

زلفونگ گرهیغه پای بست اولمیش مېن،
لعلینگ مییدین باده پرست اولمیش مېن.
اول مینی ایچیب یولونگده پست اولمیش مېن،
هی-هی، نې دېدیم، مگر كه مست اولمیش مېن.

۱۰۱

زاغې كه چوقوب آقیزدی قان كۈنگلومدين،
تيرناغ ايله اوزدی ناتوان كۈنگلومدين.
اعضاسيده كۈر اثر دميم دوديدين،
منقار ايله چنگيده نشان كۈنگلومدين.

۱۰۲

خوشتور بۇلسك، ايكاوله همدم سېن و مېن،
بیر-بیرگه دېسك، يېتۈشسە هر غم سېن و مېن.
بۇلسق بار اېسك حرمغه محرم سېن و مېن،
مغ دیری ارا بۇلسه وطن هم سېن و مېن.

۱۰۳

ای باد صبا، اگر هوا ايله گه سېن،
گلشنغه يېترنی مدعا ايله گه سېن.
سرو آليده يېر اۋپوب دعا ايله گه سېن،
گل قاشيده قوللوغوم ادا ايله گه سېن.

۱۰۴

مېن مېن و وصال اميديدين شاد اۋلغان،
بیر-بیر غم و اندوهدين آزاد اۋلغان.
آز-آزغينه بېرگن سایی گل عطری نسیم،
بلبل دېك ایشیم ناله و فرياد اۋلغان.

۱۰۵

عصیان توتونی بیرمه و چهره‌مگه امان،
اول نوع قرا قیلدی که، مؤریده سمان.
آق ایله‌مگینی مهن سیه رویِ یمان،
ایله‌ی آلمان عفو سویی بیرله گمان.

۱۰۶

عصیان ارا قالغان ابتلانی مو دبین؟
مأمور ایتکان نفسِ دغانی مو دبین؟
یؤق طاعت ایله کبر و ریانی مو دبین؟
یخشی دهمک اؤزنی بو بلانی مو دبین؟

۱۰۷

دیر ایچره تیلِب جامِ هلالی پرتو،
سجّاده گرو بؤلسه نې تانگ، ای رهرو،
چون مغیچه آلیده قیلور سجده بیرو،
یؤق عیب مصلاسی آنینگ میغه گرو.

۱۰۸

جانیمغه قیلور جور و جفا یار اسرو،
کیم یار ایچیده جور و جفا بار اسرو.
بؤلدوم چپکیبان جور و جفا زار اسرو،
مهن جورکش و یار جفا کار اسرو.

۱۰۹

گر قىلسە كىشى قىلىپ گناھى، توبە،
اول جرمغە بۇلسە عذر خواهى توبە.
قىلماق نېچە گاه جرم گاهى توبە،
بو جرم ايله توبەدين الهى توبە.

۱۱۰

نې يوزىنى غازە ايله مېش فرسودە،
نې كۆزىگە سورمە تارتىمېش بېھودە.
نې قاشىنى وسمە ايله مېش آلودە،
بو يوز و كۆز و قاشدين اېمان آسودە.

۱۱۱

نامەنگ منگە روحدىن نشان بۇلدى يىنە،
آسايىش جان ناتوان بۇلدى يىنە.
ھر حرفى انىنگ تىمىدە جان بۇلدى يىنە،
ھر لفظى حيات جاودان بۇلدى يىنە.

۱۱۲

چون لالە تۆكۈلدى، لالەگون جام ايچمە،
گل فصلى توگندى مي گلغام ايچمە.
جوزادە چو توتتى مهر آرام ايچمە،
كۆپ بۇلسە ضرورت اۆلمەيىن شام ايچمە.

۱۱۳

مغ دیریده بولسه منگه بیر کاشانه،
ملجاً داغی پیر دیردپک فرزانه.
می مغبچه توتسه هر زمان مستانه،
کافر بولهیین بولسه مرادیم یانه.

۱۱۴

هم جسمینگه ضعف بولسه جانیم صدقه،
هم جانینگه جسم ناتوانیم صدقه.
سروینگه شکست اولسه روانیم صدقه،
یوق-یوق که، سنگه جان و جهانیم صدقه.

۱۱۵

یا کاشف اسرار نهان بولسه کیشی،
حلال رموز آسمان بولسه کیشی.
یا عاشق زار ناتوان بولسه کیشی،
دبوانه و رسوای جهان بولسه کیشی.

۱۱۶

سپن خود بارهسپن کؤنگولنی قیترغیل، اخی،
ببدلیق اؤتیدین مبنی قوتقرغیل، اخی.
یا تیغ چپکیب توش-توشیدین یارغیل، اخی.
بیر پارهسینی بیزگه بیریبارغیل، اخی!

۱۱۷

سېن بارغەلى آرتمىش كۈنگۈل زارلىغى،
آه اۋقلىرىدىن ھەر نەفس افكارلىغى.
بىلەنمان اونوتولغان مو اېكن دور منگە ھجر،
يا كۈپرەك اپرور بو قتله دشوارلىغى.

۱۱۸

جانىمغە يېتىپ تورور خمار، اى ساقى،
مى توتقىل و بېرمە انتظار، اى ساقى.
اۋل اۋزىنگ ايله اختيار، اى ساقى،
توتقىل مېنگە سۈنگرە زىنھار، اى ساقى.

۱۱۹

آخردم عمر اېتسە شتاب، اى ساقى،
توتقىل منگە آنچه مى ناب، اى ساقى
كىم حشرده مست اۋلەى خراب، اى ساقى،
تا انگلەمەى اېتسەلر عذاب، اى ساقى.

۱۲۰

دېدىم ذقنىنگ توتوب، سقاغىنگى اۋپەى،
كۈز قاشىنگ گە سورتوبان قباغىنگى اۋپەى.
گل دېك يوزونگ ايسلەبان دوداغىنگى اۋپەى،
يۇق، يۇق- يۇق اگر دېسنگ، اياغىنگى اۋپەى.

۱۲۱

هر زلف خمیغه قیلمه وابسته مېنى،
هر کۆز هوسیدین اېتمه گیل خسته مېنى.
هر قاش طمعیغه سالمه پیوسته مېنى،
یارب، باریسیدین ایله وارسته مېنى.

۱۲۲

جانیمده خماردین عذاب، ای ساقی،
کۆنگلومده هم اندین اضطراب، ای ساقی.
یپتکور منگه جام می ناب، ای ساقی،
کیم حالیم ابرور اسرو خراب، ای ساقی.

۱۲۳

فرقت سحرى غمغه یؤلوقتوردی مېنى،
هجران کونی یوز بلاغه تاپشوردی مېنى.
غم شامی اؤلوم حالیغه یپتکوردی مېنى،
تانگ آتقوچه اویقوسیزلیغ اؤلتوردی مېنى.

۱۲۴

مونگلوغ باشیم آستیده غی تاشیمنی مو دبی؟
تاش اوستیده گی غریب باشیمنی مو دبی؟
حسرت سوییدین کؤزیمده یاشیمنی مو دبی؟
اؤلمکدین صعبراق معاشیمنی مو دبی؟

۱۲۵

نې دشت مخوف اېمېش فنا صحراسى،
كىم آندە كيررگە يۇق بلا ياراسى.
هرگز چو يانيب كېلمەدى نا پيداسى،
كىمدىن كىشى آيلەگەى نشان القاسى.

۱۲۶

اوّل منگە وصلې روح پرور نې اېدى،
سۈنگرە قىلماق ھجر ايلە مضطر نې اېدى.
دېسم بۇلر، اى شوخ ستمگر، نې اېدى،
دېر كيم، سېنگە نې، مېن بيلەين هر نې اېدى.

۱۲۷

كۆز بىرلە قاشىنگ يىخشى، قباغىنگ يىخشى،
يوز بىرلە سوزونگ يىخشى، دوداغىنگ يىخشى.
اېنگ بىرلە مېنگىنگ يىخشى، سقاغىنگ يىخشى،
بىر-بىر نې دېين، باشدين-اياغىنگ يىخشى.

۱۲۸

يارب كە، فنا بزمىدە خاص ايلە مېنى،
فقر اهليغە صاحب اختصاص ايلە مېنى.
يا داخل زمره خواص ايلە مېنى،
يا رنج عوامدين خلاص ايلە مېنى.

۱۲۹

تا دشت بهار بیرله رنگین بؤلغه‌ی،
گلزار نگار خانه چین بؤلغه‌ی.
دشت اوزره سېنگه سلطنت آیین بؤلغه‌ی،
گلزار ارا تخت اوستیده تسکین بؤلغه‌ی.

۱۳۰

تا چرخ وصالی کوییدین سوردی مېنی،
قتل ایله گه‌لی هجرغه تاپشوردی مېنی.
گر هجر اولوم حالیه یپتکوردی مېنی،
یار اپتکنی طعنه، لېک اولتوردی مېنی.

۱۳۱

هجرینگ سپهی زبر و زبر قیلدی مېنی،
غم کشوری ایچره در بدر قیلدی مېنی.
اندىن که بتر اېمس، بتر قیلدی مېنی،
جان آلوچه نی دبی که، نېلر قیلدی مېنی.

۱۳۲

نامه‌نگ که منگه مژده جانی اپردی،
هجران غمیدین خط امانی اپردی.
ظلمتقه سوادى گر نشانی اپردی،
مضمون انکه آب زندگانی اپردی.

۱۳۳

تیل سۆز بیلە تا قیزیتی ھنگامەمنی،
بیر ھم تیه آلمەدیم بو خود کامەمنی.
ھر نېچە ایتیکرک آیلەدیم خامەمنی،
اول خامە قاراق آیلەدی نامەمنی.

www.ezgu.org